

UTL AT DOWNSVIEW



D RANGE BAY SHLF POS ITEM C
39 12 06 12 14 008 8

BP al-Razi, Fakhr al-Din Muhammad
130 ibn 'Umar
.4 Sirr-i Kur'an
R319
1885

PLEASE DO NOT REMOVE
CARDS OR SLIPS FROM THIS POCKET

UNIVERSITY OF TORONTO LIBRARY



al-Rāzī, Fakhr al-Dīn
Muhammad ibn 'Umar

سیر قرائن

فخر رازی

مترجمی

سری کریدی

والی ولایت انقره

Sirri - Kurān
جلد اول

معارف نظارت جلیله سنک رخصتیه طبع اولمشدر

رخصتنامه نومروسی ۴۶۱


استانبول

مطبعة (۱. ق. ت.) اداره شرکت مرتبه باب عالی جاده سنده نومرو ۳۴

۱۳۰۲

۱۸۸۵

BP
130
.4
R 319
1885



مقدمه مترجم

شمدی به قدر عالم انسانیتی شرفلندیرن اعاضمک
 کافه سی، ظرف زمانه صیغمیان بونجه بدایع آثاری،
 مجرد نقد وقتی اضاعه واسراف ایتمامک کبی، بر حرکت
 مجدانه و تعالی پروزانه سایه سنده وجوده کتیر مشلدر .
 ایسته او اعاضمدن بریسی ده، میدان عرفانک یکه
 تازی، امام محمد فخرالدین رازی درکه، علوم وفنون
 شتاده وسعت احاطه جهتیه، مادرایامک مثلی طوغور مقدمه
 پک از سماحت کوستردیکی نوادر دندر .

امام جلیل مشارالیه تفسیر کبیر، عنوان واجب
 التوقیر یله مشتهر اولان کتاب نفیسه، حکمت تفسیری،
 او یله بر طرز بدیع دلنشین اوزره، زیور صحیفه بیان
 و تحریر ایتمشدرکه، آندن اول کان مفسرین عظامک هیچ
 بریسی، بو اسلوب خدا پسند عالیده خامه ران تحقیق
 اوله مامشدر . هله سورۀ شریفه ام الکتابک، حائر

اولدینگی مرتبه عالیّه اعجازی. ائمّه مفسرین ایچنده مهما
امکن اظهار و ابراز ایدن وارایسه اوده حضرت امام
محمد فخرالدین رازی در دیه بیلیرم .

مطالعّه کتب دینیّه رغبت وانهماکی ، تهالک
درجه سنده اولان محرر عاجزک ، بو دفعه سورّه کریمّه
مشارالیهایه متعلق تحریرات و تدقیقات حضرت امامی ،
ترکجه یه نقل و ترجمه کبی بر امر خطیری در عهده ایتمه سی ،
آرزوی افاده دن زیاده ، هوس استفاده دن منبعث ، بر اثر
میلان وجدان اولمه سیله ، بو حرکت جراثکارانیه سی ، اهل
علمک مظهر عفو و صفح جلیل عالیجنابا نه سی اولور
امیدنده ایم .

ترجمه سالف الذکرایله مشغول اولدینغم لیال تنهایی ده ،
کاه و بیگاه ، مصادف ظلام تردد و اشتباه اولدقچه ، در حال
قارشیمده تجلی یه باشلایان ، نور نظر فیض اثر حضرت
خلاقیناهی ، امین وحی آلهی کبی ، بکا ارائه منهای هدی ،
و حل رموز معنی ایدر ایدی .

اشبه تجلیات قدسی آثار، کشف راه صوابه مدار
اوله رق تحریر مرادده خامه، مثال آب روان، جداول
سطورده آقار کیدردی .

« سر قرآن » تسمیه ایتدیکم بو ترجمه دل آرای
مطبوع که اوچ جزء مستقل ایچنده مجموع در . بلطفه
السبحانی، مشمول لحاظه حکمت افاضه حضرت عبد
الحمید خانی { اولورسه شبهه یوق که نقصانی کماله مبدل ،
وشرف موضوعی نسبتنده حقیقه مبجل اولور .

همان جناب حق شیرازه بند کتاب اکوان، نسخه
کبرای ذات پاک ظل الهمیلرینی الی الابد سریر آرای
شوکت و شان و قبله کاه حاجتمندان جهان بیورسون آمین
والحمد رب العالمین والصلوة والسلام علی سیدنا ونبینا
محمد وعلی آله وصحبه الطیبین الطاهرین اجمعین وبالله
التوفیق .

سری کریدی

انقره ۱۳۰۲

بِسْمِ اللَّهِ الرَّحْمَنِ الرَّحِيمِ

مقدمه

سُرِّ قُرْآن

فصل اول

سورة فاتحه نك متضمن اولديغي علومى على سبيلى الاجالى بيان ايدر

سورة شريفة فاتحه الكتابك فوائد و نفاائسندن اون بيك مسأله استنباطى ممكن اولديغي نفايسه بر اراق ديمش بولندم . بعض حساد ايله بعض اهل جهل و عناد ايسه بوسوزمى جداً استبعاد ايلديلر . بن ده وقتاكه شوكتابى تصنيفه باشلادم . اولجه ديمش بولنديم سوزك ممكن الحصول ، قريب الوصول بر امر اولديغى كوسترمك ايجون اشبو مقدمه يي تقديم ايلدم . ايمدى مستنداً بتوفيق الله تعالى ديرزكه :

« اعوذ بالله من الشيطان الرجيم »

قولمزدن مراد ، شبهه يوق كه كانه منهيات و محظوراتدن استعاذه در . وينه شبهه يوق كه منهيات يا اعتقادات ، يا خود اعمال جوارح بابندندر . اعتقاداته كلنجه : خبر مشهورده وارد اولمش كه

رسول اکرم صلی الله علیه وسلم افندمن حضرت تبری «قرب
العهدده اتم یتش اوج فرقه یه آریله جقدر. بو فرقه لک بر دانه.
سندن ماعداسی ناردده درلر.» بیورمشلردر.

بو حدیث شریف نبوی ایسه فرق مذکوردهن یتش
ایکینسک عقائد فاسده و مذاهب باطله ایله موصوف اولدقلرینه
دلالت ایدر.

قالدی که فرق ضالّه مذکوردهن هر بریسک ضالالی ده یالکر
بر مسأله یه مخصوص و منحصر دکلدرد.

هر فرقه نک ضالالی الله ذو الجلالک ذاته، صفاته، احکامنه
افعالنه، اسماسنه، متعلق مباحت ایله جبره، قدره، تعدیله،
تجویزه، ثوابه، معاده، وعده، وعیده، استایه، احکامه، امامته
متعلق نیجه مسائلک ضمتنده حاصلدر.

ایمدی اشبو یتش ایکی فرقه ضالهنک عددینی شو مسائل
کثیریه توزیع ایتدیکمزده عدد حاصل. بر مبلغ عظیمه بالغ اولور.
بونلرک هپسی ایسه امت اسلامییه فرقه لرنده حاصل اولان ضالا.
لاتک انواعیدر.

قالدی که بو امت مرحومه دن خارج اولان اهل ضلال فرقه
لرینک عددی ده یدی یوزه قریب اولدینی مشهوردر.

ایمدی بونلرک ده الهیاته، احکام ذوات و صفاته، متعلق کافه
مسائل عقلیه ده کی انواع ضاللری فرق ضالّه اسلامییه نک موجود
اولان انواع ضاللرینه ضم اولنورسه، ضلالات واقعه نک مجموعی
عددجه حقیقه بر مبلغ عظیمه بالغ اولور.

«اعوذ بالله» قولزك ايسه شبهه يوق كه شو ذكر اولنان
ضالاتك جميع انواعندن استعاضه شتولى واردر.
حالبو كه مستعاض منهى و آنك قبح و بطلاننى بيلكسزين آندن
استعاضه ممكن اوله ماز. ايشته شو طريق ايله ظاهر اولور كه
«اعوذ بالله» قولز مسائل حقيقه يقينه دن بيلكلرجه مسأله يي
مشتلدر.

اعمال باطله يه كنجه : معلومدر كه عمل باطل ، ديه قرآنده ،
يا اخبار متواترده . يا اخبار آحادده . يا اجماع امتده و يا خود
قياسات صحيحده كنديسندن نهى . وارد اولان هر شئه دنير .
اشبو منهيات ايسه شبهه يوق كه بيلكلرجه عددن زياده اولوب
بونلر كنده جمله سنه «اعوذ بالله» قولزك شتولى دركاردر .
ايشته شو طريق ايله ده مستبان اولور كه يالكز «اعوذ بالله»
قولز مسائل مهمه معتبردن اون بيك ، يا اندن زياده و يا اكسك
مسأله يي مشتلدر .

قوله جل جلاله «بسم الله الرحمن الرحيم»

بونده ايكي نوع بحث واردر .

نوع اول — عند العلما مشتهر اولبشدر كه الله تعالى و تقدس
حضر تلرينك اسمائ مقدسه مطهردن بيك بر اسمي واردر .
و بو اسمائ حسنى ، كتاب و سنتده موجوددر .

اسمائ مذكور دنك هر برندن بحث ايسه شبهه يوق كه باشلى
باشنه برر مسأله شريفه عاليه در . برده بديهيدير كه مستي بيلندچه
اسم بيانهمز .

شو مسمياتك ثبوتندن، و ثبوتنه دال اولان دلائلن، و
 نقی حقه مذکور اولان شبهاتك اجوبه سندن بجده دخی
 مسائل کثیره واردرکه بونلرک عندالحساب عددلری بیکلری کچر.
 نوع ثانی — « بسم الله » دهکی با، بای الصاقدرکه فعله متعلقدر.
 (بسم الله اشرع فی اداء الطاعات) تقدیرنده درکه معناسی
 « اللهم اسم شریفیه اداى طاعاته شروع ایدرم. » دیمکدر.
 حالبوکه اقسام طاعاته واقف اولمدقچه بو معنی ملخص و معلوم
 اوله ماز.

اقسام طاعات دخی عقائد حقه و اعمال صافیه دیمکدرکه شو
 معنائك ملخص و معلوم اوله بیلسی اول امرده بونلرک دلائل و
 بیناتیه، و شبهاتندن و یریلان اجوبه ایله برابر جمله سنی بیلسکه
 متوقفدر. بونک یکونی ایسه محققدرکه اون بیک مسأله دن
 زیاده ده وارر.

استعاذه نك بسم الله شریفه اوزرینه تقدیمنده بر سر وارکه آتی
 فخر المفسرین حضرت امام فخر رازی لطائف جلیله دن اولمق اوزره
 بروجه آتی بیان بیوررلر. دیورلرکه: « اعوذ بالله » قولی عقائد
 و اعمالدن مالاینبغی نیقیه، « بسم الله » قول شریفی ده اعتقادات
 و عملیاتدن ماینبغی بی اثباته اشارتدر [تحلیه بعد التحلیه]
 ایمدی عقائد حقه ایله اعمال صافیه نك کافه سنه کسب و قوف
 ایلکسزین « بسم الله » نه در یلنمز.

بو بر ترتیدرکه حخته عقل صحیح . وحق صریح شهادت ایدر .
 قوله جل جلاله « الحمد لله »

معلوم اولسون که حمد انجق نعمته اولور . نعمته حمد ایه
 او نعمتی بیکسزین ممکن اوله ماز . شوقدرکه (وان تعدوا نعمته
 الله لا تحصوها) نص جلیلی حکمنجه نعم جلیله الهیه نک اقسامی
 تحدید و احصادن خارجدر .

او جهته الله حدسز ، نهایتسز نعمتلرندن یالکر برینی
 مثال اوله رق موضوع بحث ایدلم .

شوبله که : هر شخص عاقل کندی ذاتندن عبرت المق لازم
 کلیر . زیرا انسان ، نفس و بدنن مرکبدر : فضیلت و منفعتجه
 شو جزئیئک ادونی ایه شبهه یوقدرکه بدنر ؛ اوله ایکن ینه
 ارباب فن تشریح . مصنوع دست قدرت اولان بدن انسانی تخلیق
 و ایجادده جناب حکیم متعال ، حکمت بالغه سبحانه سیله انواع
 منافع و مصالحدن بشیکه قریب ، منفعت و مصلحت تدبیر بیورمش
 اولدیغنی بالتدقیق بیان و اثبات ایتشلردر .

قالدی که کتب تشریحی مطالعه ایه شو منافع و مصالح مکشو .
 فیه واقف اولان ارباب فن و بصیرت بیلیرکه ، معلوم و مکشوف
 اولایان منافع و مصالحه نسبتله معلوم و مکشوف اولاننرک مقداری
 بحر محیطه نسبتله قطره مثابه سندهدر .

بو حالده ظاهر و اشکار اولورکه یالکر خلقت جهتیله جناب
 حکیم رحمانک بدن انسانده اظهار ایتدیکی اقسام حکمتک معرفتی
 اون بیک ، و بلکه دهها زیاده مسأله بی مشتملدر .

ایمدی بو حاصل جمع «عرش و کرسی بی ، اطباق سمواتی ، ثابت و سیار اجرام نیراتی ، یارتمه سنده ، و بواجرامدن هر برینی بر قدر مخصوص ایله بر لر لون مخصوص و غیر مخصوصه تخصیص بیورمه سنده کی اثار حکم الهیه ضم و علاوه اولنورسه ، و بو جمله یه ده جمادات و نباتات و حیواناتدن اولان امهات و مولداتی ؛ و بونلر ده اصناف اقسامی ، احوالی خلق و تکوینده کی اثار حکم الهیه قاتیلیرسه ، مسائل مجموعه نک یکونی ملیون راده سنه واره جغی معلوم اولور .

بوندن صکره شوراسیده خاطر دن دور اولسون که جناب خلاق لم یزل ، اشبو کائناتک اکثرینی انسانک نفع و فائده سی ایچون یراتمش اولدیغنه (و سخر لکم مافی السموات والارض) آیت احسان غایتیه تنبیه بیورمشدر که یرده کوکده نه وار ایسه انی خالق تعالی سزه مستخر قیلشدر دیمکدر ایمدی بو تقدیرده ظاهر اولور که « الحمد لله » قول شریفی ملیونلرجه مسأله بی مشتملدر .

قوله جل جلاله « رب العالمین »

معلوم اولسون که بوراده (رب) قولی مضاف ؛ (العالمین) قولی ده مضاف الیه واقع اولمشدر . حال بوکه متضایفین بیلمدیکه بر شیئک بر شیئه اضافتی بیلک متعذر . بو تقدیرده (رب) کیمدر (عالین) نه دن عبارتدر ؛ بورالری بیلتمکسزین الله ذو الجلاله رب العالمین اولدیغنی بیلک محالدر .

ایمدی « عالین » که عالمک صیغه الجمعیدر ؛ سوی الله هر

موجوددن عبارتدر . و بو موجوداتده اوج قسمدر . متحيزات .
مفارقات ، صفات .

متحيزات — يا بسائطدر ؛ يا مرکباتدر .

بساط — افلاك ، كواكب ، و امهاتدن عبارتدر .

مرکبات — مواليد ثلاثهدر .

بونكه برابر اجسامك اقسام ثلاثه مذكوره انحصارينه دائر
دليلزده يوقدر . زيرا دليل ايله ثابتدر كه خارج عالم . برخلاى
نامتاهى وارددر . وينه دليل ايله ثابتدر كه مولای متعال حضر .
تلى جميع ممكناته قادردر . بناء عليه صانع تعالى و تقدس
حضر تلى عالمك خارجنده هر برى بوعالمدين بيوك اولمق اوزره
مليونلرجه عوالمى خالق و ايجادده قادردر .

اسكى فيلسوفلرك « عالم واحددر » ديهرك وحدت عالمه دائر
ايراد ايتمش اولدقلى دلأله كلنجه : بو دليللرك هپسى بك ضعيف
بك ريك شيلر اولوب مقدمات واهيه مبنىدر .

قال ابو العلا المعرى

يا ايها الناس كم لله من فلك تحرى النجوم به و الشمس و القمر
هين على الله ماضينا و غابونا فما لنا من نواحي غيره خطر

متحيزانك ذكر اولان اقسامندن بحث ايسه ايله بر بحث
طويل الذيلدر كه مليونلرجه مسألهنى مشتل ايدوكى معلومدر .

بو بحث عميقت ختمدهكى مسأله نصل حد و غايت تعيين
اولنه بيلير كه انسان بالفرض ايشنى كوچنى ، الحاصل هر شئى

بر یکا بر اقسه ده یالکز ارحام جبالده کی فلز اتدن متولد اولان عجایب معادن، اصجار صافیه یی، کبریتلرک، زرنخلرک، طوزلرک، انواعی علی وجه الاحاطه بیلک اراده ایتسه، وازهار و انوار و ثمار یله برابر عجائب احوال نباتی، و بهائم و وحوش و طیور و حشراتدن عجائب اقسام حیواناتی او کر نمک ایسته سه شبهه سز شو مطالبک اقل قلیانی بیه استحصاله موفق اولمقسزین، و هیچ برینک غورینه وارمقسزین عمری بتر توکنیر! ! نته کم حق سبحانه و تعالی قرآن کریمده (ولو ان مافی الارض من شجرة اقلام و البحر یمد من بعده سبعة ابحر ما نفدت کلمات الله) آیت جلیله سیله آثار قدرت الهیه سنی احاطه ده کی عجز مزنی بیلدیر مشدر.

اشبو مسائل ایسه تامیه «رب العالمین» قول کریمی تحتده داخلدر.

قوله تعالی «الرحمن الرحیم»

معلوم اولسون که «رحمت» انواع آفاتدن تخلص، و احباب حاجاته ایصال خیر اتدن عبارتدر.

اقسام آفاتدن تخلص بجهت کلجه: بدیدر که اقسام آفاتی بیلدیکه اندن تخلصک یولیده بیلنه مز. آفاتک اقسامی ایسه اولقدر چوقدر که عدد و مقدارینی اللهدن بشقه سی بیلز.

اقسام آفاتک بر جزء قلیله واقف اولمق ایستیان، کتب طبی مطالعه ایتسون. تاکه بدن انسانک اعضاسندن، اجزاسندن هر برنده تولدی ممکن اوله بیلن اسقام و امراضی اکلاسون. آندن صکرده الله تعالی و تقدس حضرتلری کرک معادنن، و

كرك نبات وحيواندن انسانه غذا، و درده دوا اوله بيله جك
شيلري بولغه و بيلكه عقول خلقه نصل هدايت احسان بيورمش
اولديغني دوشونسون. انسان ايسه ايجه فكر و تأمل ايدنجه بو
باب حكمت مأبك بي بحر بي پايان اولديغنه بالداهه حكم ايلر.

جالينوس حكيم، حكايه ايتمش كه: «منافع اعضاء العين»
حقنده بر كتاب تصنيف ايتشدم. فقط دماغده كي بطين مقدمينك
غورندن بدا ايدر ك بري يميندن يساره. و ديكرى يساردن يمينه
طوغرى اوزايوب بر يرده بر اشدكدن صكره صاغده كي صاغ،
صولده كي صول كوزه منتهى اولان ايجلارى بوش ايكي عصبي
ياراتمه سنده كي حكمت الهيه يي ناسه ايضاح و بيان ايتمه يي فصلسه
اسير كه مشدم. او ارالق عالم معناده كوردم كه كويا جانب آسماندى
روى زمينه بر ملك اينمش ده بكا خطاباً «اي جالينوس! اللهمك
سكا دييور كه بنم حكمتي عبادمه ايضاح و بيان ايتمه يي نچون
اسير كه دك؟» ديه ندا ايتمش؛ متعاقباً اويقودن اوياندى؛ و در حال
ذكر اولنان عصبين مجوقيني ياراتمه سنده كي حقا حكمتي ميين
اولقى اوزره بر كتاب مستقل تاليف ايتدم.

ينه حكيم مشار اليه دن منقولدر ديتمش كه
بر ارالق طحالم شيشمش ايدى، معالجات طيه دن بيلديكم
نه وار ايسه هپسنى استعمال ايتدم، فائده و يرمدى. صكره
هيكاده كوردم كه كويا آسماندى ير يوزينه بر ملك اينمش ده [ختصر

ایله بنصر آرد سنده کی طماردن قان آل! [دیه بکا امر ایتمش! (۱)
مترجم فقیر دیرکه :

«قن و علوم، تجربه و تصادف و الهامک نتیجه سیدر.»
دیدکلرینک صحتسه جالینوسدن مروی اولان شو حکایه دخی
شهادت ایدر. حتی ابو علی بن سینا ترجمه حالی کندوسی یازوب
نیجه مسائل مشککه بی رؤیاده حل ایتدیکی بیان ایتشدرد. (انتهی)
ایشته علم طبک اوائل حالنده علاماتنک اکثری بو مثللو
تنیهات و الهاماته منتهی اولور :

ایمدی انسان بو مثللو مباحث دقیقهیه واقف اولدقچه الله
تعالی و تقدس حضر تارینک عبادی حقنده کی اقسام رحمتی ضبط
واحصادن خارج اولدیغنی اکلار.

قوله جل جلاله «مالك يوم الدين»

معلوم اولسون که انسان بو دنیاده مسافر کی در. سنه لری
فرسخاره، آیلری میللره، نفسلری خطوله لره بکزر.
انسانک دنیایه کلکدن مقصدی ده بر عالم دیکره انتقال
و وصولدر. زیرا باقیات صالحاته فوز و ظفر بو عالم دنیاده میسر
اولور.

ایمدی انسانک اثنای راهده مصاف نظر امعانی اوله حق

(۱) هیکلدن مراد اسکی یونانیلرک بتخانه سیدر.

خنصر، خانک کسریله منتهای اصابع اولان کوچک پارمق.
بنصر، بانک کسریله منتهای اصابع اولان کوچک پارمقک یاننده کی
پارمق.

سو انواع عجائب ملکوت ارض و ستمایه نسبتله غبطه ده ، بهجتده
سعادته عالم آخرتک عجائب حالی فصل اولق لازم کله جگنی
فکر و ملاحظیه محتاج قالیر .

بوراسنی بالله دک یا ؟ ایمدی دیرزکه :

« مالک يوم الدين » قول شریفی معاذ ، حشر ، نشر ، مسا
ئلنه اشارتدر . مسائل مشارالیهها دخی ایکی قسمدر . بعضیلری
مسائل عقلیه محضه ، بعضیلری ده مسائل سمعیه در .

مسائل عقلیه محضه

« بو عالمی ییقوب یوق ایتک ، صکره برکره دها و ارایدوب
اولکی حالنه کتیرمک و انسانی اولدکن صکره تکرار دیرلتمک
مکندر . » کبی قولمز ، مسائل عقلیه محضه دندرکه بو باب الحق
جوهر نفسک حقیقتدن . واحوال و صفاتی ، و بعدالبدن بقاسی
کیفیتدن . و سعادت و شقاوتندن . والله تعالانک آنی اعادهیه
قدرتندن بحث ایله تمام اولور .

اشبو مباحث ایسه مسائل دقیقه عقلیه دن بشیوزده قریب
مسأله ایله الحق تمام اوله بیلیر .

مسائل سمعیه

بونلرده اوچ قسمدر .

قسم اول — قیام قیامتدن اولکی احوالدركه بو علاماتك بعضیسی صغیر ، بعضیسی کبیردر . و بونلرده قریباً ذکر ایدیه جکمز اون علامتدن عبارتدر .

قسم ثانی — قیام قیامتدهکی احوالدركه نفخ فی الصور ، موت خلائق ، تخریب سموات و کواکب . روحانیلرك جسمانیلرك موتی کیفیتدر .

قسم ثالث — قیام قیامتدن صکردهکی احوال ایله اهل موقفك شرح احوالیدركه بونلرك چوق اولوب « خلقك موقفده کیفیت و قوفی ایله بونلرك اوراده مشاهده ایدیه جکمری احوال ، ملائکه کرام و انبیای عظام علیهم السلامك موقفده کیفیت حضوری ، کیفیت حساب ، کیفیت وزن اعمال ، بر طاقك جنته ، دیگر طاقك جهنمه ذهابی ، اهل جنتك ، اهل نارك صفتلری : » هب بوجملهده داخل اولور .

اهل جنت و نارك . جنت و ناره وصولرندن صکردهکی حاللر . ینك شرحی ایله اوراده سویلشه جکمری کلماتك ، و مباشرت ایدیه جکمری اعمالك شرحی ده بو بایدن اولوب اشبو مسائل عقلیه و نقلیه نك مجموعی ایسه جائزه بیکلرله وارر . ایسته بونلركده هدیسی (مالک يوم الدين) قول شریفی تحتده داخلدر .

قوله تعالى «اياك نعبد و اياك نستعين»
 معلوم اولسونكه عبادت ، آمرى تعظيماً مأموره اولان
 اولان فعلی اتيان و اجرادن عبارتدر .

ایمدی « بو علمك بر الهی وارددرکه نهایتی اولمیان مقدوراته
 قادر . نهایتی اولمیان معلوماتی عالمدر ؛ کائنه حاجادن غنی در ؛
 عبادینه بعض شیر امر ایتش ؛ انلری بعض شیردن ده
 نمی بیورمشدر ؛ اکا اطاعت ، و تکالیفنه اتقیاد ایتك خلائق
 اوزرینه واجبدر . » ديه بورالری دلیل ایله ثابت اولمدجه « اياك
 نعبد » قولنك لوازميله قیام ممکن اوله ماز .

برده مقام مذکوردن بعد الفراغ ، او تکالیفك اقسامی
 تفصیل ، وشو اوامر ونواھینك انواعی و دینمزدہ تصنیف اولمش
 نه قدر فقه کتابی وار ایسه هپسنی بیان ایتك لازم کلیرکه بوبابده
 شریعت مطهره محمدیه ده کی تکالیف الهیه دن بشقه انبیای متقدمینك
 شرائع سابقه لرنده کی تکالیف الهیه ده ؛ الله ذو الحلالك ملائکه
 کرامی یارادالی ، و آنلره عبادات و طاعات ایله اشتغالی امر
 ایدملی دنبری کندیلرینی تبعیتیه مکلف و مأمور قیلدینی شرائع
 الهیه سی ده داخل اولور .

برده کتب فقه ، اعمال جوارحه متوجه اولان تکالیفك
 شرحنی ده مشتمل اولدیغندن ایش دها زیاده لشر .

اعمال قابوده موجود اولان تکالیفك اقسامی ایسه . اوته .
 کیلردن اکبر و اعظم و اجلددر . بونلرده مالی مختلفه ، و ائم متبا .
 ینهدن هر بریسنك حال و شاننه کوره تألیف اولمش اولان

اخلاق و سیاست کتابرینک مشغلاتندن عبارتدر .

انسان ایسه اشبو مباحثک مجموعنی پیش نظر اعتباره آلوده
بونلرک تمامیه «ایک نعد» قولى تحتده داخل اولدیغنی اکلا دیغنی
تقدیرده شبهه سز جزم و یقین حاصل ایدرکه اشبو آیت جلیله نک
مشمئل اولدیغنی مسائل شریفه عقول و افکارک الحق مقدار قلیله
ر هیاب و صول اوله بیلدیکی بر بحر محیط کبی در .

قوله جل جلاله «اهدنا الصراط المستقیم»

معلوم اولسون که بوقول کریم طلب هدایتندن عبارت اولوب
تحصیل هدایت ایچونده ایکی یول واردر .

برنجیسی — دلیل و جحتله ، ایکنجیسی — تصفیة باطن
و ریاضتله طلب معرفتدر .

طرق استدلاله کلنجه : استدلالک یوللری غیر متناهی در .
زیرا ذرات عالم اعلی و اسفلدن هیچ بر ذره یوق که صانع
تعالی و تقدس حضرتلرینک کمال الاهیتنه ، عزت عزتته ، جلال
صمدیتنه شاهد اولسون .

نته کیم شاعر دیمشدر .

و فی کل شیء له آیه تدل علی انه واحد

بونک تقریر و بیانی شو وجهله درکه اجسام عالم ، ماهیت
جسمیتده متساوی ایسه لرده صفاتده مختلفدرلر . هر جسمک
لونی ، مکانی ، حالی بشقه در . آیری آیری هر برینک کندی
صفت معینه سنه اختصاصی ده جسمیتدن ، یاخود لوازم جسمیتدن
ناشی اولمق مستحیلدر .

و الا حصول استوا لازم کایر .

بناء علیه هر جسمک کندیته مخصوص و معین اولان صفته
اختصاصی بر مخصصک تخصیصندن ، بر مدبرک تدبیرندن ناشی
اولق واجب اولور ، او مخصص دخی اگر جسم اولسه اکاده
کلام عودت ایدر و اگر جسم دکلسه فهو المطلوب .

صکره او موجود اگر (حاشا) حی ، علم ، قادر اولسه .
بلکه بونک اجسام کائناته تأثیری فیض و طبع طریقیله اولسه ینه
وجوب استوا حقنده کی الزام عودت ایدر . و اگر مخصص و مدبر
کائنات ، جسمک غیری اوله رق حیات ، علم ، قدرت صفتلریله
متصف بر موجود ایسه فهو المطلوب .

بوراسی معلومک اولدقده ذرات کائناتدن هر بریسی قادر ،
حکیم ، علیم بر آلهک وجودینه شاهد صادق ، و وحدانیت
سبحانیه سنی مخبر ناطق اولدینی ظاهر اولور .

پدرم (۱) شیخ امام ضیاء الدین عمر رحمة الله علیه دیردی که:
" هر بر جوهر فردده قدرت بالغه سبحانیه . و حکمت
و رحمت شامله ربانیه دلالت ایدر انواع دلائل غیر متاهیه
واردر . "

طوغریدر . چونکه هر بر جوهر فردک احیاز غیر متاهیه ده
علی سبیل البدل وقوعی بکن اولدینی کی کذلک صفات غیر
متاهیه ایله علی سبیل البدل اتصافیده ممکندر .

(۱) فخر الدین رازینک پدری .

او احوال مقدره‌دن هر بریسی ایسه بتقدیر الوقوع بر
صانع حکیم رحیم وجودینه افتقاره دلالت ایدر .

ایمدی بر نوع مباحث شریفه نهایت اولمدیغی بیانات
و ایضاحات واقعه‌مزه واصل درجه ثبوت اولمشدر .

ریاضت و تصفیه طریقاه استیصال هدایت مجتبه کلنجه :

بو یول ساحلسز بر دریادر .

سائر الی الله اولناردن هر بریسنگ منهج خاصی ، بر مشرب

معینی واردر . نتهکم مولای متعال « و لکل وجهه هو مولیها »

بیورمشدر . شو اسرار خفیه ایسه عقلار ایرمز . فہملمر ایسه

او انوارک میدانلرینک مبادیسندن بیله خبردار دکلردر . اهل

تحقیق اولان عارنلر بونده اولیلہ مباحث عمیقہ ، و اسرار دقیقہ

ملاحظہ بیورمشلرکہ چوق کیسه لک فہملمری . اودرجه عالیہ

یک از ترقی ایدہ یلشددر .



قوله جل جلاله « صراط الذین انعمت علیهم غیر المغضوب

علیهم ولا الضالین »

اشبو مقدماتدن اجل واعلی بر مقام ، بو مراتبدن اعظم

بر مرتبه اولہ‌ماز . بیانات واقعه‌مزه واقف اولان مرد بصیرہ ،

اشبو حالات شریفه‌نک مبادیسنه کسب اطلاع امکان پذیر اولور .

ایمدی محققدرکہ سبق ایدن بیان و ایضاح ایله اشبو سورہ

شریفه‌نک نہایتسز مباحثی ، و غایتسز اسراری مشتمل اولدیغی

و «بو سورده شریفه اون بیک مسأله بی مشتقد» دین کیسه
 «کلوا الناس علی قدر عقولهم» مصداقجه مجرد سامعینک اکلاد
 یشنه کورده بر سوز سونیش بولندی ظاهر اولور.

فصل ثانی

الفاظ قبله دن مسائل کثیره استنباطی ممکن اولدیغنه دلالت ایدر

بر مشرع اخرك تقریری

«اعوذ بالله» قولمزدن سوزده باشلايلم.

ایمدی دیرزکه :

«اعوذ» فعل مضارع انواعدن بر نوعدر. فعل مضارعده
 انواع فعلدن بر نوعدر. و (بالله) قولنده کی با بای الصاقددر.
 و بوده حروف جر انواعدن بر نوعدر. حروف جر دخی
 انواع حروفدن بر نوعدر.

(بالله) ده کی لفظه جلاله دخی علی اختلاف القولین فییه ،
 یا استمای اعلامدن . یا استمای مشتقده دن بر اسم معیندر. کرک اسم
 علم . و کرک اسم مشتق بونلرک ایکسیده اسم مطلق انواعدن
 بر نوعدر .

علوم عقلیه ده ایسه ثابت اولمشدرکه جنس یلندکجه نوعک
 یلنسی متمعدر. زیرا جنس ، نوعک ماهیتدن بر جزدر. بسیطه

یعنی جزء علمك تعلق ایسه لابد مرکه علمك تعلقندن مقدمدر .
ایمدی اولاً — استی ، فعلی ، حرفی یتدکجه (اعوذ بالله)
قولمذک مفهومی کاینی یتلمک ممکن اوله ماز .

اشبو معرفت دخی اسمک ، فعلک ، حرفک حدود و خواصی
ذکر اولندجه حاصل اوله ماز .

و بونلرک ذکرندن فارغ اولدقدن صکره استی اسم علمه ،
اسم مشتقه ، اسم جنبه تقسیم ؛ و اقسام مذکورددن هر برینی
حدیله ، رسمیه ، خواصیه تعریف ایتک لازم کلیر .

بو تقسیم و تعریفنده فارغ اولنجه : لفظة الله ، اسم علم میدر ؟
اسم مشتق میدر ؟ مشتق اولدیغی تقدیرده نه دن مشتقدر ؟ بونلره
دائر ایضاحات ویرلمک ، و احوال مذکورددن هر بری حقنده
علمای کرامک ذکر و بیان ایتمش اولدقلری وجوه کثیره در میان
ایدلمک لازم کلیر .

برده حقیقت فعل مطلقدن بحث ایدلمک ؛ و آندن صکرده ده
اقسام فعلی ، و ازان جمله فعل مضارعی ، و بونک ده حدینی ،
خواصی ، اقسامی و بعده علی التخصیص (اعوذ) قولمزه متعلق
اولان مباحتی ذکر ایتک واجب اولور .

کذلک حقیقت حرف مطلقدن بحث ایله برابر حرف جزئی ،
و آنک ده حدینی ، خواصی ، احکامی ودها صکره بای الصاقی .
و آنک ده حدینی ، خواصی ، ذکر ایتک لازم کلیر .

ایشته شو مباحتک تمامنه کسب و قوف ایدلیکی حالده
«اعوذ بالله» قولمزه متعلق اولان مباحت لفظیه نک تمامنه ده

وقوف حاصل ایدلش اولور. معاقینه اشارت ایتدیگمز شو
مباحثك ایسه جداً چوق اولدینی امور معلومه دندر.

مبحث دردنجی مرتبه سی

اسم، فعل، حرف اوچ نوعدرکه اوچیده. جنس کله تختنده
داخلدر. بناء علیه کله نكده ماهیتدن، حدندن، خواصندن
بحث ایتك لازم کلیلر.

اندن بشقه بومقامده کلمه شیه بعض شیر دها وارکه
انلرده کلام، قول، لفظ، لغت، عباردر. بناء علیه بونلرکده
اولا هر برندن. ثایا بونلر الفاظ مترادفه دئمیدلر؛ الفاظ متباینه.
دئمیدلر؛ نه درلر؛ ثالثاً الفاظ متباینه دن اولدقلری تقدیرده
فرقلری نه در؛ بورالردن بحث اولنق لازم کلیلر.

مبحث لشنجی مرتبه سی

شو کلملرک اصوات و حروفدن حاصل اولدیغنده شک
یوقدر. ایدمی بو حالد صوتك حقیقتدن، واسباب حدوث
ووجودندنه بحث ایتك لازم کلیلر.

حیوانده صوتك حدوثی ایسه معلومدرکه صدردن نفسك
خروجی سبیلله در. دیمك که اولا متفلس اولدیغمز نفسك
حقیقتدن؛ ثایا انسانك علی سبیل الضروره متفلس اولسندگی

حکمت نه در؟ و بو صوت و صدا نفسک است دخالی، و یا خود
اخراجی سیلیله می؟ نه سبيله حاصل اولیور؟ بوندنده بحث ایتک
لازم کلیر.

بناء علیه مباحث دقیقه مذکور ددن بحثه کیر شتک احوال قلبی،
رئدی، صوتک حرکتک مبدأ اولی اولان حجای [پردہ نی]
بطنک سائر عضلات محرکه سنی، خنجر دی، لسانی، شفتینی بیلکه
احتیاج مس ایدر.

و حرف، نفس صوتیدر؟ یوقسه صوته مغایر اوله رق
صوتده موجود بر هیئتیدر؟ بوندنده بحث ایتک لازم کلیر.
برده شبهه یوقکه اشبو حرفلر صوتک تقطیعندن تولد
ایدیور؛ و بوده حلقده، لسانده، اسنانده، شفتینده، بر طاقم
مخارج مخصوصه ددن عبارتدر. بناء علیه او محاسبندنه بحث ایتک
لازم کلیر. حالبوکه علم تشریح بیلندکچه اشبو مباحثک حرف
و صوته دلالتی تمام اولماز.



بحثک التنجی مرتبه سی

حرف و صوت، حاسه سمع ایله، زنگلر، ضیالر حاسه
بصرله؛ طعوم دخی حاسه ذوق ایله حس اولنور کیفیات اولوب
سائر کیفیات محسوسه دده حال بو منوال اوزر ددر.

ایمدی «بو کیفیات بر طاقم انواعدرکه جنس واحد تحتده
داخلدر؛ تمام ماهیتده یکدیگرینه مبیندر؛ آرا لرنده لوازم

خارجیه دن بشقه مشارکت یوقدر . " دیمک صحیح اوله بیایرمی ؟
دیو بو مسأله دنده بحث ایتمک لازم کلیر .

—○○○○○○○○—

مَحْثُکْ یدنجی مرتبه سی

مشهورده کیفیات محسوسه ، انواع جنس کیفدن برنوعدر .
بناء علیه اولاً مقولہ کیفدن ؛ ثانیاً کیفک تحتده کی انواعه حملی .
جنسک انواعی اوزرینه مقولیت و محمولیتی قیاسدتمی دگلی ؛
بوننده بحث ایتمک لازم کلیر .

مَحْثُکْ سکزنجی مرتبه سی

مقولہ کیف ، مقولہ کم ، مقولہ نسبت ، بونلرک اوچیده
عرضدر . بناء علیه مقولہ عرضدنده ، انک اقسامندن ،
احکامندن ، لوازمندن ، توابعندنه بحث ایتمک لازم کلیر .

مَحْثُکْ طقوزنجی مرتبه سی

عرض و جوهر [ممکن] ک تحتده دخولده مشترک اولدقلری
کی ممکن و واجب دخی [موجود] ک تحتده دخولده مشترکدرلر .
بناء علیه [موجود] ک واجب و ممکن اوزرینه حملی ، جنسک انواعی

اوزرینه مقولیت و محمولیتی قیلندنمیدر؟ یوقسه لوازملک موصو-
فاتی اوزرینه مقولیت و محمولیتی قیلندنمیدر؟ دیو لواحق وجود
و عدمدن دخی بحث ایتک لازم کلیر؟

معلوم اولسونکه: مراتب مذکورده یی موجوداتک جزئیًا.
تندن هر جزده تطبیقه قالدیشیه حق اولورسه، بر طاقم مباحث
غیر متناهی قپولری آچیلیرکه انسانک عقل و ادراکی او مباحثک
چوغنی احاطه دن عاجز قالیر.
ایشته الفاظ قلیله دن علوم کثیره نك کیفیت استنباطی شو
ایضاحات و تفصیلات ایله معلوم اولور.

فصل ثالث

اشبو سورة جاییله دن مسائل کثیره استنباطی ممکندر دیدیکمزی
تصحیح ایچون بر مشرع آخرک تقریری

معلوم اولسونکه بز بو کتابده موضوع بحث ایده جکمز بر
مسأله نك صحتته مثلاً اون وجه ایله استدلال ایده جک اولورسه ق
او وجود و دلائلن هر ریسی باشلی باشنه بر مسأله دیمکدر.

آدن صکرده او مسأله حقیقه مثلاً بش شبهه نقل و حکایه
ایده جک اولورسهق ، اشبو شبهات خمسهدنده هر بریسی بنفسها
بر مسأله مستقله اولور . بعده شبهات مذکورده نك هر بریسندن
ایکیشر و یا اوچر وجه ایله جواب ویره جک اولورسهق ، او
اجوبه ثلاثهده اوچ مسأله دیمکدر .

برده مثلاً کلام عربده وارد اولان الفاظ و لغاتدن بریسی
موضوع بحث ایدوبده بونك الشمس معناسی وار دیر و او الشمس
وجهی ده تفصیلاً بیان ایدرسهك ، حقیقهده الشمس مسأله ده
میدانه قویمش اولورز . زیرا (مسأله) نك معناسی موضع سؤال
و تقریردر . مسأله نك بوندن بشقه معناسی یوقدر . ایدمی
مادامکه شو وجود ستیندنده هر بریسی بویه برر موضع سؤال
و تقریردر ؛ برر مسأله مستقله دیمکدر .

بوراسی اکلاشلدی یا ؛ ایدمی دیرزکه :

بز اسم و فعله متعلق مباحثی نظر دقت و اعتباره آلوده ،
صکرده انعالی معلوم و مذکوره تقسیمه متعلق اولان مباحثه ،
برده موجود و معلومه و کذا واجب و ممکنه ، جوهر و عرضه ،
مقوله کفه ، و بونك کیفیت محسوسه و غیر محسوسه به کیفیت
انقسامه ، صوته ، صوتك کیفیت حدوثه ، وصوتی احداث ایدن
عضلاتك کیفیت متعلق مباحثه نزول ایتدی کمزده ایشی فوق العاده
بیولتهرك بر باب واسع آچمش اولورز .

شو قدرکه بز بو کتابده کلمه . کلامه . قوله . لفظه . عبارده
متعلق اولان مباحثدن باشلایهرق . تا « اعوذ بالله » قولنده موجود

اولان انواع ثلاثیه منتهی اولنجیهدهك يالكز اسم وفعل وحرفه
متعلق مباحثه، آندنده اسمانك، افعالك، حروفك تقسياتنه
متعلق مباحثه نزول ايدجكز.

همان شو مطلوب كريمه رهياب وصول اولغه بزى موفق
بيورمسنى الله تعالى حضر تارينك فضل عميندن رجا ايلرز.



برنجی کتاب

« اعوذ بالله من الشیطان الرجیم » قونندن مستنبط اولان علوم
بیاننده در

معلوم اواسون که شو کله دن مستنبط اولان علوم ایکی نوعدر.
نوع اول -- لغت و اعرابه . نوع ثانی -- علم اصول و فروعده
متعلق اولان مباحثدر .

برنجی کتابک قسم اولی

کله ديه متعلق اولان مباحث ادبیه بیاننده اونوب بر قاج بابی مشتملدر

باب اول

کله ديه و بحر ای کله ديه جاری اولان الفاظه متعلق مباحثت بیننده اونوب
بر قاج مسأله بی مشتملدر

برنجی مسأله

معلوم اواسون که مدلولات الفاظی تعریفده ال مکمل یول
طریق اشتقاقدر . اشتقاق دخی ایکی نوعدر .

اشتقاق اصغر، اشتقاق اکبر.

اشتقاق اصغر، صیغه ماضی و مستقبل، اسم فاعلک، اسم مفعولک و سائر صیغہ لڑک مصدر دین اشتقاقہ دینور.

اشتقاق اکبر، چند حرف دین مرکب اولان بر کلمہ نک لامحاله انقلابات عدیدہ بی قبول اتمہ سندن عبارتدر.

بونک برنجی مرتبہ سی، کلمہ نک ایکی حرف دین مرکب اولہ. سیدر. و بویله ایکی حرف دین مرکب اولان کلمہ یالکز ایکی نوع تقلیب قبول ایدر. (من) و (نم) کی.

ایکنجی مرتبہ سی کلمہ نک اوچ حرف دین مرکب اولہ سیدر. (حمد) قولمز کی کہ اشبو تقلیباتدن آتی نوع تقلیب قبول ایدر.

شویله که: او حروف ثلاثہ دن هر بری کلمہ ثلاثیہ مذکور. ردنک ابتدای اولہ بیلدیکی کی، باقی قالان ایکی حرف دخی تقادیر ثلاثہ مذکورده دن هر برنده ایکی وجه اوزره واقع اولمق ممکندر. اوچک ایکی یه ضربندن آتی حاصل اولور. بناء علیه کلمات ثلاثیاتده واقع اولان اشبو تقلیبات التی وجه اوزره وقوع بولمق ممکندر.

اوچنجی مرتبہ سی — کلمہ نک رباعیه اولہ سیدر.

(عقرب) و (ثعلب) قولمز کی که بویله درت حرفلی کلدلر یکز می درت وجه ایله تقلیبی قبول ایدر.

شویله که: او حروف اربعه دن هر بری کلمہ رباعیہ مذکورده دن ابتدای اولہ بیلدیکی کی، حروف ثلاثہ باقیه نک دخی تقلیباتدن

التي نوع اوزره وقوعى ممكندر . دردك التي به ضربى يكرمى دوت وجهى مفيد اولور .

دردنجى مرتبه سى — كله نك خماسيه اوله سيدر .

(سفرجل) قولنجى كه بو يوز يكرمى نوع تقالىي قبول ايدر . شويلاه كه او حروف خمسه دن هر برى مذكور كله خماسيه نك ابتداسى اوله بيلديكى كجى ، اشبو تقايرك هر برنده تقرير و بيانى سبق ايتديكى وجهه حروف اربعه باقيه نك ده يكرمى دوت وجهه اوزره وقوعى ممكندر .

بشى يكرمى درده ضرب ايدنجه حاصل ضرب يوز يكرمى اولور .

ايكنجى مساله

معلوم اولسون كه اشتقاق اصغر قولايدر ، معتاددر ، مألوفدر . اما اشتقاق اكبره رعايت كوجدر : شويلاه كه بياغى كلمات ثلاثيه دن بشقهلرند اشتقاق اكبره رعايت ممكن دكل كيدر . چونكه كلمات ثلاثيه نك تقالىي التي وجهى كچمز . انك ايچون انلرده اشتقاق اكبره رعايت سهلدر . اما دردر و بشر حرفلى كلهلرك تقالىي پك چوق . و بونلرك ده اكثري مهمل و غير مستعمل اولوب . بناء عليه رباعيات و خماسياتده اشتقاقك بو نوعنه يالكر على سبيل الندره رعايت اولنور . بوقسه هر وقت رعايت ممكن دكلدر .
كلمات ثلاثيه دنخى جميع تقاليب ممكنه سى معتبر و مستعمل

اولانلر پك آز بولنور . اكثر كليات ثلاثيهده تقاليب ممكنه نك
بعضيلري مستعمل ايسهده بعضيلري مهمملدر .

اوچنجي مساله

كله نك تفسيري

معلوم اولسون كه كاف ولام و ميك تركيبي بو حروفك تقاليب
ممكنه سي حسييله قوت و شدت افاده ايدر . تقاليب مذكوردهدن
بشي معتبر و مستعمل اولوب بریده ضايع و مهمملدر .

اولكيسي . — ك، ل، م .

سوز معناسنه اولان (كلام) اشبو مادهدن مشتقددر . كلام؛
شدتن خالی دكلدر . زيرا كلام، سني قرع ايله آنده تأثير ايدر .
افاده معنی واسطه سیله ذهبندهده تأثیر ايدر .

جرح، معناسنه اولان (كلم) دخی بوندن مأخوذدر . (كلم)
كافك فتحی ولامك سكونیله یارده دیر . جرح دخی جیمك ضمیله
یاره نك اسعیدر .

كلده ايسه شدت واردر .

(كلام) غراب وزننده طوپراغی قالین اولان یره دیر .
بو تسمیه یهده سنب او مثللو ارضك شدتیدر .

ایکنجیسی . — ك، م، ل .

بو ترکیب دخی قوتی مفیددر . زيرا کامل، ناقصدن اقوادر .

اوچنجیسی . — ل، ك، م .

(لكم) لامك فتحی وكافك سكونیله یومرق ايله اورمق،

وعلى قول بر آدمك كو كسنة اورمق، يا خود بر آدى اوته قفق
معاسنه دركه بونده ده شدتك معاسى ظاهر در .

در دنجيسى . — م، ك، ل .

(بئرمكول) بوندن مأخوذ در . (مكل) كتف وزنده با جمله
صوبى چكيلوب اخراج اولمش قيوه دير .

(مكول) قعود وزنده قيونك دينده «مكه» دينلان صو

اولق معاسنه در .

(مكه) ميك فتحى وضى وكافك سكونيه قيونك دينده

ايركيلوب بريكمش صو ماده سنه دير .

(مكول) صبور وزنده ايچنده «مكه» دينلان صو اولان

قيوه دير . وشول قيوه ده ديركه صوبى آزمغله اطرافندن
آزجه آزجه ايركيلوب برمقدارجه دينده مجتمع اوله .

بوماده دخی معنای شدتی متضمندر . زیرا قیوبو حاله گنجیه صوینك

ورودی مکروه و بناء علیه ورودنده برنوع شدت حاصل اولور .

بشنجيسى . — م، ل، ك .

«ملكك المجين واملكت المجين» دير . ملك، ميك فتحیه

خیری قوتله اوزله يهرك يوغورمق معاسنه در . املاك و تملك دخی
بومعنايه کایر .

(عجين) امير وزنده يوغورلمش شيئه دير . خير کي .

(عجن) عينك فتحى و حيتك سكونيه يوغورمق معاسنه در .

تمليكك دها بشقه معالری ده واردر . كذلك «املاك» دخی

ديكر معانیده ده استعمال اولور .

از جمله املاك، همزه نك كسريه بر آدمه خاتون تزويج ايلك
معناسنه مستعملدر. برده امر تطلق محلنده استعمال اولنور.
«ملك الانسان» قولیده اشبو ماده دن مأخوذدر. زیرا ملك
دخی برنوع قدرتدر.

«املك الجارية» قولنده قدرت، دركارددر. زیرا بلك
قدرتی جاریه اوزرینه تعلق ایدر.
بل، بانك فتحی وعینك سکونیه برشئك صاحب و مالکنه
دنیر. زوج وزوجه یهده اطلاق اولنور.

دردنجی مسأله

کله، لفظی بعضاً لفظه واحدهده استعمال اولنورده انکله
بعض اجزاسی بعض اجزاسنه مرتبط اولان کلام کثیر مراد
اولور.

سراپا برقصیده یی «کله» تسمیه ایدیشلری کی.
«کله شهادت» «کله طیه صدقه در» دینسی ده بوقیلنددر.
وچونکه مجاز، اشتراکدن اولی اولدیغندن بیلدک که مرکبه (کله)
اطلاقی مجازدر. و بودخی ایکی وجهدن ناشیدر.
وجه اول. — محققدر که مرکب آنحق مفرداتدن ترکیب
ایدر. بناءً علیه کلام مرکبه «کله» اطلاقی جزئک استمی کله اطلاق
قیلندن اولمش اولور.

وجه ثانی. — ینه محققدر که کلام کثیرک بعض اجزاسی

بعض اجزاسنه مرتبط اولنجه انك ايچون برنوع وحدت، حاصل اولور. بناءً عليه اوكلام كثير شو وجوه ارتباطده مفرده شبيه اولمش اولور.

مشابهت ايسه حسن مجاز اسبابندن برينيدر. ايشته بوسيدن ناشيدركه كلام طويله «كلمه» لفظى اطلاق اولندي.

بشنجى مسأله

قرآن كريم ناطق اولديغى اوزره «كلمه» لفظى ديكر ايكي مفهومده استعمال اولمشدر.

مفهوم اول. — حضرت عيسى عليه السلامه (كلمة الله) دنير. بواطلاق دخی يا جناب رسالتا بلرينك خلقت وفطرتى بلا اب، همان (كن) امر شريفياه وجود بولديغيچوندر. ياخود كلمه فصل زمان قلیله حادث اوليورسه حضرت عيسى دخی اويبد زمان قلیلد. كهواره زيب حدوث ووجود اولديغيچوندر.

مفهوم ثانی. — الله ذو الجلال، افعال حکمت مآلنى کلمات، تسميه بيورمشدر. فصل که (قل لو كان البحر مداداً لكلمات ربى تنفد البحر قبل ان تنفد کلمات ربى) آیت جلیله سنده مذکوردر. بونده کی سبب دخی مسأله رابعه ده بیان اولنان وجهین در. یعنی لفظ کلمه نك معنای موضوع الهی بردر. كرك جناب عيسى وكرك فعل خدایه کلمه اطلاق یا مجاز مرسل. ياخود استعاره مصرحه طریقیه در. والله اعلم.

التنجی مسأله

قول

اشبو ترکیب تقالیب سته سی حسبیله حرکت و خفته دلالت
ایدر.

اولکیسی. — ق، و، ل.

قول، بوماده دن مأخوذدر. بونده ایسه خفت درکاردر.
زیرا قولک لسان اوزرینه جریانی امر سهلدر. مترجم فقیر دیرکه:
قاموسک بیانیه کوره قول، قافک فتحی وواوک سکونیله سوزده
دیر. کرک تام وکرک ناقص اولسون.

قول، وجوه عیدیده اطلاق اولنور. اظهاری نطق،
واسطه سیله خارجه ابراز اولنان حروفدن مرکب، لفظدر. کرک
مفرد، کرک جمله اولسون. یوکا فارسیده سخن، ترکیده سوز
دیر. نفس انسانیده قبل ابراز متصور اولان سوزدهده «قول»
اطلاق اولنور. وجوه سائر سیده کتب لغاتده مسطوردر [انتهی]

ایکنجیسی. — ق، ل، و.

قلو، بوماده دن مأخوذدر.

قلو قافک کسری ولامک سکونیله حمار وحشییه دیر. اکا
(قلو) دینلمسی خفیف الحریکه اولمسندن ناشیدر.

عرب «شیء قلو» دیرکه خفیف دیمکدر.

قلولی، دخی یوکسک اوچان قوشه دیر.

اوچنجیسی. — و، ق، ل.

وَقُلْ، وَعَلَّ دِيمَكْدِر .

وَقُلْ، جِل وِزْنَدَه طَاغَه چِیَقْمَق بَابِنْدَه قَوِی وَتَوَانَا اِنْسَان
وَحِیَوَانَه دَنِیر .

وَعَلْ، وَاوَلْ فَتَحِیْاه نَلَسْ، وَوَعَلْ، کَتَف وِزْنَدَه وَوَعَلْ،
دَل وِزْنَدَه طَاغ چِیَسْنِکْ تَکَه سَنَه دَنِیر . وَوَعَلْ، مَصْدَر اَوَلورْکَه
یَوُکْسَکَه چِیَقْمَق مَعْنَسَنَه مُسْتَعْمَلِدِر .

وَقُلْ، دَخِی نَقْل وِزْنَدَه طَاغَه چِیَقْمَق مَعْنَسَنَه دِر . . بِرِیْسِی
طَاغَه چِیَقْدِیغْنَدَه «تَوَقْل فِی الْجِل» دَنِیر .
دِرْدِیجِیْسِی . — و، ل، ق .

وَلَقْ، خَلْق وِزْنَدَه سِرْعَت اِیْلَکْ مَعْنَسَنَه دِر .
وَأَهْسَتَه جَه دَوْرَتْمَکْ، قَلِیْجِیْاه اَوْرَمَقْ، بِرْدَوِزِیْه کَتْمَکْ،
بِرْدَوِزِیْه یَا لَان سَوِیْلَه مَکْ مَعْنَالِزْنَدَه دَه مُسْتَعْمَلِدِر .
قَامُوسْکْ . بَیَانَنَه کُورَه

(اِذَا تَلَقُّوْهُ بِالسَّنَتِکُمْ) قَوْلْ کَرِیْمِی دَخِی بُو بَابِنْدِرْکَه تَانْکْ
فَتَحِیْ وَلَامْکْ کَسْرِیْاه «تَسْرِعُوْنَ الْکَذِبَ» دِیْمَکْدِر . صَاَحِبْ
تَفْسِیرْ دِرْکَه بُو قَوْلْ کَرِیْم (اِذَا تَلَقُّوْهُ بِالسَّنَتِکُمْ) دَخِی اَوَقُونْدِی .
مَعْنَایْ شَرِیْفِی «لَا تُخْفَوْنَ وَتَسْرِعُوْنَ» دِیْمَکْدِر .
بَشِیْجِیْسِی . — ل، و، ق .

لُوقْ، سَوَق وِزْنَدَه یَوْمَشَاتْمَقْ مَعْنَسَنَه دِر .
لُوقْ، لَامْکْ ضَمِیْاه قَایْمَغَه، یَاخُودْ تَرَه یَاغْنَه دَنِیر . بِرْ قَوْلَه کُورَه
قَایْمَقْلَه . یَاخُودْ تَرَه یَاغِیْاه تَاَزَه خَرْمَادَنْ . یَاخُودْ صَاَفِی یَاغِیْاه تَاَزَه
خَرْمَادَنْ مَرْتَبْ طَعَامَه دَنِیر .

تلویق ، تره یا غیله طعامی اصلاح ایلک معناسنه در .
 فصل که حدیث شریفده کیشدر . «لا اکل الطعام الا مالوق لی»
 ای اعملت الید فی تحریکه وتلیقه حتی یصلح .
 التجیسی . - ل ، ق ، و .

لقوه ، که عقابک اسیدر ؛ بوماده دن مأخوذدر .
 عقابه (لقوه) دینلسی خفتدن وسرعت طریاندن ناشیدر .
 قاموسده دیرکه «لقو، لقود» لاهک فتیحی وکسریله دیشی
 طوشنجل قوشنه ، یاخود چاپک وچالاک اولاننه دیر .

یدنجی مسأله

ابن جنی، رحمه الله دیمش که :
 (لغت) سویلشدم معناسنه اولان (لغوت) ماده سندن مأخوذ
 فعله درکه اصلی لغوة در . آخرنده کی هاء واودن عوضدر .
 مترجم فقیر دیرکه .

قاموس شارحنک بیاننه کوره اصل (لغو) قوش جولدیسنه
 موضوعدر . بعده مفهومسز بیهوده کلامده استعمال اولدی .
 صکره توسیعه مطاق کلامده مستعمل اولدی . هر قومک کندی
 لسانلری اوزره اولان کلامه (لغت) اطلاقی معنای موضوعندن
 یاخود ذکر اولنان معنای مجازدن مأخوذدر . [انتهی]

لغتك انی یلغی دن کلدیکی دخی منقولدر . حتی (واذا مروا
 باللغو مروا اکراما) آیت جلیله سنده واقع (لغو) دخی بوندن
 مأخوذدر .

ینه مترجم فقیر دیرکه :

قاموسك بیاننه کوره «لغی» نئی وزننده لغو کبی بیهوده
و بیغنی شیئه دیر. [انتهی]

ابن جنی (کله) ایله (قول) ده اشتقاق اکبره اعتبار ایتمش ده
(لغت) ده اکا اعتبار ایتماشدر. حالبوکه اشتقاق اکبر بونده ده
حاصلدر.

شوبله که :

برنجیسی. - ل، غ، و.

بالاده بیان اولندیغی وجهله لغت کینه سی بو ماده دن مأخوذ
اولدینی کبی کلام لغو، و عمل لغو دخی بومعنادن آلتشدر.
ایکنجیسی. - ل، و، غ.

مترجم دیرکه :

قاموسك بیاننه کوره (لوغ) سوغ وزننده برشی ئی اغزده
اوتنه بری یوارلایوب دوندردکدنسکره آتق و بر آدمه دخی
ملازمت ایتک معنالربنه مستعملدر. [انتهی]

اوچنجیسی. - غ، ل، و.

غلو. سمووزننده حدی تجاوز ایتک معناسنه درکه عربک
«فلانک شوشیده غلوی وارددر» دیشلری بومعنادن مأخوذدر.
(غلو) ده بو معنادن مأخوذدر.

غلو، قمره وزننده اوق آتیمی مسافه نه دیر.

دردنجیسی. - غ، و، ل

مترجم فقیر دیرکه :

قاموسك بياننه كوره غول، غينك ضميئه سبب هلاك اولان
شيئه دیر. [انتهی]

(لافيهاغول) قول کریمی بو معنادن مأخوذدر.

بشجیسی. - و، غ، ل.

عربك «فلان» اوغل فی كذا» دیشلری بوندن مأخوذدر.
مترجم فقیر دیرکه :

قاموسك بياننه كوره وغل، واوك فتحی و غین معجمهك
سكونيله ضعيف وناكس و بی اعتبار وهر خصوصده دون همت
ومقصر آدمه دیر.

اوغل، ایغالدن فعل ماضیدر. ایغال، همزهك کسریله پك
ایراق کیمك وبر آدمی عجله ایله بریره صوقوق معنالرینه در. [انتهی]
التنجیسی. - و، ل، غ.

«ولغ الكلب فی الاناء» قولى بوندن مأخوذدر.

مترجم فقیر دیرکه : قاموسك بياننه كوره «ولغ» واوك
فتحی وضمی ولامك سكونيله و «ولوغ» قعود وزنده و «ولغان»
فتحاتله كوپك قسمی دینك اوچيله قاپدن برشی ایچمك، علی قول
دینلی قاپه، چاغه صوقوب یالامق معناسنه در. [انتهی]

سکرنجی مسأله

لفظ

ظن ایدرمکه افاده معنی ایدن بو اصوات و حروفه (لفظ)
اطلاقی علی سبیل المجازدر.

چونکه بواسوات و حروف، نفسك داخل صدر دن خارجه
اخراجنده حادث اولور .

شویلهکه انسان متففس اولدینی نفسی داخل صدر دن خارجه
حیقاررکن ابتدا محابس معینهده حبس ایدر . صکره اوجبسی
ازاله ایلر ودر حال حرفار بللو اولمغه وسس ایشیدلمکه باشلار .
وتعبیر آخرله بومتللفظ اولدیغمز حرفار نفسك آخر زمان
حبسنده واول زمان اطلاقده تولد ایدر .

الحاصل لفظك اصل معنای موضوع لاهی (رمی) درکه آتمق
دیمکدر . وبومعنای رمیک اشبو اصوات و حروفده حصولی دخی
ایکی وجهنددر .

وجه اول — انسان، حروف واصواتی احداث ایدن نفسی
داخل صدر دن خارجه آتارکه بوده اخراجدن عبارتدر . لفظ
دخی شو تکلم ایتدیگمز کلماتك حدوثنه سبیدر . بناءً علیه اشبو
کلماته شو سبیدن ناشی اسم لفظ اطلاق اولندی .

وجه ثانی . — محققدرکه حروفك تولیدینه سبب اوهوای
محبوسك داخلدن خارجه لفظ ورمی در . بناءً علیه انسان کویاکه
شو حرفاری داخلدن خارجه آیویرمش کی اولور . مشابته
ایسه مجاز اسبابندن بریسیدر .

طقوزنجی مسأله

عباره

عبارهك ترکیبی [ع، ب، ر] مادهسندن مأخوذدر .

بوماده دخی تقالیب سته سنده عبور وانتقال معناسنی افاد ایدر.
اولکیسی. — ع، ب، ر.

بوماده بر حالدن بر حاله تجاوز ایلسکه موضوعدر. بومعادندرکه
عبور ماده سنی صوبی تجاوز ایلسکه کثیر الاستعمال اولدی. کرک
سیاحت و کرک سفینه و دواب و قنطره ایله اولسون.

ایشته «عباره» که لسان متکلمدن سمع سامعه عابر اولان
کلام اوله جقدر بوماده دن متفرعدر.

زیرا انسان بر حرفدن دیگر حرفه انتقال ایتدیکه عبارتیه
تکلم ایده مز. کویا متکلمک تکلم ایتدیکی عبارتیه واسطه سیله معنی
کندی ذهنندن سامعک ذهننه انتقال ایدر.

و دمعیه معناسنه اولان (عبرة) دخی آندن منشعبدر. زیرا
دمعه که اشک خونین دیمکدر. چشمک داخلندن خارجنه سایل
و منتقل اولور.

و (عبرت) که معرفت مشاهدندن مشاهد اولیانه وسیله
توصل اولان حالتدن عبارتدر. بوده ماده مذکورده دن متفرعدر.
زیرا بونده ده شاهدندن غایبه انتقال واردر.

معبر منبر و زننده کوپری یه دیر؛ بوده ماده مذکورده دن
مأخوذدر. زیرا انسان بو واسطه ایله دکرک یاخود نهرک اوته
یا قه سنه بچر.

و تعبیرکه رؤیانک ظاهرندن باطننه عبوردر، آندن متفرعدر.
زیرا انسان عالم منامده کوردیکی شیلردن معانی غایبه یه انتقال
ایدر.

ایکجیسی . — ع ، ر ، ب .

عرب که عجمک غیرینہ دیر . صیف وشتا موستارندہ بشقہ
بشقہ محالہ نقل ورحلتہ پک چوق انتقالندہ بولندقلری جہتہ
عرب تسمیہ اولمشدر .

«فلان اعراب فی کلامہ» قولیدہ بوندن منشعبد . زیرالفظ
قبل الاعراب مجهول اولوب اکا اعراب داخل اولنجہ مجهو .
لیدن معرفت و بیانہ منتقل اولور .

المترجم — قاموسک بیانہ کورہ اعراب همزه نک کسریاہ
بر شیئک کنہ و حقیقتی اظهار و عیان ایلک و کلام عربده لحن
و خطا ایتیموب فصاحت اوزره قواعد نحویہ رعایتہ سولیک
معناسندر .

«يقال اعراب کلامه ای افصح ولم یلحن فیه» انتهى

اوچجیسی — ب ، ر ، ع .

عربک «برع فی کذا اذا تکامل و ترايد» قولى بوندن
مأخوذدر .

قاموسک بیانہ کورہ «براغت» سماحت وزندہ و (بروع)
قعود وزندہ بر آدم علم و شجاعت مقوله سی اوصافده فائق
الاقران اولق و علی قول جمال و فضیلت کبی هر وصفده تام
وکامل اولق معناسندر .

انتهی

دردنجیسی — ب ، ع ، ر .

بعر بانك فتحی و عینك سكونی و فتحیه ده دوه و قیون وچی
و اهو قسمنك ترسنه دیر . داخلدن خارجه منتقل اولدیغیچون
بعر تسیمه اولمشدر .

بشجیسی — ر ، ع ، ب .

قورقویه « رعب » دنیسی خوفك حدودنده انسان ، حالدن
حاله منتقل اولدیغی ایچوندر .

التجیسی — ر ، ب ، ع .

ربع ، رانك فتحی و بانك سكونیه خانهیه ، محلهیه ، قوناغه دیر .
ناس دائما بر خانه دن دیگر خانهیه ، بر محله دن دیگر محلهیه ،
بر قوناقدن دیگر قوناغه نقل ایده کلدیکندن خانهیه ، محلهیه ،
قوناغه ربع دیلدی .

اونجی مسأله

نحویونك اکثری « کله » کلامك غیریدر (کله) لفظه مفرده در
(کلام) جمله مفیده در . دیش .

اصولیونك اکثریده کله ایله کلام بیننده معاجه فرق اولدیغی
و ایکسندن هر بری مفردی ده ، مرکبی ده متناول اولدیغی راینده
بولمشدر .

ابن جنی ، بو بابده نحو یونه او یوب متکلمینك کلامنی استبعاد
ایلدی .

اما بن ، ابن جنی نك کلامنده سیویه دن منقول « کلام »
جمله تامهیه مختصدر .

سوزندن بشقه بر حجت قویه کوردمدم. واقعا ابن جنی کلمه
و کلام آردسندگی فرق معنوی به دائر سیویهک شو سوزندن بشقه
دها بر چوق سوزلر ایراد ایتمش ایسه ده انارغایت ضعیف شیلردر.
کلمه ایله کلام آردسند معناجه فرق یوقدر دین اصولیون
بو مسأله ده بر قاج وجه ایله احتجاج ایلدیلر.

وجه اول — کلام که ترکیه سی سوز دیمکدر. خرس یعنی
دیلسز لکه و برده سکوتہ ضد اولان شیدر دیه عقلا متفق و متحددر.
کلمه واحده ایله تکلم ایسه خرس و سکوتہ ضددر. بناءً علیه
کلمه واحده دخی کلامدن معدود اولمش اولور.

وجه ثانی — کلمه. کلمدن مشتقد که بالاده بیان اولندیغی
وجهله جرح و تأثیر معناسه در. کلمه واحده ایشیدن کیسه ایسه
معلومدر که او کلمه نك معناسی فهم ایدر. دیمک که بونده ده معنای
تأثیر، حاصلدر. او یله ایسه کلمه واحده دخی کلامدن معدود
اولمق لازم کلیر.

وجه ثالث — «فلان شو کلمه واحده بی تکلم ایتدی»
«فلان شو کلمه واحده دن بشقه تکلم ایتدی.» دیمک صحیح اولور که
شو استعمالک صحتی کلمه واحده نك ده کلام اولدیغنه دلالت ایدر.
یوقسه بویله دنیلسی صحیح اولماق لازم کلیردی.

اون برنجی مسأله [۱]

اون ایکنجی مسأله [۲]

اون اوچنجی مسأله

لفظ کله وکلام، مهملی متاولیدر؟
 یعنی الفاظ مهمله و غیر مستعمله یه ده کله وکلام دیرمی دینزمی؟
 کیمی متاولدر. یعنی مهمله ده سوز معناسنه اولان کله وکلام
 اطلاق اولنور زیرا «شو کلام، مهملدر. بو کلام، مستعملدر.»
 دینلک صحیح اولور. وکذا «فلان غیر مفهوم برکلام تکلم ایلدی.
 یعنی مالی اکلاشلار بر سوز سویلیدی.» دینلک دخی صحیح اولور.
 برده لفظ مستعمل کبی لفظ مهمل دخی قولاغنه تأثیر ایده.
 کلدیکندن لفظ مهمله ده معنای تأثیر وکلام حاصل اولمش اولور.
 کیمی ده کله وکلام اطلاق مفید اولان سوزده مقصوددر.
 مفید اولیان سوزده کله ده، کلام ده دینمز، چونکه بو قاعده اعتبار
 اولنجه حق اولسه اصوات طیوره یعنی قوشلارک جولدیسنه ده کله
 وکلام دیمه یی تجویز ایتمک لازم کلیر.

[۱] [۲] اختلاف مذکور اوزرینه بر مسأله فقهییه تفرع ایندیکنی
 حضرت مفسر اشبو اون برنجی و اون ایکنجی مسأله لرده تفصیل وایضاح
 بیورمش ایسه ده مترجم فقیر آتی طی ایلدی.

اون دردنجی مسأله

معانی به دلالت ایدر بر ترکیب ایله مترکب ، اصوات حاصل اولدقده ، شوقدرکه او ترکیب ، ترکیب وضعی دکلده ترکیب طینی اواسه ، او مثللو اصواته کله وکلام تسیمه اولنورمی ؟ مثلا انسان وجع و اضطراب ، یا راحت حالنده یا خود بر ماده دن اظهار حزن و ملال ایلدکده « آخ ، اوخ » دیدیکی کبی بر کیسه دن نامعقول بر حرکت صدور ایتدکده دخی آئی استکراهله « آخ بویله ایتدک ؟ آخ آدم نیچون سوز دکلده مزین ؟ » دیر .

او کسوررکنده « اح اح » دیر . ایشته بونلر بر طاقم اصوات مرکبه و حروف مؤلفه درکه واقعا معانی مخصوصه به دلالت ایدرلر ؛ لکن بونلرک مدلولاتنه دلالتری وضعی دکل ، طییعیدر . انکیچون بو مثللو سسلرده عجیبا کلمات دنیلیرمی ؟

کذلک قضا دنیلان قوشک سسی قطایه لقلقک سسی لق لقه بکزر . ایمدی بو مثللو سسلرده آیا کلمات تسیمه اولنورمی ؟ دیه بونده اهل لسان اختلاف ایتشدیر . فقط بن ایکی طرفده ده بر حجت معتبره کوردمدم .

بو بحثک فائده سی مسأله آتیئده ظاهر اولور .

مثلا بریسی دیسه که « اگر برکله طویار سه م عیدم حر اولسون » صکرده شوسسلر مثللو برسس ایشته ، او کیسه نک اوزرینه حث و بر ترتب ایدرمی ایتزمی ؟

اون بشنجی مسأله

ابن جنی « لفظ (قول) کلام تامه ده ، کلمه واحده یه ده علی سبیل الحقیقه اطلاق اولنور . اما لفظ کلامک اطلاق جمله تامه یه ، و لفظ کلمه مفرده مقصور و مخصوصدر . » دیدی .

مایینی فرقه ابن جنی نک حاصل کلامی شو اولیور که آنجا بیان اولندیغی وجهله (قول) ماده سنک ترکیبی خفت و سهولته دلالت ایدر . بناءً علیه (قول) کلمه واحده یه ده متناول اولمق لازم کلیر . کلام ماده سنک ترکیبینه کلنجه : بو ترکیب دخی تأثیر افاده ایدر . و تأثیر ایسه جمله تامه دن بشقه سنده حاصل اوله ماز . شو قدر که بو استدلال کلمه لفظیه دوچار اشکال اولور . بو اشکاله تقویت و یرن شیردن بریسیده شاعرك « قلت لها قفي فقالت قاف » قولنده محبوبه سنک مجرد (قاف) دیشنی (قول) تسمیه ایتمش اولمسیدر .

اون التنجی مسأله

ینه ابن جنی دیمش که :

(قول) لفظی مجازاً اعتقادات و آرا معناسنه استعمال اولنور . « فلان يقول بقول ابی حنیفة و یذهب الی قول مالک » دیر . کورمز میسین که مثلاً رؤیة اللهک صحتی صور دیغک برکیمسه دن « رؤیت باری جائز دکدر » جوابی آلهک ، اکا « بو معتزله نک

قولیدر. «سوزیله رد جواب ایدرسین ده تعسف یولنی التزام
ایتمدکجه» بو معتزله نك کلامیدر. «دیمزسین.

اون یدنجی مسأله

(قال) لفظی اتساع و مجاز اوزره نطقك غیریده ده استعمال
اولنور.

قال ابوالنجم

قال له الطیر تقدم راشداً انك لا ترجع الا حامداً
ایما معناسنده استعمال اولنور.

شعر

وقالت له العینان سمعاً وطاعة وحدر تا کالدر لما یشقب
دلالت معناسنده مستعملدر.

شعر

امثلاء الحوض وقال قطنی مهلاً رویداً قدملات بطنی
استعید بالله (انما قولنا لشیء اذا اردناه ان نقول له کن فیکون)
وقوله تعالی (فقال لها وللارض انی اطوعاً او کرهاً قالتا انینا
طائعين) آیت کریمه لرنده کی (قول) دخی یو بایدندر.

اون سکزنجی مسأله

کلام نفسی بی انکار ایدنلر کلام، قول، شو تلفظ و تکلم
ایتمدکمز الفاظ و کلماتک اسمیدر دیه اتفاق ایتمشلدردر.

کلام لفظیدن بشقه برده کلام نفسی بی اثبات ایدنلر دخی الفاظ و کلمات مذکورده نک مدلولی اولان معنای نفسانی یه ده هم کلام، هم ده قول دنیلیکنه اتفاق و بوبابده قرآن ایله، اثرله، شعر ایله احتجاج ایلشلدردر.
قرآندن حجتلری (والله یشهد ان المنافقین لکاذبون) نظم جیلیدر.

جناب پروردگار «منافقار» یا محمد سن محقق اللهک رسولین [دیه شهادت ایدرلر. اللهده سنک محقق آنک رسولی اولدیغنه شهادت ایدر. آنجق الله منافقارک بوشهادتلرنده تحقیقاً کاذب اولدقلرینه ده شهادت ایلر.] مال منیفی متضمن بر آیت جلیسه انزال بیورمشدر. منافقین ایسه ظاهر درکه لفظده کاذب دکل ایدیلر. زیرا انلرده لفظاً ولساناً حضرت نبی اکرم صلی الله علیه و سلم افندمزک حق پیغمبر اولدیغنی اقرار ایدرلر ایدی که اشبو اقرار و اخبار لفظی ولسانی ده صادق ایدیلر.

حالبوکه آنفاً بیان اولندیغنی وجهله جناب حق آنلرک کاذب اولدقلرینی بیلدیریور. بناءً علیه منافقینک یالانلرینی کلام لفظیدن بشقه برکلامده آرامق لازم کلیر که اوده انجق کلام نفسیدر. اثردن حجتلری، حضرت عمرک «رضی الله عنه» یوم سقیفهده (کتب زورت فی نفس کلاماً فسبقنی ابوبکر) دییشیدر.
مترجم فقیر دیرکه:

ابن اثیرک (الکامل) نام تاریخنده مسطور اولدیغنه کوره اشبو کلام عمر یوم سقیفهده بین الاصحاب جریان ایدن مباحثه

معروفه و منازعه مشهوره دایر مشارالیهک مؤخرأ زمان خلافتده ایراد ایتدیکی بر خطبه دن مأخوذدر .

حضرت عمر اشبو خطبه سنده انصار کرامک ارتحال حضرت رسالتپناهی کونی بر یسنی نامزد امامت و مسند نشین خلافت ایتک ایچون مدینه منوره ده واقع «سقیفه بنی ساعده» نام موضعه طویلانوب عقد انجمن مشورت ایتدکاری طویلنجه اجله اصحابدن حضرت «ابو بکر الصدیق» و «ابو عبیده بن الجراح» رضی الله عنهما ایله برلکده محل جمعیه واروب بینارنده جریان ایدن محاوره مشهوره دایر مؤخرأ بالمناصبه نقل و حکایه بیوردقاری صرده شو وجهله اداره کلام ایدوب دیمشکه

«او آراق بنده تقسمده تحسین ایتدیکم بر سوزی سولیکه بر قاج کره طور اندم ایسه ده ابو بکر «هله سن صبر ایت طور» دیهرک بکا تائی و ترک استجال ایله امر ایدر. و ضمیر مدن کچنی بیلیرمش کبی هر دفعه سنده بنم سولیک استدیکم شیردن بر یسنی ترک ایتیموب عینیه آتی و بلسکه ده آدن احسنی سویلردی .»

قاموسک بیاننه کوره [تزویر] بر نسنهیه قوام و اعتدال و استقامت و یرمکه آتی تحسین و تهذیب ایتک معناسنده در . بونده تقیل، سلب ایچوندرکه اعوجاجنی ازاله ایتکله اولور . اتمی شعر دن حجتلری، شاعر اخطلک

ان الكلام لفي الفؤاد وانما
جعل اللسان على الفؤاد دليلاً

قوليدر .

شاعر بو قولنده «سوز قلیده در . لسان یالکرز قلیده دوزان
ایدن سوزده تر جاندر» دیمش که بوده کلام لفظی و لسانیدن بشقه
نفس متکلم ایله قائم برده کلام نفسینک وجودینه دلالت ایدر .
اشبو کلام نفسی یی انکار ایدنلر دخی وجهه آتی اوزره
احتجاج ایدوب دیمشلرکه :

«نطق ایتیمان و حروف ایله متلفظ اولیان کیسه ایچون
عرف ولغته [تکلم ایتدی] دیر ؛ وخت و بردخی اشبو الفاظه
تعلق ایدر . بناءً علیه کلام الحق کلام لفظی یه اطلاق اولنور .
بزم اصحابمزدنده قول و کلامک ، معنای نفسانی ایله لفظ
لسانی بیننده مشترک اولدیغی رأینده اولانلر واردر .

اون طقوزنجی مسأله

اشبو کلمات و عبارات بعضاً (احادیث تسمیه اولنور .

الله تعالی (فلیأتوا بحديث مثله) بیورمشدر .

بو تسمیه ده سبب بودر که اشبو کلمات ، متعاقب و متوالی الورود
اولان حرفلردن ترکیب ایدر . شو حروف متعاقبه متوالیه دن
هر بریمی ایسه دیکرینک عقینده حادث و حاصل اولور . ایشته
بو سبیدن ناشی کلمه یه (حدیث) دینلشدور .

برده حروفك سماعی قلوبده علوم و معانی احداث ایتدیکندن
بو تسمیه ده بوده بر سبب دیگر اوله بیلیر . والله اعلم .

یکر منجی مسأله

بو مسأله ده پك چوق لفظلر واردر . برنجیسی کله ، ایلنجیسی
کلام ، اوچنجیسی قول ، دردنجیسی لفظ ، بشنجیسی عبارت ،
التنجیسی حدیث درکه بونلری باسرها شرح ایتمشدر .
یدنجیسی نطقدرکه بونکده هم کیفیت اشتقاقندن همده نطق
شو الفاظ مذکوره نك بعضیسنه مرادفیدر مبانیدر؟ مبان اولدینی
تقدیرده فرقلری نه در؟ بوندن بحث ایتک لازم کلیر .

یکر می برنجی مسأله

کله نك حدی (تعریفی) بیاننده در
زمحشری (مفصل) ك اولنده دیمش که : « الكلمة هي اللفظة
الدالة على معنى مفرد بالوضع » یعنی کله معنای مفرد بالوضع
دلالت ایدن لفظه دیر .

بو تعریف ایسه جید دکلدر . زیرا صیغه ماضی دخی کله در .
مع هذا که صیغه ماضی معنای مفرد بالوضع دلالت ایتمز .
بناءً علیه بو تعریف غلطدر .
زیرا کله ایکی امره یعنی حدث و زمانه دالدر .
صه ، مه ، قولمز کی استمای افعالدهده حال بومنوال اوزره در

یعنی اسم فعل امر دخی کله در لر . فقط صیغه ماضی کبی بونلر دخی
معنای مفردده بالوضع دلالت ایتمزلر .

سبب غلط دخی شوکه ز محشری مفردی لفظه صفت قیلق
لازم کلیرکن غلط ایدوب معنایه صفت قیلشدر .

للمترجم

قاموسده بیان اولندیغی وجهله

[صه] صادق فتحی و هانک سکونیه و هانک منونا کسریله
متکلمه کله زجر در . یعنی تکلم ایدن آدمه زجر و آزار ایله
« صوص » معناسنده استعمال اولنور .

[مه] میمک فتحی و هانک تشدیدیه دوهلری رفق و سهولته
قولالائق معناسنده در .

مترجم قاموس دیرکه : مه کبی صه دخی فی الاصل مصدر
مقامنه قائم صوت اولوب بعده اسم فعل امر اولمشدر . « صوک »

یکرمی ایکنجی مسأله

لفظ یا مهممل اولورکه بو معلومدر ، یا مستعمل اولورکه
بو اوچ قسمدر .

قسم اول ، مفرددرکه اجزاسندن برشی معانیدن هیچ برشیته
دلالت ایتمز (فرس و جل کبی) .

قسم ثانی ، مرکبدرکه بر اعتباره کوره اجزاسندن هیچ بریسی
اصلا برشیته دلالت ایتمز سهده اعتبار آخرله دلالت ایدر (عبدالله)

قولمز کی کہ اشبو مجموعی اسم علم دیہ اعتبار ایدرسہ کے اجزاسندن
 هیچ بریسی بشقہ بر شیئہ اصلا دلالت ایتمز . اما آئی مضاف
 و مضاف الیہ قیلد یغمزده اجزاسندن هر بر جزء شیء آخره
 دال اولور .

قسم ثالث . مؤلفدرکه اجزاسندن هر بر جزء ایچون علی
 جمیع الاعتبار مدلول آخره دلالت حاصل اولور . عالم
 حادثدر . سما کرددر . زید منطلقدر . « قولمز کی .

یکرمی او چنجی مسأله

مسموع مفید . درت قسمه منقسم اولور . زیرا یا لفظ و معنائک
 ایکسیدہ مؤلف اولور . « انسان حیواندر ، زیدک غلامی »
 قولمز کی .

یاخود مسموع و معنائک ایکسیدہ مفرد اولور . وحدت
 و نقطه قولمز کی . و یاخود لفظ (مفرد) معنی (مؤلف) اولور
 (انسان) قولمز کی . زیرا لفظ انسان گرچه مفرددر . انجق
 معنی ماهیت مرکبه درکه امور کثیردن ترکیب ایدر . یاخود لفظ
 (مرکب) معنی (مفرد) اولورکه بو محالدر .

یکرمی دردنجی مسأله

« الكلمة هي اللفظة المفردة الدالة بالاصطلاح على معنى » یعنی
 کلمه بر لفظ مفرددرکه بر معنایه بالاصطلاح دلالت ایدر .

بو تعريف قيود اربعه دن مرکيدر .
 قيد اول، کلمه نك لفظ اولميسيدر . قيد ثاني، مفرد اولميسيدر
 قيد ثالث، دال اولميسيدر . (بو قيد مهملا تدن احتراز ايجوندرد .)
 قيد رابع، بالاصطلاح دال اولميسيدر .
 الفاظك دال تلري ايسه دلالت وضعيه اولوب دلالت ذاتيه
 اولديغنه قريباً دليل اقامه ايدده جکزر .

يکرمي بشنجي مسأله

« قيل الكلمة صوت مفرد دال على معنى بالوضع » يعنى « کلمه
 بر صوت مفرد در که معنايه بالوضع دلالت ايدر » يولنده ده تعريف
 اولمشدر .

ابو علي بن سينا کتاب (اوسط) ده ديمش که « بو جائز دکلدر
 زيرا صوت ماده در . لفظ ايسه جنسدر . حالبو که جنسك ذکرى
 ماده يي ذکر دن اولادر »

ابن سينا ماده و جنس بيننده کي فرقك بياننه دائر پك دقيق
 سوزلر سويلش ايسه ده او سوزلر دقيق اولغله برابر ضعيفدرلر .
 وجه ضعفى ده عقلياتده بيان ايتمشدر .

کلمه يي تعريفده صوتى ذکر ايمه نك جائز اولماسى حقنده
 بن سبب آتى يي بوليو رم . شويلاه که :

صوت ، حيوان ايله غيريسنك صوتنه منقسم اولور .
 صوت انسان دخى انسانك حلقندن (بوغازندن) وحلقنك
 غيريسندن حادث و حاصل اولان صوته منقسم اولور . حلق

انساندن حادث و حاصل اولان صوت دخی حدوث و حصولی شو متلفظ اولدیغمز حرفلر مثللو احوال مخصوصهیه مخصوص اولان صوته، برده بویه اولیان یعنی وجع و اضطراب و یا استراحت و اوکسورک حالنده آخ آخ آخ آخ دیفرك حدوث ایدن اصواته منقسم اولور. بناءً علیه (صوت) جنس بعید (لفظ) جنس قریب اولوب جنس قریبی ایراد ایسه جنس بعیدی ایراددن اولادر.

یکرمی التنجی مسأله

معتزله «کله نك مفید اولمه نك شرطی ایکی یاخود ده ازیاده حرفدن مرکب اولمه سیدر» دیمشه ده بوقوللرینی (ق) و (ع) کله لری نقض ایدر.

زیرا (ق) (ع) برر حرفدن عبارت اولدینی حالده ایکیسیده امر حاضر اولوب برر معنی افاده ایدر. واقعا معتزله طرفندن جواب ویرلمش که بونلر تقدیراً مرکبدرلر.

زیرا تنبیه حالنده (قیا) (عیا) دنیسی دلیلله ثابت اولدینی اوزره اصللری (ق) و (عی) در.

فقط جواب الجواب اوله رق دیش که «ترکب مقدردر! اما واقعه حرف واحددر»

معتزله نك بوقولانی کذلک لام تعریف، نون تنوین، اضافت دخی نقض ایدر.

زیرا بونلرک اوچیده مفید اولان حرفلردندر .
حرف ایسه بر نوعدرکه جنس کله تحتیده داخل اولوب
نوع، صادق اولدینی وقت جنس دخی صادق اولور . بناءً علیه
اشبو حرفلر مرکب اولماقله برابر برر کلهدرلر .

یکرمی یدجی مسأله

اولی اولان « هر منطوق به که بالوضع بر شیئی افاده ایدر
کلهدر » دنیلی که بو تقدیرده، مفردده مرکبده تعریفده داخل
اولور .

(منطوق به) قیدی خط و اشارتدن احتراز اچوندور .

یکرمی سکرنجی مسأله

الفاظک مدلولاتنه دالالتلری دلالت ذاتیه حقیقه دکلدور .
عباد، بورأیک خلافتندهدر .

بزم دلیلز — امکنه وازمنه نک اختلافیه الفاظ، تغیر ایدر .
ذاتیات ایسه الفاظ کبی اختلاف امکنه وازمنه ایله متغیر اولماز .
عبادک حجتی — « الفاظ معینه ایله معانی معینه بیننده
مناسبات مخصوصه اولمسه ایدی، الفاظدن هر بریسنک کندی
مساحنه تخصیصی ممکنک من غیر مرجح ترجیحی قیلندن اولمق
لازم کلیردی . بو ایسه محالدر . »

جوابمز

عالمك البته حادث اولديغي بر زمان وازيا؟ پك اعلى يا آندن
اول ياخود آندن صكره حادث اوليوبده حدوثنك او زمان
معينه اختصاصى نه دن نشأت ايدييور؟ ايمدى حدوث عالمك او
زمان معينه اختصاصى نصلسه الفاظك مسالرينه تخصيص دخی
او قیلندذر.

ایشته حدوث عالمك وقت معينه اختصاصى عبادك حجت
مسروده سنی نقض ایدر.

كذلك هر انسانك اسم علم معينه اختصاصیه ده عبادك
حجتی دوچار اشكال اولور.

يکرمی طقوزنجی مسأله

گاه بعض الفاظك معنای موضوع لهنه راست كله مناسب
دوشديكى ده اولور.

(قطا) دنیلان طير معروفه (قط) تسميه ايديشاری کبی.

چونکه (قط) لفظی قطانك صوتنه بکرده یور.

لقلقك لقلق تسميه اولنمسيده بو قیلندذر.

كذلك عربك قارپوز و خيار کبی رطب اولان شيلرك اكلنه
(خضم) ويا بس اولان شيلرك اكلنه (قضم) لفظلرينی وضع
ايديشاری دخی خاء مجمله حرفنك سسی ياش بر شی يينورکن
آغزده حاصل اولان خيشردییه وقاف حرفنك سسی قوری

بر شی ینورکن کذلک آغزده حاصل اولان قیجردی یه بکزه .
دیکندن باشیدر . ابن جنی (خصائص) ده بوکا دائر بر چوق
مثالیر ایراد ایتشدیر .

اوتوزنجی مسأله

الفاظک دالالتلری توقیفیه در دیه قطع و جزمه امکان بوله میز .
واقعا الفاظک دالالتلری توقیفیه اولدیغنی قطع و جزم ایدنده
واردر . حتی بو بابده عقل و نقل ایله ده احتیاج ایتشدیر .
دلیل عقلی

الفاظ مخصوصه نك معانی مخصوصه یه وضعی قولسز ممکن اوله ماز .
هر حالده سوزده ، تکلمه محتاجدر ، ایمدی اوسوز دخی بالفرض ناس
طرفندن وضع آخرله وضع اولنیش اولسه هر وضعک لا الی
نهایه وضع دیگرله مسبوق بولنشی لازم کلیر ، بوا یسه محالدر .
بناءً علیه توقیف الهی ایله حاصل اولان وضعه انتها لازم کلیر .
دلیل نقلی

(و علم آدم الاسماء کلها) نظم جلیلدر .

دلیل عقلی یه جواب

الفاظک معانی یه وضعی اشارات ایله ده حاصل اولمق نیچون جائز
اولسون ؟

دلیل نقلی یه جواب

حضرت آدمه تعلیم اسمادن مراد ، الهام اولمق نه دن جائز
اولسون ؟

و کذا جائز که بولغتري حضرت آدمدن اول موجود اولان اقوام وضع ايتمش بولنسونده مؤخرأ الله ذو الجلال حضرتلری جناب آدم عليه السلامه تعليم ايتمش اولسون .

اوتوز برنجی مسأله

الفاظ و لغاتك بالاصطلاح حاصل اولديغنهده جزم و قطعه امکان یوقدر . يالکز معتزله الفاظ و لغاتك بالاصطلاح حصولی ممکن اولدينی رأینده اولوب بروجہ آتی احتجاج ايتشدر .
دیشلرکه : صفته علم ، علم ضروری اولدينی حالده موصوفه علم دخی علم ضروری اولمش اولور .

ایمدی الله تعالى اشبو لفظی بومعنايه وضع ايتديکنه دائر قلب عاقلده علم ، خلق ايتسه علم بالله دخی ضروری اولمق لازم کلیر . بوايسه تکلیفك صحتی قاح و مانع اولور .
جواب

الله تعالى واضع کندي اولديغنه دائر علمی خلق ايتمکسزین يالکز « واضع لغات شو لفظی بومعنايه وضع ايتشدر » ديه قلبده علم ضروری خلق ايدر دنيلك نيچون جائز اولمسون ؟ بونك جوازی تقدیرنده اشکال زائل اولور .

اوتوز ايکنجی مسأله

وقتاکه شو دلائلك ضعفی اکلاشلديسه لغتلك کانہسی توقيفيهده

اوله بیلیر؛ اصطلاحیه ده اوله بیلیر، بعضیسی توقیفیه، بعضیسی اصطلاحیه ده اوله بیلیر؛ دیمه دن چکنیز.

اوتوز اوچنجی مسأله

لفظ مفرد البته کندی مسمانی مفید دکلدر.
زیرا او لفظك او معنایه موضوع اولدیغی بیلندکجه لفظ کندی کندی نه هیچ برشی افاده ایتمز.

لکن لفظ مفردك او معنایه موضوع اولدیغی بیلک اولفظ ایله او معنی بیننده کی نسبت مخصوصیه علمدر، بین الامرین مخصوص اولان نسبتیه علم ایسه لفظ و معنایک ایکیسندنه مقدم حاصل اولور. یعنی نسبت مذکوره بیلندکجه لفظ و معنی بیلنه مز. ایمدی اکر لفظك معنای موضوع لهنه علمزینه اولفظدن مستفاد اولسه دور لازم کلیرکه بو محالدر.

بوکا شوایله جواب ویرلمش که: خیالده لفظ معین ایله معنای معین بیننده مقارنت مستقر اولنجه احتمال که لفظه شعور حاصل اولدقده خیال معنایه منتقل اولور.
و بو تقدیرده دورك فسادی مندفع اولور.

اوتوز دزدنجی مسأله

مفردده کی اشکال مذکور، مرکبده حاصل دکلدر. زیرا الفاظ مفردده نك کندی معنایرینی افاده لری افاده وضعیه در. ترکیاتك افاده لری ایسه افاده عقلیه در.

بناءً على ذلك شو مفرداتی ایشیدنجه عقل آنلرک ترکیاتی
نظر دقت و اعتباره آیرده صکره اوترکیات عقلیه واسطه سیاه
او مرکباته تحصیل علم و وقوفه رهیاب وصول اولور. ایشه
آرده کی فرق ظاهر اولدی.

اوتوز بشخی مسأله

الفاظك دالتلری معانی ذهنیه منحصر اولوب مافی الاعیان
دالتلری یوقدر و بو سیدن ناشی «الفاظ، معانی یه دالت ایدر.
زیرا معانی عانی نك یعنی قاصدك قصد ایتدیکی شیلردرکه آنلرده
امور ذهنیه در» دنیلیر.



الفاظك دالتلری معانی ذهنیه منحصر اولدیغنه

برنجی دلیلمز

بز اوزاقدن بر جسم کور ویده آنی طاش ظن ایتسهک دیرزکه
شو کوردیکمز جسم بر طاشدر. صکره او جسمه براز دها یا قلا.
شویده آنی متحرک بر حالده کورمه مزله قوش ظن ایلسهک دیرزکه
خیر! بو قوشدر. دها صکره بستیون یا قلا شویده انسان اولدیغنی
یلنجه ینه دیرزکه خیر! بو انساندر.

ایمدی تصورات ذهنیه نك اختلافنده اسمانك دكیشی ویرمسی
دالت ایدرکه الفاظك مداولی صور ذهنیه دن عبارتدر . اعتبارات
خارجیه دکلدر .

ایکنجی دلیلمز

لفظ اگر موجود خارجی به دالت ایتسهیدی، بریسی «عالم،
قدیمدر.» دیکری ده (عالم، حادثدر.) دینجه عالمك هم قدیم،
همده حادث اولمسی لازم کلیردی، بو ایسه محالدر.
اما الفاظك دالتلرینی معانی ذهنیه منحصر قیلدینمز حالده
قولین مذکورین اشبو ایکی حکمك اشبو ایکی شخص مفروضدن
حصولنه دال اولمش اولوب ایکی شخصدن بویله ایکی حکم
متضادك حصولی ایسه تناقضی ایجاب ایتمز.

اوتوزالتنجی مسأله

جميع ماهياتك (معانی نك) الفاظ ایله مسمی اولمسی ممکن
اوله ماز. زیرا ماهیات، غیر متناهیدر. نهایتی اولیان شیلرك ایسه
علی التفصیل مشعوربه اولمسی ممکن دکلدر. مشعوربه اولیان
شئك ده یاننه اسم وضعی متمتعدر.

اوتوزیدنچی مسأله

افصاح و بیاننه اك زیاده احتیاج مس ایلان معنی هانکیسی

ایسه انك یاننه وضع لفظ اولنغه معانء سائر ددن اودها لایق و مناسبدر، او امر و نواهی، عموم و خصوص صیغه لری کبی .
 بونك دلیلی ده شودر که او معنای اهمی ا کلامغه حاجت مس ایدر . بناءً علیه او وضعه داعی، کامل و مانع، زائل اولور .
 داعی ایسه قوی و مانع زائل اولدینی وقت انك نعلی واجب الحصول اولور . یعنی ایش بو پرده سیه کلنجه افصاح و بیاننه احتیاج مس ایلیان معنای اهمی تعبیر و تعریف ایچون وضع لفظه مجبوریث الویرر .

اوتوز سکزنجی مسأله

عند الجمهور خفی اولان معنائك لفظ مشهور به ایله مسمی اولسی متمتع در .

مثالی — حرکت، لفظی بر لفظ مشهور در . جسمك بر جانبدن دیگر جانبه منتقل اولدینی ده هر كسك معلومیدر . متكلمین ایسه حرکتی بشقه درلو . تفسیر ایدر لر . دیرلر که « حرکت او انتقالی ایجاب ایدن معنادر » ایسته بو معنی بر امر خفیدر . زیرا بو معنایی حواص ناسدن بشقه سی تصور ایتمز . بویله اولدینی حالده « حرکت، نفس اشبو انتقالك استیدر ؛ انتقالی ایجاب ایدن معنائك اسمی دکادر . » دیمك لازم کلیر . و كذلك علم و قدرت، عالمیت و قادریتی موجب اولان معنائك اسمی دکل . بلکه علم، نفس عالمیتك، قدرت . نفس قادریتك اسمی او لمق لازم کلیر .

اوتوز طقوزنجی مسأله

معنی

معنی صورت ذهنيه نك اسميدر. موجودات خارجيه نك اسمی
 دكلدر. زیرا معنی قاصدك قصد ایتدیکی شیدن عبارتدر. بوشی
 ایسه بالذات امور ذهنيه و بالعرض اشای خارجیه دندز.
 ایمدی « قائل بر لفظ ایله اشبو معنایی اراده ایتدی. »
 دنیلیدی وقت مراد. قائل لفظی ذکر ایله او امر متصوری
 تعریف ایتك ایستدی دیمك اولور.

قرقنجی مسأله

بعض معانی واریکه الفاظ ایله تعریفلری ممکن اوله ماز.
 مثلاً، بز بال ایله شكرك طاتلیقلری آردسندگی فرقی حس
 ذوق ایله ادراك ایدرز. آغزیمزه آنجه بو بال، شوشکردردیرز.
 كذلك بعضاً تفتیمزده بر حال حاصل اولورکه آتی دخی لفظ
 ولسان ایله تعریفه مقتدر اوله مایز.
 بو طوغریدر.

زیرا واضع لغات بالک حلاوتیه شكرك حلاوتی بینندهکی
 فرقه دلالت ایدهجک بر لفظ معین وضع ایتماشدز. وضع ایتمش
 اولسه ایدی، ذوقاً حس ایتدی کمز شو فرقی لفظاً ولساناً دخی

تعریفه مقتدر اولوردق. حتی واضع آیری آیری هر طاتینک
حلاوته ده دلالت ایده جک الفاظ مخصوصه وضع ایتماش اولد.
یغندن ناشیدرکه هیچ بر طاتینک حلاوتی اضافتسز ذکر و بیانه
مقتدر اوله میورزده لدی الایجاب اضافتله بالک، شکرک حلاوتی
دیلمکه مجبور اولورز.

بعضاً تقسزده حس و ادراک ایلدی کمز حالات مخصوصه یی ده
لفظاً و لساناً تعریفه مقتدر اوله میثیز مجرد او حالاته دلالت
ایده جک مخصوص لفظلر وضع ایدلماش اولماسندن ناشیدر.
و چونکه مسعی اولجه مخاطبکده مدرك و معلومی اولدقچه سنک
خود بخود وضع ایده جکک استمدن کیسه بر شی اکلایه ماز. اشته
سبب بودرکه مثلاً سن نفسکده حس ایتدی کک بر حالی تعریف
ایچون کندیلککدن بر لفظ وضع ایده مزسین، ایتسه کده آنکله
کیسه یه دردینی اکلاته مزسین.

اما وقتیله هر طاتینک حلاوته دلالت ایده جک برر لفظ
مخصوص وضع ایدلمش و هر کس ده آتی بللمش اولسه یدی،
او حلاوتی اضافتسز دخی ذکر ایدیبایردک. کذلک بال ایله شکرک
و سائر حلویاتک آرمسند ذوقاً محسوس اولان فرقه دلالت
ایلیه جک برر لفظ مخصوص وضع ایدلمش اولسه یدی، بوفر قی ده
لفظاً تعریفه مقتدر اولوردق. بونک کبی سن نفسکده حس
ایدوبده آخرک محسوسی اولیان حالات مخصوصه یی وقتیله ده
بر چوق آدملر تصور ایدرک هر برینه بشقه بشقه برر لفظ

مخصوص وضع ایتش اولسه لردی، بونلرکده معانی سائره کبی
بیانات لفظیه ایله تعریفی ممکن اولوردی.

قرق برنجی مسأله

معانی به الفاظک وضعنده حکمت نهدر؟

معلومدرکه انسان جمیع حوایج و مهماتی بالاستقلال استحصاله
مقتدر اوله میه جق صورتده یارادلش اولدیغندن مطلقاً تعاون
و تناصره محتاجدر. تعاون و تناصر دخی هر حالده یکدیگره افاده
مافی الضمیر ایله تعاطی افکار و آرایه متوقف اولوب افاده مرا.
مه ده البته بر طریق و واسطه لازمدر. کتابت و اشارت کبی،
تصفیق بر (ال چریمق) کبی، اعضای سائره نی قید اتمق کبی،
طرق تعریف ایسه چوقدر. شوقدرکه طرق مذکور نك اسهل
واحسنی اشبو متلفظ و متکلم اولدیغمز الفاظک استعمالی اولدیغندن
ایشته معانی به الفاظک وضعنده کی حکمت بودر.

طرق تعریفک اسهل واحسنی بو اولدیغنه وجوه آیه دخی
دلالت ایدر.

وجه اول. — متنفس اولدیغمز نفس، درون دلدن خارجه
حیقدیغنده صوتک، واصوات، تقطیعاتی حالنده حروف مختلفه نك
حدودش سبب اولوب بو واسطه ایله معانی قلییه نك تعریف
و تنهیمی بغایت آسان اولور. بوقولایلق و کلفتسز نك ایسه کتابت
و اشارت کبی سائر طرق تعریفده بولنه ماز.

وجه ثانی - افادۀ مرام خدمتند ده قوللانديغمز بوسسلسر
وجودی عقبنده فانی اولیویرر. شویله که انسان افادۀ مرام
ایچون تکلمه محتاج اولنجه درحال صوت. حصوله کلیر و حاجت
زائل اولنجهده فانی ومنقضى اولور.

وجه ثالث - مخارج حروفده کی تقطیعات کثیره حسبیله
اصواتدن حروف کثیره تولد ایدر. و ترکیبات کثیره سی حسبیله
او حروف کثیره دن کلمات غیرمتناهیة حصوله کلیر. ایمی اوکلمات
حاصله دن هر مغنایه برکله تخصیص ایتدیکمزده الفاظ، التباس
واشتباهه محل قالمیه رق معانییه توزیع ایدلمش اولور. بونده کی
سهولت و محسناتک مثلی ایسه بدیهدرکه اشارت و تصفیق کی
سائر طرق تعریفده بولنه ماز.

ایشته شو اوج سیدن ناشیدرکه عمول سلیمه مافی القلوبک
احسن تعریفاتی الفاظ اولدیغنه حکم ایدر.

قرق ایکنجی مسأله

کمال انسان، حق حق طانیوب خیری دخی مقتضاسیله
عمل ایچون نیلدهدر. جوهر نفس ایسه اصل خلقتده بوکماللردن
عاری اولغله اردهه بوبدن خاکدانی واسطه اولمادجقه ممکن دکل
اکتساب کمال ایده مز بناء علیه مصنوع دست قدرت اولان بدن
انسانک خالق و تکوینی مجرد اشبو حکمتدن ناشی مطلوب اولدی.
برده محققدرکه قلب دنیلان کوشتپاره صنوبری الشکل

حرارت غریزه نك ینبوعی اولسه بو بدنك ده مصالحی تمام اوله.
ماز. و چونكه بو حرارت غریزه بغایت قوتلی بر حرارت
اولدیغندن لاجل التعدیل قلب ترویجه محتاج اولدی. بناءً علیه
رحیم، حکیم اولان صانع تعالی و تقدس حضر تلی بومقصودی
شویله تدبیر بیورمشدر.

قلبه بر قوه انبساط و یزمش که خارج بدنن هوای باردنی
کندینه جذب ایدر. آندن صکره بو هوای باردك درون دلدہ
بر لحظه طور مسیله سخونت وحدت و حرارتی شدت وقوت کسب
ایده کلدیکندن قلب آتی ینه خارجه دفعه محتاج اولور. انقباض
بودیمکدر. زیرا قلب، منقبض اولدجه ایچنده کی هوا صقیله رق
خارجه حیقار.

ایشته حیوانی متنفس قیلقدہ کی حکمت خدا بودر.

قصده اول ایله مقصود اولان شی ایسه جوهر نفس علم
و عمل ایله تکمیلدن عبارتدر. بناءً علیه بوکالی اکتسابه واسطه
منفردہ اولان بدنك خلق و تکوینی مطلوبیتك مرتبه ثانیه سنده،
وقلبی تخلیق ایله آتی حرارت غریزه نك منبعی قیلق مطلوبیتك
مرتبه ثالثه سنده، و لاجل الترویج خارجدن هوای طیبك المجذابی
موجب اولان انبساطه قلبی اقدار بیورہق مطلوبیتك مرتبه
رابعه سنده، و او هوای مخرفك خروجی ایجاب ایدن انقباضه ینه
قلبی قدرتیاب ایتك مطلوبیتك مرتبه خامسه سنده، و قلبك
انقباضی حالنده خارج اولان هوایی ماده صوته صرف ایدیورمك
مطلوبیتك مرتبه سادسه سنده واقع اولدی. صکرده مقدر حکیم

و مدبر رحيم اولان الله ذوالجلال حضرت تارى مرتبه سابعده
على سبيل الغرض واقع اولان اشبو امر مطالوبى ده ماده صوت
قيه رق حلق ولسان ولسان وشفتين ده صوته مخصوص برطاقم
محبسار، مقطع لر خلق ويجاد بيور مشدر كه اشبو مختلف حرف لر
و بو حرف لر ك تركيباتندن نهايت سز ككلر او سبيله حادث و حاصل
اولور. اندن صكرده اشبو نطق و كلامده برطاقم حكم عاليه
و اسرار باهره ايداع بيور مش كه عقول اولين و آخري انك
بجرندن برقطره ي، انك شمسندن برشعاليه بيله احاطه دن عاجز
قالمشدر.

(فسبحان المدبر بالحكمة الباهرة والقدرة الغير المتناهية)

قرق او چنجى مسأله

بيانات سابقه مزله ظاهر اولدى كه كلام لسانى نك معناسى
بر اصطلاح دن عبارتدر.

شويله كه: ناس قلوب و ضمائر ده دوران ايدن معانى يه اشبو
اصوات و مقطعه و حروف مركبه ي معرف قيه رق كلام لسانى
بو صورته ميدانه كلى. بالفرض والتحقيق مافى الضمير تعريف
وتعير ايجون اشبو اصوات مقطعه و حروف مركبه نك يرينه
بشقه شيار وضع ايتش اولسه لردى، او اشيا دخى بريكيلر كى
كلام اولوردى.

بويله اولنجه ديمك كه كلام لسانى علم و قدرت و اراده صقتارى
كى برصفت حقيقه دكل، بلسكه برامر وضعى اصطلاحيدر.

{ تحقیق }

«کلام انسانی، حیات و قدرت صفتلریله متصف اولان کیمسه نك
ضمیرندکی ارادات و اعتقاداتی آخره تعریف ایچون ایشلیدیکی
بر فعل مخصوصدن عبارتدر.»

بو حالده ظاهر اولور که انسانك بو حرفلرله متکلم اولمسندن
مراد، مجرد شو غرض مخصوص یعنی افاده مافی الضمیر ایچون
او حرفلرک فاعلی اولمه سیدر.

فاما کلام نفس که ذات متکلم ایله قائم اولان معنادر. بو کلام
انسانی کبی اولیوب غلم و قدرت و اراده صفتلری کبی بر صفت
حقیقه در.

قرق دردنجی مسأله

وقتا که الفاظ، مافی الضمائر و القلوبك دلائلی ایدوکی ثابت
اولدیسسه اشبو الفاظك مدلول علیهی دخی ارادات و اعتقادات
یا خود نوع آخر اولمق لازم کله جکندن معتزله (افعل) صیغه سی
اراده فعل ایچون موضوع بر لفظ سدر. (خبر) دخی (اوقائلك
فلان شی شویله بویله در دیه اعتقاد ایدر اولدیغنی تعریف ایچوندر.)
دیدی.

بزم اصحابم زده (طلب نفسانی اراده یه مغایر در. حکم ذهنی
دخی اعتقاده مغایر. بر امر در.) دیدیلر.

طلب نفسانی نك اراده یه مغایر اولدیغنه دلیلر

متفق علیهدرکه الله تعالی و تقدس حضرتلری کافرده ایمان ایله امر ایتمش و لکن کافرك ایمانی اراده ایتماشدر . اراده بیور . سه ایدی . کافر کفرده قالماز مؤمن اولوردی . بوکاده شو ایکی وجه آتی دلالت ایدر .

وجه اول . - کاترك قدرتتی اکر کفری موجب ایسه او قد . رتك خالق کفری مرید اولمش ديمك اولور . زیرا مرید علت ، مرید معلولدر .

واکر کفر و ایمانك ایکیسنه ده صالح ایسه چونکه مرجع حسن احد همانك آخر اوزرینه رجحانی متمتع ایدوکندن مرجع یا عبد یا الله اولمق لازم کلیر . اکر مرجع عبدر دیرسه بو حالده تقسیم اول عودت ایدر . اکر ترجیح طرف الهیدن ایسه بوتقدیرده قدرت و داعیه نك مجموعی کفری موجب اولمش اولور . مرید علت ایسه مرید معلولدر . او یله ایسه کافردن کفری مرید اولان الله تعالی و تقدس حضرتلری ایدوکی ثابت اولدی .

وجه ثانی . - الله تعالی کافرك کفر ایده جکنی بیلیر . بو علمك حصولی ایسه ایمانك حصولنه ضددر . ضدین یئنی جمع دخی محالدر . برشیئك متمتع الوقوع اولدیغنی بیان ذات ایسه آتی اراده ایتمز .

ایمدی الله تعالی کافر ایمان ایله امر بیورمش اما انك ایمانی اراده بیورماش اولدیغنی ثابت اولدی . بناءً علیه امر الهینك

مدلولی اراده دن بشقه برشیدک فعلی اولق لازم کلیر . وهو المطلوب .

حکم ذهنی نك اعتقاده علمده مغایر اولدیغنه دلیل
بریمی « عالم، قدیمدر . » دیدکده بوقولک مدلولی قائلنک
قدم عالمه حکمندن عبارت اولوب حال بوکه بعضاً قائل هم بویله
« عالم، قدیمدر » دیر همده عالمک قدیم اولمادیغنی اعتقاد ایدر .
بوندن بیلیرکه حکم ذهنی حاصل ، اعتقاد غیر حاصلدر .
آنک ایچون حکم ذهنی اعتقاده مغایردر .

قرق بشنجی مسأله

الفاظک مدلولاتی بعضاً الفاظه مغایر شیر اولور .
سما و ارض لفظلری کبی .
بعضاً دخی الفاظک مدلولاتی ینه الفاظ اولور .
اسم ، فعل ، حرف ، عام ، خاص ، مجمل ، مین قولمز کبی .
چونکه بولفظلر بر طاقم استلردرکه مسعاریده ینه الفاظدر .

قرق التنجی مسأله

لغات یلمه نك یولی
لغات یالکز عقل ایله بیانک محالدر .
لغات یالکز نقل متواتر ، وزوایات آحاد ایله بیلمه بیلیر .
و صحیح اولانده بودر .

کرچه عقل و نقلدن مرکب اولان استدلال ایله ده بیلنیر
دینلر اولمش و چوق کیمسه لرده بر چوق لغاتی اثباتده بو یولی
طوتمش ایسه ده بو طریق استدلال ضعیفدر .

عقل و نقلدن مرکب استدلال

مثلا دیرزکه : (من) صیغه سی اوزرینه استئانک ادخالی جائز
اولدینی نقل ایله ثابتدر . و کذا استئانک حکمی اول شیئی
اخراجدرکه اگر اخراج اولنسه مستثنی منهدده داخل اولور» دیه
ینه نقل ایله ثابتدر .

ایمدی شو ایکی نقلک مجموعندن بحکم العقل (من) صیغه .
سنک عمومه موضوع اولسی لازم کله جکی استدلال اولور .
شوقدرکه بو استدلالک صحیح اوله یلسی مقدمین مذکور تینک
واضعی دخی اشبو ملازمه یی معترف اولمغه متوقفدر . یوقسه یعنی
واضع بونی معترف اولمازسه تناقض لازم کلیر .

لکن واضع لغات اگر الله تعالی و تقدس حضرتلری اولدینی
ثابت اولورسه انک ذات پاکنی مناقضه دن تنزیه ، واجب اولور .
اما واضع او دکلده ناس ایشسه چونکه ناس ، کلاملرنده
تناقض ایدیه بیله جکلرندن انلری مناقضه دن تنزیه لزوم یوقدر .
و وقتاکه اشبو اصل ، مشکوک اولدیه دلیل دخی اصلی کبی
مشکوک اولور .

یعنی مادامکه واضع لغات جناب اللهم ی ناسمی کیدر؟ بوراسی

قطعياً ثابت اولیوب دائرۂ شك و اشتباهده قالمشدر . بویابده ایراد اولنان دلیل دخی كذلك مشکو کیندن قور تیلهماز .

قرق یدنجی مسأله

بزه منقول اولان لغاتک بعضیلری تواترله ، بعضیلری ده روایت آحاد ایله منقولدر .

اهل لساندن بعضیسی شو استعمال ایده کلدیکمز لغتک تواتراً منقول اولدیغنی قبول ایتیوب دیمش که :

اشهر الفاظ ، لفظة (الله) در . حالبوکه اشبولفظه جلاله دهده اختلاف ، واقع اولوب کیمی دیدی که (الله) لفظی عربی دکدر ؛ عبری در . کیمی دیدی که اسم علمدر . بعضیلری ده اسمای مشتقه دندر دیوب کیفیت اشتقاقده اون وجه ذکر ایلدیلر . ایسته امر بو آنه دک شو اختلافات ایچنده موقوف قالمشدر .

کذلك الفاظ مشهوردن اولان (ایمان) و (کفر) لفظلرندهده اختلاف شدید ایله اختلاف ایتدیلر . بونک کبی اوامر و نواهی ، عموم و خصوص صیغهلری مختلف فیها اولوب مع هذا که بونلرده الفاظ مشهوره دندرلر .

ایمدی دوشونملی که اظهر و اشهر اولان الفاظک حال و شانی بو اولورسه یا ظهور و شهرتی بو درجهده اولیان الفاظک تواترینه فصل اینانیله بیلیر ؟

دها طوغریسی آرانیرسه دیرزکه الفاظ مذکوره نك اشبو
اصول مواردده ورودی تواترله معلومدر. ماهیات و اعتباراته
کلنجه ایشته مختلف فیها اولان بونلردر. فقط انلرک مختلف فیها
اولسی فی الاصل تواترک حصولنده قدحی موجب دکلدر.

قرق سکنجی مسأله

کیسی ده « اشبو الفاظک بعضیسنده یالکز حال حاضرده
تواترک حصوانی تسلیم ایلدی. شوقدرکه ادوار ماضیه نك حالی
معلوم اولمדיنی ایچون جائرکه ادوار ماضیه نك بعضیسنده نقل،
روایت آحاده منتهی اوله. و بر کیسه (اگر ادوار ماضیه نك
بعضیسنده نقل، آحاده منتهی اولسه یدی. مشتهر وحد تواتره
بالغ اولوردی) دیه مز. زیرا بو مقدمه صحتی تقدیرنده بیله وقائع
عظیه حقیقه صحیح اوله بیایر. تصرفات الفاظه کلنجه: بونلرک
وقائع حقیردن اولسیله اشتهاری وحد تواتره بلوغی لازم کلز.

طوغریسی بودرکه مثلاً سما، ارض، جدار، دار لفظلرینک
و اشتباهنک ازمه ماضیه ده کی حالاری بو زمانده کی حالاری کی
اولدیغنه علم ضروری حاصلدر.

قرق طقوزنجی مسأله

شك يوق که لغتلك اکثری روایت آحادایله منقولدر . واحدك
روایتی ایسه ظندن بشقه برشی افاده ایتمز .

برده احادیث شریفه نبویه نك راویلری حقنیده بر چوق
شرطلره رعایت اولمقده اولدینی حالده لغتلك راویلری حقنیده
اولیه شرطلره رعایت و اعتبار ایتماشلردر . مع هذاکه لغات
احادیث شریفه نك اصولی مجراسنده جایددر .

اشبو سؤالی مؤکد اولان احوالنددر شوکه ادباندن بعضیلری
یکدیگرنی کاهجهیل وکاهتفسیق ایله طعن وتشنیع ایتدی . کوفیون
ایله بصریون آرمسنده حاصل اولان عداوت دخی مشهوردر .
اکثر محدثینک اکثر اربابی مالاینغییه نسبت ایدیشی ده کذلک
مشهوردر .

بویله اولدینی حالده ادبانک روایتلری مقبول اوله ماز .
ایشته بو طریق ایله لغاتک اکثری درجات قبولدن ساقط
اولور .

طوغریسی بودرکه: لغتلك چوغی تواتره قریبدر . وبوطریق
ایله اشبو طعن دخی ساقط اولور .

المنجی مسأله

الفاظك معنایه دلالتلری دلالت ظنیه در .

زیرا الفاظك معنایه دلالتلری هم لغاتك . هم اعرابات
و تصریفاتك تقاضیه موقوفند . مع هذا اوناقلارك اوائل احواله
نظار اولنورسه هر برینك خبری خبر واحد اولدینی اكلاشیلیر .
روایت آحاد ایسه ظندن بشقه برشی افاده ایتیز .

كذلك الفاظك معنایه دلالتلری عدم اشتراكه (۱) عدم
مجازه (۲) عدم ثقله (۳) عدم اجمالیه (۴) عدم تخصیصه (۵) عدم
معارض عقلیه (۶) موقوفندركه معارض حاصل اولدینی تقدیرده
لفظی مجازده صرف ایتك لازم كلیر .

اشبو مقدمات منیهیه اعتقاد ایسه شك یوق كه ظن محضدر .
ظنه موقوف اولان دخی ظن اولمغله اولادر . والله اعلم

(۱) لفظك معنای واحدہ منحصراً اولسی (۲) لفظك وضع اول ایله
موضوع اولدینی معناده مستعمل اولسی (۳) لفظك وضع اول ایله موضوع
اولدینی معنادن معنای اخره منقول اولماسی (۴) معناتك بیانیه محتاج
اولماسی (۵) لفظك الفاظ عمومندن اولماسی (۶) لفظك متشابهاتندن
اولماسی .

(المترجم)

باب ثانی

صوت و حروفدن مستنبط اولان مباحثه و صوت و حروفك احكامنه
دائر اولوب چند مسأله بی مشتادر

بر نحی مسأله

رئیس حکما ابوعلی بن سینا صوتی تعریفده « انه کیفیة تحدث
من تموج الهواء المنضغط بین قارع و مقروع » دیمش که: ترکیه سی
« صوت، قارع و مقروع یعنی یکدیگریته شدتله ضرب ایدیلاں
ایکی جسم متصوت آردسده صیقیشان هوانك تموجدن حادث
اولور بر کیفیتدر. » دیمکدر. بن دیرم که. ماهیت صوت عضو
سمع اولان قولاقله حس و ادراک اولنور.

موجودات ایچنده ایسه محسوسدن اظهر برشی یوق که
محسوس انکله تعریف اولنه یلسون،

بناء علیه ابن سینانك بو سوزی صوتك سبب حدوثه
اشارتدر. یوقسه ماهیتی تعریف دکلددر.

لیترجم، درویش پاشانك حکمت طبعیه کتابنده مذکور
درکه: هر هانکی جسم الاستیقینك بر سبب خارجینك تأثیرله

جزء فردلری وضعیت اصلیه لرندن خروج ایسه اجزای مرقومه
ینه اول وضعیتی اخذ ایتک ایچون بر طاقم حرکات رقاصیه اجرا
ایدرك اشبو حرکات، جسمه دخی سرایت ایدر.

ایشته حرکات رقاصیه مذکوره پک سریع اولدقلری حالده
» اهتزازات تعبیریه معروف اولوب ذکر اولان جسم الاستیقی
بو مثالو اهتزاز ایلدیکی صورتده دروننده بولندیغی واسطه نك
تموجنی دخی موجب اولغله کندوسنك اهتزازندن حادث اولان
کیفیه «صدا» ویا «صوت» اطلاق اولانه رق اول دخی واسطه.
نك تموجی حسیله عضو سمع اولان قولاغه بالوصول حس
اولنور. و بو جهته صدا حاصل ایدن جسم الاستیقیه دخی
» جسم متصوت « تسمیه قلنور.

شو مناسبتله الاستیقیتکده تعریفی لازم کلکله بند آئی
کذلک کتاب مذکوردن عیناً نقل ایلرز.

اجسامک جزء فردلری اکثراً تضیق واسطه سیله وضع
اصلیلرندن آیرلدقلرنده یعنی بر برلرینه ده ازیاده تقریب اولند.
قلرنده اجزای مرقومه بیننده واقع قوه دافعه زیاده لشوب اول
جزئلری تقریب ایدن سبب رفع اولندیغی کبی ینه وضع اصلیلرینه
بالورود اول وضعی بر مقدار مرور وینه کیرویه عودت ایدوب
تکرار وضع اصلیلرینه کادکدن صکره اول وضعی ینه بر مقدار
مرور وبعده عودت ایدرك بو سیاق اوزره بر طاقم حرکات
رقاصیه دن صکره وضع اصلیلرندن ساکن قالورلر.

ایشته اجزای مرقومه نك بو مثالو حرکات رقاصیه لرینک

اوچنجی مسأله

بعضیاری «صوت، اجسام صلبه نك اصطكاکی یعنی طوقو . شمسیدر .» دیمش اینسه ده بو طوغری دکلدر . زیرا اصطكاك دنیلان طوقوشق بر تماشیدن عبارتدر . تماش است ایسه مبصر اتدن اولوب حال بوکه صوت ، مبصر اتدن دکلدر . کیسی ده دیدی که «صوت، نفس قرع — یاخود — نفس قلعدر .» یعنی صدا بر جسمه دیگر بر جسم ایله خیزلیجه اورمق ، یاخود بر جسمی دیگر جسمدن خیزلیجه قوبارمق دیمکدر . کیسی ده دیدی که «صوت، حرکه نك تموجیدر .»

بو تعریفاتك ایسه هیچ بریسی طوغری دکلدر . زیرا احوال مذکوره مبصر اتدن اولوب صوت ایسه غیر مبصر در . والله اعلم

دردنجی مسأله

دنیلدی که : صوتك سبب قریبی تموج هوادر . تموج دنده مراد من بر مبدأ معیندن بر منتهای معینه دك حرکت انتقالیه دیمك دکلدر . بلکه مراد هوانك تموجنه شیه اولان بر حالتدر . زیرا تموج هوا ، صدمات و سکنات متعاقبه ایله شیئا نشیئا حادث اولور بر امردر .

تموجك سببی ایسه یا اساس عنیفدر که قرع بودر . یاخود تفریق عنیفدر که قاعده بودر .

بو مجتک تحقیقی ارزو ایدن کتب عقلیه مزه مراجعت
ایتسون .

بشنجی مسأله

الشیخ الرئيس ابو علی بن سینا حرفی تعریفده «انه هیئت
عارضه للصوت تميز بها عن صوت آخر مثله في الحقة والقل
تمیزاً فی المسموع» دیمش که ترکیه سی «حرف، صوته عارض بر
هیئتدرکه خفت و تقلده مثلی اولان صوت آخردن او هیئت
واسطه سیله مسموعده تمیز ایدر» دیمکدر .

التنجی مسأله

حروف یا مصوته اولورکه بونلر نحو ده مد ولین تسمیه
قلنان حرفلر اولوب بونلرله ابتدا ممکن اوله ماز . یاصامته اولورکه
بونلرده مصوته نک غیری اولان حرفلر در . صدالی دیمک اولان
حروف مصوته یه کلنجه شبهه یوق که بونلر صوته عارض اولان
هیئتدندر .

صداسز حرفلر دیمک اولان صوامته کلنجه : بونلردنده با،
تا، دال، طاکبی بعضیلری وارکه آنلرک تمیدیدی ممکن اوله ماز .
و حروفک هرایکی قسمی ده نفسک آخر زمان حبسیله اول زمان
ارسالی اولان آنده حاصل و حادث اولور . حرفلرک صوته
نسبتی نقطه نک خطه، آنک زمانه نسبتی کی در .

حرفلر نه اصواتدر، نه ده عوارض اصواتدر. حرفلر اصواتك
مبدأ حدوثنده حادث اولور شيلردر.

حرفلره «حرف» تسميه سيده كوزل بر تسميه در.

زيرا حرف، طرف ديمك اولوب بو حرفلر دخی اصواتك
اطراف و مباديسيدر.

صداسز حرفلردن بحسب الظاهر تمديدی ممکن اولنلرده
واردر.

صكره اشبو صداسز حرفلر دخی ايكي قسمه آريلير.

بر قسمی حا، خا کبی حرفلردر که بونلر هر تقدیر بحسب الحس
زمانية الوجود ايسه ده ظن غالبه کوره نفس الامرده آنية الوجوددر.

زيرا حا، خا حرفلری هر نه قدر بر برینی تعقيب ایدن آنا تده
حاصل اولور کبی ظن اولنور سه ده نفس الامرده هر بریسی آنی
الوجوددر.

لکن حس، بعضيسنك بعضيسندن ممتاز اولديغنی فرق ايده
مديکندن آنلری حرف واحد زمانی ظن ايلر.

ديگر قسمی سین، شين کبی حرفلردر که بونلرده ظن غالبه
کوره حقیقتده زمانية الوجوددر. زيرا بو حرفلر صوته عارض،
وصوتك استمراريله مستمر اولور هيئتلردر.

يدنجی مسأله

حرف، مطلقاً يا ساکن، يا خود متحرك اولور.

بو تعبیر ایله مراد من حرکت و سکون، حرفه حلول ایدر
 دیمک دکلدر. زیرا حرکت و سکون، اوصاف و خواص عمومی
 اجسامدندر. بوراده حرکت و سکون ایله مراد حرف صامتک
 عقینده صوت مخصوص ایله حاصل و حادث اولان حالتدر.

سکونجی مسأله

حرکه لر صدالی حرفلرک ابعاضیدر.
 بوکا دلیلزده شودرکه اشبو صدالی حرفلر زیاده و نقصانی
 قبول ایدرلر.

نقصان جانبنده ایسه اشبو حرکاتدن بشقه طرف یوقدر.
 برده اشبو حرکات، مد اولندقدده صدالی حرفلر حادث
 اولورکه بوده حرکه لر صدالی حرفلرک ابعاضی اولدیغنه دلالت
 ایدر.

طقوزنجی مسأله

صداسز حرف، حرکه تسمیه اولنان صدالی حرف مقصور
 اوزرینه متقدم و سابقدر.

دلیلزده شودرکه اشبو حرکات ایله تکلم، حرف صامتله
 تکلمه موقوف اولدیغند، اگر حرکات، صداسز حرفلر اوزرینه
 متقدم و سابق اولسه ایدی دور لازم کلیردی. دورایسه محالدر.

اونجی مسأله

حروف و اصواتدن مرکب اولان (کلامک) قدیم اولمه سی
ممتنع در ديه عقل بالبداهه حکم ایلر .

بونک بداهتی ده ایکی وجهدن ناشیدر .

وجه اول . — حرفلری متوالی اولمقجه کلمه، کئیه اوله ماز .

ایمدی منقضی اولان حرف اول محدثدر . زیرا عدمی ثابت

اولانک قدمی ممتنعدر .

برنجی حرفک انقضاسندن صکره حادث اولان حرف آتی

دخی اولکیسی کبی شبهه یوق که حادثدر .

وجه ثانی . — کلمه نک متألف و مرکب اولدیغی حرفلری

هپسی دفعهً واحدهً حصولی فرض اولنسه کلمه حصوله کلمه مز .

زیرا مثلاً کلمه ثلاثیه نک اتی وجهله تقابلی ممکندر . بناءً علیه

او کلمه نک متألف و مرکب اولدیغی حرفلرک یکدیگری ولی و تعقیب

ایتمه رک اوچی بردن حاصل اولسه بیله کلمه نک تقالیب سته سندن

یالکز بریسی میدانه کلمه بیلیر اوته کیلر قالیر .

حالبوکه وجوه سته مذکوردهن برینک وقوع و حصولی

دیگر لرینک وقوع و حصولندن اولی دکلدر .

وجوه متروکه نک ترکنده بر سبب یوقدر .

واکر کلمه نک متألف اولدیغی حرفلر اولیه دفعهً حاصل

اوله میوبده بیلدیکمز کبی علی التعاقب حاصل یعنی حرف ثانی نک

حدوث و حصولی حرف اولك انقضاسنه متوقف، اولورسه
 ديمك كه اشبو حروف واصواتدن متركب اولان كلامده حادثدر.
 حروفك قدمنه قائل اولنلر دخی بروجه آتی عقل ونقل ایله
 احتجاج ایتشلددر.

عقل ایله احتجاجلری

«هر حرفك بر ماهیت مخصوصه سی واردر كه او ماهیت،
 اعتباریله یكدیكرندن ممتاز اولور. ماهیات ایسه زوال و عدم،
 قبول ایتمز. بناءً علیه حرفلر قدیمدر.»

نقل ایله احتجاجلری

«محققدر كه كلام الله قدیمدر. كلام الله دخی بو حرفلردن عبا.
 رتدر. بناءً علیه بو حرفلرك قدمنه حكم ایتك لازم کیر.»
 كلام اللهك قدیمی بخته کلتجه: بدیهیدر كه كلام، صفت کالدر.
 عدم كلام دخی صفت نقصدر.

ایمدی آكر كلام الله قدیم اولمنه حاشا «الله تعالی ازلده ناقص
 ایشده صکره مالایزالده کامل اولدی.» کی مناسبتسز برسوزك
 تقوهنه جواز ویرمك لازم کیر. بو سوز ایسه اجماع مسلمین
 ایله باطلدر.

«كلام الله بو حرفلردن عبارتدر.» دیشمرك بر قایج وجهی
 واردر.

وجه اول. — الله تعالی (وان احد من المشركين استجارك
 فأجره حتى يسمع كلام الله) نیورمشدر.

مع هذا معلومدرکه مسموع اولان کلام بو حرفلردن بشقه سی
دکلدر .

بناءً علیه بو آیت جلیله دلالت ایدرکه کلام الله شو حروف
مسموعه در .

وجه ثانی . — بر کیمسه کلام اللهم سماعی اوزرینه یمین ایتسه،
صکره اشبو حروف قرآنییه ایشته اوزرینه بروختن ترتب ایدر.
وجه ثالث . — بزه تواتر ایدر نقل اولغشدرکه نبی اکرم صلی الله
علیه وسلم افندمن « اشبو متلو و مسموع اولان قرآن. کلام الله در. »
بیورلردی .

بناءً علیه بونی منکر اولان دین محمد علیه الصلوٰۃ والسلامدن
تواترله بیلنان شیئی منکر دیمک اولوب اکا کفر لازم کلیر .

احتجاج عقلیه جواب

بودیدیککز یالککز ماهیت حروفه مخصوص ومقصودکلدر .
ماهیات سائرهنک دخی شانی بودر . بناءً علیه بواسطه استدلاله معتمد
ایسه کز کافه ماهیاتک قدمنه قائل اولمکز لازم کلیر .

احتجاج نقلیه جواب

اشبو استدلالککز بدیهیات مقابلنده خفی اولدیغندن باطلدر .

اون برنجی مسأله

اشبو حروف متوالیه واصوات متعاقبه ایچون . « بونلر کلام
الله در » دیدیکمزده ذات الله ایله قائم اولان صفتیه دلالت ایدن

الفاظی اراده ایتش اولورز . بناءً علیه حروف واصوات مذکو .
 رديه اسم کلامک اطلاق یعنی بونلره کلام الله دیشلی علی سبیل
 المجازدر .

حنت وبر، سوزینه کلنجه : برمنوال محرر حروف واصوات
 قرآنیه نک سماعندن حنت وبرک تری یمینلرک بناسی عرف اوزرینه
 مبنی اولدیغیچوندر .

وصورت مطلقهده «کلام الله قدیمدر .» دیدیکمزده بوافاده .
 مزله اشبو الفاظ وعباراتک مدلولی اولان صفت قدیمه الهیهدن
 بشقه سنی اراده ایتیز .

و «کلام الله حضرت محمد صلی الله علیه وسلم اقدمزک
 معجزه سیدر .»

دیدیکمزده حدوتلری بدیهی اولان اشبو حروف واصواتی
 قصد واراده ایدرز .

زیرا ذات الله ايله قائم اولان صفت کلام که قدیم اولان
 اودر، حضرت محمد علیه الصلوة والسلام اقدمز زینتساز عالم
 امکان ووجود اولمهدن مقدم دخی موجود ایدی .

بناءً علیه اوکلام قدیم نفس رسالتیناه اقدمز حضرتلرینک
 معجزه سنی نصل اوله بیلیر ؟

و «کلام الله، سور و آیاتدر .» دیدیکمزده دخی ینه بوحرقلری
 قصد واداده ایدرز .

و «کلام الله . فصیحدر .» دیدیکمزدهده اشبو الفاظی اراده
 ایلرز .

و کلام اللهی تفسیره شروع دنده مقصود منینه الفاظ قرآنی
تفسیردن عبارتدر

اون ایکنجی مسأله

حشویله قرائت قرآن ایدن انساندن ایشتدیکمز اصواتک
عین کلام الله اولدیغنی زعم ایدرلر! حشویه نك بوزعمی ایسه
باطلدر. زیرا بز بالبداهه بیلیرزکه اشبو انساندن ایشتدیکمز
حروف و اصوات او انسانک لسانیه. سسلریله قائم بر صفتدر.
بناءً علیه اکر او حروف و اصوات مستوعه نك عین کلام الله
اولدیغنه قائل اولسه ق او حالده صفت واحده نك بعینها هم ذات
الله ايله قائم اولدیغنه و هم انسانک بدننه حلول ایتمش بولندیغنه
قائل اولمه من لازم کایر. بو اعتقاد ایسه بالضروره معلوم الفساددر.
حشویله نك بو زعم فاسدلی نصارانک «اقنوم کله، ناسوت
صریحه حلول ایتدی.»

وینه «اقنوم کله، حضرت عیسی علیه السلامک نا سوتنه
حلول ایتمش اولمغله برابر الله تعالی و تقدس حضرتلرینک صفتدر.
و آندن زائل دکلدیر» دیدکلرینک عیندر.
زیرا حشویه نه دیور؛ «کلام الله بو انسانک لساننه حلول
ایتشدیر.

مع هذا ذات الله بنده زائل دکلدیر. «دیور.
قولین اراسنده ایسه هیچ بر فرق یوقدر. شوقدرکه نصاری

بو قولی یالکز حضرت عیسیٰ علیہ السلام حقنده ایراد ایلدیلر.
 حالبوکه احمق حشویلر مشرقدن مغربه دک دنیا ده کی ناسک هپسی
 حقنده بو قول خییثی تفوهه جرات ایتمش اولدیلر.

اون اوچنجی مسأله

گرامیلر «کلام، سوزده قادر اولمه نك اسمیدر.» دیدیلر.
 و بو بایده «نطقه قادر اولانه هر نه قدر حال حاضرده سوزله
 مشغول اولمسه دخی ینه متکلم دیر. كذلك کلامک ضدی
 خرسدر. خرس ایسه سوز سوزله دن عاجز اولمقدیر [۱]
 بناءً علیه کلام دخی سوز سوزله یه قادر اولمقدن عبارت
 اولمق لازم کلیر.» یولنده استدلال ایلدیلر.
 بونلر دیمک ایسترلرکه «الله تعالیٰ و تقدس حضرتلرینک
 سوز سوزله یه قدرتی قدیم اولدیغندن بو معناه کلام الله قدیمدر.
 اما سوز حادثدر.»
 ایشته سوزلرینک تفصیلی بواولنوب بڑ ایسه انلرک بوسوز.
 لرینی ابطال ایتشمزدر،

اون دردنجی مسأله

حشویلر، اشعریلره دیمشلرکه: اگر قرآن، قدیمدر دیمه دن

[۱] خرس، فتحینه درکه دیاسزلک دیمکدر.

مراد کز اشبو قرآن، جمیع مأمورات و محرماته متعلق اولان صفت قدیمیه دالدر دیمک ایسه دنیاده تصنیف اولمش اولان هر بر کتابکده قدیم اولسی لازم کلیر. زیرا او هر بر کتابکده برر مدلولی، برر مفهومی واردر. و چونکه کلام الله جمیع متعلقاته تعلقی عام و شامل اولدیغندن کلام الله مصنفات مذکوره دن هر برینک مدلولاتندن ده بر خبر اولمش اولور.

ایمدی بو تقدیر و تفسیره کوره قدیم اولمقدن قرآن کریم ایله بر طاقم فحش و هجوی متضمن اولان سائر کتب مؤلفه بیننده فرق قالمز.

و اگر قرآنک قدمندن مراد شوندن بشقه بروجه ایسه او وجهی ده بیان و ایضاح ایتمکز لازم کلیر.

اشاعره نك جوابی — بز کلام اللهک جمیع مخبراته متعلق اولسنی التزام ایتمز.

بو تقدیرده اشبو سؤال ساقط اولور.

معلوم اولسونکه هر اخبار اولنان شی طوغری اولمق لازم کلز. مخبراتک لابد یالافی ده واردر.

کلام اللهده ایسه احتمال کذب، محالدر. آنک ایچون کلام الله جمیع مخبراته تعلق ایتمز دیورز.

ظن اولنسون! بزم کلام اللهک جمیع مخبراته متعلق اولسنی التزام ایتیشمز بوندن ناشی دکلدر.

زیرا الله ذو الجلال حضر تلی: بعض اقوامك اناذیب
 و فحشیاتی اخبار ایتدکرینی ده اخبار بیور مشدر.
 بناءً علیه جناب حقك بو اخباری کذب اولماز.
 کلام اللهک جمیع مخبراته تعلقی مجرد الله تعالی و تقدس حضر.
 تلیخی نقائصدن تنزیهه راجع اولان بر امر دیکردن ناشی منع
 اولنور.

زیرا اشبو فحشیات و سخیفاتک اخباری مجرای نقصده
 جاریدرکه بو جناب حقه کوره محالدر.

معاونم اولسون که حروفک، صوتک، مباحثی و حروفی فاعل
 اولان عضلاتک تشریحی و قدم قرآن حقنده کی اشکالات مذکو.
 رهنک بیانی پک کوچ پک دقیق شیر اولوب بناءً علیه بو قدرله
 اکتفا ایتک اولادر. والله اعلم بالصواب.

باب ثالث

اسم و فعل و حرفه متعلق مباحث بیاننده اولوب مسائل
شعابی مشتملدر

برنجی مسأله

معلوم اولسون که کله نك شو انواع ثلاثیه تقسیمی ایکی وجه
ایله ایراد ایتک ممکندر.

برنجی — کله یا کندیسندن یاخود کندیسيله اخبار صحیح
اولور که بو (اسم) در.

یاخود کندیسندن اخبار صحیح اولمازده یالکز کندیسيله اخبار
صحیح اولور که بو (فعل) در.

یاخود نه کندیسندن نه کندیسيله اخبار صحیح اولور که بوده
(حرف) در.

« اسمدن اخبار صحیح اولور اما حرف و فعلدن اخبار صحیح

وقت فعلك عملی كی عمل ایدر «دیمشار». بناء علی ذلك اسم
فعلك حال و استقباله مقصوریتی تسلیم ایتیز.

سكزنجی مسأله

كلمتك معناسی معلومیت و مفهومیته یامستقل اولور یا اولماز.
ایکنجیسی حرفدر.

ایمدی حرفك اسم و فعلدن امتیازی قید عدمی ایله در.
معناسی معلومیت و مفهومیته مستقل اولان کلمه کلنجه:
بودخی کندی مستاسنه مخصوص اولان زمان معینه یادلالت ایدر.
یا ایتیز.

بونك ایکنجیسی دخی اسمدر.

ایمدی اسم دخی فعلدن قید عدمی ایله ممتاز اولدی.
فعلك ماهیتیته قیود وجودیه ایله مترکبدر.

طقوزنجی مسأله

صیغه ماضی معلوم اوزره (ضرب) دیدیکمزدده بو قولمز
علی الاطلاق برشیدن ضربك صدورینه دلالت ایدر. شو قدرکه
اوشی ئی اشبو (ضرب) لفظی علی التعین ذکر و ایضاح ایتیش اولماز.

سؤال

دیر لسه که بو محالدر. محال اولدیغنه ده شوایکی وجه دلالت ایدر.

وجه اول . — اگر او یله اولسه یدی یالکز باشنه صیغه نعلک
صدقه کذب احتمالی اولوردی .

وجه ثانی . — (ضرب) صیغه سی اگر نفس الامرده ضربک
بر شی مبهمه اسنادینه دلالت ایتسه فعل ضربک شی معینه اسنادی
ممتنع اولور . والاتناقض لازم کلیر . و اگر فعل ضربک شی معینه
اسنادینه دلالت ایتسه بوده باطدر . زیرا بز بالضروره بیلیرکه
مجرد (ضرب) قولمز ضربک بعینه زیده یاخود بعینه عمرود
اسنادی ایچون وضع اولنماشدر .

جواب

شوایکی سؤاله بر جوابمز واردر، دیرزکه:

(ضرب) صیغه سی نفس الامرده مبهم اولان برشیئه ضربک
اسنادی ایچون وضع اولنماشدر . بلکه (ضرب) دین کیسه نک
ذکر ایتدیکی شیئه ضربک اسنادی ایچون وضع اولنماشدر .
بناءً علیه قائل، اوشیئی ذکر ایتکمزین یالکز باشنه (ضرب)
صیغه سی نه کلام تام اولور و نه ده صدق و کذب محتمل اولور .
و بو تقدیرده سؤال مذکور دخی مندفع وزائل اولور .

اونجی سؤاله

حرفی تعریفده (الحرف ماجاء لمعنی غیره) دیدیلرکه:
«حرف، غیریده اولان معنایه کلان شیدن عبارتدر .» دیمک
اولوب بو ایسه برلفظ مبهمدر . زیرا حرفی بو یولده تعریف

ایدنلر اکر «حرف جزفک غیریسنده حاصل و غیریسنده حال اولان معنایه دلالت ایدن شیدر.» دیمک ایسته مشلرسه جمیع اعراض و صفاتک استملری ده حروف اولدیغنه قائل اولملری لازم کلیر. و اکر «شول بر معنایه دلالت ایدن لفظدرکه اولفظک مدلولی او معناتک غیریدر.» دیمک ایسترارسه بوده ظاهر الفساددر. و شاید او چنجی بر معنا اراده ایدرلر ایسنه اتی بیان و ایضاح ایتملری لازم کلیر.

اون برنجی مسأله

اشبو اسم و فعل و حرفدن ممکن اوله بیلان ترکیبات التیدر. اولکیسی. — (اسم مع الاسم) درکه بو، مبتداً ایله خبردن حاصل اولان جملهدر.

ایکنجیسی. — (اسم مع الفعل) درکه بوده فعل ایله فاعلدن حاصل اولان جملهدر.

ایشته بو ایکی جمله نك مفید اولدقلری متفق علیهدر. او چنجیسی. — (اسم مع الحرف) درکه بونلردن حاصل اولان ترکیب کیفیت افاده سی مختلف فیهدر. کیمی دیدی که بو ایکی صورتده مفید اولور.

صورت اولی

(یا زید) ترکیبیدر. ایمدی دنیلدی که (یا زید) ترکیبتک مفید اولمسی مجرد (انادی) تقدیرنده اولدینی ایچوندور.

بونی دینلر ایکی وجه ایله احتیاج ایتشلر .

وجه اول . — (یا) لفظنه اماله داخل اولور . اماله ایسه اسم وفعلدن بشقه سنه دخول ایتز .

وجه ثانی . — لام جر ، (یا) حرفه تعلق ایدرده (یا زید) دیر .
 زیرا بولام ، لام اشتغائه درکه اوده حرف جر در . حالبوکه
 (یا) قولمز مقام فعلده قائم اولمسه یدی ، اکا حرف جرک تعلق
 ایتسی جائز اولمازدی . زیرا حرف اوزرینه حرف داخل اولماز .
 کیسی ده (یا) نك (انادی) معنانه اولدیغنی بالانکار مقام
 احتیاجده دیدی که :

(۱) (انادی) سوزی ندادن اخباردر . برشیدن اخبار ایسه
 خبر عنه مغایردر . بناءً علیه (انادی زیداً) قولمزك (یا زید) قولمزده
 مغایر اولمسی لازم کلیر .

(۲) (انادی زیداً) سوزمن صدق و کذب محتمل اولان
 برکلامدر . (یا زید) قولمزك ایسه صدق و کذب احتمالی اولماز .
 (۳) (یا زید) قولمز مناد ایله برابر برخطابدر (انادی زیداً)
 قولمز ایسه منادیه مقصود دکلدر .

(۴) (یا زید) قولمز حال حضرده ندانك حصولنه دلالت
 ایدر . (انادی زیداً) سوزمن ایسه ندانك حال حاضره اختصاصه
 دلالت ایتز .

(۵) (انادی زیداً قائماً) دینك صحیح اولورده (یا زید قائماً)
 دینك صحیح اولماز .

ایمدی شو و جوہ خمسہ (یا) حرف نداسیلہ (انادی) کلمہ سی
 بیتندہ فرق اولدیغنه دلالت ایدر.
 صورت ثانیہ

(زید فی الدار) قولمزددر. ایمدی (زید) قولمز مبتدادر.
 خبری ده (فی) قولمزد دلالت ایتدیکی معنادر. شوقدرکه ظرفیت
 معناسنک مفهومی بعضاً داره، بعضاً مسجده وسائر محله شامل
 اولدیغندن مجرد ادات ظرف اولان (فی) حرفی افاده خبرده کافی
 اولیوب شو ظرفیت، سائر انواعدن تمیز ایچون داره اضافت اولندی.
 ایمدی «اشبو» (زید فی الدار) سوزینک مفید اولسی مجرد
 (زید استقر فی الدار) و (زید مستقر فی الدار) تقدیرنده
 اولدیغیچوندر. «دیرلرسه جواب ویررزکه: بوسوزکر باطلدر.
 زیرا (استقر) قولمزد معناسی (حصل فی الاستقرار) دیمکدر.
 بناءً علیه (فیه) قولمز حصول آخری مفید اولمش اولور.
 بوحصول آخر دخی کنیدیسنده اواستقرارک حاصل اولدیغی
 حصولدن عبارتدر. بوايسه محال و باطل اولان تسلسلی مفضی
 و مؤدی اولور.

بناءً علیه ثابت اولدی که (زید فی الدار) سوزمز برکلام تام
 اولوب آتی بر فعل مقدر مضمرة تعلیق ایتک ممکن دکلددر.

اون ایکنجی مسأله

جمله مرکبه، یا [ترکیب اولی] یا [ترکیب ثانوی] ایله مرکب
 اولور،

ترکیب اولی ایلہ مرکب اولان جمله دخی جمله اسمیه. یا جمله فعلیه در.

رتبه ده جمله اسمیه نك جمله فعلیه اوزرینه مقدم اولسی دها
زیاده یاقیشمر. زیرا اسم، بسیطدر. فعل، مرکبدر. بسیط ایسه
مرکب اوزرینه مقدمدر. بناءً علیه جمله اسمیه نك جمله فعلیه دن
اقدام اولسی واجب اولور.
شویله ده دینك ممکندرکه :

» خیر! جمله فعلیه اقدامدر. زیرا اسم غیر یسنه اسناد اولتقمده
غیر اصیلدر. بناءً علیه جمله فعلیه جمله اسمیه دن اقدام اولمش
اولدی.»

ترکیب ثانوی ایلہ مرکب اولان جمله دخی جمله شرطیه در.
(ان كانت الشمس طالعة فالنهار موجود) قولك كبی.
زیرا (الشمس طالعة) قولك بر جمله در. (النهار موجود)
قولك دخی جمله آخرادر. صکره جملتینك برینه حرف شرط
و دیگرینه حرف جزا ادخال اولتغله جملتینك مجموعندن جمله
واحدہ حاصل اولدی. » والله اعلم«

باب رابع

اسمک کندی انواعنه تقسیماتی

تقسیم اول

معنای اسمک نفس تصویری وقوع شرکتدن یا مانعدر؛ یا دکلدر. مانع ایسه اسم یا مظهردرکه اکا علم دیر. یا مضمردرکه بوده معلومدر. اما وقوع شرکتدن مانع اولمادینی حالده، او معنای متصورک مفهومی یا ماهیت معینه اولورکه اسمای اجناس بونلردر؛ یا خود مفهومی ماهیت معینه اولمازده صفت فلانیه ایله موصوف برشی اولورکه بوده اسم مشتقدر. اسود، قولنر کی. زیرا اسودک مفهومی سواد ایله متصف اولان شی دیمکدر. ایملدی شو بیانمزله ثابت اولدی که (اسم) تحتده انواع ثلاثه بولنان برجنددر.

اسمای اعلام، اسمای اجناس، اسمای مشتقه. اویله ایسه اشبو اقسامکده احکامنی ذکر ایدلم.

نوع اول

اعلامک احکامی

احکام اعلام چوقدر. [مترجم فقیر یالکز ایکسینک ذکر یله اکتفا ایلدی.]

حکم اول: — متکلمین، اسم علم اصلا برشی بی مفید دکلدر دیش!

بن دیرم که: واقعا اسم علم مسماده بر صفت افاده ایتمز. بوطوغریدر. اما اصلا برشی افاده ایتمز دیدکلری طوغری دکلدر. نصل طوغری اوله بیلیر که اسم علم. موضوع لهی اولدینی ذات مخصوصه بی تعریف ایدر. [حضرت مفسر بو تعریف دخی بر افاده در دیمک ایستر]

حکم ثانی: — متفق علمهدر که اسمای اجناسک ده اسمای اعلامی وازدر.

مثلا «اسد» اشبو حقیقتک اسم جنسیدر. «اسامه» دخی انک اسم علمیدر.

کذلک «ثعلب» اشبو حقیقتک اسم جنسیدر. «ثعاله» دخی انک اسم علمیدر.

تقسیم ثانی

اسم علم، یا مفرد اولور «زید» کبی. یا بیننده علاقه اولیان ایکی کله دن مرکب اولور «بعلبک» کبی. یاخود بیننده علاقه اولان ایکی کله دن مرکب اولور که بو علاقه دخی یا اضافت علاقه سی اولور «عبدالله» و «ابی زید» کبی. یاخود اسناد، علاقه سی اولور که بوده یا جمله اسمیه، یاخود جمله فعلیه در.

تقسیم ثالث

علم یا منقول اولور. یا مرجح اولور.

منقول دخی یا بر لفظ مفیددن، یا خود لفظ غیر مفیددن.
منقول اولور.

لفظ مفیددن منقول اولان علم یا اسمک، یا فعلک، یا حرفک،
آری آری هر برندن و یا خود بونلرک مجموعندن منقول اولور.
اسمندن منقول اولان «علم» یا اسم عینندن منقول اولور.
اسد کی. ثور کی.

یا اسم معنادن منقول اولور. فضل، نصر کی.
یا بر صفت حقیقهندن منقول اولور. حسن کی.
یا بر صفت اضافیهندن منقول اولور. مذکور، مردود کی.
فعلندن منقول اولان علم دخی یا صیغه ماضیدن منقول اولور.
شمر کی.

یا صیغه مضارعندن منقول اولور یحیی کی.
یا صیغه امرندن منقول اونور. اطرق کی.
حرفندن منقول اولان علم دخی «رجل» کی درکه صیغ
حروفندن بر صیغه ایله تسمیه اولمشدر.

کله اسم و فعل و حرفک ترکیبندن منقول اولان علم؛ بونده
نظر اونور: مرکب اگر مفید ایسه بو تقسیم ثانیده مذکور
اولان علمدر. یعنی تقسیم ثانیده مذکور اولان (عبدالله) ترکیبی
کی اولور که بو من حیث التریب اللهک قولی دیمکدر. و من
حیث العلم شخص معینه دلالت ایدر. اگر مفید دکل ایسه علمک
کندی مفید اولور. یعنی من حیث التریب بر معنای مفید دکل
ایسهده من حیث العلم بر شخص معینه دلالت ایدر.

صوتدن منقول اولان علمه کلمه بوده بعض ملوک علویه
 « طباطبا » تسمیه اولمش اولسی کیدر [۱]
 مرحل اولان اسم علم دخی بعضاً قیاسی اولور (عمران .
 حمدان) کبی . زیرا بو ایکی اسم . سرخان [۲] ندمان [۳] مثللو
 استای اجناسدندر . بعضاً دخی شاذ اولورکه نظیری پک ازبولور
 « تحیب » و « موهب » کبی .

تقسیم رابع

اعلام، یا ذواته . یا خود معانییه وضع اولور . و علی کلا
 التقدیرین علم، یا علم شخص، یا خود علم جنس اولور . دیمککه
 بونده درت قسم واردر . اشبو اقسامی شرحه باشلامزدن اول
 شوراسنی بیلدیرمه مز لازم کلیرکه اعلامک ذواته وضعی . معانییه
 وضعندن اکثردر . زیرا اشخاص ذوات . احوالندن علی سبیل
 التبعین اخباره غرض . تعلق ایدن شیلردندر . اشخاص صفات
 اینسه اغلب احوالده اوپله دکلدر .

[۱] طباطبا . — علویلردن (یحیی بن البهادی) نام ذاتک یمنده
 ۲۸۸ تاریخ هجریسنده تشکیل ایلدیکی حکومتدر . بو حکومت ۳۴۵
 تاریخته قدر پایدار اولدی . مرکز ادارهسی (صنعاء) و (صعده) شهرلری
 ایدی . مؤسس مشارالیهک لساننده بر نوع لکنت واریامشده دائماً (طباطبا
 طباطبا) دیر ایش . بناء علیه (طباطبا) هم کندیتنه همده تشکیل ایتدیکی
 حکومته علم اولشدی .

[۲] سرخان، کمرسین ایله قورده دیر . جعی سراحین و انشاسی
 سرخاندهدر .

[۳] ندمان، پشیمان اولمش کیمسیده و برده قدح ارقداشته دیر .

كلهلم اقسام اربعه نك احكامه :

قسم اولكه ذواته موضوع اولان علمدر ؛ بونك شرطی
مسمی واضعك مألوفی اولمقدر . مألوفات دده اصل اولان
(انسان) در ؛ زیرا اسمای اعلامی استعمال ایدن انساندر . شيدك
كندی نوعنه اولان انس والفتی ايسه نوعنك غيری يه اولان
انس والفتندن اتم واكملدر .

درجه ثانیه دهكي مألوفات دخی انسانك محتاج اليهی اولدينی
و دائماً مشاهده ایده كلديكي شيلردر .

انسانك مألوف و مأنوس اولدينی شيلرك اشخاصه اعلام،
وضعی ايسه قليل و نادردر .

قسم ثانی . — ذواته موضوع اولان علم جنسدر . اسد
« اسامه » . ثعلبه « تعاله » ديدكلری كبی .

قسم ثالث . — صفاتك افراد معينه سته وضع علم ايتمكدركه
فائده سزلكندن ناشی بودر لوسی مفقوددر :

قسم رابع معانی يه موضوع اولان علم جنسدر .
برلفظك غير منصرف اولسی قاعدة اسباب تسعة معلومه دن
ايكي سببك اجتماعنه متوقفدر . ايمدی يالکز بر سبب حاصل
و موجود اولوبده سبب ثانی موجود دكل ايكن ينه اولفظی
حرندن منع ايتدنكاری کوريلنجه بيانيركه آتی اسم علم قيلشارده آنك
ايچون حرفدن منع ايلشاردر .

ايسته معانی يه موضوع اولان اسم علمی بيله نك قاعده سی بودر .
ابن جنی بوبابده بعض مثالر دخی ذکر و ایراد ايدوب ديمشكه :

تسبیحی «سبحان» دشتی «کسبان» تسبیح ایدیشلری بو قیلدندر. زیرا بونلرک ایکسیده غیر منصرفدر. ائمدی سبب واحد اولان الف ونون ذاتاً موجود اولوب بناءً علیه علیتکده حصولی لابد ولازمدرکه منع حرف ایچون مشروط اولان سببین. تمام اولسون.

تقسیم خامس

معلوم اولسون که اسم جنس بعضاً اسم علمه منقلب اولور. شویله که: لفظک مفهومی امور کثیرده اشتراکه صالح بر امر کلی اولدینی حالدده اکا لام تعریف داخل اولورسه شخص معینه مقصور اولورده اولفظه. اسم جنس ایکن اسم علمه منقلب اولور نتکم النجم، فی الاصل هر نجمک اسمی ایکن بویله معرف اوله رق کوکب ثریاه علم اولدینی کی.

کذلک (سماء) دخی ارتقاعدن مشتق بر اسم اولدینی حالدده معرف اوله رق السماء، کوکب معینه علم اولمشدر.

----- د د د د د د د د د د -----

باب خامس

اسمای اجناس ایله اسمای مشتقه نک احکامی بیانندهدر

اسمای اجناسک احکامی

حکم اول. — ماهیت و تعیر دیکرله مضی بعضاً مرکب:

بعضاً بسیط اولور علوم عقلیهده ایسه ثابت اولمشدركه مرکب،
-جنسده بسیطدن و بسیط فصلده مرکبدن مقدمدر.

برده بحسب الاستقرا ثابت اولمشدركه جنسك قوتی شدتده
فصلك قوتندن ایلریدر. بناءً علیه ماهیات مركبهك اسماری
ماهیات بسیطهك اسماری اوزرینه سابق و متقدم اولمق لازمکلیر.
حکم ثانی. — اسمای اجناس، رتبهجه اسمای مشتقهدن
ایلریدرلر. زیرا اسم مشتق، اسم مشتق منه متفرعدر. بناءً علیه
اسم مشتق منه دخی اسم مشتق کی مشتق اولیدی، یا تسلسل
یادور لازم کلیردی.

حالبوکه دور و تسلسلک ایکسیده محالدر. بناءً علیه اشتقا.
قائده اسمای موضوعه جامدهیه اتها واجب اولور.

ایمدی بوندن شو نتیجه حاصل اولورکه (اسم موضوع جامد)
اسم مشتقندن مستغنی اولوب اسم مشتق ایسه بالعکس اسم موضوع
جامده محتاج ایدوکنندن اسم موضوع جامدك رتبهجه اسم
مشتقندن ایلری اولسی لازم کلیر.

وشو ایضاحات ایلهده ظاهر اولورکه كرك اهل لغاتك وكرك
حاتك هر لفظ ایچون مطاقاً بر محل اشتقاق ارامغه کال تهاکله
چالیشماری بوش بوشنه بر یوزغونلق و باطل بر سعی ایمش!
حکم ثالث. — موجود یا واجیدر. یا ممکندر.

ممکن دخی یا متحیزدر. یا متحیزده حالدر. یا خود نه متحیزدر.
نهده متحیزده حالدر؟ شو قدرکه بینان یا لکتر قسمین اولیندر.
بعد ازیں دلیل ایله ثابت اولمشدركه متحیزات، ذاتلرینك

تمامنده یکدیگرینه مساویدر . و بونلرک اراسندهکی اختلاف یالکز
کندیلریله قائم اولان صفات سببیه وقوعه کلیر . بناءً علیه اجسامک
هر نوعه ویریلان اسملرک مسالری یالکز ذات جسم دکل، یالکز
جسمک صفتی ده دکل، بلکه هم ذاتک، همده آنکه قائم اولان
صفات مخصوصه نک مجموعیدر .

« اسمای مشتقه نک احکامی » درتدر

حکم اول . — ذاتک مشتق منه ایله موصوف اولسی اسم
مشتقک شرطندن دکلدر . زیرا (معلوم) دخی علمدن مشتقدر .
مع هذا علم، معلوم ایله قائم دکلدر . مذکور، مرئی، مسموع،
لائق، رامی دده حال بو منوال اوزره در .

حکم ثانی . — اسم مشتقک صدقک شرطی مشتق منهک
درحال حصولیدر . زیرا کافره ده اسلامه کلدیکی آنده « کافر
دکلدر » دیمک صادق اولور .

ایشته بو دلالت ایدرکه مشتق منهک بقیاسی اسم مشتقک
صدقده شرطدر .

حکم ثالث . — مشتق منه اگر ماهیت مرکبه ایسه اجزاسنک
مجتعاً حصولی ممکن اوله ماز . کلام، قول، صلاة کی .
زیرا اسم مشتقک علی سبیل الحقیقه صادق اولسی الحق
اجزای مذکوره دن جزء اخیرک حصوله متوقفدر .

حکم رابع . — (ضارب) ضربدن مشتق بر اسمدرکه مفهومی
فعل ضرب کنیدیسیله قائم اولان شخص دیمکدر .

فاما اوزات، جسم میدر. جسمك غیر میدر. بوراسی مفهومدن
خارج اولوب الحق دلالت التزام ایله یلنیر.

باب سادس

اسمی معربه؛ مبنیه تقسیم ایله برابر بو ایکی قسمه متفرع اولان
احکام بیانده اولوب مسائل شتایی مشتملدر

برنجی مسأله

اعراب، لفظنده ایکی وجهه واردر: برنجیسی. — لفظ
اعرابك «اعرب عن نفسه» قولندن مأخوذ اولمسیدرکه بر کیسه
ضمیرنده کنی بیان ایتدیکی وقت دیر. زیرا اعراب، ایضاح معنی
دیمکدر. ایکنجیسی. — لفظ اعرابك «عربت معدة الرجل»
قولندن منقول اولمسیدرکه معدةك فسادنده دینیر. بوتقدیرده
اعرابدن مراد، ازاله فساد و رفع ابهام دیمك اولور. کتابك
عجمه سنی ازاله معناسنه اوله رق «اعجمت الكتاب» دنیلدیکی کی.

ایکنجی مسأله

بر لفظ، احوال مختلفهیه مورد اولان ب معنایه وضع اولندقد

احوال مختلفه لفظیه احوال مختلفه معنویه دال اولمق ایچون او لفظک دخی احوال مختلفهیه مورد اولمسی لازم کلیر .

نصلکه جوهر لفظ . اصل ماهیته دال اولدینی ایچون آنک اختلاف احوالی احوال معنویه نکه ده اختلافه دال اولور . ایمدی اعراب دنیلان شی احوال مختلفه معنویهیه دال اولان شواحوال مختلفه لفظیه دن عبارتدر .

للمترجم

احوال مختلفه لفظیه « فاعلیت و مفعولیت و اضافت » علا . ماتیدرکه احوال مختلفه معنویهیه دلالت ایدن بونلردر . بتدی .

اوچنجی مسأله

افعال و حروف . (ماهیاته) و تعبیردیگرله (معانییه) عارض اولان احوالدر . عوارضه ایسه دیگر عوارض ، عارض اولماز . بو قاعده کلیه دکلسهده بر حکم اکثری در .

احوال مختلفهیه معروض اولان انحق ذواتدر . بو ذواته دلالت ایدن الفاظ دخی اسملردر . بناء علیه وضع اول ایله اعرابه مستحق اولان یالکر اسملردر .

دزدنجی مسأله

اعرابک ، کلمه نکه حرف اخیرینه اختصاصی ایکی وجهدن ناشیدر .

وجه اول . — ذاته عارض اولان احوال، ذاتك وجود و حصولندن صكره وجوده كلير .

لفظ دخى حروف مركبه سندن حرف اخيرك وجود و حدوثندن صكره حصوله كلير .

بناءً عليه احوال مختلفه مغنويه دال اولان علامتلى دخى كلهنك تمامندن صكره حاصل اولق لازم كلير .

وجه ثانى . — كلهنك برنجى و اينجى حرفنك اختلاف حالى اوزان كلهنك اختلافه دلالت ايچوندر . بناءً عليه احوال اعراضيه قبول ايچون كلهنك حرف اخيرندن بشقه حرف قلماز .

بشجى مسأله

اعراب، اواخر كلماتده موجود اولان حرركات و سكناتندن عبارت دكلدر . چونكه اعرابدن خالى اولان مبنياتك دخى اواخرنده حرركات و سكنات بولنور .

يا اعراب نه در ؟

اعراب، كلماتك عوامل محسوسه حسييله اشبو حرركاته استحقاقندن عبارتدر . و بو استحقاق معقولدر ، محسوس دكلدر . اعراب دخى بر حالت معقوله در . حالت محسوسه دكلدر .

التجى مسأله

حرفه متحرك يا خود ساكن دينسى مجاز طريقيله در . زيرا

حرکت وسکون صفات اجسامنددر . حرف ایسه جسم دکلدر .
یا حرفك حرکه سندن مراد نه در ؟
حرفك حرکه سندن مراد لفظك تلفظی عقبنده حصوله
کلان صوت مخصوصدر .
یا حرفك سکون سندن مراد نه در ؟
حرکه دنیلان صوت مخصوص کندیسنی تعقیب ایتمکسزین
حرفك حصوله کلسندن عبارتدر .

(یدنجی مسأله دن اون یدنجی مسأله یه قدر) [۸]

اون سکرنجی مسأله

اعراب، حرف ویا حرکه واسطه سیاه عواملاک وقوعه کلان
اختلافیه آخر کله نك تحقیقاً یا خود تقدیراً مختلف اولمیدر .
اختلاف دخی آخر کله نك مثلاً متحرک ایکن سکون وساکن
ایکن حرکه ایله موصوف اولمسنندن عبارتدر .
اشبو موصوفیت ایسه شک یوق که بر حالت معقوله در . حالت
محسوسه دکلدر .
ایمدی بو معنادن ناشیدر که عبد القاهر نحوی « اعراب بر
حالت معقوله در . حالت محسوسه دکلدر » دیدی .

[۹] اشبو مسائل حرکات وسکناته و علم قرائته متعلق مباحثی شامل
اولوب ترجمه سندن صرف نظر قلمشدر .

اعرابك تعريفده «عواملك اختلافيه» ديشيدى . بونك
نه ديمك اولديغنى ايضاحات آتیه بيلديرر .
شويلاه:

آخر حرفى دائماحالت واحده اوزره مستمراولوب دكيشيان
لفظ انجق (مبنى) در .

آخرلى اختلافدن خالى اولميانلر دخی ايکي قسمدر .
بر قسمى شول لفظدرکه آخر حرفى حرکات وسکناجه
اختلافدن خالى دکلسهده بواختلاف سبيله معناسى احوال مختلفه يي
قبول ايتمز . يعنى معناسى دكيشمز (من) کلمه سى کچي که (اخذت
المال من زيد) ترکیبنده ساکن الآخر ايکن (اخذت المال من
الرجل) دينجه نونی مفتوح اوقونور .

(اخذت المال من ابنك) دينجهده مکسور اوقونور .
شوقدرکه بواختلاف، اعراب دکادر . زیرا (من) کلمه سندن
مفهوم اولان معنى واحد اولوب احوال مختلفه يي قبول ايتمز .
قسم ثانی . — صوك حرفك احوالى دکشدکجه معناسى ده
دکيشن لفظدرکه اعراب ايشته بواختلافى ايجاب ايدن حالت
معقوله دن عبارتدر .

(اون طقوزنجى مسأله دن يکرمى دردنجى مسأله يه قدر متروک)

يکرمى بشنجى مسأله

« غير منصرف اولان برکلمه يه الف ولا مداخل اولنجه وياخود

برنجی کتاب

« اعوذ بالله من الشیطان الرجیم » قولندن مستنبط اولان علوم
بیانده در

معلوم اولسون که شو کله دن مستنبط اولان علوم ایکی نوعدر.
نوع اول -- لغت و اعرابه . نوع ثانی -- علم اصول و فروع
متعلق اولان مباحثدر .

برنجی کتابک قسم اولی

کله ده متعلق اولان مباحث ادبیه بیانده اولوب بر قاج بابی مشتملدر

باب اول

کله ده و مجرای کله ده جاری اولان الفاظه متعلق مباحث بیانده اولوب
بر قاج مسأله بی مشتملدر

برنجی مسأله

معلوم اولسون که مدلولات الفاظی تعریفده ال مکمل یول
طریق اشتقاقدر . اشتقاق دخی ایکی نوعدر .

اشتقاق اصغر ، اشتقاق اکبر .

اشتقاق اصغر ، صیغه ماضی و مستقبلک ، اسم فاعلک ، اسم مفعولک و سائر صیغہ لڑک مصدر دن اشتقاقہ دینور .

اشتقاق اکبر ، چند حرف دن مرکب اولان بر کله نک لامحاله انقلابات عدیدہ بی قبول اتمہ سندن عبارتدر .

بونک برنجی مرتبہ سی ، کله نک ایکی حرف دن مرکب اولہ . سیدر . و بویله ایکی حرف دن مرکب اولان کله یالکز ایکی نوع تقلیب قبول ایدر . (من) و (نم) کی .

ایکنجی مرتبہ سی کله نک اوچ حرف دن مرکب اولہ سیدر . (حمد) قولمز کی کہ اشبو کله تقلیات دن آتی نوع تقلیب قبول ایدر .

شویله کہ : او حروف ثلاثہ دن هر بری کله ثلاثیہ مذکور . ردنک ابتدائی اولہ بیلدیکی کی ، باقی قالان ایکی حرف دخی تقادیر ثلاثہ مذکور دن هر برنده ایکی وجه اوزره واقع اولمق ممکندر . اوچک ایکیه ضربندن آتی حاصل اولور . بناء علیه کلمات ثلاثیاده واقع اولان اشبو تقلیبات التی وجه اوزره وقوع بولمق ممکندر .

اوچنجی مرتبہ سی — کله نک رباعیه اولہ سیدر .

(عقرب) و (ثعلب) قولمز کی کہ بویله درت حرفی کله لڑک یکر می درت وجه ایله تقلیب قبول ایدر .

شویله کہ : او حروف اربعہ دن هر بری کله رباعیہ مذکور دنک ابتدائی اولہ بیلدیکی کی ، حروف ثلاثہ باقیه نک دخی تقلیات دن


امام خلیل دیدی که «رفعده اصل اولان فاعلدر ؛ باقیلری
 فاعله تشبیه اولمشدر .»

سیبویه دیدی که «رفعده اصل اولان مبتدادر ؛ باقیلرده
 اکا تشبیه اولمشدر .»

احفش دیدی که «رفعده کړك فاعلك وکړك مبتدانك هر
 بریسی بنفسه اصلدر .»


برنجی کتابک ایکنجی قسمی

استعاده به متعلق مباحث نقلیه و عقلیه بی متضمن اولوب
چند بابی مشتملدر



باب اول

« اعوذ بالله من الشيطان الرجيم » قولزدن مستنبط اولان
مسائل فقهیه بیاندهدر



برنجی مسأله

اکثر ائمه دین، قرائت استعاده نك وقتی قرائت فاتحه دن
اولدر ديه اتفاق ايتمشلر .

يالكز (نحی) دن مرویدرکه قرائت استعاده نك وقتی قرائت
فاتحه دن صکره در . بو . داود اصفهانی نك قولی و ابن سیریندن
منقول اولان روایتینک بری در .

بونار دیشلرکه صلاته قیام ایدن کیمسه سورة فاتحه نین تمامها
اوقویوب « آمین » دیدکدن صکره « اعوذ بالله » دیمیلدر .

«جیر بن مطعم» روایت ایتش که حضرت بنی اکرم صلی الله تعالی علیه وسلم افندمن نمازه باشا لارکن اوچ کره (الله اکبر کبیراً) اوچ کره (والحمد لله کثیراً) اوچ کره (وسبحان الله بکرةً واصیلاً) دیرلر و آندن صکرده ده (اعوذ بالله من الشیطان الرجیم من همزه وفتح وناقشه) بیوررلردی.

بناءً علیه استعاذه نك قرائتی، قرائت فاتحه یه تقدیم ایتلیدر دیه اولکیلر بو روایتله احتیاج واستدلال ایلشلردر.

بورایه مخالف اولان دخی (فاذا قرأت القرآن فاستعذ بالله من الشیطان الرجیم) آیت کریمه سیله احتیاج ایلدی.

دیدیکه: «بو آیت جلیله قرائت قرآن شرط، و ذکر استعاذه جزا اولدیغنه دلالت ایدر. جزا ایسه شرطدن متأخردر.»

«بناءً علیه استعاذه، قرائت قرآندن متأخر اولمق لازم کلیر. و بو عقله ده موافق در. زیرا قرائت قرآن، قارئه ثواب عظیمی مستوجبدر. آنک ایچون شو طاعتی ادادن طولای قارئه عجب کله جک اولورسه ثواب مذکور ساقط اولور. زیرا خواجه کائنات علیه الصلاة والسلام افندمن حضرت تیزی بر حدیث شر- یفلرنده (ثلاث مهلكات) بیورمش و بو اوچدن بریسیده (اعجاب المرأ بنفسه) در دیشدر.»

«ایشته بو سبیدن ناشیدر که حق سبحانه و تعالی حضرت تیزی رسائینه افندمنی قرائت قرآندن صکره شیطان، طاعت مذکور. ردنک ثوابی اسقاط ایدمک بر عمله حمل و سوق ایدمک ایچون شیطاندن استعاذه ایله مأمور بیوردیلر.»

دیدیلرکه (اذا قمتم الى الصلاة فاغسلوا وجوهكم) قول کریمی (اذا اردتم القيام الى الصلاة) معناسنه اولدیغی کبی (اذا قرأت القرآن) قول کریمی دخی (اذا اردت قراءة القرآن) تقدیرنده در یولنده تأویلهده جواز یوقدر. زیرا موضع دلیلده ظاهری ترک، سائر موضعلردهده لغیر دلیل ترکی ایجاب ایتمز.

جمهور فقهایه کلنجه: بونلر دیدیلرکه: (فاذا قرأت القرآن فاستعذ بالله) آیت کریمه سنندن مراد (اذا اردت) اولمق احتمالی وارد. و بوده شکسزدر. حالبوکه احتمال، ثابت اولدقده اشیبو آیت جلیله ایله انفأ روایت ایلدیکمز خبر ییننی توفیق ایچون (اذا قرأت القرآن) لفظنی «اذا اردت قراءة القرآن» معناسنه حمل، واجب اولور.

جمهور فقهایه بوقولنی تقویه ایدن مناسبات عقلیه دن ده شوراسی وارکه استعاده دن مقصود، اثنای قرائت قرآنده وسوس شیطانی نفی در. جناب حق (وما ارسلنا من قبلك من رسول ولا نبی الا اذا تمی الی الشیطان فی أَمْنِیْته فینسخ الله ما یلقى الشیطان) بیورعی. ایشته حق سبحانه و تعالیٰ حضرتلرینک قرائت قرآنه استعاده نک تقدیمی امر بیورمسی مجرد بوسیدن ناشیدر.

بن دیرمکه بوراده برقول ثالث وارد. شویلهکه بقدر الامکان دلیالینک ییننی جمع ایچون استعاده یی مقتضای خبرله قرائت قرآندن مقدم، و مقتضای قرآن ایله قرائت قرآندن صکره او قومقدر.

ایکینچی مسئلہ

عطا، استعاذہ ہر قرائت ایچون واجیدر . نمازہ اولسون اولسون " دیدی .

ابن سیرین، " کئی مدت عمرندہ برکرہ قرآن اوقورکن تعوذ ایتسہ اسقاط وجوبده کفایت ایدر . " دیدی .
باقیلری ده " استعاذہ، واجب دکلدر . " دیدیلر .

چہورک حجتی

" نبی اکرم ورسول محترم صلی اللہ تعالیٰ علیہ وسلم افدمنز حضر تلری - اعرابیہ جملہ اعمال صلات صردسندہ استعاذہنی تعلیم بیورماشد . "

لامترجم . - انکچون استعاذہنک وجوبنہ قائل اولہمیز دیمک ایسترلر . بتدی .

قائل دیہیلیرکہ : خبر مذکور بالجملہ واجبات صلاتک بیانی مشتمل دکلدر . بناءً علیہ خبر مذکورده استعاذہنک عدم ذکرندن عدم وجوبی لازم کلز .

عطا، استعاذہنک وجوبنہ برقاچ وجہ ایلہ احتجاج ایتشد .
وجہ اول . - علیہ الصلاة والسلام افدمنز استعاذہنیہ مواظبت بیورمشلر . بناءً علیہ بزده استعاذہ واجب اولور . زیرا جناب حق (واتبعوه) قولیلہ ہر خصوصده حضرت پیغمبرہ متابعت ایتہمزی امر بیوردیلر .

وجه ثانی. — «فاستعذ» قول کریمی امر در. و بوده و جواب
ایچوندر. برده هر قرآن او قوندجه استعاذه ایتک لازم کلیر. زیرا
الله تعالی (فاذا قرأت القرآن فاستعذ بالله) بیورمشدر. وصف
مناسب عقینده حکمی ذکر ایسه تعلیله دلالت ایدر. انکچون
حکم و تعبیر دیکرله (و جواب) علتک تکرریله تکرر ایدر.

وجه ثالث. — الله تبارک و تعالی حضرتلری شیطان رحیمدن
دفع شر ایچون درگاه عزتیه استعاذه والتجا ایله امر بیوردی.
زیرا (فاستعذ بالله من الشیطان الرجیم) قول کریمی بونی مشعردر.
شر شیطانی دفع ایسه واجبدر. دیمک که بوبابده واجبی ادا استعا.
ذهیه متوقفدر. اولیه ایسه استعاذهده واجبدر. زیرا تمام واجب،
اکا منحصر اولوب واجب آنسر تمام اوله ماز.

وجه رابع. — محققدر که طریق احتیاط هر قرائتده استعاذه بی
ایجاب ایدر.

اوچنجی مسأله

اکثر فقها عندنده قبل القراءة تعوذ مستحبدر.

دردنجی مسأله

امام شافعی رضی الله عنه (ام) ده دیدی که عبدالله بن عمر
رضی الله عنهما استعاذه بی اخفا ایدردی دیه زوایت اولتمشدر.
ابوهریره دن ده مرویدر که او استعاذه بی جهراً او قوردی: ینه امام

مشارالیه علاوهً دیدی که استعاذه کړك اخفا و كړك جهړ جائزدر.
 ینه امام مشارالیه (املا) ده دیدی که «استعاذه جهراً او قو-
 تملیدر. شاید اخفاده ایدیلیرسه ضرری یوقدر.»

امام مشارالیه کندی عندنده جهړ. اولی اولدیغنی بیان ایتدی.
 بن دیرم که استعاذه الحقی بعد الافتتاح وقبل الفتحه او قونور.
 ایدی اکر استعاذه بی فاتحنک ماقبلنه الحاق ایدرسه ك اخفا
 لازم کلیر. واکر فاتحه بی الحاق ایدرسه ك جهړ لازم کلیر.
 شوقدر که استعاذه و افتتاح بیتنده مشابحت اتمدر. چونکه
 هرایکسیده عند الفقهاء نافله در. [*] و چونکه جهړ. کیفیت
 وجودیه اولوب اخفا. ایسه او کیفیتك عدمندن عبارت ایدوکنندن
 اصل اولان ده عدمدر.

بشچی مسأله

امام شافعی رضی الله عنه هر رکعتده تعوذ اولدیغنی (ام) ده
 صیغه تملیض ایله بیان ایتدکدن صکره «بنم رأیحه یالکر رکعت
 اولاده تعوذ اولنور» دیدی.

بن دیرم که امام مشارالیه ایچون شویله احتیاج ایتك ممکن
 ایدی. دیه بیلیردی که: اصل اولان عدمدر. ذکر استعاذه ایله
 مأمور اولمه مزی ایجاب ایدن شی دخی (فاذا قرائت القرآن
 فاستعذ بالله) آیت جاایلیرسیدر. (اذا) کلمه سی ایسه عموم افاده ایتمز.

[*] نافله در یعنی استعاذه و افتتاحك ایکسیده خارج ملاتدر.

(للمترجم)

قائل دیه بیلیر که بالاده بیان اولندیغی اوزره وصف مناسب اوزره حکمی ترتیب، علیه دلالت ایدر. بناءً علیه علتک تکرریله حکمک تکرری لازم کلیر.

التجی مسأله

حق سبحانه وتعالی حضرت تبری سورۃ نحلده (فاذا قرأت القرآن فاستعذ بالله من الشیطان الرجیم) دیگر بر سورده ده دخی (انه هو السميع العليم) - او چنجی بر سورۃ شریفه ده ده (انه سمیع العليم) بیوردی.

ایشته بوسبیدن ناشی علما اختلاف ایدوب امام شافعی (اعوذ بالله من الشیطان الرجیم) دیمک واجبدر دیدی. امام ابی حنیفه نک ده رأی بودر.

علما بویله دیملیدر؛ دیدیلر. زیرا اشبو نظم [*] (فاستعذ بالله من الشیطان الرجیم) قول کریمنه موافقدر. كذلك جبر بن مطعمدر روایت ایتدیکمز خبرکده ظاهرینه موافقدر.

امام (احمد بن حنبل) آیتینی جمع ایچون اولی اولان (اعوذ بالله من الشیطان الرجیم) انه هو السميع العليم) دیمکدر بیوردیلر. بعض اصحابمز دخی اولی اولان (اعوذ بالله السميع العليم من الشیطان الرجیم) دیمکدر. زیرا بودخی آیتینی جمع ایتشدردیدی. محدثیندن (امام بیهقی) کتاب سننده ابی سعید الخدری

[*] یعنی اعوذ بالله من الشیطان الرجیم. (للقرجم)

رضی الله عنه حضرت تلمذند نقلاً روایت ایتش که رسول الله صلی الله علیه وسلم افندمز حضرت تلمذی کیجه قائم اولدقلری وقت اوچ کره تکبیر ایدوب «اعوذ بالله السميع العليم من الشيطان الرجيم» بیورلردی .

(امام ثوری) ایله (اوزاعی) دخی اولی اولان «اعوذ بالله من الشيطان الرجيم ان الله هو السميع العليم دیمکدر بیوردیلر .

(ضحاك) حضرت ابن عباسدن «رضی الله عنهما» نقل وروایت ایتش که جبریل علیه السلامك جناب مصطفایه اولا «استعذ بالله السميع العليم من الشيطان الرجيم» وثانیاً «بسم الله الرحمن الرحيم اقرا باسم ربك الذي خلق» نظم جلیلترینی تنزیل ایلدی .

وبالجملة شبهه سزدرکه استعاذه استغراق فی المهدن مانع نه وار ایسه آنك هپسندن قلبی تطهیر ایلر . تسبیح دخی قابی هیبت جلال الله توجیه ایدر . (والله الهادی)

یدنجی مسأله

نمازده تعوذ، قرآئت ایچونمی صلات ایچونمی ؟

امام (ابی حنیفه) ایله امام (محمد) عندنده قرآئت ایچوندر .

امام (ابی یوسف) عندنده ده صلات ایچوندر .

بواصل اوزرینه ایکی فرع، تفرع ایدر .

فرع اول . - مؤتم که امامه اقتدا ایدن دیمکدر . خلف امامده

تعوذ ایتلی می ؟ ایتاملی می ؟ امام اعظم ایله امام محمد کوره مؤتم

ایچون تعوذ واجب دکلدر. زیرا او قرائت ایتمز. امام ابی یوسفه کوره ایسه مؤتم دخی تعوذ ایتملیدر.

امام اعظم ایله امام محمدک وجه اجتهادی (فاذا قرأت القرآن فاستعذ بالله من الشیطان الرجیم) قول کریمیدر. زیرا جناب باری بو آیت کریمهده استعاذهی قرائته تعایق بیوردی. مقتدییه ایسه قرائت واجب دکلدر. بناءً علیه اکا تعوذ دخی لازم کلز.

امام ابی یوسفک دخی وجه اجتهادی شودرکه اکر تعوذک وجوبی قرائت ایچون اولسهیدی قرائتک تکرریله تعوذ دخی متکرر اولمق لازم کلیردی. ایمدی مادامکه قرائتک تکرریله تعوذ تکرر ایتمیور بلسکه یالاکر صلاتک تکرریله تکرر ایدیور. ایشته بودلالت ایدرکه استعاذه قرائت ایچون دکل صلات ایچوندر.

فرع ثانی. — صلات عیدک افتتاحنده «سبحانک» یی او قویوب «اعوذ بالله» دیرده آندن صکره می یوقسه آندن اول می تکبیر کتیرملیدر؟

امام اعظم ایله امام محمده کوره اولا تکبیرلری کتیرملی؛ صکره قرائته باشلانجنی وقت تعوذ ایتملیدر.

امام ابی یوسفه کوردهده تعوذی تکبیراته تقدیم ایلملیدر. مسائل فاحهدهن بعض شیلر قالمشدرکه انلری ده بوراده ذکر ایدده جکر.

سکزنجی مسأله

قرآنی ترتیل اوزره او قومق سنت سنیدر. زیرا الله تبارک و تعالی حضر تلری (ورتل القرآن ترتیلاً) بیورمشدر.

ترتیل. دیہ حروف و کلماتی اکلاشیہ جق صورتدہ آچیق
 آچیق ذکر ایتکہ دیر. بونک قاعدہ سی شودرکہ قرآن عظیم
 الشانک قرائتی بو وجہ اوزردہ واقع اولدینی وقت اوقونان
 الفاظک معانی شریفه سنی قاری هم کندی اکلار، همده غیرینه
 یعنی سامعینه اکلاتیر. اما سرعتله اوقوینجه معانی شریفه سنی نه
 کندی اکلار: نه ده آخرده اکلاته بیلیر بنا. علیه ترتیل، سرعتله
 قرائتدن اولادر.

طقوزنجی مسأله

قرآن، جہراً اوقوندینی وقت قرائتده تجوید، ستندر.
 ابو داود (براء) ابن غازبدن نقلاً روایت ایدوب دیدی کہ
 رسول الله صلی الله علیه وسلم افندمن «زینوا القرآن باصواتکم»
 بیورمشدر. قرآنی سسلرکزله تزین ایدیکز دیمکدر.

اوننجی مسأله

بزم عندمزده مختار اولان بودرکہ (ضاد) حرفنی (ظا) حرفنه
 مشابه بر صورتده تلفظ ایتک صلاحی ابطال ایتمز. زیرا ایکسینک
 یئینده جداً مشابہت واردر. بر صورتده که یکدیگرندن فرق
 و تمیزی کوچدر. بناءً علیه اثنای قرائتده همه حال ایکسینک
 یئتی فرق ایله تکلیف ساقط اولمق واجب اولور.

للمترجم . - حضرت مفسر ضاد ايله ظا حرفلرينك اړه .
 سنده كي مشابهي بر قاچ وجه ايله بيان بيوردقدنصكره ديمشكه
 حرف ضادي كهاى حقها ادا غربه مخصوصدر .
 حضرت پيغمبر افندمن « انا افصح من نطق بالضاد » بيور .
 مشدر . ايمدى ثابت اولوركه ضاد و ظا حرفلري يئنده مشابعت
 شديده واردر . بر صورتده كي ايكيسنك اراسنى فرق و تميز
 ايدەئيلك غايتله كوچدر .

بوراسى ثابت اولنجه ديرزكه اكر بو فرق ، معتبر اوليدى ،
 رسول الله صلى الله عليه و سلم افندمن حضر تلرينك زمان سعا .
 دتلبنده ، ازمنه صحابه ده ، لاسيما عجمك اسلامه دخولنده بوفرقدن
 سؤال واقع اولوردى . ايمدى مادامكه اشبو مسأله دن سؤال
 وقوعى قطعاً منقول دكلدر . اشبو ضاد و ظا حرفلرينى اثناسى
 قراشته يكدىكرندن فرق و تميز ايتك تحت تكليفده واقع دكلدر .

اون برنجى مسأله

لام مغالظه لغات فصيحهدنى دكلى ديه اختلاف اولندى .
 لغات فصيحهدن اولديغلك ثبوتى تقديرندهده علما اتفاق
 ايتشدركه مكسور اولديغنى حالده تغليظى جائز دكلدر . زيرا
 كسره دن لام مغالظه ايله تلفظه انتقال لسانه ثقیل كير . بناءً عليه
 او ثقلتك لغت فصيحهدن نفعى و ازاله سى لازمدر .

اون ايكنجى مسأله

نمازده مثلاً (الحمد لله) يى حمدىء دالنى مكسور و ياخود (الله) نك لامنى مضموم او قومق كى شاذ اولان وجود ايله قرائت قرآن جائز دكلدر ديو اتفاق ايتشلدردر.

زيرا دليل، وجود شاذ ايله قرائت قرآنك جوازىنى صورت مطلقه نفي ايلر. چونكه او وجود شاذ اكر قرآندن معدود اولسیدی، شهرته حد تواتره بالغ اولق لازم كلیدی. ايمدی مادامكه شهرته حد تواتره بالغ اولماشدر. وجود شاذ مذكوره قرآندن دكلدر ديه جزم ايلر.

شوقدركه بز نماز خارجده جواز قرائته اشبو دليلدن عدول ايلدك. بو تقديرده وجود شاذ نك نمازده قرائتى اصل منع اوزره باقى قالمق واجب اولور.

اون اوچنجى مسأله

قراآت مشهوره نك نقل متواتره منقول اولديغنه اكثر علما اتفاق ايتشدر. انجق بو قول جاى اشكلدر. زيرا بزديرزكه اشبو قراآت مشهوره يا نقل متواتره منقولدر، يادكلدر. ايمدی اكر نقل متواتره منقول ايسه او تقديرده ينه نقل متواتره ثابت اولمش اولوركه الله تعالى و تقدس حضرتلرى مكلفينى اشبو قراآتده تخير و قراآت مذكوره نك يينى جوازده تسويه بيورمشدر.

بویله اولدینی حالدده قراآت مذکوره دن برینک دیکرینه
 ترجیحی تواترله ثابت اولان حکمک خلافتیه واقع اولمش اولور.
 بناءً علیه بعض قرائتی بعض آخری اوزرینه ترجیحیه ذاهب
 اولانارک تکفیری لازم کلمه مستوجب تفسیق اولملری لازمکلیر.
 بزاویه کوریورزکه قراء مومی الیهمدن هر بریسی قرائتک بر
 نوعنی ترجیح ایدرک ناسی اولوجهله قرائت قرآنه سوق وتشویق
 وقراآت سائرده منع ایدیور. بناءً علیه قراء مومی الیهم حقنده
 بیان ایتدیکمز تفسیقک لزومی تحقیق ایدر.

اما اتمو قراآت مشهوره تواترله دکل، بلکه آحاد طریقیه
 ثابت اولمشدر دیرسهک، بو تقدیرده قرآن کریم جزم وقطع
 ویقین ایله مقید اولمقدن خروج ایلر. بوایه بالا جماع باطلدر.
 بوکا شو وجهله جواب ویریه یلیرکه قراآت مذکوره نک
 بعضی متواتردر و بونده بین الامة اختلافده یوقدر. قراآت
 مذکوره نک هر بریسیله و بعضیسیله قرائتی تجویز دخی آحاد
 بایندندر. بعض قرآنلرک آحاد بایندن اولسی ایسه قرآن کریمک
 بکلیته قطعی اولمقدن خروجنی اقتضا ایتمز (والله اعلم)

باب ثانی

« اعوذ بالله من الشيطان الرجيم » قولمزدن مستنبط اولان

مباحث عقليه بياندهدر



معلوم اولسون که بو بابده سوز ارکان خمسهيه تعلق ايدر .
استعاذه، مستعيز، مستعاذه، مستعاذه منه، برده کنديسي ايجون
استعاذه حاصل اولان شی .

رکن اول

استعاذه

استعاذه مسائل شتاي مشتقدر .

برنجی مسأله

« اعوذ بالله من الشيطان الرجيم » قولمزدن بحسب اللغة

تفسیری بیاندهدر



اعوذ، کلمه سی (عوذ) دن مشتقدر .

عينك فتحى و واوك سكونيله عوزك ايكي معناسى واردر .
 بريسى - التجا و استجاره؛ وديكرى التصاقد ر . التجا و استجاره نك
 تركهسى صغنىق ، و التصاقل ده معنای تركيسى ياشمق واولاشمقد ر .
 « اطيب اللحم عوزه » دنيركه كميكه ملتصق اولان لخم ديمكد ر .
 چونكه عوز ، سكر و زننده كميكه ياشق اولان اته اطلاق اولنور .
 ايمدى وجه اوله كوره « اعوذ بالله » قولنك معناسى « الله تعالى نك
 رحمت و عصمتيه صيغيريم » ديمكد ر . وجه ثانى يه كورده ده معنای
 شريفى « نفسى الله ذوالجلالك فضل و رحمتيه الصاق ايلرم » ديمكد ر .
 شيطان ، لفظنه كلنجه : بو ماده ده ايكي قول واردر .

قول اول . - شيطان ، بعد معناسنه اولان (شطن) دن
 مشتقد ر . (شطن دارك) دنير . بناً عليه انس و جن و دابه دن
 متد اولانه ، رشاد و سداددن بعدى جهته شيطان ، اطلاق
 اولنور .

الله تعالى (وكذلك جعلنا لكل نبى عدوا شياطين الانس
 و الجن) بيورمشدر . حضرت عمر بركون بر باركيه بينر ، باركيه
 شاخلانمغه صچرامغه باشلار ، اوشاخلانمغه حضرت عمرده
 قرباچلادى ، قرباچلادقمه حيوانك آزغلنى آرتدى ، نهايت
 حيواندن ايندى و آدملىرينه « ما حلتمونى الا على شيطان »
 بيوردى كه آزغين حيوانه شيطان اطلاق اولنديغى مشاراليهك
 بو كلاميله ده مستدلدن .

قول ثانى . - شيطان ، [شاط يسيط] قولندن مأخوذ ر .
 متد ر ، تركهسى آزغين كيسه كندى وجوه مصالحنى مبطل

اولدینی سییله نفسنده باطل کیدر . آنک ایچون هر آزغینه
شیطان، اطلاق اولندی .

للمترجم . — ترجمه قاموسده دخی «شیطان» مادهسی بوجهله
مضبوط اولمقله برابر انده بعض ایضاحات زائده مندرج ایدو .
کندن بوجه آتی نقل اولنور .

«شیطان» حیجان وزرننده معلومدرکه فارسیده دیوه دینر .

مؤلفک [۱] بصائرده بیانته کوره شیطان مادهسنده ایکی

قول واردر .

بزی «بعد» معناسنه اولان (شطون) دن مأخوذدر .

بعید عن الحق، یاخود بعید عن الرحمه اولدینی ایچون اطلاق

اولندی .

بو صورتده نونی اصلیه اولوب وزنی فیهال اولور . قول

ثانی (شیط) مادهسندن مأخوذدرکه احتراق معناسنه در ابلیس

قوة ناریه دن مخلوق اولدینی ایچون اطلاق اولندی .

بو صورتده وزنی فعالان، ونونی زائده اولور . و بر قول

دها وارددرکه هلاک معناسنه اولان (شیط) دن مأخوذدر .

اسم اصلیه عزازیل ایدی . و شیطان مطلقا ازغین اولان

شخصه دینر . کرک انس ، و کرک جن اولسون . (نهایت)

رحیم دخی فعل بمعنی مفعولدرکه مرقوم دیمکدر .

«کف خضیب» و «رجل لعین» دیدکلری کبی که مخضوب

و ملعون معناسنه در [۱] شیطانك مرجومیتنده دخی ایکی وجه
وارد ر.

وجه اول - شیطانك مرجوم اولمه سی من قبل الله ملعون
اولیشندن کنایه در. الله تعالی شیطانه «جنتدن چیق! سن ملعون
ومطرود سین» مألنده اوله رق (اخرج منها فانك رجیم)
نیورمشدر.

ایشته بو آیت کریمه دنده اکلایشیلرکه «لعن» رجیم تسمیه اولنور.
المترجم. - قاموسك بیاننه کوره «رجیم» رانك نخی و جیمك
سکونیه قتل ایلک معناسنه در. بو معنا و آتی الذکر معانی سائره
رمی بالحجاره معناسندن متفرعدر. و بر آدمك ناموسنه طوقغه
دیر. وغیب، ظن و کمان، دوست، ندیم و مصاحب، لعن و نفرین،
سوکمک، و برشی ئی کلیاً ترك و قطع ایلک، قوغمق، بر آدمی طاشه
طوقتی کی معنارده کلیر. برده «رجیم» بر کیسه یه آتیلان طاشك
اسمیر (بتدی).

ینه قرآن کریمه جناب حق ابراهیم علیه السلامک پدرندن
حکایه بیورمشلرکه پدر ابراهیم جناب ابراهیمه (لئن لم تنته
لنرجنک) دیدی. بعضیلری دیمشکه پدر ابراهیم بو تعبیر ایله
«رجیم بالقول» اراده ایتدی.

ینه جناب حق قرآن مینده قوم نوحدن حکایه طریقیله

[۱] خضاب، بو یا خضیب، بویانمش معناسنه در «کف خضیب»
قنه لشمش رنگین ال دیمکدر. «کف خضیب» بر یلدزکده آدیدر. کمال
جرتندن انکله کنایه اولمشدر.

بیورمشارکه قوم نوح، جناب نوحه (لئن لم تته یانوح لتکون
من المرجومین) دیدیلر.

یسن، سوره شریفه سنده ده (لئن لم تنتهوا لارجنکم)
بیورلشدر.

وجه ثانی. - شیطانک مرجومیتله موصوف اولسنک سبی
شودرکه الله تعالی شیطانی سمواتدن طرد ایچون شهب وثواقبه
رمی ایتملرینی ملائکه کرامه امر بیورمغله بعد ازان لفظ رجیم،
هر آزغین، شریر متمرّد کیسه یه وصف ایدلشدر.

(ان الله هو السميع العليم) قولنده دخی ایکی وجه واردر.
وجه اول. - استعاده دن غرض، وسوسه شرندن
احترازدر. وسوسه ایسه معلومدرکه قلب انسانده کویا حروف
خفیه ایمشده انلره هیچ کیسه مطلع دکل ایمش! انک ایچون
عبد کویا دیرمش که «ای هر مسموع ایشیدن، هر کیزلی سری
بیان باری تعالی؟ سن شیطانک وسوسه سنی ایشیدر و بونده کی
غرضی ده بیلیرسین؛ آنک بو وسوسه سنی بندن دفعه قادر اولانده
الحق سنسین؛ او یله ایسه او وسوسه شیطانیه یی فضل و کرمکله
بندن دفع ایت!»

ایشته بوسبیدن ناشی بو موضعه السميع العليمک ذکر
اذکار سائرده دن اولی وانسبدر.

وجه ثانی. - السميع العليمک بو موضعه تعنی مجرد لفظ
قدانه اقتدادن ناشیدر؛ چونکه قرآن کریمده (واما ینزعنک من
الشیطان نزع فاستعذ بالله انه سميع عليم) بیورلشدر.

حم السجده سورة شریفه سنده ده (انه هو السميع العليم)
بیورلدی.

ایکنجی مسأله

ماهیت استعاذه دن بحث عقلی بیانده در

معلوم اولسون که «استعاذه» انجق علم ایله، حال ایله، عمل
ایله تمام اولور.

علم. — عبدك جميع منافع دینیه و دنیویه نی جلبدن، و جمیع
مضار دینیه و دنیویه نی دفعدن عاجز اولدیغنی، واللہ تعالی و تقدس
حضر تلرینک ایسه جمیع منافع دینیه و دنیویه نی ایجاده، و جمیع
مضار دینیه و دنیویه نی دفعه قادر اولوب آندن بشقه سی نه او
منفعتلری جلبه، و نهجه بو مضرتلری دفعه اصلا مقتدر اولمادیغنی
بیله سیدر.

ایمدی قلبده بو علم، حاصل اولدقدن بوندن ینه قلبده بر
حالتک حصولی تولد ایدر که اوده انکسار و تواضعدن عبارتدر.
و بو حالت شریفه اله تضرع و خضوع تعیر اولنور.
و بو حالتک حصولی ینه قلبده دیگر بر صفتک، لسانده ده
بشقه بر صفتک حصولنی ایجاب ایدر.

قلبده حاصل اولان صفت، عبد عاجزک الله ذو الجلال
کندیسنی آفاددن مصون، و خیرات و حسناتک افاضه سنه مخصوص
و مقرون بیورمسنی مرید اوله سیدر.

لسانده حاصل اولان صفت دخی كذلك عبد عاجزك اشبو
معنای حق سبحانه و تعالی حضرت تارندن لسانیه طالب اوله سیدر.
واو طلب دخی استعاده دن عبارتدر . استعاده ده (اعوذ بالله)
قولیدر .



بیانات واقعہ من محاط علم یقینک اولدقدہ استعاده نک رکن
اعظمی (علم العبد بالله و علمه بنفسه) ایدوکی سکا ظاهر اولورکه
عبدک هم الہنی، حمدہ کندی حالی بیله سی دیمکدر .

علم العبد بالله نہدر ؟

بو حق سبحانه و تعالی حضرت تارینک جمیع معلوماتی عالم، یعنی
کافۂ ممکنات و تمتعاتی علماً احاطہ ایتدیکنی بیله سیدر . زیرا امر
بویله اولمسه الله تعالیٰ عبدک استعاده ده، عبدک احوالی ده بیله مامسی
جائز اولور . بناءً علیہ بوتقدیرده حق تعالیٰ حضرت تارینہ استعاده
و التجا عبث اولمش اولور .

برده «علم العبد بالله» حق سبحانه و تعالیٰ حضرت تارینک
جمیع ممکناتہ قادر اولدیغنی دخی عبدک بیله سیدر . والحق تعالیٰ
حضرت تارلی بالفرض جمیع ممکناتہ قادر اولمسه، عبدک مرادینی
تحصیلدن بعضاً عاجز قاله بیلیر .

وکذا «علم العبد بالله» الله ذوالجلالک مطلقاً جواد اولندیغنی ده
عبدک بیله سیدر . زیرا الله ذوالجلال حقندہ بخل جائز اولسه،
ا کا استعاده و التجاده فائده اولماق لازم کلیر .

و کذا « علم العبد بالله » اللهم دن بشقه سی مقاصد و آمانک حصوله معاونت اتمک مقتدر اولمادیغنی ده عبدک بیله سیدر زیرا عبدک مقاصد و آمانه اللهک غیری معین اوله بیلک جائز اولیای، الله تعالی یه استعاذه ده رغبت، قوی اولمازدی . اشبو علوم ایسه الحق توحید مطلق ایله تمام اولور .

توحید مطلق ایله مراد، « مدبر عالم، واحددر . عبد کندی افعالنده مستقل دکلدر . زیرا مستقل اولسه غیره استعاذه والتجاه فائده اولمازدی . » دیه عبدک بیله سیدر .

ایمدی شو و ایضا حاتمزه ثابت اولدی که عزت ربوبیتی و ذلت عبودیتی بیلدکجه عبدک « اعوذ بالله من الشیطان الرجیم » دیمه سی صحیح اوله ماز .

واقعا « استعاذه ده مطلقا شو مقدماتی علی سبیل التفصیل بیلکه حاجت یوقیدر . بیلکه انسان یالکزجه امر بویله اولدیغنی علی سبیل الاجمال بحویر ایدنجه (اعوذ بالله) دیمک بحاجدر » دینلرده واردر . الحق بوقول جداً ضعیفدر . زیرا ابراهیم علیه السلام (لم تعبد ما لا یسمع ولا یبصر ولا یغنی عنک شیئاً) قوانده پدرینی تعیب ایلدی . امدی آله واحد؛ جل شأنه حضرتلری جمیع معلوماتی عالم، جمیع مقدوراته قادر اولمادیغنی تقدیرده عبدک اکا سؤالی ایشتمز کورمز کیسه یه ایدی لان سؤاله بکریه جکندن حضرت ابراهیم علیه السلامک پدرینه عیب صایدیغنی شیئک محتده داخل اولمش اولور .

علم العبد بحال نفسه نهدر ؟

بودخی عبدك كندی مصالحنه علی سبیل التمام رعایتدن عاجز
وقاصر اولدیغنی وبالغرض كندی مصالحنی كمیت و کیفیت حسیله
بیلک ممکن اولسه بیله، انلری فقدانى حالنده تحصیله، ووجودی
حالندهده ابقایه مقتدر اولمادیغنی بیله سیدر.

بوراسنی بالله دك یا؟ ایمدی دیرزكه :

عبدك قلبنده علوم مذکوره حاصل، و بونلری مشاهده ایله
علمی مرتبه یقینه واصل اولدقده مرآت دل تابناکنده انکسار
و خضوع دنیلان خالت شریفه واجب الحصول اولور.

و بو تقدیرده عبدك جناننده طلب، ولساننده اوطلبه دال
اولان لفظ، حاصل اولورکه بواه «اعوذ بالله من الشيطان الرجيم»
قولیدر.

انسانك دنیایه، عقبایه متعلق مصالح نفسنی تحصیلدن عاجز
اولدیغنی مقام استدلالده دیرزكه : انساندن صادر اولان یا عملدر؛
یا عملدر. انسانك ایسه بو ایکی بایددهده عجزی درجه نهاییهدهدر.
انسانك علم بابندهکی عجزینه کلنجه : تحصیل علمده اللهه استعاذه
والتجایه، و علمك ضدینك حصولدن احترازدهده ینه اللهه استعاذه
والتجایه عبد اشد احتیاج ایله محتاج اولوب بوكاده وجوده آتیه
دلاله ایدر.

وجه اول. — عقلای محققیندن نیجه کیسهلری کورمشزدرکه
ایلیشدکلری برمسألهنك حقیقتنی کشف و حل ایدهمیهرك مدت
عمرلری شبهه ایله کچر. یالسکز شبههده قالسهلر ای؛ نقطه بعضیلری

یا کاش بالله دکاری مسأله نك صحتته قائل، و خطا لرنده مصر اوله.
 رق اوشبهه و خطا لرینی علم یقینی و برهان جلی ظن ایدر لر. نهدن
 صکره بشقه لری کلیر که او محقق لک وجه غلطی کشف ایدر ک
 مسأله ده کی خطا لرینی فنا اظهار و اثبات ایله حقیقت حالی میدانه
 قور لر. ائیدی مادام که بو حال ناسک بعضیسی حقنده جائز
 الوقوعدر؛ بونک مثلی هر کس حقنده ده جائز اوله بیلیر. حتی
 بو یا کاش آکلایش اولسه ایدی، اهل علم آرسنده ادیان و مذاهب
 حقنه بوقدر اختلاف واقع اولمازدی. ائیدی امر بویله اولنجه،
 عیبا الله تعالی و تقدس حضرتلرینک عون و عنایتی و فضل و کرم
 و ارشادی اولسه، بر کیمسه بولنه بیلیر می که ضلالت طالع لری
 وظلمت کردا بلری آرسندن مجرد کندی سفینه فیکریله ره یاب
 خلاص، و ساحل رس نجات اوله بیلسون؟ هیات!

وجه ثانی. — دنیاده هر کس بر دین حق، بر اعتقاد صحیح
 حاصل ائیمکه چالیشیر. کیمسه یوق که کندی نك جهل و کفرینه
 راضی اولسون. ائیدی امر هر کسک سعی و ارادته وابسته
 اولسه ایدی، عمومک محق و صادق اولسی لازم کلیردی. حالو که
 عموماً خلقک محق و صادق اولسی شویله طورسون! بلکه بالعکس
 محق اولانلر مبطللره نسبتله ثور اسودک جلدنده بر بیاض قیل
 مثابه سنده قالیور. یعنی اهل حقک آزغی بونسبتده در. ایشه
 بوندنه اکلایه بیلیر که خالق الارض و السماتک عون و عنایت
 الهیه سی منضم اولما دجه ظلمات ضلالتدن خلاصه یول یوقدر.
 وجه ثالث. — انسان، صحت و فسادنده متوقف اولدینی

بر قضیه نك موضوعیله محمولی آره سنده حد اوسط داخل اولما.
دجه صحیح ویا فاسد اولدیغنی جزمه یول بوله مز.

ایمدی اگر حد اوسط او انسانك مستحضری ایسه قیاس،
منعقد، نتیجه لازم اولور. اول حالده دیمك كه قضیه مذکورده
عقل متوقف دكل، بالعکس جازم ایمش! بز ایسه آتی متوقف،
فرض ایتمشدك: مع هذا كه جازمه متوقف دیمز. واکر حد اوسط
او انسانك مستحضری دكل ایسه بو حالده او آدم حد اوسطی
طلب ایده بیلیرمی؟ ایده مز می؟ یولنده بر سؤال وارد اولور.

اولکیسی ایسه یعنی امکان طلب باطلدر. زیرا شخص متوقف
اگر حد اوسطی بعینه بیلورسه، بیلدیکی شیئی فصل طاب ایده.
بیلیرکه برشی بی بعینه آرامق اولا آتی بیلکه متوقفدر.

واکر بعینه بیلورسه بوتقدیرده حد اوسط مستحضری دیمك
اوله جغندن آنك طاب حاصلی تحصیل قیلندن اولمش اولور.
و اما حد اوسطی طلبه شخص متوقف، طریق امکان بوله.
مدینی تقدیرده دیمك كه توقف مذکوردن قورتلغه. وظلت حیرتن
چقمغه مدار اولان طریق تحصیلدن عاجزدر.

ایشته عبدك درجه نهاده حیرت و دهشته بولندیغه بو بر
دلیل عائی در.

وجه رابع. — حق تعالی حضرتلری رسول اکرم صلی الله
علیه وسلم افندمزه (وقل رب اعوذبك من همزات الشیاطین)
بیورمشدر.

اشبو امر استعاذه ایسه مطلقدر. بر حالت مخصوصه ایله

مقید دکلدر . بناءً علیه بو امر الهی عقائد و علومى تحصیلدن
عبدك كمال عجزینی بیاندر .

عبدك كندیته جلب منفعتنه و نفسندن دفع مضرتنه مدار اولان
اعمال ظاهره سی

ایشته بو اعمال ظاهره دن ده عبدك عجزی همان تحصیل علمده کی
عجزی کی در بوکاده وجود آیه دلالت ایدر .

وجه اول . — ارباب بصائر منکشف اولمشدرکه اشبو بدن
خاکدانی دوزخه بکزر ؛ و بودوزخك قپوسنده اون طقوز نوع
زبانى اوطوریورکه بونلر حواس خمس ظاهره، حواس خمس
باطنه، شهوت، غضب، برده یدی قوه طبعیه دن عبارتدر . و بو
اون طقوز نوع زبانیدن هر بریسی بحسب الجنس واحده در .
شوقدرکه بونلردن هر برینك تحتنده بحسب الشخص و العدد،
اعداد غیر متناهیه داخل اولور . بو کثرتی قوه باصره ایله ده
اعتبار ایده بیلیرسین ! زیرا قوه باصره یی ادراکی اوزرینه تقویه
ایدن شیلر امور غیر متناهیه درکه امور مذکوره نك هر برینی
کورمکدن قلبده بر اثر مخصوص حاصل اولور . او اثر مخصوص
دخی قلبی عالم روحانیاتك اوچندن عالم جسمانیاتك خضیضنه جر
و تنزیل ایلر .

بو دقیقه معلومك اولدقده ظاهر اولورکه شعوائق و علاقك

کثرتیه برابر اعانت و اغانت الهیه مدد رس اولمازسه، بوکرداب
ظلماتدن قلبك قورتيله جنی یوقدر .

ووقتاکه جهات نقصانات عبده نهایت، وکمال رحمت و قدرت
و حکمت خدایهده حد و غایت اولمادیغی ثابت اولدیسسه: جمیع
اوقاتده الله تعالیه استعاذه والتجأنک واجب اولدیغی ده ثابت اولور.
ایشته بو سیددن ناشیدرکه هر قولک، هر عملک اولنده، هر
لفظه و لحظه نك مبدأئده (اعوذ بالله من الشيطان الرجيم) ديمك
اوزرمزه واجب ولازمدر .

وجه ثانی . - بو حیات عاجلهده حاصل اولان لذتله ایکی
قسمدر . بریسی لذات حسیه، و دیکری لذات خیالیهدر . لذات
خیالیه، لذت ریاستدن عبارتدر . و انسان بویکی قسم لذاتدن هر
هانکیسنک تحصیلنده ممارسه حاصل ایتماش ایسه اولذتی طویه مز،
واکلاویه مز، لذتی طویمدیغی شیئهده انسانک رغبتی بالطبع آزاوور.
فقط او لذتله بالممارسه وقوف، حاصل ایتدکدن صکره
انلره مثلند اولمغه باشلار . و التذائینک تزایدی نسبتده آنلره
رغبتی ده آرتار . شویلهکه انسان، تحصیل لذات و طیبایده نه قدر
عالی بر مقامه واصل اولورسه اواسون، مطلقا آندن ایلری .
آندن یوجه بر مقام آخره وصول ایچون شدت رغبتی، و قوت
حرصی دخی او نسبتده تزاید و ترقی ایلر .

الحاصل انسان، مطالب و مقاصدینه نه قدر چوچه نائل
اولورسه . آندن زیاده سنی تحصیلده، حرصی او قدر عظیم، و رغبتی
او مرتبه شدید اولور .

و چونکه مراتب کماله نهایت اولمادینی کی، حرصک درجا تنهده کذلک حد و غایت یوقدر. و نصل که نهایتی اولیان کالاتک تحصیلی ممکن دکلسه، کذلک الم شوق و حرصی دخی قلبدن ازاله یه عبد ایچون امکان، مفقوددر.

الحاصل بو برمرضدرکه علاجه عبدک قدرتی تعلق ایتمز. بناء علیه بویابده رحمی، کرمی، نصرتی قوللرینه مبذول و رایکان اولان واجب تعالی حضر تلرینه رجوع ایله (اعوذ بالله من الشیطان الرجیم) دیمک، و آنک درگاه عزتیه استعاده والتجا ایلک لازم کلیر.

وجه ثالث. - آتی الذکر آیات جلیله دخی تقریر سابقمزی تأیید ایلر.

قال الله تعالى (ایاک نعبد وایاک نستعین)
و قول جل جلاله (واستعینوا بالصبر والصلاة)
و قوله موسى لقومه (استعینوا بالله واصبروا ان الارض لله یورثها من یشاء و من عباده والعاقبة للمتقین)
بعض کتب الهیهده ده مذکوردر که باری تعالی و تقدس حضرتلری عزت و جلالته قسم ایدرک بیوررلرکه:
بنم درگاه عزتمک غیری یردن امیدوار عنایت اولانی البته مقطوع الامل و الباس ثوب مذلتله مذل ایدرم.

شرف قریبمدن خائب و خاسر و وصالمدن ابعاد ایله الی الابد حیران و متفکر قیلارم. اثنای شدائدده او، غیرمدن مدد اومیور!
حالبوکه شدائد بنم ید قدرت قاهره مدهدر. حی و قیوم اولان

بنم؛ او بشقه سندن رجامند اوليور؛ بشقه قبولري چاليور؛
 حالبوکه قبالي قبولرک اناختارلري بنم دست مشيتدهدر. بنم باب
 رحتم بکا دعا و مناجات ايدنه آچي قدر.

او چنجي مسأله

مذهب اهل جبر ايله مذهب قدريه به کوره استعاذه نصل
 صحيح اوله بيلير؟

معترله ديمش که «اعوذ بالله» يعنى اللهه استعاذه والتجاء اعتقاد
 جبرى برقاج وجه ايله ابطال ايدر.

وجه اول. — «اعوذ بالله» قولى عبدك فعل استعاذه ي فاعل
 اولديغنى اعترافدر.

ايمدى اكر اعمالك خالق الله ذوالجلال اولسه، عبدك فعل
 استعاذه ي فاعل اولمى ممتنع اولوردى. زيرا حاصلى تحصيل
 محالدر.

كذلك فعل استعاذه ي الله تعالى عبده خالق ايتديكى وقت
 آنك دفعى ممتنع اولديغى كي، خلق ايتنجده تحصيل ينه ممتنعدر.
 بناء عليه «اعوذ بالله» قولى عبدك كندى افعالى موجب اولديغنى
 صراحة اعترافدر.

وجه ثانى. — مستعاذ منها اولان امور اكر الله تعالى انك
 مخلوق دكلسه واقعا الله تعالى حضر تلى نه استعاذه بجادر. اما
 امور مذكوره نك فاعلى الله تعالى اولنجه، او اموردن الله تعالىه

استعاذه ممتنع اولور. زیرا بوتقدیرده عبدکویا اللهم عین
ایشلیدیکی شیده اللمدن ینہ الله صغتمش اولور.

وجه ثالث. — معاصیدن الله استعاذه، عبدک معاصی به راضی
اولمادیغنه دلالت ایدر. ایمدی معاصی اکر الله تعالانک تخلیقیه
قضاسیله، حکمیله، حاصل اولیورسه، عبدک معاصی به رضاداده
اولمسی لازم کلیر. چونکه قضاء الله رضا، واجب اولدیغی اجماع
امتله ثابتدر.

وجه رابع. — اکر وسوسه شیطانک فعلی ایسه واقعا وسوسه
شیطاندن الله صغتمق، معقول و مستحسن اولور. اما وسوسه
اللهک فعلی اولوبده وجود وسوسهده شیطانک قطعاً دخل
واثری یوق ایسه، اول حالده شر شیطاندن استعاذه، فصل معقول
و بجا اوله بیلیر؟ بلکه بوتقدیرده اللهک شرندن استعاذه ایدمک
لازم کلیر. زیرا هیچ برشر یوق که من قبل الله صادر اولمش اولسون.
وجه خامس. — شیطان علیه ما یستحق دیه بیلیر که: «بن

حقیقتده هیچ برشیئک فاعلی اولمادیغ حالده یا اله العالمین! سن
وسوسه نک صدورینی بدن بیلدک. بنده ایسه قدرتکه مخالفته
قدرت یوق. صکرده (لا یتکف الله نفساً الا وسعها) و (یرید الله
بکم الیسر ولا یرید بکم العسر) و (ما جعل علیکم فی الدین من
خرج) بیوردک. ایمدی بواعذار ظاهره و اسباب قویه میدانده
ایکن بنی ذم و لعن ایتماک سنک نزد حکمت و رحمت ربانیه کده
فصل جائز اوله بیلیر؟

وجه سادس . - ینه شیطان دیهیلیرکه : « بندن صادر اولان
برجرم سببیله، یاخود بندن صادر اولیان برجرم سببیله بنی
مرجوم و ملعون قیلدک . ایمدی بنم مرجومیت و ملعونیتیم اکر
بندن صادر اولان جریم سببیله ایسه شبهه یوقکه . جبر، باطل
اولور . و اکر بندن صادر اولیان برجرم سببیله ایسه ینه شبهه
یوقکه بو محض ظلمدر . سن ایسه بیورمش سین که (و ما لله یرید
ظما للعباد) ایمدی یارب ! بو ظلم سکا لایقمیدر ؟

بونک اوزرینه دنیرسه که اشبو اشکالار جبره قائل اولانه
وارد اولور . بن ایسه نه جبره قائل، نه قدره . بلکه بن دیرم که
حق جبر و قدر بیننده متوسط اولان امردر که اوده کسبدر .
بزده دیرزکه بوجواب ضعیفدر . زیرا فعلده عبدک قدرتی
یا علی سیل الاستقلال مؤثردر . یا دکلدر . اکر مؤثر ایسه سوز
مذهب اعتزاله منجر اولور . دکل ایسه جبر محضه وارر . ذکر
اولنان سؤالر ایسه جبر محض اوزرینه وارد اولوب بناءً علیه
جبر و قدر بیننده واسطه نصل تعقل اولنه ییلیر ؟

اهل سنتک معترله یه جوابی

ای اهل اعتزال ! سزک بزه الزام ایتدیکنر اشکالارک هپسی
ایکی وجهدن طولایی سزه وارد اولور .

اولا . - عبدک قدرتی یا احد طرفینی تعیننه منحصر، یاخود
هرایکی طرفهده صالح اولور . ایمدی شق اول، اختیار اولنورسه
جبر لازم کلیر . شق ثانی اختیار اولنورسه اول حالده احد طرفینک
آخر اوزرینه رجحانی یا برمرجحہ متوقف اولور، یا اولماز .

برمرححه متوقف اولنجهده او مر حنك فاعلى يا عبددر؛ يا جناب
باريدركه شق اوله كوره تقسيم اول عودت ايدر. شق ثانى يه كوره
دخى الله تعالى او امر مر ححى فاعل اولنجه فعل، واجب الوقوع
و فاعل اولنجهده ممتنع الوقوع اولور. و بوتقديرده بزم عليهمزده
ايراد ايتديكيز اشكالاتك كافه سى سزه وارد اولمش اولور.

ثانياً. — «احد طرفينك آخر اوزرينه رجحاني مر ححه
متوقف دكلدر» دنياه بيلير كه بوسوزكده بطلاننه شو ايكي وجه
آتى دلالت ايدر.

وجه اول. — اكر بوجاژ اولسه، ممكنك طرفيندن — يعنى
وجود و عدمندن — برينك ديكرى اوزرينه ترجيحى ايله وجود
مر ححه استدلال باطل اولوردي.

وجه ثانى. — احد طرفينك آخر اوزرينه رجحاني مر ححه
متوقف اولماديغى تقديرده او رجحان، عبيدن صادر اولمش
صائناز. بلكه راست كله اولمش صاييلير. بوجالده جبر محض،
عودت ايدر.

ايشته بزم عليهمزده هر نه كه ايراد ايتمش ايسه كر انك تماميله
سزه وارد اولديغى بو بيان و ايضاح ايله ثابت اولور.

برده اى اهل اعتزال! سز كده مسلكز اولديغى وجهاله
مادام كه الله ذوالجلال جميع معلوماتى علمدر. بر شينك على خلاف
علمه وقوعى علم الهيسنك جهاله انقلابى اقتضا ايترمى. و بو ايسه
محال دكليدر؟ حالو كه محاله نتيجه و يرن شى ده محال اولديغنده
شبهه يوقدر. بناءً عليه قضا و قدر بحثنده بزم عليهمزده هر نه كه

ایراد ایتش ایسه کز علم بچنده تمامیله سزه وارد اولور . بوبابده
 اوپله بر لزوم قطعی ایله ملزمسیکزرکه ویره جک جوابکز یوقدر .
 آندن صکره اهل سنت و جماعت دیمش که (اعوذ بالله من الشیطان
 الرجیم) قول شریفی اعتقاد قدری برقاق وجه ایله ابطال ایدر .
 وجه اول . — « اعوذ بالله من الشیطان الرجیم » قولک
 ایله مطلب ، الله تعالانک یانهی و تحذیر صورتیله ، ویاخود قهر
 طریقیه عمل وسوسه در شیطانی منع ایتسی اوله جقدر .

اولکیسنه کلنجه : بو اولمش بتمش بر ایشدر . بناءً علیه بویله
 اولمش بتمش اولان برایشی یعنی نهی و تحذیر صورتیله شیطانی
 عمل وسوسه در منع ایتیمی تکرار اللهم من طلب ایتک حاصلی
 تحصیل دیمکدرکه محالدر .

ایکچیسنه کلنجه : بوده غیر جائدر . زیرا الجاء ، شیاطینک
 مکلفیتنه منافیدر . حالبوکه شیاطینک دخی مکلف اولدقلری ثابتدر .
 معتزله نك بو سؤاله جوابی

دیدیلرکه : استعاذه ایله جناب حقدرن مطلوبمز مجرد عبد
 مکلفی فعل حسنه و ترک قبیحه دعوت ایدن الطافی ایشله مکدن
 عبارتدر .

او الطاف ، باسرها جناب حقک فعلی اولوب فعلی اولنجه
 آنلری طلبده نه فائده واردر ؟ دیلمسون .

زیرا بعض الطاف وارکه آنک ایشلنسی یا لکتر بو دعا وقتنده
 یعنی حین استعاذهده بجا اولور ؛ بناءً علیه دعای مذکور یعنی
 استعاذه تقدم ایتدکجه او الطافک فعلی بجا اوله ماز دیرز .

اهل سنت و جماعتك جواب الجوابى

ديديلرکه: جناب حقـدن فعلی مطلوب اولان او الطافی
ایشلمه نك جانب فعلی جانب ترك اوزرینه ترجیمده اثری یا واردرد؛
یا یوقدر . واریسه ترجیمك حصولی حالنده فعل، واجب الوقوع
اولور .

بونك دلیلده شودرکه وجود جانبك رجحانك حصولی
حالنده بالفرض عدم حاصل اولسه او تقدیرده وجود، جانبك
رجحانی حاصل اولمق لازم کلیر . بو ایسه تقیضین یئنی جمع
دیگدرکه محالدر . بناءً علیه ثابت اولدی که رجحانك حصولی
حالنده فعلك وجوبی حاصل اولور؛ و بوده اعتقاد اعتزالی
ابطال ایلر .

و شاید او الطافك فعلی حسیله وجود، طرفك رجحانی
حاصل اولمازسه دیمك که الطاف مذکورهی ایشلمه نك ترجیمده
اصلاً بر تأثری یوقدر . بناءً علیه او الطافی ایشلمه مك عبث
محض اولمش اولور؛ بو ایسه حق باریده محالدر .

وجه ثانی . — دنیلیرکه الله تعالی عبدك صلاح حالنی یا ایستر؛
یا ایسته مز . فعل افسادیده شیطاندن یا توقع ایدر؛ یا ایتمز . ایمدی
عبدك صلاح حالنی اراده ایله برابر شیطاندن توقع فساد اید .
میورسه، بونك یئنی فصل توفیق اولنه ییلیر . زیرا واجب تعالی
مادامکه عبدك صلاح حالنی اراده بیوریور، و بونکه برابر
شیطاندن دخی فعل افسادی توقع ایدیور! باری شیطانی هیچ
یارا تمامق و مادامکه یاراتدی، عبد اوزرینه مسلط ایتمامك لازم

کلیدی. و اگر شیطان فعل افساد بکنیورسه، اول حالده
شیطان استعاده به عبدك نه احتیاجی قالیر ؟

اما الله تعالی عبدك صلاح حالی اولان شیئی اراده ایتمز
دنیلیرسه، بوتقدیردهده الله استعاده شر شیطان اعتصامی فصل
مفید اوله بیلیر ؟

وجه ثالث. — شیطان یا منحصرأ شر ایشله مهیه مجبوردر ؛
یا خود شری ده خیری ده ایشله مهیه قادردر. ایتمدی بونك
طوغریسی اولکیسی ایسه دیمك که الله تعالی آنی شره اجبار
بیورمشدر. بواجبار ایسه معتزلهك « باری تعالی صلاح وخیردن
بشقه برشی اراده ایتمز » دیدکلرینی قدح و جرح ایلر.

و شاید طوغریسی ایکنجیسی ایسه که بوده شیطانك فعل
شردهده؛ فعل خیرهده قادر اولمسندن عبارتدر. بو صورتده فعل
خیرك فعل شر اوزرینه مرجحسز ترجیحی متمتع اولور. و او
مرجح دخی الله تعالی اولمق لازم کلیر. اوله اولنجه شر شیطاندن
استعادهده نه فائده واردر ؟

وجه رابع. — طوتهلم که بشرك ارتکاب معاصی ایتمسی
شیطانك وسوسه سی سبيله در.

یا شیطانك معصیتی عیبا نه صورت و سبيله وقوعبولمشدر ؟
ایمدی اگر شیطانك معصیتی ده دیگر شیطانك وسوسه سبيله
وقوعبولمش دیرسهك؛ باهر البطلان اولان تسلسل لازم کلیر.
شیطان آخرك وسوسه سی سبيله دکلدر دیرسهك؛ یا بونك
مثلی حق بشرده نیچون جائز اولسون ؟

جائز اولدینی تقدیردهده شر شیطاندن الله صیغنیقده فائده یوقدر .


و اگر الله تعالی بشره شیطانی مسلط ایتمش اما شیطانیه شیطان آخری مسلط ایتماش دیرسهک، یا بوبشره یازق دگیدر؟ حالبوکه بالخاصه بشری بویله تحملکداز بر باره، بویله بر اضرازه دوجار ایدیویرمک جناب رب العالمینک عبادی حقندهکی مرحمت شامله الهیهسنه منافیدر .

وجه خامس . — مستعاذمنه اولان فعل، اگر معلوم الوقوع ایسه دیمککه واجب الوقوعدر . بناءً علیه آندن استعادهده نه فائده وار؟ و اگر معلوم الوقوع دکل ایسه ممتنع الوقوع اولمش اولورکه ینه آندن استعادهده فائده تصور اولنهماز .



معلوم اولسونکه اشبو مناظره «اعوذ بالله» قولنک حقیقی اولمادیغنه دلالت ایدر . مکرکه خیر و شر هپ اللهدن اولدینی عبده منکشف اوله .

حضرت رسول اکرم صلی الله علیه وسلم افندمن حضرتلری [اعوذ برضاک من سخطک و اعوذ بعفوک من غضبک و اعوذ بک منک لا اخضی ثناء علیک انت کما اثبت علی نفسک] بیورمشلردر . ایشته خلاصه کلام و نتیجه مرام بودر والسلام .



رکن ثانی

مستعاذبه

معلوم اولسون که مستعاذبه، قرآن و اخبارده ایکی وجه اوزره وارد اولمشدر .

برسی «اعوذ بالله» دیکری «اعوذ بکلمات الله»
 «اعوذ بالله» قولنک بیانی آنحق لفظه اللمدن بحث ایله
 تمام اولورکه بو بحث دخی قریباً بسم اللهک تفسیرنده کله جکدر .
 «اعوذ بکلمات الله التامات» قول شریفنه کلنجه : معلوم
 اولسون که «کلمات الله» ایله مراد (انما قولنا لشیء اذا اردناه ان
 نقول له کن فیکون) قول شریفدر .

(کن) قولیلده مراد، قدرت قاهره سبحانیه سنک ممکناتده :
 ومشیت نافذه الهیه سنک کائناتده هیچ بر عائق و مانعک عروضی
 ممکن و متصور اوله میه حق بر حیثیله نفاذ و سریانیدر .

شک و اشتباه ایسه یوقدرکه الله استعاذنک بحالولمسی آنحق
 کندی ذات پاک بویله بر قدرت قاهره و بر مشیت نافذه ایله
 موصوف اولدیغی ایچوندر .

کذلک معلومدرکه جسمانیات قوددن فعله تدریجاً خروج
 ایتک طریقله جلوه کر ساحه حدوث و وجود اولور .

روحانیاتك تكونيله قوه دن فعله خروجی ایسه بالعکس دفعی و آیدر.

بناءً علیه روحانیاتك حدوث و تکنونی آن غیر منقسمه موجود اولان حرفه شیه اولوب ایشته بو مشاهدن ناشی درکه قدرت صانعك نفاذی (کله) تسمیه قلمشدر.

كذلك علم معقولاته ثابت اولمشدرکه عالم ارواح، عالم اجسام اوزرینه مستولیدر. و بو عالم جسمانیك مدبراتی ارواح علویه در. ته كم باری تعالی (فالمدبرات امرأ) بیورمشدر.

ایمدی «اعوذ بکلمات الله التامات» قول شریفی ارواح بشریه دن ارواح خبیئه ظلمانیه کدرهك شرلرینی دفعهده عالی، مقدس، طاهر، طیب اولان ارواحه استعاذه دیمک و بو تقدیرده اللهم کلمات تاماتیهده مراد، شو ارواح عالیه طاهره ایدوکی بی شکدر.

بو مقامده بر دقیقه دها وازدر. شویله که:

(اعوذ بکلمات الله التامات) قول شریفنك ذکر ی آنجق عبدك نظرنده هنوز غیر الله التفات باقی قالدیغی مدبجه بجا اولور. اما عبد، بحر توحیده طالبوده قعر حقائقده متوغل اولدیغی و اللهدن غیری وارلقده کیمسه یی کورمز بر حال استغراقه کلدیکی وقت اللهدن غیرییه استعاذه، اللهدن غیرییه التجا، اللهدن غیرییه انکال و اعتماد ایدهمیه جکندن اول حال شرف مآله آنجق «اعوذ بالله» و «اعوذ من الله بالله» دیه جکنده شبهه یوقدر.

نصل که خواجه کائنات علیه افضل التحیات اقدمن حضر تبری
دخی «اعوذ بك منك» بیورمشلردر .

شوراسیده معلوم اولسون که بو مقامدهده عبد غیر الله ایله
مشتغل اولمش اولور . زیرا استعاذه مطلقا یا طلب و یا خود هرب
ایچون اولور . کړک طلب و کړک هرب ایسه شبهه یوق که الله
تعالانک غیر یله اشتغال دیمکدر . ایدی عبد بو مقامدن ایلری یه
ترقی ایدوبده نفسندن فانی و نفسنک فناسندنده کذلک فانی
اولدقد در حال «اعوذ بالله» مقامندن دخی ایلری کچهرک بحر
نور بسم اللهده مستغرق اولور . کورمز میسین که علیه الصلاة
و السلام اقدمن دخی اول «اعوذ بك منك» دیوب بعده بو
مقامدن ترقی ایدرک «انت کما اثبتت علی نفسك» بیوردیلر .

لمترجه الحقیق

کوکل کیم محو محویتله ایرمش سر توحیده
نصل ضبط ایلیور ملک فنانی الهی کورسونار

رکن ثالث

مستعین

معلوم اولسون که «اعوذ بالله» سوزی الله طرفندن «بویله سویلیک!» دیه قوللرینه بر امر ایدر. و بو امر دخی بر شخص معینه مختص و مقصور اولیوب علی سبیل العموم وارد اولمشدر. زیرا الله تعالی اشبو استعاذه‌یی اولیا و انبیاسی لسانندن ده حکایه بیورمشلردر. بو ایسه هر بر مخلوقک الله ذوالجلاله مستعین اولسنی ایجاب ایلر.

قرآن کریمده السنه! نبدان منقول اولان استعاذه‌لر

اولکیسی: — باری تعالی و تقدس حضرتلری نوح نبی علیه السلامدن حکایه (قال انی اعوذک ان اسألك مالیس لی به علم) بیورمشلر.

حضرت نوح بو استعاذه‌سی اوزرینه «سلام و برکات» خلعتاریله مظهر اعزاز الهی اولمشدر.

شویله که باری تعالی و تقدس حضرتلری اکا (یانوح اهبط بسلام منا و برکات علیک) بیورمشلردر.

ایکنجیسی: — زلیحانک مراوده معلومه‌سی اوزرینه حضرت

یوسف علیه السلامدن حکایه (قال معاذ الله انه ربی احسن
مثنوی) بیورمشلردر .

اشبو آیت کریمه ناطق اولدینی اوزره حضرت یوسف ار-
تکاب فحشدن جناب الله استعاده ایتسی اوزرینه «حرف سوء
وفحشاء» خلعتاریله نائل عصمت خدا اولمشدر .

شویله که : مولای متعال حضرتلری آنک حقنده (لنصرف
عنه السوء و الفحشاء) بیورمشلردر .

اوچنچیسى . — قحط سنه لرندہ حضرت یوسفک قرداشلری
ایکنجی دفعه اوله رق ذخیره مبایعه سیچون مصره کلدکارندہ نبی
مشارالیه بالاخره کندینی طانتدیرمغه و پدر بزرگوارلرینی مصره
کیتیمکه وسیله اولق اوزره الحاذ بیوردقلری تدبیر معروف ایله
لابوین اولان برادرینی نزدنده آلیقویمق ایستنجیه هنوز واقف
حقیقت حال اولیان دیگر برادرلری اکا «خذ احدا مکانه»
دیمشار ایدی که خلاصه مالى آنک یرینه بریمزی آلیقوی دیمکدر .
نبی مشارالیه دخی آنلره «معاذ الله ان نأخذ الامن وجدنا
متاعنا عنده» یولنده جواب ویرمشدی که خلاصه مضمون شریفی
نزدنده متاع مسروقیزی بولدیمخمز ذاتی بر اقوبده آنک یرینه
دیگرینی اخذ و توقیف ایتمک کبی بر ظلمده بولتمقدن جناب حقّه
صغیرز دیمکدر .

ایشته بو استعاده سببیه حضرت مشارالیه «ورفع ابویه علی
العرش و حرواله سجداً» اکرامیله مکرم و مشرف اولمشدر .
دردنچیسى . — موسی علیه السلام ذبح بقره حقنده کی امر

الهی بنی اسرائیلہ تبلیغ ایدوبده آنلرده (اتخذنا هزواً) دینجه
 نبی مشارالیه دخی (اعوذ بالله ان اکون من الجاهلین) دیدی
 دیه جناب حق قرآن کرمیده حضرت موسادن حکایه بیان
 بیورمشدر.

ایشته بو استغاذسی اوزرینه حضرت موسایی مولای متعال
 حضرتلری ایکی خلعت فاخره احسانیه تجیل بیورمشدرکه
 بری ازاله تهمت، و دیگری احیای مقتولدر. شویله که جناب حی
 و قیوم (فقلنا اخربوه ببعضها كذلك یحیی الله الموتی) بیورمشدر.
 المترجم. — امام فخر رازی رحمه الله علیه (واذ قال موسی
 لقومه ان الله یأمرکم ان تذبحوا بقرة) آیت کریمه سنک
 تفسیرنده حضرت ابن عباس رضی الله عنهمادن وسائر مفسر.
 یندن مروی اولمق اوزره نقل و بیان بیوررلرکه بنی اسرائیلدن
 برکیسه میراثنه قونمه یی استجبال ایتدیکی اقرباسندن بریسنی قتل
 ایدوب یولک اورته سنه اتی ویردی. صکردهده حضرت موسی
 علیه السلامه واروب «بنم بر قریمی اولدر دیلر» دیه شکایت
 ایلدی.

بنی مشارالیه دخی پک چوقی تحقیق و تحری ایتمش ایسهده
 ممکن دکل قاتلی بوله مدی. وقتاکه تحریات واقعه ایله قاتلک ظاهره
 اخراجی ممکن اوله مدی. بنی اسرائیل حضرت موسایه «شونک
 قاتانی میدانه چیقارمق ایچون اللهه یالوار» دیدیلر. حضرت
 موسی دخی بونی جناب، حقدن طاب و نیاز ایتسی اوزرینه ذبح
 بقره ایله مأمور اولدی. بنی اسرائیل ایسه اشبوامر الهی کنیدیلرینه

یلرینه تبلیغ ایدیلنجه تعجب واستغراب ایدرک جناب کلیم الله
 « بزمه اکنیورمیسین؟ » مانده بز سوز سویلایلر. کلیم الله
 دخی استهزا جهلدر. بن ایسه اويله بر جهالتده بولمقدن الله
 صیغیزم « سیاقنده جواب ویردی [۱] بنی اسرائیل ایشک جدیتی
 اکلانجه ذبحيله مأمور اولدقلری بقره نك وصفی طلبده استقصا
 ایلایلر. صکرده پك چوق ارادیلر طرادیلر؛ فقط او وصفده
 بر اوکوز بوله مدیلر. نهایت بر آدمده اوصاف مطلوبه ايله مو-
 صوف بر اوکوز بولایلر. و دکر بهاسنك بر قاچ قاتی و یروب
 آلیلر؛ کسایلر. حضرت موسانك امر و تعلیمی وجهله بقر
 مذبوحك بر عضویه نعش مقتوله اوردیلر. اورر اورماز مقتول
 جناب حقك اذنیله دیرلدی. و کنديسنی اولدورن شخصك استغی
 خبر ویردی. و روایت کوره ینه جانسز اوله رق یره سریلدی.
 قاتل مقتولك وارثی اولان شخص معهود ایمس که جنایت
 قتلی ارتکاب ایتدکن صکره حضرت موسایه واروب جعلی او.
 له رق شکایت ایلشدی. بونك اوزرینه قاتل مرقوم دردست
 ایدیلهرك قصاصاً اعدام اولندی. «تم استطراد المترجم»

بشخیصی. — کندينی قتل ايله تهديد و اخافه ایتدکلر ندهده

حضرت موسی (وای عذت بری وربکم ان ترجون) و دیگر
 بر آیتده دخی (آی عذت بری وربکم من کل متکبر لایؤمن بیوم
 الحساب) دیمش اولدینی طرف الهیدن حکایه بیان بیورلشدیر.

[۱] استهزا، جهل معناسنه اولدینی کی آیت کریمهده مذکور اولان
 (جاهلین) ده مراد (مستهزئین) دیمکدر.

بو سیدن ناشی الله تعالى دخی آئی نائل مراد و دشمنی محو
و بریاد ایدرک اعداسنک ممالک و اراضیسنه وارث و مالک ایلدی.
التخیسی. — حضرت مریمک والدۀ محترمه سی مریمی طو-
غوردقده (و انی اعیذها بک و ذریتها من الشیطان الرجیم)
دیددی. بو جهته ام مریم دخی نائل خلعت قبول اولوب حقنده
(قتبلها ربها بقبول حسن و انتہا نباتاً حسناً) بیورلدی.

یدیحیسی. — حضرت مریم علیها السلام تنهانشین اولدینی
بر زمانده تفح روح ایچون جبریل امینک صورت بشرده متمل
اوله رق نزد عصمتپناهیلرینه کلدیکنی کورنجه انی انسان ظن ایدرک
(انی اعوذ بالرحمن منك ان كنت تقیاً) دیددی، آنکچون
مشارالیها دخی نعمتین عظمتینه نائل اولدی که آنک بریسی باباسز
بر ولد نییه و دیکری او طفل نوزادک لسانیه طرف حقندن
مظهر اولدینی تنزیمدر.

للمترجم. — ولادت عیسایی طویان و حقیقت حاله واقف
اولیان اقارب و خویشانی نزد مشارالیهایه واروبده «ای
هارونک همشیره سی سنک باباک کوتو آدم؛ اناک فاحشه دکل ایدی.
سن بو جنایتی فصل ارتکاب ایتدک؟ دیه تقریع و تشنیعه باشلا.
دقلرنده حضرت مریم دخی بشیکده قاط آرای عز و حرمت
اولان جناب عیسایه اشارته بو سر سر بسته قدری او بیان
ایتسون کی بر ایمای معصومانده بولندی.

«هیچ بشیکده کی طفل نوزاد سوز سویلرمی؟» کی مقالات
ایله بریکلر تعجب و استغرابلرینی آرتدیرمقده اولدقلری بر آنده

ایدی که حضرت عیسیٰ علیہ السلام لسان فصیح البیان ایلہ (انی
عبدالله . . .) دیو سوزہ اغاز ایلہ والدہ ماجده سنک عفت
وعصمتہ وحمدہ ایدیلاں سوژندن برائت ذمتہ شهادت ایدی.
تم الاستطراد

سکرنجیسی . — الله تعالى حضرتلری خاتمہ شرفنامه نبوت
علیه اجل التحیة اقدمزده (قل اعوذ بك من همزات الشیاطین)
و (اعوذ بك رب ان يحضرون) و (قل اعوذ رب الفلق) و
(قل اعوذ رب الناس) آیتلرنده استعاذه ایلہ مکرراً امر بیوردی .
طقوزنجیسی . — ینه جناب حق سورة اعرافده (خذ
العفو و أمر بالعرف و أعرض عن الجاهلین و اما ینزعک من
الشیطان نزع فاستعذ بالله انه سمیع علیم) وحم السجده سورة .
سنده (ادفع بالتی هی احسن فاذا الذی ینک و ینه عداوة کانه
ولی حمیم — الی ان قال — واما ینزعک من الشیطان نزع فاستعذ
بالله انه هو السميع العليم) بیوردی .

ایشته شو آیات بینات، دلالت ایدرکه انبیای عظام علیهم
السلامک کافه سی شیطین انس و جن شرندن دائماً استعاذه ده
ایدیلر .

استعاذه حقنده کی اخبار مرویه کلنجہ بونلر بک چوقدر

خبر اول

معاذ بن جبل رضی الله عنہدن مرویدر . دیمش که حضور
پر نور جناب رسالتپناهیده ایکی کشی یکدیگری شتم ایدرک نہایت

درجه ده حدتندیلر . بونک اوزرینه حبیب ادیب خدا «بن بر
کله بیایرم که بو آدم لر آتی ذکر ایتسه لر . ایکسندن ده بو غضب
و حدت حالی زائل اولور؛ اوکله دخی (اعوذ بالله من الشیطان
الرجیم) در . «بیوردیلر .

بن دیرم که بو معنی عقله ده قریب اولوب بر قاج وجه ایله
ایضاح و بیان اولنه بیلیر .

وجه اول . — انسان یک اعلی بیلیر که بو عالمک مصالح
و مفاسدینه اولان علم و وقوفی غایت آذر . و اولانجه علم و
وقوفی ده مجرد عقلک اعانه سیله حاصلدر . حالبوکه وقت غضبه
انسانک باشندن عقلی کیدی ویرر . بناءً علیه کشتی احوال غضبه
هر نه دیر و هر نه یارسه قانون حکمتیه اصلاً توافق ایتمز .
ایمدی انسان بونی در خاطر ایدنجه معنای مذکور اومثللو قانون
حکمتیه مغایر اقوال و افعاله اقدامدن کنیدی منع و تحصیل
خیرات و دفع آفاته جناب الله رجوعه مجبور ایدرده شبهه
یوق که (اعوذ بالله) دیرک عصمت خدایه صغیر .

وجه ثانی . — انسان، حق کنیدی جانبده می خصمده می
بوراسنی قطعاً بیله مز . ایمدی مادام که حق نه طرفده اولدیغنی
بیله میور؛ الله تقویض امر ایدرک «اگر حق بنده ایسه شبهه
یوق که عادل حقیقی اولان الله حق می خصمندن آیر . اگر حق
خصمده ایسه اولخالده اولی اولان اکا ظلم ایتما می یم . «دیر،
و بر منوال محرر دعوانک فصلنی جناب احکم الحاکمینه بالاحاله
(اعوذ بالله) قولیه الله التجا ایدر .

وجه ثالث. — انسان، خصمه غلبه سنی تأمین ایده جگ صورتده نفسنده بر قوت و شدت مفرطه حس ایتسه غضبه کتز. انسانك غضبیتسی مجرد نفسنده بویه بر قوت و شدت حس ایتسندن ناشیدر. ایتدی غضبی فورانه باشالایان انسان دوشونسه دیسه که «یا هو! بن کیم؟ بن بر عبد عاجزم؛ آله عالم بندن دها قوی، دها قادر ایکن، و بن عجز و مسکتله برابر اکا پک چوق دفعه عصیان ایتش ایکن او، کال فضل و کرمله بنم عصیانمندن کجدی؛ بکا لائق اولدیغ معامله بی ایتدی؛ او یله ایسه اولی اولان بن دخی شو مغضوب علیهك قصورینه باقاملیم.»

ایشته بو معنی او غضبناك انسانك خاطرینه کلدیکی آنده خصومت و منازعه بی ترك ايله (اعوذ بالله) دیمکه و عفو و مرحمت الهیه التجا الیکه مجبور اولور.

اشبو معانی نك كافه سی (ان الذين اتقوا اذا مسهم طیف من الشیطان تذکروا و اذا هم مبصرون) آیت جلیله سندن استنباط اولمشدر. [۱]

آیت جلیله نك خلاصه مضمون شریفی شو دیمک اوله جق که انسان اشبو اسرار و معانی بی تذکر و نخطر ایتدیکی وقت، طریق رشد و سدادی کوررده نزاع و دفاعی ترك ايله حکم و قضای مولایه کردنده اتقید و رضا اولور.

[۱] طیف، حیف و زننده خشم و غضب معنانه در.

خبر ثانی

معقل بن یسار رضی الله عنه حضرت رسول اکرم صلی الله علیه وسلم افندمزدن روایت ایدوب دیمش که جناب رسالتاب «هر کیم صباح وقتی اوچ کره (اعوذ بالله من الشیطان الرجیم) دیر؛ و سورة حشرک آخرنندن ده اوچ آیت قرائت ایدرسه او کون اقشامه قدر کندیسنه صلات و سلام کتیرمک اوزره جناب حق یتمش بیک ملک مؤکل ایدر. و شاید اجلی کمش بولنورده او کون وفات ایلرسه مرتبه عالیة شهادته نائل اولور. واقشام وقتی بونی یاپان کیمسه دخی ینه او شرف و منزلی حائر اولور.» بیوردیلر.

اشبو حدیث شریفک مدلول منیفی عقلاً شویله ایضاح و بیان ایده بیلیرکه: «اعوذ بالله» قولی نفسک کال عجزینی و نهایت مرتبه ده کی قصورینی مشاهده و سورة حشرک آخرنندن اوقونه جق اوچ آیت کریمه دخی الله تعالانک کالنی، جلالنی، عظمتنی مشاهده دیمک اولوب مقام عبودیتده کال حال ایسه بو ایکی مقامسز متیسر اوله ماز.

خبر ثالث

انس رضی الله عنه حضرت پیغمبر افندمزدن روایت یتمش که رسالتپناه افندمز حضرتلری «کونده اون کره استعاذه ایدن کیمسه جناب حق بر ملک مؤکل قیلارکه آندن دایما شیطانی طرد و تبعید ایدر.» بیوردیلر.

بونده کی سبب شودر که انسان وقتا که معناسنی اکلایه رق
 و بیله رک «اعوذ بالله» دیر. بواسطه اذدن کنسینک نقصان قدرتی،
 نقصان عملی فہم و ادراک ایتش دیمک اولور. بونی ادراک اید.
 مجہدہ نفس امارہ سنک امر ایتدیکی شیئہ بالطبع التفات ایتمز.
 و نفسک کنسینسی دعوت ایتدیکی اعمال فاسدہ یہدہ اقدام ایلز.
 الذیوک شیطان ایسہ نفسدر. دیمک کہ شوکلہ نک قرائتی انساندن
 شیطانی طرد و تبعید ایلدیکی ثابت اولدی.

خبر رابع

خولة بنت حکیم رضی اللہ عنہا نبی محترم صلی اللہ علیہ
 وسلمدن روایت ایتش کہ سلطان انبیا «بریسی بر منزله نازل اولد.
 یغندہ (اعوذ بکلمات اللہ التامات من شر ما خلق) دیسہ او منزلدن
 منزل دیگرہ ارتحال ایدنجیہ دک اکا هیچ بر شی ضرر ویرمز»
 بیوردیلر.

بونده کی سبب دخی شودر کہ اشخاص روحانیہ نک کثرتی
 اشخاص جسمانیہ نک کثرتہ فائق اولدینی و سمواتک دخی ارواح
 طاہرہ ایله مملو بولندینی علوم عقلیہ دہ ثابت اولمشدر. نتہ کم
 علیہ الصلاة والسلام افندمز (اطت السماء و حق لها ان تنط
 مافیہا موضع قدم الاوفیہ ملک قائم اوقاعد) بیورمشلردر کہ
 خلاصہ مضمون شریفی کونک ایکلہ دی؛ ایکلہ مہ یہدہ حق وار؛
 زیرا کونکدہ آفاق باصہ حق قدر بریر یوق کہ آندہ بر ملک یاقائم.
 یاخود قاعد اولہ رق عبادت خدا ایله مشغول بولنسون دیمکدر.
 اثیر و هوا دخی سما کی ارواح ایله مملودر. بو ارواحکدہ

بعضیلری طاهر، مشرق، خیردر . و بعضیلری کدر، مؤذی،
شریردر .

بناءً علیه بر کیمسه (اعوذ بکلمات الله التامات) دیدکده
ارواح خبیثه نك شرنیدن ارواح طاهره مذکورده صغش اولور.
«کلمات الله» دخی بالادهده بیان اولندیغی وجهله (کن)
قولیدرکه بوده قدرت نافذهدن عبارتدر . ایمدی هر کیم که اللهمک
قدرتنه صغیرسه اکا هیچ بر شی ایراث ضرر ایده من .

خبر خامس

عمرو بن شعیب باباسندن اوده جندن روایت ایدرک دیمشکه
سید الانبیا علیه اکل التحایا افندمن حضرتلری «بریکز اویقه
اره سنده حایقرر قورقارسه (اعوذ بکلمات الله التامة من غضبه
وعقابه وشرعباده و من شرهمزات الشیاطین وان یحضر و ن) دعا.
سنه مواظبت ایتسون، اکا هیچ بر ضرر کلز.» بیوردیلر .
و عبدالله بن عمر اشبو دعای کوله لرندن حد بلوغه واصل
اولنلره تعلیم و بر ورقه یه یازوب بالغ اولمیانلرک بیونلرینه تعلیق
ایدردی .

خبر سادس

ابن عباس رضی الله عنهما دن مرویدر دیمشکه نبی اکرم
صلی الله علیه و سلم افندمن حضرت حسن و حضرت حسین
رضی الله تعالی عنهما ی تعویذ ایدرک «اعوذ بکلمات الله التامة
من کل شیطان و هامة و من کل عین لامة» دیرلر و جناب

رسالتاً بلری « بابام ابراهیم علیہ السلام اسماعیل واسحق علیہما السلامی بو استعاذه ایله تعویذ ایدردی » بیوررلردی .

خبر سابع

علیه الصلاة والسلام افندمن حضرتلری امر استعاذهیه فوق العاده اهمیت ویررلردی . حتی بروقت بر خاتون تزوج بیورمشلردی . زفاف کجهسی خاتون رسالتیناه افندمنه خطاباً (اعوذ بالله منك) دیدی . حضرت پیغمبر افندمن دخی درعقب (عدت بمعاذ فالحقی بأهلك) دییوب خاتونی اقرباسی نزدینه اعاده ایلدی .

معلوم اولسونکه حضرت مشارالیهک اشبومعامله لری شوکا دلالت ایدرکه نورالله ایله مستبصر اولان کیمسه قائله التفات ایتیز؛ آنک التفاتی قوله در .

بناءً علیه او خاتون وقتاکه (اعوذ بالله) کلهسنی ذکر ایلدی . حضرت رسول اکرم صلی الله علیه وسلم افندمنک قلب منورلری کلمه مذکور دنک مزایای عالیه سیله مشغول قاهر ق او خاتون بو کله یی عن قصدی یوقسه من غیر قصدی سویلدی بورایه التفات بیور . مامشلردر .

خبر ثامن

حسن بصیردن مرویدر؛ دیمش که بر وقت بریسی کولهسنی دوکمه باشلادی . یچاره کوله « اعوذ بالله » دیمکه یعنی الله التجا ایتدیکنی سویله مکهدوام ایتدیسهدده حریف انی دوکه کدن واز کچمدی . اوصرده ده نبی محترم افندمن اوزرلرینه واردی . کوله حضرت

پیغمبری کورنجه «اعوذ بر رسول الله» دهرک مرحمت سنیة رسا.
 لتناهی به صغدی. حریفده درحال کوله نی صالیویردی. رسا.
 لتناه افندمز «اللهه عائد و ملتجی اولان صالیویرلمکه احقدر.»
 مقال حکمت مأیله کوله جناب حقه صغندیغی وقت صالیویرلسه
 ایدی، صفت عبودیته دها موافق اولوردی، دیمک ایستدیلر.
 شخص ضارب دخی خطاسنه واقف اولوب درحال تدارک مافات
 ایچون «یا رسول الله بو کوله مک لوجنه الله حر اولدیغنه سنی
 شاهد طوتارم.» دیدی. بونک اوزرینه رسول اکرم صلی الله
 علیه و سلم افندمز «نفسم ید قدرتیده مسخر اولان مولای متعال
 حضر تلرینه قسم ایدرم که اگر بونی یا مسمه یدک مظهر عذاب وعقاب
 الهی اولوردک» مأنده ایراد مقال بیوردیلر.

خبر تاسع

سوید دیمش که ابوبکر الصدیق حضر تلری برکون منبره
 چیقوب خطابت ایدر ایکن (اعوذ بالله من الشیطان الرجیم)
 دیوب بعده «بن رسول الله صلی الله علیه و سلم افندمز شیطان
 رجیم شرندن اللهه تعوذ والتجا ایتدیکنی ایشتمشدر. بناءً علیه
 دنیاده باقی اولدیغمدنجه استعاذه نی ترک ایده مم.» بیورمشلردر.

خبر عاشر

صلی الله علیه و سلم افندمز دن مروی اولان شوحدیت شریفدر.
 (اعوذ برضاک من سخطک و اعوذ بعفوک من غضبک
 و اعوذ بک منک)

رکن رابع

مستعاذ منه

مستعاذ منه، شیطاندر، استعاذه دنده مقصود، دفع شر شیطاندر، معلوم اولسون که شر شیطان یاسوسه ایله، یاسوسه نك غیر یله اولور. نه کم مولای متعال حضر تلی (کایقوم الذی یخیطه الشیطان من المس) آیت کریمه سنده بیان بیور مشدر. بوباید عقلیات و علوم مکاشفاتدن بر چوق مسائل غامضه دقیقه واردر.

برنجی مسأله

جن و شیطینک وجودنده ناس اختلاف ایتمشدر، بعضیلری جن و شیطینی انکار ایدوب نه جن وار، نه شیطان دیدیلر. تدقیقانه کیرشتمزدن اول جن و شیطینک ماهیتندن بحث ایتک لازم کلمکه دیرزکه جن و شیطینک ناس و بهائم مثللو کلیر کیدر اشخاص جسمانیه کشفه دن عبارت اولمادیفی متفق علیهدر، بوباید ایکی قول واردر.

قول اول — جن و شیطین، اشکال مختلفه ایله کندیلرینی

تشکیله مقتدر اجسام هوایه در، عقلری، فهمری و اعمال صعبه شاقیه قدرتلی و اردر .

قول ثانی . — چوق کیمه لر جن و شیاطین موجودات متحیزه قسندن دکلدر .

متحیزه حلول ایشده دکلدر دیه اثباته قالدیشوب جن و شیاطین، جسمیدن مجرد موجوداتدر دیه زعم ایلدیلر .
تفصیل . — اشبو موجودات مجردة بر طاقی تدبیر اجسامدن بالکلیه مقدس و عالی درکه بونلر ملائکه مقریندر، نته کم الله تعالی (ومن عنده لا یتکبرون عن عبادته ولا یتخسرون) بیورمشدر .
مرتبه اولاده اولان اشبورواح عالیة مقدسه یی تدبیر اجسامه متعلق اولان ارواح لطیفه ولی و تعقیب ایدرکه بوا یکنجی مرتبه ده .
کیلر ده اشرفلری حمایه عرشدر، نته کم الله تعالی (و یحمل عرش ربك فوقهم يومئذ ثمانية) بیورمشدر .

مرتبه ثلثه . — ملائکه کرس .

مرتبه رابعه . — ملائکه سموات .

مرتبه خامسه . — ملائکه کره اثر .

مرتبه سادسه . — ملائکه کره هوا (نسیم)

مرتبه سابعه ، — ملائکه کره زمهریر .

مرتبه ثامنه . — دکرلره متعلق ومؤکل اولان ارواح .

مرتبه تاسعه . — حیایه متعلق اولان ملائکه .

مرتبه عاشره . — اشبو عالمده موجود اجسام نباتیه

و حیوانیه ده متصرف اولان ارواح سفلیه .

معلوم اولسون که هرایکی قوله کورد اشبو ارواحك بعضیلری
نورانی، الهی، خیر، سعید اولورکه بونلره طائفه جنك
صالحلری دئیر.

بعضیلری ده ظمائی، سفلی، شریر، شقی اولورکه شیاطین ایله
مسمی اولانلرده بونلردر.

جن وشیاطینك وجودینی انکار ایله (نه جن وار، نه شیا.
طین) — دیانلر بر قاج وجه ایله احتجاج ایتملردر.

حجت اولی

شیطان، موجود اولسهیدی، یا جسم کثیف، یا جسم لطیف
اولمق لازم کلیردی. حالبوکه هر ایکی قسمده باطالدر. بناء علیه
شیطان وار سوزی ده باهر البطلاندر کوزدن نهان اولان شیطانك
جسم کثیف اولمسی ممتنعدر دیمه مزك سبی شودرکه اگر شیطان
بر جسم کثیف اولسهیدی، سلیم الحس اولان هر کس آتی کوره
بيلك لازم کلیردی، اگر کوزمزك اوکنده بر طاقم اجسام کثیفه
موجود اولدینی حالد بزم انلری کوره ماملکمز جائز اوله
بیالسهیدی، کذلک پیش نظر مزده بر طاقم یوکسك طاغیر، پارلاق
کونشلر، رعادلر، برقلر موجود اولدینی حالد بزم آنلردن ده
هیچ بر شی کوره ماملکمز جائز اولمق لازم کلیردی عقلدن خارج
اولان بویه بر شیئی تجویز ایدن ایسه ذوی العقولدن معدود
اوله مز.

«شیطانك اجسام لطیفه دن اولمسی ده جائز دکلد» دیمه مزك
سبی ده شودرکه اگر شیطانلرك اجسام لطیفه دن اولملری جائز

اولسهیدی ریا حاصفه قویه نك هوبی حالنده متخرق و متفرق اولملری
یعنی پارچه لایوب طاعلمری و برده اعمال شاقهیه قادر اولاملری لازم
کلیردی، حالبوکه جن واردیانلر « جن طائفه سی اعمال شاقهیه
قادر در » دیرلر. و یقباکه کرک جسم کشف کرک جسم لطیف
اولدقلرینک بطلانی تحقق ایتدی (جن وار) سوزینکده فساد
ثابت اولدی.

حجت ثانیه

جن، دنیلان بو اشخاص اگر بو عالمده حاضر و موجود
اولوبده بشر ایله مخلوط ایمشسلر. بوقدر اوزون اختلاط
و مصاحبت سببیه مطلقا بینهماده یا صداقت یا خود عداوت،
حاصل اولملی ایدی ایمدی اگر صداقت حاصل اولمش ایسه او
صداقت سببیه بر طاقم منافعک ظهوری. و اگر عداوت حصوله
کلمش ایسه او عداوت سببیهده بر طاقم مضرتلرک ظهوری بالطبع
لازم کلیردی. حالبوکه بز نه او یله بر صداقتدن نه ده او یله بر
عداوتدن اثر کوردیکمز یوقدر. و صنعت تغریمه (افسوسجلیغه)
نمارسه ایدن شو معهودلر دخی اکا ذیبیدن نائب و مستغفر او.
لدقلرنده صورلسلر عمرلرنده جندن اثر مشاهده ایتماش اولد.
قلربی اعتراف ایدرلر.

اشته جن و شیطانک عدم وجودی حقیقه کی ظنه قوت ویرن
احوالدن بریسیده بودر.

واقعا خبیلیکی ترک ایله نائب و مستغفر اولمش اولان بر
کیسه دن بن دخی ایشتم؛ دیردی که « بن فلان غریمه (انسونه)

شوقدر کون مواظبت ومداومت ایلدم . همان بر دقیقه بیه بوش
طورمدم . بونکه برابر عزائم خوانلرک بیان ایده کلدکلری
احوالدن بر اثر وخبر مشاهده ایده مدم .

حجت ثالثه

معرفت اشیا به اوج یول وارد؛ بری حس؛ دیگرى خبر؛
او چنجیسی ده دلیلدر . حسك ایه بو شیلرک یعنی جنك: شیطان.
نلرک؛ وجودینه قطعاً دلالتی یوقدر . زیرا بو شیلر موجود
اولسه لردی وجودلرینی یا صورت و یا صوت ایله حس و ادراک
ایتمه مز لازم کلیردی . ایمدی مادامکه بونلرک وجودینه دلالت
ایده جك نه بر صورت کوردیکمز ونه ده بر صوت ایشتمدیکمز
وارد؛ جن و شیاطین حقنده نصل ادعای احساس ایده بیلیرز .
بز آنلرک صورتلرینی کوردک، یاخود سسلرینی ایشتمک
دیانلر ایه ایکی طائفه درکه بریسی مزاجلرینک خللی سببیه اولیه
بعض شیلر تخیل ایدرک کوردک ظن ایدن مجنونلر؛ و دیگرى
معهود یا لانجی جنجیلردر .

انبیا و رسل حضراتنک اخبارلری واسطه سیله بو شیلرک
اثباتی ایه باطلدر . چونکه بوشیلر ثابت اوله جق اولسه انبیانک
نبوتی باطل اولمق لازم کایر . زیرا بونلرک وجودی ثابت اولدینی
تقدیرده انبیای کرام علیهم السلامک ید مؤیددلرنده ظهور
ایدن معجزات، (حاشا) جن و شیاطینک اعانه سیله در دینمک جائز
اولور؛ حالبوکه اصلک ابطالی مؤدی اولان هر فرعکده بطلانی
طبیعی و ضروریدر .

بونك مثالى - بز بر كره جنك بو اطن انسانه دخولنى
تجويز ايدى جنك اولسوق صكره دنيله بيلير كه جدىنك خيلى يعنى
حضرت پيغمبره سس ويرن خرما اغانجك صداسى معجزه اثرى
دكلى. بلكه شيطان جده نفوذ ايتدى ده سس ويرن او ايدى.
كذلك دنيله بيلير كه رسول اكرم صلى الله عليه وسلم افندمزه
ناقه نك تكلم ايتسى معجزه اثرى دكلى بلكه شيطان، ناقه نك
جوفه كيردى ده تكلم ايدن او ايدى؛ ينه دنيله بيلير كه شجره نك
كوكندن سو كيويرمى معجزه اثرى دكلى؛ بلكه شيطان آنى
سو كيويردى.

بناءً عليه جن وشياطين وار ديمك بالاخره انبياء عظام
عليهم السلامك بطلان نبوتلرينه قائل اولمى ايجاب ايدر.
بو شيارك دليل و نظر واسطه سيله اثباتى بحثه كلنجه هله بو
بستون متعذر در. زيرا بز بر دليل عقلى بيله ميورزكه جن وشيا.
طينك وجودينه دلالت ايدمى اسون. ديمك كه بو شيارك وجودينه
تحصيل علم ومعرفته بزم ايچون يول يوقدر.

اويله ايسه جن وشياطين وار ديدكلى باطل برسوزدر.
اشته جنى، شياطينى انكار ايدنلرك بالجملة شهلىرى بونلردر.

جواب

اولكى شهلىرينك جوابنده ديرزكه: سرك ذكر و بيان
ايتديككز شبهه جنك جسم اولمى تمتع ايدوكنه دلالت ايدر؛
بونده حقكز وار ديلم فقط «جن جسميتدن مجرد بر جوهر در»
ديمك ايچون جائ اولسون؟

شوراسیده معلوم اولسون که «جن جسمیتدن مجرد بر جوهر در»
دیانلر فرق عدیده منقسمدرلر.

فریق اول. — بونلر دیمشلرکه ابدان انساندن آریلان
نفوس ناطقه بشریه دن بعضیلری خیر، بعضیلری شریر اولور.
خیر اولانلر یر یوزی ملکدرلر. شریر اولانلر ده یر یوزی
شیطانلریدر.

صکرة او نفوس مفارقة نك بدننه مشاهدت تامه سی اولان
بر بدن دیگر حادث اولوبده او بدن حادثه نفس مفارقة یه بغایت
مشابه بر نفس، تعلق ایدنجه او نفس مفارقة ایچون بو بدن حادثه
بر نوع تعلق حادث واصل اولور. بناءً علیه او نفس مفارقة
بو بدن حادثه متعلق اولان نفسه کندنه لائق اعماله معاونت ایدر.
ایمدی بوتقدیرده نفسلرک ایکسیده طاهر، نورانی خیر
اولان نفوسدن ایسلر اومعاونت ومعاذته (الهام) واکر نفوس
خیثه شریردن ایسلر اومعاونت ومناصرته (وسوسه) دیر.
اشته فریق اولی قولنج الهام ووسوسه بودیمکدر.

فریق ثانی. — «جن وشیاطین» برطاقم جواهردر که
جسمیتدن ده، جسمیتک علائقندن ده مجرددرلر. وبونلرک
جنسلری، نفوس ناطقه بشریه نك جنسنه مخالفدرلر «دیانلر در»
بعدازین معلوم اولسون که نفوس ناطقه بشریه نك جنسی متنوع
اولدینی کبی مجردات مذکوره نك ده جنسی تحتده انواع، مندرج
اولور. شویله که: جواهر مجرد مذکوره نك طاهر ونورانیلری
پرملانکه سیدرلر که بونلره طائفة جنک ضالحلری دیر.

خیث و شریرلری دخی شیاطین مؤذیه در .

بونى بلله دك یاء ایمدى دیرزكه جنسیت، ضمه سبب و علت اولدیغندن طاهر و نورانی اولان نفوس بشریه اوتیه کی ارواح طاهره نورانیه منضم و خیر و بر و تقوی ابوابندن اولان اعماله معین اولورلر .

فریق ثالث . — بونلر ارواح سفلیه نك وجودینی انكار و فقط ارواح مجردة فلیکیه بی اثبات و اقرار ایدنلر در .
بونلرک زعمجه کویا ارواح مجردة فلیکیه، عالی، قاهر، قوی برطاقم ارواحدرکه جواهر و ماهیاجه مختلفدرلر . و ارواح بشر . یه دن هر بر روحك نصل بر بدن معینی واریسه ارواح فلیکیه دن هر بر روحك ده او یله بر بدن معینی واردرکه اوبدن دخی فلك معیندن عبارتدر .

و بشرک روحی نصلکه اولا قلبه تعلق ایدرده صکره تعلق مذکور واسطه سیله او روحك اثری مجموع اعضای بدنه ساری و منتشر اولیورسه روح فلیکی دخی کذلک اولا کواکبه تعلق ایدرده صکره تعلق مذکور واسطه سیله او روحك اثری هم او فلكک، همده عالمک کلیته ساری و منتشر اولور .

و قلب و دماغده نصل ارواح لطیفه تولد ایدنیور؛ و ارواح نصل شرآیین و اعضایه و باجمله اجزای بدنه متادی و منتشر او . لهرق حیات، حس، حرکه قوتی اجزای اعضادن هر جزئه بو طریق ایله نصل وصول بولیورسه کذلک جرم کواکبدن دخی برطاقم خطوط شعاعیه منبعث اولهرق جوانب عالمه واصل و کواکب

مذکور دنك قوتی او خطوط شعاعیه واسطه سیله اجزای عالمه متادی و منتشر اولور.

و قلب و دماغدن اجزای بدنه فیضی ساری اولان ارواح واسطه سیله نصل که او بدنك اجزاسندن هر جزده غاذیه، نامیه، مولده، حساسه کبی مختلف قوتلر حاصل اولور و بو قوتلر کلیت بدنی مدبر اولان جوهر نفسك نصل که نتایج و اولادی کبی صایلیورسه، کذلک کو اکیدن طاقیلر ق بو عالمك اجزاسنه واصل اولان خطوط شعاعیه واسطه سیله اجزای عالمده نفس زید کبی، نفس عمرو کبی، برطاقم نفوس مخصوصه حادث و حاصل اولور که بو نفوس حادثه مخصوصه دخی او نفوس فلکیه نك اولادی کبی صایلیور.

و نفوس فلکیه جواهر و ماهیاتنده نصل مختلف ایسه لکن کذلک مثلاً نفس فلك زحلدن متولد اولان نفوس ایله نفس فلك مشتریدن متولد اولان نفوس بشقه بشقه برر طاقئه اولوب بناءً علیه روح زخله منتسب اولان نفوس، متجانس و متشاکل و یینلرنده محبت و مودت حاصل اولور سه ده روح زخله منتسب اولان نفوس، طبع و ماهیجه روح مشترییه منتسب اولان نفوسه مخالف اولور.

بونی بلله دنك یا! ایمدی دیر زکه :

قدمای حکمانك قولنه کوره علت، معلولدن اقوی اولور .
نفوس بشریه ایسه ارواح فلکیه دن بر روحك معلولی درلر طوائف نفوس بشریه دن هر طاقئه نك ده کدینه مخصوص بر

طبیعتی واردر. بشاء علیه طبیعت مذکوره نك روح فلكی ده کی
قوتی ارواح بشریه ده کی قوتندن دها زیاده، دها عالیدر.

وشو ارواح فلكیه، ارواح بشریه نك شو طائفه سینه نسبتله
اب مشفق و سلطان رحیم کی در. ایشته بو سبیدن ناشی ذکر
اولان ارواح فلكیه اولادلی مثابه سنده اولان انسانلرک مصالحه
معاونت ایله آنلره کاه او یقوده علی سبیل الرؤیا و کاه یقظه ده
علی سبیل الالهام ارأئه طریق رشد و سداد ایدرلر.

برده اشبو نفوس بشریه نك بعضیسی خاصیت مذکوره
جنسندن بر قوه قویه راست کله مظهر اولوب کنیدنک اصلی
و معدنی اولان روح فلكیه اتصالی قویلشدیکی وقت او نفسده
افعال عجیبه. وعادته مخالف اعمال غریبه ظهور ایدیورر.

ایشته جن و شیطانی اثبات ایله [بونلر بر طاقم موجوداتدر که
نه اجسامدرلر. نه ده جسمانیدرلر] دیه زعم ایدنلرک مذهبیرینک
تفصیلی بودر.

معلوم اولسون که فلاسفه دن بعضیلری بومذهبی طعن و تزییف
ایله «ماده دن مجرد اولانک جزئیاتی ادراک ایتسی ده، مجرداتک
افعال جزئییه فی فاعل اولسی ده، ممتنعدر.» دیه زعم ایلدیلر.
بو زعمک بطلانی ایسه آتی الذکر ایکی وجه ایله اثبات اولنور.

وجه اول. — «شو شخص معین، انساندر فرس دکلدرد.»
دیه حکم ایده بیلیرز. ایکی شیئه حکم ایده نك نفسنده اینسه مقضی
علیهمانک حضوری لابددر. ایدمی بوبابده کلی مدرک اولان

یا لکن شیء واحد در که اوده نفس در بناءً علیه نفس جزئی بی ده
مدرک اولسی لازم کایر.

لترجم. — حضرت مفسر دیمک استرکه انسان کلی در؛
اشخاص معین دخی جزئی در؛ ایمدی نفس ناطقه انسانک کلیته
حکم ایتدیکی وقت مقضی علیه اولان انسان فصل نفسده حاضر
اولیورسه کذلک « شو شخص معین انساندر فرس دکدر » دیه
حکم ایتدیکی وقت ینه مقضی علیه اولان شخص جزئی نک دخی
عند النفس حضوری طبعی و ضروریدر. حالبوکه شو حکملرک
ایکسینده ویرن شیء واحد در که اوده نفس در بناءً علیه نفس
ناطقه کلی اولان انسانی مدرک اولدینی کبی جزئی اولان شخص
معینی ده ادراک ایدن ینه اودر. بو تقدیرده بعض حکمانک نفس
ناطقه جزئیاتی ادراک ایتمز دیدکلری باطلدر. « تم کلام المترجم »
وجه ثانی. — طوته لمکه نفس مجردة ابتداءً یعنی بلا واسطه
جزئیاتی ادراکه مقتدر اوله میور. لکن آلات جسمانی و واسطه سیله
جزئیاتی ده ادراک ایتمکه قدرتیاب اولدیغنده نزاع یوق یا؟ ایمدی
« جن و شیاطین دنیلان ارواح مجردة نک کره اثیردن یاخود کره
زمهریردن آلات جسمانیلری واردرکه او آلات جسمانی و واسطه
سیله جزئیاتی ادراکه و بوابدان انسانده تصرفه مقتدر اولیورلر. »
دیمک نیچون جائز اولسون؟

ایشته بو مذهبک شرحنده دیه حکمز سوزک تمامی بودر.

جن، اجسام هواییه یاخود اجسام ناریه دیه زعم ایدنلرک
مذهبه کنبه، بونلر دیمشلرکه: اجسام، حجمیت و مقدارده

متساویدر. حالبوکه بومعنا لک ایکیسیده - یعنی حجمیت مقدارده -
 - اعراضدن اولوب بناءً علیه اجسام بو اعراضی قبولده متسا.
 ویدر. بلماهیة مختلف اولان اشیانک ایسه بعض لوازمده
 اشتراکری تمتع دکلدر. بو حالده «اجسام، هر نه قدر حجمیت
 ومقداری قبولده مشترک ایسه لده ذوات مخصوصه وماهیات
 معینهلری حسبیلله مختلفدرلر. « دینک نیچون جائر
 اولسون.

ایشته بو ثابت اولدقده بزده دیرزکه: «اجسامک بر نوعی
 اجسام لطیفه در. نفاذدر. کندیلکندن حی در. آلا ته محتاج اولیه رق
 عاقلدر. كذلك آلا ته محتاج اولیه رق اعمال شاقیه قادردر.
 ولطف اولمقله برابر تفرق وتمزق غیر قابلدر. « دینک نیچون
 جائر اولسون؟ بویله اولدینی حالده اجسام مذکوره کندی کند.
 یلرینی اشکال مختلفه ایله تشکیله قادر اوله ییلرلر. وبومثللو اجسام
 لطیفه یی نه ریا ح عاصفه تمزق ونه ده اجسام کشفه تفریق ایده ییلر.
 فلاسفه «صاعقه لردن منفصل اولان آتش (سیاله برقیه) بر لحظه
 لطیفه ده احجار وحیدک بو اطننه نفوذ ایدرک دیگر جانبدن
 چیقویرر. « دیمدیلمی؟ او یله ایسه لطافت جسمیهلری حسبیلله
 جن وشیاطین حقنده ده بو نفوذ و خروجک امکان واحتمالی
 مستبعد و نامعقول اوله میه جغندن بونلرک بواطن ناسه نفوذ ایله
 آنده تصرفه قدرتلری و اجل معین و وقت معلومک حلولنه دک
 حی وفعال قاله رق فساددن یعنی موتدن مصونیت ومحفوظیتلری
 شایان قبول کوریلور.

ایمدی بو احوالک کافه سی احتمالات ظاهر ددن اولوب ابطا .
لنده دلیل قائم اولمادیغندن بطلاننه حکم اولنه من .

شبهه ثانیه نك جوابی

جن وشیاطینك مفروض اولان صداقت وعداوتلری مطلقا
هر بر انسان ایله حاصل اولیویرمك لازم گنز . هر کس ایسه یالکز
کندی حائنی بیله بیلیر . کندندن بشقه سنك حالنه واقف و آگاه
دکلدر . بناء علیه بو امر ، حیز احتماله قالمشدر .

شبهه ثالثه نك جوابی

جن وشیاطینك وجودی ، انبیای عظام علیهم السلام
حضرانك نبوتلرنده طغنی ایجاب ایتدیکنی بز تسلیم ایده میز .
بونك جوابیده بوندن صکره قریباً ذکر ایدمه جکگز اجوبه دن
ظاهر اولور . ایشته اشبو شبهه لرك جوابنده سوزمرك صوکی بودر .

ایکنجی مسأله

معلوم اولسون که کرک قرآن کرک اخبار ، جن وشیاطینك
وجودینه دلالت ایدر .

جن وشیاطینك وجودینه دلالت ایدن آیات قرآنیه

آیت اولی . — « واذ صرفنا الیک نفراً من الجن يستمعون
القرآن فلما حضروه قالوا انصتوا فلما قضی ولوا الی قومهم منذرین ؛
قالوا یا قومنا انا سمعنا کتاباً انزل من بعد موسى مصدقاً لما بین یدیہ
یهدی الی الحق والی طریق مستقیم »

ایشته بو آیت کریمه طائفه جنک وجودینه، وقرآنی ایشته.
کارینه، وکندی قوملرینی انذار ایتدکرینه، دلالت ایدر بر نص
صریحدر.

المترجم. — ایشو آیت کریمه خندن بر جماعتک حضور
فائض النور حضرت رسالتناهییه کوندربلوب علیه الصلاة
والسلام اندمرك قرائت بیوردقلری آیات قرآنییهی استماع ایلد.
کدن صکره قوم و قبیلهلری نزدینه عودتله «یا قومنا! بزموسادن
صکره انزال بیورلمش بر کتاب ایشتهکه موسایه منزل اولان
توراتی مصدق اولوب حتی و طوغری یولی کوسترر.» دیمش
اولدقلرینی ناطقدر. . صوک

آیت ثانیه. — (واتبعوا اما تلتوا الشیاطین علی ملک سلیمان)
آیت ثالثه. — قوله تعالی فی قصة سلیمان علیه السلام
(یعملون له ما یشاء من محاریب و تمایل و جفان کالجواب و قدور
راسیات عملوا. — وقال تعالی (والشیاطین کل بناء و غواص
و اخرین مقرنین فی الاصفاد) وقال تعالی. — (ولسلمان الريح
الی قوله تعالی. — و من الجن من يعمل بین یدیه باذن ربه)
آیت رابعه. — (یا معشر الجن والانس ان استطعتم ان
تنفذوا من اقطار السموات والارض فانفذوا)

آیت خامسه. — (انا زینا السماء الدنیا بزینة الکواکب
و حفظاً من کل شیطان مازد)

جن وشیاطینک وجودینه دلالت ایدن خبرلر
خبر اول. — امام مالک (موطأ) نام تألیف شریفنده

سینی بن الفلحن، اوده هشام بن زهره نك ازادلوسی ابی السا.
 بدن نقلاً شویله روایت ایتشد. ابی السائب دیمش که، « ابی
 سعید الحدری رضی الله عنه حضرتلرینك نزدینه کیتش ایدم؛
 آنی نمازده بولد یغمدن اوطوردیم؛ نمازینی بترسون دیه بکلیوردیم.
 برده سندالیه نك التنده بر شیک قلداندیغنی طویدم. دقت ایتدم
 کوردیم که قیلدانان مکر قوجه بر حیه ایش! همان ایاغه قالدقوب
 اولدورمه یه طاوراندم ایسده مشارالیه ابی سعید بکا اوطور دیه
 اشارت ایلدی. وقتاکه نمازینی بیتردی. خانه سنده کی بر اوطه یی
 بکا کوستردك دیدی که: شو اوطه یی کوریورمیسین؟ بر وقت
 بونده یکی اولمش بر دلقانی وارایدی. دلقانی برکون خانه سنه
 کلیرکن حرمنی خلقك یاننده کوردی. دلقانی قسقا بجندن پر
 حدت کسیره لك خاتونی بترمك اوزره مزراغنه طاوراندی.
 خاتون اکا « یا هو! عجله ایتمه، خانه که کیر باق ده صکره نه یاجنك
 وارسه یپارسین! » دیدی. دلقانی برده خانه سنه کیر کیرمز
 کورده کندی یتاغنده مهیب بر حیه قیورانمش یاتیور. درحال
 مزراغنی حیه یه صاپلا ییوردی. حیه مزراغك اوچنده طولانغه
 باشلادی. فقط دلقانی ده او آنده جانسز اوله رق یره سریلدی.
 شویله که: حیه می؟ دلقانی می؟ ایکسندن هانکیسنگ اوکجه جانی
 چقدیغنی اکلا یه مدق. صکره بونی حضرت رسول اکرم صلی الله
 علیه وسلم افندمزه نقل ایتدم. سعادتله بیورمشلرکه « مدینه ده
 اسلامه کیش بر طاقم جن واردر. بوناردن سزه کورینان اولورسه
 صاوشتی ایچون آکا اوچ کون اذن ویرکز شاید کیتزده اوچ

کوندن صکره ینه سزه کورینه جک اولورسه همان اولدورکز.
زیرا او دیمک که جن مسلم دکل، شیطاندر. »

خبر ثانی. — ینه امام مالک (موطأ) نام تألیف لطیفنده
یحیی بن سعیددن نقلاً روایت ایتشد که: رسول الله صلی الله
علیه وسلم لیلہ اسراده جندن بر عفرتی کورمشلرکه بر شعله
آتشین ایله ذات نبوتسماتلری تعقیب ایدوب کلیور. شویله که
جناب رسالتا بلری هر نه وقت دونوب باقسه لر عفرت مرقوم
مصادف نظر هایونلری اولوردی. جیب خدا افندمزه رفیق
طریقاری اولان جبریل علیه السلام بو حالی کورنجه «یا رسول
الله! سکا بر قاج کلمه اوکرته یم که آنلری سویلر سویله مز، شو
عفرتک شعله سی سوز؛ کن دیسیده آغزی اوزرینه یره قبانیر
دوشر دیدکن صکره یا رسول الله! [اعوذ بوجه الله الکریم،
وبکلماته التامات الی لایحی اوزهن بر ولا فاجر من شر ماینزل
من السماء ومن شر ما یرج فیها ومن شر ما نزل الی الارض ومن
شر ما یخرج منها ومن شر طوارق اللیل والنهار الاطارقاً یطرق
بخیر یا رحمن] دعا سن اوقو! » بیوردیلر.

خبر ثالث. — ینه امام مالک (موطأ) ده روایت ایتمش که
(کعب الاخبار) اعوذ بوجه الله العظیم الذی لیس شر اعظم منه
بکلمات الله التامات الی لایحی اوزهن بر ولا فاجر وباسمائ کلها
ما قد علمت منها وما لم اعلم من شر ما خلق وذراً وبرا» دیرایدی.
خبر رابع. — ینه امام مالک روایت ایتمش که خالد بن ولید
او یقوسی ارده سنده قورقمقده اولدیغنی رسول الله صلی الله علیه

و سلم افندمزه عرض ایتدی. صاحب شریعت افندمزه دخی
 «اعوذ بکلمات الله التامات من غصبه وعقابه وشر عباده و من
 همزات الشیاطین وان یحضر و ن» دعا سنه مداومت ایلسنی اکا
 امر بیوردیلر.

خبر خامس. — نبی اکرم صلی الله علیه و سلم افندمزه که
 لیلۃ الجن ده جن طائفه سنه قرآن عظیمی قرائت، و آنلری دینه
 دعوت بیوردیغنه دائر مبلغ تواتره بالغ اولان خبر مشهوردر.

خبر سادس. — قاضی ابوبکر (هدایه) ده روایت ایتمش که
 حضرت عیسی بن مریم علیهما السلام شیطانک بنی آدمده
 موضعی نره سی اولدیغنی بکا کوستر یا ربی! دیه جناب حقدن
 دعا و نیاز ایلدی. جناب حقدده کوستردی. برده یاشی حیه باشنه
 بکزر برشی کوردی که باشی بنی آدمک سویدای قلبنه قویور.
 شویله که بنی آدم ذکر الله ایله مشغول اولدیغنی وقت کری چکیلیر؛
 و ذکر الهی ترک ایدمجه اوده سر خبائث افسرینی نعوذ بالله تعالی
 سویدای دل انسانه وضع ایله القای و سوسه ایلردی.

خبر سابع. — «ان الشیطان لیجری من ابن آدم مجری
 الدم» حدیث شریفیدر که شیطان لعینک انسانک طمارلرینه کیر.
 دیکنی وقان عروق بدن انسانده نصل جریان ایدیورسه او
 خیشک دخی بدن انسانده اوله ناغذ و جاری اولدیغنی ایضاح
 و بیان ایدر.

ینه حضرت رسول مجتبی «مانکم احد الاوله شیطان»

بیورمشلرکه بو حدیث شریف دخی بنی آدمدن هر کسه بر
شیطانک مسلط اولدیغنی اشعار ایلر .

حتی بو حدیث شریفک شرفسنوح و صدور بیورلدیغنده
« یارسول الله جناب رسالتاً بکز دخی بو حکمده داخلینکیز؟ »
یولنده ایراد سؤال ایلیان اصحاب، (نعم) جوابیله محباب، و فقط
بو جوابی ولی و تعقیب ایدن « شو قدرکه اعانه ربانیه ایله بنمکی
اسلامه کلشدر . » ایضا حیلده جناب رسالتاً وجه معنادن پرده
برانداز شک و ارتیاب اولدیار .

بو بابده مروی اولان احادیث نبویه پک چوق ایسهده شو
ذکر و بیان ایتدی کمز مقدار دخی اثبات مدعایه کافیدر .

او چنجی مسأله

جن، آتشدن یرادلشدر

دلیلزده « والجان خلقناه من قبل من نار السموم » آیت
کریمه سیله ابلیس لعیندن حکایه وارد اولان « قال خلقتنی من
نار و خلقتنه من طین » نظم جلیلیدر . و شوراسیده معلوم
اولسون که آتشدن حیاتک حصولی مستبعد کلدردر . کورمز میسین که
اطبا « نفسک متعلق اولی قلب و روحدر » دیمشدر .

قلب و روحک سخوتی ایسه درجه نهاییه ددر . حتی جالینوس
حکیم دخی « بن بر کره بر مایمونک قرتی یاردم . ایچنسه الیمی
صوقدم . یار مغمله یورکنی یوقلادم . آتی سخونتک درجه نهاییه .
سندده بولدم » دیمشدر .

بز ايسه دها ايلريسنده واروب ديرزكه : اطبا « حیات
 انجق حرارت غریزه ايله حاصل اولور . بشقه درلو حاصل
 اوله مز » دیشلر .
 بعضیلری ده دیشلرکه اغلب ظنه کوره نره ناز روحانیات
 ايله مملودر .

دردنجی مسأله

جنك وجه تسمیه‌سنده ایکی قول واردر .
 قول اول . — لفظ جن، استئاردن مأخوذدر . فتح جیم
 ايله (جنت) لفظی دخی بو معنادر التمشدر . اشجار ايله مستر
 اولدینی ایچون .
 ضم جیم ايله (جنه) دخی بوندن مأخوذدر . انسانی سائر
 اولدینی ایچون .
 (جن) دخی کوزلردن مستر ونه ان اولدقلری ایچون بو
 اسم ايله تسمیه اولمشلردر .
 (مجنون) لفظی ده بوندن التمشدر . عقلی مستر اولدیغیچون .
 (جنین) ده بوندن مأخوذدر . بطنده مستر اولدیغیچون .
 (واخذوا ایمانهم جنه) آیت کریمه‌سنده واقع اولان (جنه)
 دخی بوندن مأخوذدرکه وقایه وستر معناسه‌در . [۱]
 برده معلوم اولسون که ملائکه کرام دخی عیون و ابصار بنی
 [۱] جنه، بالنم والتشديد، قالقان ديمکدر . مطلقا ستره معناسنه کلیر .

آدمدن مستر ونهان اولدقلری ایچون بو قوله کوره انلرکده
جنبدن اولملری لازم کلیر . مکر دنيله که بو اطلاق [۱] عرف
سبيله تقيد مطلق بایندندر .

قول نانی . — جن، اوائل حاللرنده جنك خازنلری ایدی.
انك ایچون بو اسم ایله تسمیه اولمشلردر .
لکن قول اول اقوادر .

بشجی مسأله

معلوم اولسون که طوائف مکلفین درتدر .

(ملائکه، انس، جن، شیطان)

جن وشیاطینده اختلاف ایتدکلرندن کیمی دیمش که شیاطین
بر جنسدر جن دخی جنس آخردر . نتهکم انسان ایله فرس بشقه
بشقه برر جنس اولدقلری کبی کیمی دیمش که جنك اخیاریده،
اشراریده واردر . وشیاطین، اشرار جنك اسیدر .

التنجی مسأله

جنك بوطن بشره نفوذه قدرتلری اولدینی مشهوردر .
معترله نك اکثری بونی نفی وانکار ایتدی .

[۱] یعنی کرک جن وکرک ملک استتارده مشترک ایکن بو وجهدن
طولای یالکز جنه جن دیمسی عرف سبيله تقيد مطلق بایندندر .
(المترجم)

مثبت اولانلر بر قاچ وجه ايله احتجاج ايلدیلر .

وجه اول . — جن، اگر نه جسم ونه جسمانی اولمیان بر موجوددن عبارت ایسه بو تقدیرجه جنك باطن بشره نفوذه قادر اولمهنك معناسی باطن بشرده تصرفه قادر اولمهنسی دیمك اولور بو ایسه مستبعد دكلدر .

واكر انفاً وصف ایتدیكمز كی هوئی، لطیف، نفاذ بر حیواندن عبارت ایسه كذاك بونك باطن بی آدمه نفاذی نفسه وغیرینه قیاساً ممتنع دكلدر .

وجه ثانی . — (لایقومون الاكایقوم الذی یخطبه الشیطان من المس) آیت کریمه سنده بو معنی واضحدر .

وجه ثالث . — علیه الصلاة والسلام ائندمزك « ان الشیطان لیجری من ابن آدم مجری الدم » حدیث شریفندهده شیطانك باطن بی آدمه نفوذ و جریانی صراحهً بیان بیورلمشدر . منكر اولانلر دخی امور آیه ايله احتجاج ایتشاردر .

امر اول . — الله تعالى ابلیس علیه اللعنه دن حکایه طریقیه (وما کان لی غلیم من سلطان الا ان دعوتکم فستجبتم لی) بیورمشدر .

اشبو آیتده ایسه شیطانك بشر اوزرینه تسلط و استیلاسی آنحق من وجه اولوب بو دخی وسوسه القا و باطله دعوتدن عبارت ایدوکنی واجب تعالی و تقدس حضرت تبری تصریح بیورمشدر .

امر ثانی . — شکمزدرکه انیسای عظام و علمای محققین شیطانهم لعن ایتمه همده آندن برائته ناسی دعوت بیوررلر . بناءً علیه انیا و عمایله شیطان آره سنده کی عداوت انواع عداوتك

اك يىوكى اولقى لازم كليز. ايمدى شىطاپين اكر بواطن بشره
نفوذايه آلره شر و بلا ايصالنه مقتدر اولسهلردى سائر هر
كسدن زياده انيسا و علمانك شيطانلردن متضرر اولملرى لازم
كليردى.

مادامكه بو طوغرى دكلدر بيلدك كه شيطانلرك بواطن بشره
نفوذ واستيلايه قدرتلرى واردر سوزى ده باطلدر.

يدنجى مساله

متفق عايمدر كه ملائكه كرام يئزلر، ايجمزلر، جماع ايتمزلر.
ليل ونهار تسبيح ايدرلر عبادتدن اصلا فتور كتميمزلر.
جن، و شىطاطينه كلنجه : بونلر يرلر، ايجرلر، حتى پيغمبر
اقدمنر روڤ و عظم جن طائفه سنك زاد و ذخيره سيدر ديو بيان
بيورمشلردر.

توالد دخى ايدرلر.

شىطانك ذريتى اولديغنى (انتخذه و ذريته اولياء من دونى)
آيت جليله سيده ناطقدر.

سكزنجى مساله

وشوسه نك كيفيتى بياننده در

« شيطان لعين، انسانك باطننه طالار؛ باشنى سويداي قلبنه

قور؛ وسوسه‌سنى اورايه القا ايلر. « ديمشك وبونك حخته (ان الشيطان ليجرى من ابن آدم مجرى الدم الافضيقوا مجاريه بالجوع) و (لولا ان الشياطين يحومون على قلوب بنى آدم لنظروا الى ملكوت السموات) حديث شريفليله احتجاج ايشلردر . بعض كيمسهلر دخى اشبو خبرلى بهممه حال تاويل ايتك لازم كلير . زيرا بومثللو خبرلى ظواهرى اوزرينه حملى ممتعدر . « ديديلر وبوبابده برقاج وجه ايله احتجاج ايلديلر .

وجه اول . شياطينك بواطن ناسه نفوذى محالدر . زيرا نفوذى ممكن اولسه يا مجارىء مذكوره‌نك اتساعى ، يا خود اجسام شياطينك تداخلى لازم كلير .

وجه ثانى . — اولجده بيان ايتديكمز وجهله شيطان ايد اهلې دين ارمينده عداوت شديد واردر ايمدى شيطانلر اشبو نفوذه قادر ايمشسهلر يا نچون اهل دينه دهها زياده ضررلى طوقتيور ؟

وجه ثالث . — شيطان ، آتشدن يراديلش اولديغندن داخل بدن انسانه دخول ايدوبياسه داخل بدنه كانه آتش نفوذ ايتمش كې اولوردى . حالبوكه اويله برشيئك حس اولتماديغنى معلومدر .

وجه رابع . — شيطانلر معاصى يى وانواع كفر و فسق سورلر مع هذا انواع فسق اظهار ايدويوملر نچون بز آنلره پك زياده يالواروب يقارديغمز حالده هيچ بر اثر وفائده كورديكمز يوقدر وبالجمله عداوتلر نندن ده بر ضرر ، صداقتلر نندن ده بر فائده كوردميورز .

مثبت اولانلرك جوابلری

برنجی سؤالک جوابی

بونلر اکر نفوس مجرد ایسهلر سؤال، جوابندن مستغنی
قالیر. ضیاء هوا کی اجسام لطیفه دن ایسهلر ینه سؤال زائل
و جوابندن استغنا حاصل اولور.

ایکنجی سؤالک جوابی

الله تعالی وانک ملککری علمای بشری ایدادن شیطانلری
منع ایدرلر دیمک بنید دکدر.

اوچنجی سؤالک جوابی

وقتاکه حق سبحانه و تعالانک نار ابراهیمه (یانار کونی برداً
و سلاماً علی ابراهیم) دیمسی جائز اولدیه بوراده ده انک مثلی
نیچون جائز اولسون؟

دردنجی سؤالک جوابی

شیطانلرده مختار اولدقلرندن جائزکه قبیائحندن دیله دکلرینی
ایشلرلرده دیله مدکلرینی ایشله مزلر.

طقوزنجی مسأله

اشبو مسأله امام غزالینک (کتاب الاحیاء) ده تقریر و بیان
بیوردقلری اوزره وسوسه حقنده کی کلامک تحقیقی مین در.

امام غزالی دیرکه :

قلب، متعدد قبولو قبه کبی درکه احوال هر قبولدن اکا منصب اولور .

یا مثل هدفدرکه سهام هر جانبندن اکا طوغری آتیلیر .
یا مرآت منصوبه کبی درکه اوکندن اشخاص کچدکجه صورۀ بعد صورۀ هپسی آنده جلوه کر اولور .

یاخود حوض کیدرکه انهار مفتوحه دن میاه مختلفه اکا منصب اولور . برده معلوم اولسون که قابده ساعت بساعت متجدد اولان اشبو آثارک مداخلی یا ظاهر دندر حواس خمس کبی . یا بواطندندر، خیال، شهوت، غضب، برده مزاج انسانده مرکب اولان اخلاق کبی .

«ایمدی انسان، حواس ظاهره واسطه سیاه بر شی ادراک ایتدیکی وقت آندن قلبنده بر اثر حاصل اولور . و کذا شهوت، یاخود غضب، هیجانه کلدیکی وقت او احوالنده قلبنده ینه بر طاقم آثار حصوله کلور .

واما انسان ادراکات ظاهره دن منع اولندقدده، نفسدهکی خیالات حاصله باقی قالور؛ وخیال برشیدن برشیئه منتقل اولور؛ وخیالک انتقالی حسیله قلب دخی برحالدن برحاله منتقل اولور . ایمدی بو اسبابدن ناشی قلب آدم دائما تغیر و تأثردهدر .

قلبدده حاصل اولان آثارک اخصی ایسه خواطردهر . خوا . طردن مراد قلبه عارض اولان انکار و اذکاردهر . افکار و اذ .

کاردن ده مراد، یا علی سبیل التجدد یا خود علی سبیل التذکر
حصوله کلان ادراکات و علومدر .

و بونلره خواطر تسمیه اولنمی مجرد قلب بونلردن غافل
ایکن خیاله خطور ایتدکری حیثیدن ناشیدر .

ایمدی خواطر، اراداتک، ارادات دخی اعضانک محرکری
اولمش اولور . صکره اشو اراداتی محرك اولان خواطر ایکی
قسمه منقسم اولور . بر قسمی شری یعنی عاقبتده مضر دیگر
قسمیده عاقبتده نافع اولانی دعوت ایدن شیدر .

ایمدی بونلر مختلف ایکی خاطر اولدقلر یچون مختلف ایکی
استهده محتاج و مقتدر اولوب بناء علیه خاطر محمود (الهام)
و خاطر مذموم (و سواس) تسمیه اولنور .

» بوندن صکرده سن بیایرسین که اشو خواطر بر طاقم
احوال حادثه در . بناء علی ذلک بونلر ایچون بر سبب لازمدر
تسلسل ایسه محال اولدیغندن احوال حادثه مذکورده نک کافه سی
جناب واجب الوجوده منتهی و مستند اولمق لازم کلیر که بونلرک
هپسنی یاپان یرادن اودر دیمک اولور .

ایشته تطویلاتی حذفدن صکره امام غزالی نک کلامنک
ملخصی بودر .

اونجی مسأله

تحقیق الکلام فیما ذکره الغزالی

معلوم اولسون که بو ذات عالیقدر کرچه حول مقصوده

دوران ایتشدر. شو قدر که کلامنی ایجه تنقیح ایتدکجه مراد
اکلاشیه منز.

بناءً علیه دیرز که مقصوده کیرشزدن اول بعض مقدماتی
تقدیمه لزوم وارد.

مقدمه اولی. — شبهه یوق که بو مقامده بر مطلوب، برده
مهر و بر وارد هر مطلوب ایسه بالذاته مطلوب اولور؛ یا خود
لغیره مطلوب اولور. یوقسه هر مطلوبک یا لکز لغیره مطلوب
اولسی و هر مهر و بکده یا لکز لغیره مهر و بر عنه اولسی جائز
دکدر. و الا یادور و یا تسلسل لازم کلیر. حالبوکه بونلرک
ایکیسیده محالدر.

ایمدی ثابت اولدی که (لذاته مطلوب) و (لذاته مهر و بر)
عنه برر شی وار اولدیغنی اعتراف ایتک لازم کلیر.

(۲) مقدمه. — استقرا دلالت ایدر که مطلوب بالذات،
لذت و سروردر. مطلوب بالتبع دخی لذت و سرور و سیله
اولان شیدر. و مهر و بر عنه بالذات، الم و حزندر. مهر و بر عنه
بالتبع دخی الم و خزنه و سیله اولاندر.

(۳) مقدمه. — قوای نفسانیه دن هر بر قوه نک عندنده کی
لذت برر شی آخردر. ایمدی قوه باصره عندنده لذت اولان
شی، قوه سامعه عندنده لذت اولان سینک غیریدر قوه شهوانیه
عندنده کی لذتده او حنجی بر شیدر. قوه غضبیه عندنده لذت
اولان دخی دردنجی بر شیدر. قوه عاقله عندنده کی لذت ایسه
بشجی بر شیدر.

(۴) مقدمه . — قوهٔ باصره خارجه بر موجودی ادراك ايتديكى وقت او ادراك بصريتك حصولندن مرئي مذكورك ماهيته ذهنك واقف اولسي لازم كليز .

و ذهنك اكا وقوفى حالنده او مرئي تك يا لذيزه، يا مؤلم، ياخود لذت و الملك ايكنسندنده خالى اولديغنه علم حاصل اولور . ايمدى او مرئي تك اكر لذيزه ايدوكنه علم حاصل اولورسه آنى تحصيله ميلك حصولى بو علم ويا اعتقادك حصولى اوزرينه مرتبدر . و اكر مؤلم ايدوكنه علم حاصل اولورسه آندن اوزا . قلاشوب قاچغه ميلك حصولى دخى بو علم ويا اعتقادك حصولى اوزرينه ترتب ايدر .

و اكر مؤلم اولديغنه ده، لذيزه اولديغنه ده علم حاصل اولمازسه قلبده دخى آندن نه فراره، ونه ده آنى تحصيله رغبت حاصل اولماز . (۵) مقدمه . — مرئي تك لذيزه اولديغنى بيله تك آنى تحصيله حصول ميل و رغبتى موجب اولماسى مجرد او علمك معارض و معاوقدن خالى اولديغى وقت حاصل اوليور مسنه متوقفدر . فاما بو معارض حاصل اولديغى وقت او اقتضا حاصل اولماز .

مثالى . — بر لذيزه طعام كورديكمز ده انك لذيزه اولديغنى بيلسهك دخى ضررى نفعندن زياده اولماديغنى اعتقاد ايتدكجه مجرد او بيلشمز طعام مذكورك تناولنه اقدامده مؤثر اوله مز .

ضررى نفعندن زياده اولديغنى اعتقاد ايتديكمز وقت دخى عقل معارضه و ترجيح كيفيتى نظر دقت و اعتباره اير . و معارضه

و ترجيحن هانكيسنك ارجتج اولديني ظننه غايه ايلرسه او
رجحانك مقتضاسيله عمل و حرکت ايدر .

مثال ديكر . — انسان، بعضاً كنديني اولدورر . (انخار
ايدر) بعضاده كنديني بر سطح عاليدن اشاغى آتار .

شوقدركه دها بيوك بر المدن قورتيله جغنى، ياخود دها على
بر منفعتيه بو واسطه ايله واصل اوله جغنى محقق بيلدجكه بو عمل
مؤله جرات ايتمز .

ايمدى شو بيانتمزله ثابت اولدى كه بر شيئك لذيد ويا مؤلم
ايدوكنى اعتقاد ايمهك رغبت و نفرتى ايجاب ايمهسى مجرد او
اعتقادك معارضدن خالى بولمسييله مشروطدر .

(٦) مقدمه . — اشبو مقدمه تقرير سالف البيانمذك افعال
حيوانيهك ترتيب ذاتى لزومى عقلى ايله مرتب بر طاقم مرتبه
لرى اولديغنه دلالت ايتديكى بيانندهدر .

شويلهكه افعال حيوانيهك بويله مراتبى واردر
افعال حيوانيهك مصدر قريبي عضلاتده موجود اولان قوادر .
شوقدركه قواى مذكوره فعل و تركه صالحدر . بناءً عليه
بونلرك خود بخود تركدن بدل، فعله و فعلدن بدل تركه مصدر
اولملرى متمعدر . بويله فعل و تركدن برينه مصدر اوله بيلملرى
مجرد بر ضميمهك كنديلارينه انضمامنه محتاجدركه او ضميمهده
اراداتدر .

سكره او ارادات كنديلرينك لذيد، ياخود مؤلم اولدقلىرى
بيلنديكى ايچون حادث و حاصل اولور .

صکرده او علوم و ادراکات اگر انسانک فعلیه حاصل
 اولیورسه بوندهده بحث اول، عودت ایدرک یا دور و یا تسلسل
 لازم کلیر که بونلرک ایکسیده محالدر. و یاخود اسباب خارجیه دن
 جوهر نفسده حاصل اولور بر طاقم علوم و ادراکات و تصو.
 رانه اتهما لازم کلیر. و بو اسباب خارجیه دخی بعض فلاسفه
 قدیمه نك مذهبه کوره یا اتصالات فلکیه در؛ یاخود سبب حقیقیدر
 سبب حقیقی دخی او اعتقاداتی یاخود او علوم و ادراکاتی جناب
 حَقِّک قلب انسانده خلق ایتمه سیدر.

ایمدی حیواندن فعل نصل صادر اولور؛ سوزینک خلاصه
 الخلاصه سی بودر.

بونى اکلادک یا! شمدی شوراسیده معلومک اولسون که
 شیطانی ده و سه سه بی ده نفی و انکار ایدنلر دیدیلر که افعال حیوانیه نك
 مصدر قریبی عضلات و او تارده کی قوای مذکوره اولدیغی ثابتدر.
 ایمدی ثابت اولدی که قوای مذکوره کندیلرینه میل و اراده
 منظم اولمادقجه خود بخود فعل و ترکک مصادری اوله مزلر.

وینه ثابت اولدی که او اراده شیء مطلوبک لذیذ، یاخود
 مؤلم اولدیغنه شعورک لوازم حصولندندر. و شعور مذکورک
 حصولیده یا ابتداءً (بلا واسطه) یاخود تقریر و بیان ایتدیکمز
 وجهله هر بریسی کندینک مابعدینی مستلزم اولمق شانندن اولان
 برطاقم مراتبک واسطه سیله الله تعالانک، خلق و ایجادینه مستنددر.
 وینه ثابت اولدی که اشبو مراتبدن هر بریسنک ماقبلنده کی
 مرتبه یه رتبی لزوم ذاتی واجب ایله لازمدر.

بناءً عليه انسان بر شئی احساس ایدوب طبعه ملائم کلد.
 یکنی ده اکلا یخه اکا میل ایدیورر. ومیل ایدجده در حال قوه
 حیوانیه حرکت کلوب آئی ارامغه باشلار. ایدی بو مراتب
 حاصل اولدقده فعل دخی لابد حصولپذیر اولور انک ایچون
 خارجدن القای وسوسه یه مقتدر بر شیطانک وجودنی فرض
 و تقدیر ایتدی کمزده وسوسه مذکوره عدیة الاثر اولمش اولور.
 زیرا مراتب مذکوره حاصل اولدینی وقت همه حال فعل
 حصوله کایر.

وسوسه شیطان حاصل اولسون اولسون.
 مراتب مذکوره نک مجموعی حاصل اولمادینی حالده فعل
 حصوله کلز.

وسوسه شیطان حاصل اولسون اولسون
 بناءً عليه ییلدک که «شیطان وار، وسوسه وار» سوزی بر
 قول باطلدر. بونک طوغریسی شودر.
 دیملی یزکه:

اگر اشبو مراتب اتفاقاً طرف نافعده حاصل اولیورسه آئی
 (الهام) تسمیه ایدرز. و اگر راست کله ضررلی طرفده حاصل
 اولیورسه اکاده (وسوسه) نامنی ویررز.
 اشبو اشکالی تقریر و بیانده سوزک تمامی و نهایتی بودر.

جواب

بو ذکر و بیان ایتدکار کزک هپسی حقدیر طوغریدر. شو قدر که
 انسانک بر شیدن غافل اوله یلمسی ده مستبعد دکادر. بناءً عليه

شیطان، اوشیئی خاطره کتیردیکنده انسان ده تخطر و تذکرايدر.
وتذکر ایدنجه اوشیئه مائل اولور و او میلک حصولنده فعل
ترتب ایلر. ایمدی شیطان خارجنک اتیان ایتدیکی شی الحق شو
تذکر دن عبارتدر.

والله تعالانک لسان ابلیس دن حکایه (وماکانلی علیکم من
سلطان الا ان دعوتکم فاستجتملی) بیودینی دخی بوکا اشارتدر.
شوقدرکه قائل ایچون بونده یالکز بر سوز قالدی. دیه بیلیرکه:
بو تقدیرده انسانک معصیته اقدامی آنحق شیطانک تذکیریه
واقع اولمش اولور. ایمدی شیطانک ده معصیته اقدامی اگر شیطان
آخرک تذکیری ایله ایسه شیاطینک تسلسلی لازم کلیر. واکر او
شیطانک عملی شیطان آخرک تذکیرندن ناشی دکلسه شیطان اولک
معصیته اقدامی مجرد او اعتقادک قلمندن حصولندن ناشی اولدینی
ثابت اولور. و او اعتقاد حادثک ده حصولنه مطلقا بر سبب
موجب لازمدرکه بوده الله سبحانه و تعالی حضرتلرینک خلقندن
بشقه بر شی دکلدر. بو حالده خیر و شرک هپسی اللهدن اولدینی
ظاهر اولور.

ایشته بو بحث دقیق و عمیقده سویلیه بیلر جکمز سوزک غایت
ونهایتی بو اولوب حاصل کلام سید المرسلین علیه الصلاة والسلام
افندمز حضرتلرینک بیوردقلریدر که اوده (اعوذ بک منک)
قول شریفیدر. والله اعلم

اون برنجی مسأله

معلوم اولسون که انسان، تنهانشین اولوبده قلبنه خواطر
تواتر ایتمهک باشلادینی وقت کاه درون قلب و دماغنده کانه بر
طاقم کیزی سسلر، کیزی حرفلر ایشیندر وکانه برمتکلم کندیسيله
سویلشیر و بر مخاطب کندیسيله مخاطبه ایلرکی بعض شیلر حس ایدر.
ایشته بو هر کسک نفسنده واقع اولان بر امر وجدانی در.
صکره ناس او خواطر خصوصنده اختلاف ایدوب فلاسفه
دعش که:

بو شیلر نه حروفدر نه ده اصواتدر. بونلر آنجق حروف
و اصواتک تخیلاتیدر.

برشیک تخیلی ایسه رسم و مثالک خیالده حضورندن عبارتدر.
نصل که طاغلرک، دکرلرک، اشخاصک صورتلرینی تخیل ایتد.
یکمزده بو شیلرک اعیانی عقل و قلبده غیر موجود اولوب بلکه
عقل و قلبده موجود اولان یالکز بونلرک صورتلری، مثاللری،
رسملریدر. ایشته انلرکی بونلرده علی سبیل التمثیل مرآده
مرتمم اولان صورت، مجراسنده جاریدر.

ایمدی بز آینهده فلکک، شمسک، قمرک صورتی احساس
ایتدیکمزده عجیب آینهده بو شیلرک ذواتی موجودمیدرده بزه
کورینان انلرمیدر؟ خیردکدر. زیرا بو محالدر. مرآده حاصل
اولان الحق بو شیلرک رسماری، مثاللری صورتلریدر.

مبصراتی تخیله بونصلسه حروف و کلمات مسموعه بی تخیله ده
حال او منوال اوزره در ایسته جمهور فلاسفه نك قولى بودر .

قائل دیه بیلیرکه :

«حروف و کلمات تخیلی» دیه تمیسه ایتدیكك شی عیبا
ماهیتده حروف و کلمه مساویمیدر دکیدر؟ ایدی اگر مساوی
ایسه خیالده حاصل اولان شی، حروف و اصواتك حقائق و بحر
و ستایی تخیل ایدرکن خیالده حاصل اولان شی دخی بحر و ستانك
حقیقتی اولدیغنه کلام عودت ایدر .

و اگر بونك طوغریسی ایکنجیسی ایسه . — یعنی خیالده
حاصل اولان مبصرات و مسموعاته مخالف بر شیء دیگر ایسه بو
تقدیردهده سؤال عودت ایدر . یعنی بز اشبو صور مرئیاتی،
بو کلمات و عباراتی کندیلمکمزدن نصل بوله بیلیورز؟ و بونلر عقله
کلیر حروف متوالیه، و ذهنه کلیر الفاظ متعاقبه در دیه وجداناً
نصل بلا شك و شبهه حکم ایدیورز؟

ایسته فلاسفه نك سوزنی بیانده منتهای کلام بودر .

اهل علمك جمهور اعظمه کلنجه : بونلر اشبو خواطر متوالیه
متعاقبه نك حقیقه حروف و اصوات اولدیغنی تسلیم ایتدیلر .

معلوم اولسونکه بو سوزی سویلیانلر دیدیلرکه اشبو
حروف و اصواتك موجد و فاعلی یا او انسانك کندیدر یا انسان
آخردر و یا خود روحانی، مباین و او حروف و اصواتی بو

انسانه القایه مقتدر و متمکن دیگر برشیدر. اومتکلم اولان ایستر.
سه جن و شیطین اولسون ایستر سه ملک اولسون. یاخود دنیایر که
او حروف و اصواتک خالق الله تعالادر.

اولکی قسم که اشبو حروف و اصواتک موجد و فاعلی او
انسانک کندی اوله سیدر بو باهر البطلاندر. زیرا انسان کندی
اختیار یله حاصل اولان شیئی ترکده مقتدر در ایدمی اشبو خوا.
طرك حصولی انسانک فعلیه اوله سیدی انسان مراد ایتدیکی
وقت او خواطری دفع و ترك ایتیهده مقتدر اوله بیللی ایدی.
حالبوکه انسانک خواطر واردینی دفعه مقتدر اوله مدینی معلومدر،
انسان اشبو خواطری فعل و ترکدن عاجز اولوب خواطر
بغیر اختیاره طبع و ذهنه متعاقب الورود اولور.

ایکنجی قسم که اشبو خواطر انسان آخرک فعلیه حاصل
اوله سیدر، بوده ظاهر الفساددر.

و وقتا که اشبو ایکی قسمکده بطلانی متین و ثابت اولدیه
قسم ثالث قالدی که بوده خواطرک جنک یا ملکک و یاخود الله
تعالانک فعلندن حصوله کله سیدر.

«الله تعالی فاعل قبائح اولمق جائز دکدر» دیانلره کلنجه:

بونلر کندی مذهبلرینه لایق اولان «اشبو خواطر خیشه
اللهک فعلندن دکدر» دیملیدر لر.

بناءً علیه برشی قالیر که اوده خواطرک احادیث جن و شیا.
طیندن اوله سیدر «اللهک هیچ بر فعلی قبیح دکدر» دیانلره کلنجه

بونلرکده مذهب لرنده اشبو خواطری حق سبحانه و تعالیٰ حضرت .
تدرینه اسناددن کندیلرینی منع ایدہ جک بر مانع یوقدر .

معلوم اولسون که ثنویه « عالمک (حاشا) ایکی الهی واردر .
بری خیردر و بونک عسکریده ملائکه در . و دیگر ی شیردر .
و بونکده عسکری شیاطیندر . و بو ایکی اله عالمده کی هر شی
ایچون دائماً یکدیگریله خصومت و نزاع ایدر لر . بناءً علیه هر
بریسنگ اوشیئه برر تعلق اولدیغندن اعمال خیره داعی اولان
خواطر منحصرأً للهک عسکرندن حاصل اولوز .
اعمال شره داعی اولان خواطر دخی الحق شیطانک عسکر .
ندن حصوله کلیر « دیر لر .

معلوم اولسون که ایکی اله اثباتی دلائل عقلیه و نقلیه ایله
فسادی ثابت اولان باطل ، فاسد بر سوزدر .
ایشته بو بابدهده سوزک صوکی بودر .


اون ابکنجی مسأله

ناسدن بعضیاری اشبو شیاطینک احیایه ، اماتهیه ، خالق
اجسامه ، اشخاصی صورت اصلیه و خلقت اولیه لرندن بشقه
صورتیه تحویل و تغیره قدرت لری اولدیغنی اثبات ایلدی .
بعضیلری ده اشبو احوالی انکار ایدوب « شیاطینک اشبو
احوالدن هیچ بر شیئه قدرتی یوقدر » دیدی .

بزم اصحابمز اولان ائمه اهل سنته کلنجه: مشارالیه‌م قدرت
ایجاد و تکوین، قدرت احداث آنجق خالق تعالی‌ه مخصوصدر
دیه دلیل اقامه ایتمش اولدقلرندن مذاهب مذکور دنک بالکلیه
بطلانی متحققدر.

معتزله‌یه کلنجه: بونلر انسانک بعض حوادثی ایجادده قادر
اولدیغنی تسایم ایتدکلرندن چارده‌سز اشبو شیطاینک خالق اجسام
و حیات قدرتلری اولمادیغنی بروجه اتی بیان و اثباته محتاج اولدیلر.
دیدیلرکه:

«شیطان جسمدر؛ هر جسم دخی قدرت واسطه‌سیله قادردر؛
قدرت ایسه ایجاد اجسامه صالح دکلدر.»



ایشته بو دلیل اوچ مقدمه‌دن مرکبدر.

مقدمه اولی. — شیطان، جسمدر.

معتزله، بو مقدمه‌یی «ماسوی الله یا متخیزدر، یا متخیزده
جالدر.» حصر استقرائسی اوزرینه بنا ایتمشلردر. معتزله‌نک
ایسه بو مقدمه‌یی اثباتده حجتلری شویله طورسون شبهه‌لری
بیله یوقدر.

مقدمه ثانیه. — جسم آنجق قدرت واسطه‌سیله قادر اولور.
معتزله، بو مقدمه‌یی ده «اجسام، ممائله‌یی مستلزم اولان
شیلردندر.

بناءً علیه اجسامدن بر شی لذاته یعنی بلا واسطه القدرة

قادر اولسه‌یدی، اجسامک هپسی ده بویله بلا واسطه‌ القدره مالک اقتدار اولمق لازم کلیردی . « استدلالی اوزرینه بنا ایتمشلر درکه اشبو مقدمه‌نک ده بناسی تمائل اجسام اساسنه مستنددر . مقدمه‌ نالته . — معترله‌نک « بزه مخصوص اولان قدرت، خلق اجسامه صالح دکلدر . بناءً علیه قدرت حادثه‌نک خلق اجسامه صالح اولماسی لازم کلیر . » سیاقنده‌کی سوزلریدر .
 حالبوکه معترله‌نک بو سوزلریده اولکیلری کی ضعیفدر .
 زیرا انلره دنیلیرکه بزم قدرت حاصله‌مزه مخالف، و خلق اجسامه صالح بر قدرتک حصولی نیچون جائز اولسون ؟ زیرا بر شیک حال حاضرده موجود اولماسندن اوشیک حد ذاتنده وجودی متمنع اولمق لازم کلر .

اون اوچنچی مسأله

جن، غیبی بیلیرمی ؟
 بو مسأله‌ده اختلاف ایتمشلردر .
 الله تعالی کتاب کریمنده جن طائفه‌سنگ قید سلیمان التنده بولندقلرینی و جناب سلیمانک وفاتندن صکرده‌ بر مدت حبسنده قالدقلرینی و موت سلیمانی بیله‌مدتکارینی بیان بیورمشدر . انلرک بو حالی ایسه غیبی بیلدکلرینه دلالت ایدر .
 کیمی ده « خیر ! جن، غیبی بیلیر » دیدی .
 صکره بوکا قائل اولانلرده اختلاف ایدوب کیمی « جن طا .

ثقه سندن بعضیلری ستواته یاخود اکا یقین یرده صعود ایله السنه
ملائکه دن استراق ایتدیکی بعض غیوبی اخبار ایدر» دیدی.
کیی ده «جنك معرفت غیوبده بشقه یوللری واردرکه او
یوللری الله دن بشقه سی یلرز.» دیدی.

معلوم اولسون که بو مثللو مباحثده نه قدر فتح باب اطناب
ایدسه طنوندن بشقه بر شیئی مفید اولماز. عالم حقائق حال
ایسه آنجق مولای متعالدر.



رکن خامس

مباحث استعاده ارکاندن بشجی رکن، باعث استعاده اولان مطالبدر

عبدك حاجاتی نامتاهی اولدیغی بیان ایتشدك. ایمدی عبد
پر احتیاج هیچ بر خیر یوق که آنی استحصاله و هیچ بر شر یوق که
آنی ده دفع و ابطاله محتاج اولسون .

«اعوذ بالله» قولى ایسه جمیع شرور روحانیه و جسمانیه نك
دفعی متاول و شاملدر و بونلرک ده هپسی امور غیر متاهیة در .
بزایسه انلرک بالکز معاقدينه تنیه ایدرزده دیرزکه : شرور،
یاقلوبیده حاصل اولان اعتقاد بایندندر؛ یاخود ابدانده موجود
اولان اعمال بایندندر .

قسم اوله کلنجه : جمیع عقائد باطله بونده داخل اولور .
برده معلوم اولسون که اقسام معلومات، نامتاهیدر . بونلردن
هر بریسنك صحیح، صواب بر اعتقاد اولمق اوزره اعتقاد اولنسی
ممکن اولدیغی کبی فاسد، خطا بر اعتقاد اولمق اوزره اعتقاد
اولنسی ده ممکندر . وعالمده نه قدر مذاهب ضلال واریسه هپسی
اشبو جمله ده داخل اولور که یالکز بوامت مرحومه دن اولانلری
یتش ایکی در . بو امتدن خارج اولانلری ده یدی یوزدن زیاده در .

ایمدی (اعوذ بالله) قولى مذکور فرق ضالاک آری آری
 هر بریسندن استعاذہی متناول وشاملدر .
 کلام اعمال بدنیه متعلق اولان شروره : بونار ایکی قسمدر .
 بعضیلری مضار دنیہی، و بعضیلری مضار دنیویہی مفید
 اولانلردر .

مضار دنیہ . — جمیع اقسام تکالیفده الله تعالانک نہی
 ایتدیکی شیلردرکه منہیات مذکوردهنک ضبطی عادتا متعذر کی
 اولوب (اعوذ بالله) قولى ایسه هپسنى متناول وشاملدر .
 مضار دنیویہ . — بو قسمده آلام، اسقام، حرق، غرق،
 فتر، کوتورملک، کورلک کی شیلر دخی داخلدرکه انواعی همان
 نامتاهى بر رادیه وارییور . ایمدی (اعوذ بالله) قولى بونلرکه ده
 هر بریسندن استعاذہی متناول وشاملدر . ماحصل (اعوذ بالله)
 قولى آتی الذکر اوچ قسمی متناول وشاملدرکه بو قسملرک هر بری
 مجرای مالانهایده جاریدر .
 قسم اول . — جهل .

مادامکه اقسام معلومات، نامتاهیدر؛ انواع جهالات، دخی
 غیر متساهیدر . ایمدی عبد مستعید، جهالاتک کافه انواعندن
 جناب الله استعاده ایتمش اولورکه بو جلهیه اهل کفرک، اهل
 بدعتک مذاهب کثیرده بی ده داخل اولور .
 قسم ثانی . — فسق .

مادامکه تکالیفک انواعی جداچوقدر . مادامکه کتب احکام بونلری
 محتوی در . (اعوذ بالله) قول شریفنک بونلرکه ده شمولی طبعیدر .

قسم ثالث. — میکروهات، آفات، مخافات.
 بونلرکده اقسام وانواعی نامتناهی اولمقله بر این (اعوذ بالله)
 قولنک هپسنه شمولی واردر.

هر کیم اقسام آفاقی ممکن مرتبه علماً احاطه ایتنک ایسترسه
 کتب طبی مطالعه ایتسون. تاکه اعضای بدن انساندن هر برینسک
 کندینه مخصوص نه قدر آلام واسقامه استعدادی اولد. یعنی اکلاسون.
 شو جالده عاقله واجب اولان بودرکه (اعوذ بالله) دیمک
 ایستدیکی وقت اشبو اجناس ثلاثی، و بونلردن هر برینسک
 انواعه و نواع انواعه تقسیمی ذهننه کتیرملی و بوتقسیم و تفصیلده
 مبالغه ایتلیدر.

برده انسان عاقل شو حساب و تعداده کلیان انواع آفات
 و مخافات بر کره خیال و خاطرینه کتیر و بده بعده بتون خلق
 عالمک قدرت و قوتی بونلری دفع و ازالهیه کافی و وافی اولمادیغنی
 دوشونسه اکلهسه، آنک طبع و عقلی کندیسنی. مقصدورات غیر
 متناهییه دفعه قادر اولان الله ذوالجلالک عصمت و رحمتنه التجایه
 مجبور ایدرک همان (اعوذ بالله القادر علی کل المقدورات من جمیع
 اقسام الآفات و المخافات) دیه، استعاذیه باشلار.

آرتق یو بابدیکی مباحثدن یوقدرله آکتفا ایدلم. «والله
 الهادی»

باب ثالث

« اعوذ بالله من الشيطان الرجيم » قولندن مستنبط اولان
لظائف بیانده در

برنجی نکته

« اعوذ بالله » قول شریفنده خلقدن خالقده، ممکندن واجیه
عروج و التجا معناسی درکاردرکه بدایت سلو کده متعین اولان
طریق بودر.

زیرا بدایت سلو کده خلقک احتیاجیه غنی، قادر اولان
حقک وجودینه استدلالدن بشقه عید ایچون معرفت بارییه
بول یوقدر.

دیمک که (اعوذ) قولی حاجت تامهیه اشارتدر.

زیرا احتیاج اولسه استعاذهده فائده اولمازدی.

(بالله) قول شریفیده جناب حقک غنای تامنه اشارتدر.

بناء علیه عبدعاجزک (اعوذ) دیمسی کندیسنک فقر و حاجتی

اقراردر.

(بالله) دیمسیده آتی الذکر ایکی امری اقراردرکه بریسی. —

جناب حقک هم جمیع خیراتی تحصیلده، همده جمیع آفاتی دفعه

قادر اوله سی، و دیگری. — جناب عزتندن غیری کیسه بو
صفتله متصف اولیوب هم دفع حاجات، و هم اعطای خیرات
خصوصلرینک الحق ذات اقدس الهیسنه مخصوص و منحصر
بولمخه سیدر.

ایمدی عبد عاجز اشبو حالت شریفه نک شهودیله جلا ساز
بصر بصیرت اولنجه کرک کندی کندندز، و کرک جناب حقک
غیری هرشیدن فراره شتابان اولور. وهان اشبو فرارده (ففروا
الی الله) سرنی مشاهده ایله مطمئن الجنان اولورکه اشبو حالت
دخی (اعوذ) قولنده جلوه کر ساخه حصول اولور. بعده غیبت
حقه وصول و التحاق ایله نور جلال حقنده رهین استغراق او.
لورکه اول آن فیض نشانده ده (قل الله ثم ذرهم) سر سجانسی
کندیسنه عیان اوله رق (اعوذ بالله) قولیله مرطوب اللسان اولور.

ایکنجی نکته

(اعوذ بالله) قولى نفسك عجز و افتقارینی، و خالق تعالانک
قوت و اقتدارینی اعترافدر. بو ایسه قرب حضرت خدایه عجز
و انکساردن بشقه وسیله موصله مفقود ایدوکنه دلالت ایدر.
حضرت سید کائنات علیه اکمل التحیات افندمزک «کندی
یلان خالقنی بیلیر» مضموننده کی (من عرف نفسه فقد عرف
ربه) حدیث شریفلری دخی بو معنایی مشعردرکه مدلول لطیفی
(من عرف نفسه بالضعف والقصور، عرف ربه بانه قادر علی

كل مقدور) يعنى كندينك ضعف وقصورينى بيان. مولاي متعالك
هر مقدوره قادر اولديغنى ده ادراك ايلر. (ومن عرف نفسه
بالجهل، عرف ربه بالفضل والعدل) يعنى كندينك جهانى بيان،
جناب واجب الوجودك فضل و عدل ايله متصف اولديغنى ده
اكلار.

(ومن عرف نفسه باختلال الحال، عرف ربه بالكمال والجلال)
يعنى كندى حالى اختلالدن غير خالى اولديغنى بيان خالقنك كمال
وجلانى ده ادراك ايلر ديمكدر.

اوچنجى نكته

طاعة اقدم، آنجق شيطاندن فرار ايله تيسر نماي حصول
اولور كه بو فرار، مجرد الله ذو الجلاله صيغته قن عبارتدر.
شوقدر كه ايشو استعاذه دخی طاعتدن بر نوعدر. بناءً عليه
طاعته اقدم، اكر استعاذه نك طاعته تقديمى ايجاب ايدىورسه،
استعاذه نك كنديسى دخی استعاذه آخرانى تقديمه محتاج و مفتقر
اولور؛ و بو حالده تسلسل لازم كلير، و اكر طاعته اقدم، استعا.
ذهي اكا تقديمه محتاج اوليورسه، اول حالده ده استعاذه ده بر فائده
يوق ديمك اولور.

انك ايچون عبد عاجزه كويا دنير كه « استعاذه نى طاعته تقديم
ايتدجكه اقدم على الطاعة تمام اولماز. استعاذه ايسه نهايتى اولميان
بر چوق شيلرك تياتنى ايجاب ايدر. حالبوكه اتيان مالا نه ايه،

سَنَك دَائِرَةُ وَسَعٍ وَاقْتِدَارُكَدَن خَارِجِدِر . يَالْكَزْ شُورَاسِي وَارَكِه
 بُو حَالَتِ مُحَاطِ عِلْمِ يَقِيْنِكِ اَوْلَدَقْدِه سَن ، عَجْزِكِي مُشَاهَدِه وَقْصُورِكِي
 اِعْتِرَافِ اِيْتِمَشِ اَوْلُورَسِيْن . بِنَاءُ عَلَيْهِ بِنْدِه اِدَايِ طَاعَتِه سَكَا اَعَانِه
 اِيْدِرْم ؛ وَطَاعَتِه كَيْفِيَّتِ شَرْوَعِكِي سَكَا وَاكْرَهْتِيْرِم ، هَمَانِ سَن (اَعُوْذُ
 بِاللّٰهِ مِنَ الشَّيْطَانِ الرَّجِيْمِ) قَوْلِيْلِه بَكَا التَّجَا اِيْت ! »

دردنجی نکته

استعاذه نك سري . — سندن آفاتی دفع ایده جك بر قادر
 قیومه التجادن عبارتدر .

برده محققدر که شیطان لعینك القای وسوسه یه یلتمدیکی امورك
 اجل و اعظمی قرائت قرآندر . زیرا عبادت رحمن نیتله قرائت
 قرآن ، ومع ذلك آنك وعدنده ، وعیدنده ، آیاتنده ، ینساننده ،
 تفکرله تحکیم ایمان ایدن کیسه نك طاعات حسنه یه رغبتی ، ومحرماتدن
 رهبتی بالطبع مزداد و فراوان اولور :

ایشته بوسیدن ناشی در که قرائت قرآن ، طاعات و عباداتك
 اعظمی عدا اولنور . بِنَاءُ عَلٰی ذٰلِكَ شَبَهْ یُوقِیْهِ شَیْطَانُكَ عَبْدُ مَوْمِنِ
 قِرَآئَتِ قُرْآنَدَن مَنَعَه مَصْرُوفِ اَوْلَانِ سَعِیِ عِبَادَاتِ سَأْرَهْدَن مَنَعَه
 مَصْرُوفِ اَوْلَانِ مَسَاعِدِسِنْدَن اَبْلَغْدِر . وَاَوْجَهْتَلِه در که عبدك دخی
 انشای قرآنده کن دیسنی شر شیطاندن حفظ و صیانت ایده جك
 بر ذات اقدسهِ صِغْتَه احتیاجی دها شدیددر .
 ایشته بوحکمتهمبنی در که قرائت قرآن استعاذه یه مقصوددر .

بشنجی نکته

شیطان، انسانك دشمنیدر . نته کیم الله تعالی کتاب کریمنده
 (ان الشیطان لكم عدو فانحدوه عدواً) بیورمشدر . حضرت
 رحمن ایسه، انسانك مولاسی، خالق، و مهماتنك مصلحی در .
 بوندن صکره محققدرکه انسان، طاعات و عباداته باشلاینجه
 دشندن قورقاز . بناءً علیه کندیسنی او دشمن ایمانك زحمتدن
 قورتارمق ایچون مالکی اولان جناب یزدانك رضای شریفی
 تحرییه سعی و اجتهاد ایلر . ایمدی حضرت واصل اولوبده
 انواع بهجت و کرامتی مشاهده ایلدکده دشمنی اونودی ویررده
 خدمت جیه بالکیه اقبال، و او خدمت سعادت منقبت حصر
 اشتغال ایدر . دیمک که مقام اول، مقام فراردرکه اوده (اعوذ
 بالله من الشیطان الرجیم) قولیدر . مقام ثانی دخی حضرت ملک
 جبارده استقراردرکه بوده (بسم الله الرحمن الرحیم) قولیدر .

التنجی نکته

باری تعالی حضرتاری قرآن حقنده (لایمسه الا المطهرون)
 بیورمشدرکه احداثدن طاهر اولمیان مس قرآن حرامدر دیمکدر .
 ایمدی قلب انسان غیراللهه تعلق ایدوبده لسان دخی غیراللهه
 ذکر یله جاری اولنجه بونلرک هر برنده طهارتی موجب . بر نوع

لوٹ حاصل اولور که اول حالده طهور [۱] استعمالی لازم کلیر .
 بناءً علیه عبد وقتاکه (اعوذ بالله) ديهرك اللهه صغیر . در حال
 طهور ، حاصل اولور و ذکر المهدن عبارت اولان صلاة حقیقیه
 حاضر لانیرده (بسم الله) ديهيله جك بر خاله کلیر .

یدنجی نکته

ارباب اشارات دیدی که : سنك خصم جان و دشمن دین
 و ایمانك ایکی در . و بونلرك بری ظاهر و دیکری باطندر . و سن
 بو ایکی خصم قوی ایله محاربهیه مأمور سین . مولای متعال
 حضرتاری دشمن ظاهر حقنده (وقاتلوا الذين ولا یؤمنون بالله)
 و دشمن باطن حقنده (ان الشیطان لکم عدو فاتخذوه عدواً)
 بیورمشدر .

ایمدی الله تعالی کا نه قولکه شویله خطاب ایدر بیوررکه
 دشمن ظاهرکه محاربه ایتدیکنده مددسك ملك اولور . « [نته کم
 قرآن کریمده (ان یمدکم بخمسته آلاف من الملائکته مسومین)
 بیورمشدر .] دشمن باطنکه حرب و صواش ایتدیککده مدد
 کارك ملك اولور . « [نته کم فرقان مینده (ان عبادی لیس لک
 علیهم سلطان) بیورمشدر .]

بناءً علیه دشمن باطنله محاربه؛ دشمن ظاهرله محاربه دن اولادر .

[۱] طهور؛ صبور و زننده فعول بمعنی فاعلدرکه بنفسه طاهر
 وغیری بی مطهر اولان شیئه دئیر .

زیرا دشمن ظاهر فرصتیاب اولسه دخی آنک قصدی متاع دنیایه
مختصر در. فقط دشمن باطن، فرصت بولورسه بونک غلبه سی دین
ویقینه مضر در. برده دشمن ظاهرک غلبه سی تقدیرده دخی بزینه
اجتهاد مزله مأجور اولورز. فقط خدا نکرده دشمن باطن بزه
غالب اولورسه منقون اولورز. کذلک دشمن ظاهرک یدنده
مقتول اولان شهید اولور. فقط دشمن باطنک مقتولی الله قیو.
سندن طرید و بعید اولور.

بو سبیدن ناشی دشمن باطن، شرنیدن دها زیاده احتراز
ایدملیدر. بو احتراز دخی مجرد کشتی قلیله، لسانیه «اعوذ بالله
من الشیطان الرجیم» دیه رک الله صغفقه اولور.

سکرنجی نکته

مؤمنک قلبی اشرف البقادر.
بناء علیه نه قدر خوش کاشانه لر. معمور بوستان لر، جنت مثال
بغلر وارایسه، قلب مؤمنی انلرک هپسندن اشرف و اعلی بولور سین.
قلب مؤمن، صفاده آینه کی در؛ بلکه آینه یه ده فائق در.
زیرا مرآت مصفا ناک اوکنه بر پرده چکلسه آنده ارتق بر شی
کورلر اولور. حالبوکه قلب مؤمنه هفت آسمان دکل، حتی کرسی
و عرش رحمان بیله حجاب حائل اوله ماز.
نته کم الله ذوالجلال (الیه یصعد الکلم الطیب والعمل الصالح
یرفعه) بیور مشدر.

ایشته ظاهر آ بر کوشتپاره صنوبری الشکلدن بشقه برشی
دکل ظن اولنان قلب انسان، اولیه بر تجلیکاه رحماندرکه بوجه
حجب صوریه نک حیاولتیه برابر ینه جلال ربوبیتی مطالعه و صفات
صمدیتی علماً احاطه ایدر [۱].

قلبك اشرف بقاع اولدیغنه دلالت ایدن وجهلر چوقدر .
اولکیسی . — علیه الصلاة والسلام اقدمن حضرتلری
« القبر روضة من رياض الجنة » بیورمشاردرد .

قبر ایسه بر عبد صالح میتک مکانندن بشقه بر شی دکلدر .
ایمدی قلب، معرفته الهک سریری، الهیتک عرش اولدیغی
حالده شبهه یوقکه اشرف بقاع اولق لازم کلیر .

ایکنجیسی . — طرف الهیدن کویا شو یولده خطاب عزت
کلیرکه « یا قوم ! سنک قلبک بنم بوستاندر؛ بنمده جنم سنک
بوستانکدر . ایمدی مادامکه سن بوستانکی بدنن اسیرکه میورسین؛
واسیرکه مدکدن بشقه بلکهده بنم معرفتی آنده اترال ایدیورسین؛
بن بوستانمی سندن نصل اسیرکر؛ و سنی بوستانمه کیرمکدن نصل
منع ایلرم؟ »

اوچنجیسی . — خدای متعال، عبد صالحک بوستان جنتیه

[۱] « انک ادنی پایهسی باق عرش اعلا ندنه اعلا در »

« کوکل دیر لر سرای سینده بر تختگاهک وار . »

« کوکلدن، دیده دن، نردنسه ارتق (سری) فهم ایتدم »

« حریملی مع الله واریر بر کبرلی راهک وار . »

(مترجه الحقییر)

کیفیت نزولانی حکایه ایدرک (فی مقعد صدق عند ملیک مقتدر)
 بیورمشده قید (مقتدر) ی حذف ایله یالکز (عند الملیک)
 دیماشدر. الله تعالی کائنه «بن یوم آخرتده بر ملیک مقتدر
 اولورم؛ قولارمده ملوک اولورلر. شوقدرکه آنار هر نه قدر ملوک
 اوله جقلر سده ینه بنم تحت قدرتمده بولانه جقلردر.» بیورمشدر.
 برده طرف الهیدن کائنه شویله خطاب عزت کلیرکه «ای
 قولم! بن جنتی سکا تخصیص ایتدم، سنده کرچه جنتکی بکا
 تخصیص ایتمشین. لکن ینه سن بکا انصافسزلق ایدیورسین.
 هاله سویله باقهلم! بنم جنتی کوردکی؟ عبد «خیر! یا ربی»
 جوابی ویرنجه «یا بن سنک جنتکه کیردم می؟» سوؤالی وارد
 اوله رق بوکاده «اوت! یا ربی» جوابی ویرمهک مجبور اولور.
 بو صروده «واقعا سن هنوز بنم جنته کیرماشسین؛ فقط سنک
 زمان دخولک یاقلاشجه بن مجرد سنک نزولک ایچون شیطان
 [مذموم و مدحور اولدیفک حالده جنتدن چیق!] دیهرک آتی
 جنتدن طرد و اخراج ایلدم. ایمدی بن سنک نزولکدن مقدم
 دشمنکی جنتدن بویله طرد و تبعید ایدیمده سن حالا بنم دشمنی
 بوستانکدن طرد و اخراج ایتماهی نفسکه نصلروا کوریورسین؟
 مع هذاکه بن سنک بوستانکه نزول ایدلی یتمش ییل اولیور.»
 یولنده شرف صدور اولان خطاب عتاب آمیز الهییه قارشلی باکمال
 شرم و حجاب «ایهی! سن بنم دشمنی جنتکدن چیقارمغه
 قادرسین. اما بن برعبد عاجز وضعیف اولدیمدن سنک دشمنکی
 بوستان دلدن چیقارمغه مقتدر دکم.» جوابیله عرض معذرت

شتاب ایدنجہ « بر ملک قاهرک حمایہ سی آتہ کیرن عاجز، قوی اولور. بناءً علیہ سن ده بنم تحت حمایتہ کیر! تاکہ جنت جنانکدن طرد و اخراج دشمنہ قدرتیاب اولہ سین. همان (اعوذ باللہ من الشیطان الرجیم) دیہرک بکا التجایہ استعجال ایت! » خطاب مستطاب بیہ تسلیتیاب اولور.

ایمدی « مادامکہ قلب انسان، بوستان خدادار؛ یانچون شیطانی اورادن کندی چیقارمیور؟ » یولندہ وارد اولان سؤالہ جواباً اهل اشارات بروجه آتی لؤلؤ باش تحقیق اولمشدر.

کأن بوبابده طرف الہیدن خطاب عزت کایرکہ « یا عبدی! سن اوکیسه سین کہ سلطان معرفتی حجرۂ قلبکده مهممان ایلدک؛ حالبوکہ کندی حجرہ سنہ برسلطان ذیشانی مهممان ایتک ایستیان کیمسہ البتہ حجرہ سنی سیلوب سپوروب تمیزلہ مکدده مجبور در. یوقسہ حجرہ نک تطہیر وتنظیفی سلطان مهممانہ واجب دکدر، ایمدی سن ده (اعوذ باللہ من الشیطان الرجیم) دیہرک منزل سلطان معرفت اولان قلبکی لوٹ وسوسہ دن پاک ایتلمی سین »

طقوزنجی نکتہ

کأن خطاب عزت کایرکہ « یا قوم! سن بکا انصافسزاق ایدیور سین. شیطانک درکاه عزتمدن مطرودیتہ سبب نہ اولدیغی بیایر میسین؟ ملائکہ عبادتمده نصل قائم ایسہ لر، شیطان دخی بکا اولیہ عبادت ایدر طورردی، ظاہر ده بنم الہیتی مقرر و معترف

ایدی؛ صکره سنک باباک آدمه سجده ایتمنی اکا امر ایتم. اوده امتناع ایدی ویردی. ایمدی وقتاکه تکبر ایتمی. بن ده آتی خدمتدن نفی و طرد ایلم، شیطان ایسه حقیقتده باباکه دشمناک ایتماشدی؛ یالکز بنم خدمتدن امتناع ایتماشدی. صکره او سکا یتش سندهرکه دشمناک اییدیور. سن ایسه ینه اکا محبت اید. ییورسین. نه قدر خیرات و حسنات وار ایسه، هپسندده او سکا مخالفت اییدیور. سن ایسه بالعکس کافه مراداده اکا موافقت ایلیورسین. ایمدی بو مذموم یولی براق ده (اعوذ بالله من الشیطان الرحیم) دهرک سن ده اکا دشمن اولدیگی کوستر!

اونجی نکته

انسان! بر کره باباک آدمک قصه سنه نظرایتسهک آ. شیطان علیه اللغه باباکه «بن سکا ناصحیندنم» دیه یمین ایتماشی ایدی؟ صکره آنک نصیحت دیدیکی امرک عاقبتی نتیجه سی نه اولدی؟ باباکی جنتدن چیقارمغه چالشمقندن عبارت اولمادی!

برده سنک حقه سکه سویلیدیکی سوزده دقت ایتمسهک آ. سنی اضلال و اغوا ایده جکنه قسم ایدرک (فبعتک لاغوینهم اجمعین الا عبادک منهم المخلصین) دیمدی؟ ایمدی دوشونکه «بن سکا ناصحیندنم» دیه یمین ایتمیدیکی ذات ایله معامله سی بوندن عبارت اولنجیه ارتق اضلال و اغوا ایده جکنه قسم ایتمیدیکی کیسه ایله معامله سی نصل اولق لازم کلیر؟

اون برنجی نکته

«اعوذ بالله» دیوبده «بالله» رینه دیکر بر اسم ذکر
ایتماسی معاصیدن زاجر و دافع اولمده اشبو اسم شریف، سائر
اسما و صفاتدن اباع اولدینی ایچوندرد. زیرا (آله) اول ذات
پاکدرکه عبادته مستحقدر. و عبادته استحقاقی دخی قادر، علیم،
حکیم اولدینی ایچوندرد. بناءً علیه (اعوذ بالله) قولی (اعوذ
بالتادر العلیم الحکیم) دیمه نك مجراسنده جاریدرد. اشبو صفتلر
ایسه زجر و منعی افادده واصل مرتبه نهایتدر.

تفصیل

خرسز بك اعلى بیايركه ياقهبي الويره جك اولورسه سلطان
انك حقندن كلهيه مقتدردر. مع هذا فرصت بولنجه سلطانك ده
مالنى چالمقندن كرى قالميور. زیرا خرسز بك اعلى بيايركه سلطان
هر نه قدر اجراى مجازاته قادر ايسهده مالنك سارقى كيم اولد.
يعنى بياير.

ايسته خرسزك مال سلطانى سرقة اجتسارى بو سببندن
ناشيدرد. بناءً عليه يالكزجه قدرت، زجر و منعده كافى اولميوب
بلكه قدرته برابر علم دخى لازمدر. كذلك يالكز قدرت و علم
دخى زجره حصوله كفايت ايتمز. زیرا حضرت پادشاه بر فعل
منكرى كوررده نهى عن المنكر ايتمزه آنك يالكز حضورى فعل
منكره مانع اولماز. اما هم قدرت، هم علم، همده قبائحندن منع

ایدیجی حکمت حاصل و مجتمع اولدقدده شبهه سز زجر کامل،
حاصل اولور .

ایمدی عبد « اعوذ بالله » دیدیکنده کویاکه « اعوذ بالله القادر
العالیم الحکیم الذی لایرضی بشیء من المنکرات » دیش اولور .
انک ایچون شبهه سز، زجر تام حاصل اولور .

اون ایکنجی نکته

عبدک « اعوذ بالله من الشیطان الرجیم » دهرک عصمت خدایه
التجا ایتسی کن دیسنک شیطانیه مجاور ومعاون اولمغه راضی اولدیغنه
دلالت ایدر .

عبدک بوکا عدم رضاسی ده مجرد شیطانک الله اولان
عصیانندن ناشیدر . حالبوکه شیطانک عصیان اشبو مسلم مستعینه
حقیقتده بر ضرر ویرمز . ایدمی عبد مسلم او یله بر عاصی نک
حتی جوار و حمایتنه بیله راضی دکل ایکن، یا کندی بر فعل منکره
رضا داده اولورمی ؟ البته اولماز .

اون اوچنجی نکته

(شیطان) اسمدر: (رجیم) صفتدر .
استعاذهده الله تعالی اسم اوزرینه اقتصار ایتیموب صفتی ده
ذکر ایتدی .

کویا جانب حقدن خطابِ عزت کایرکه: «شیطان، خدمت عبودیتده بیکلرجه سنه لر دوام ایتشدی؛ اوخیٹک بزه برضرر، برکوتولک ایدیه یلیدیکنی سن هیچ ایشتمدکی؟ مع هذا صکره بز آتی رجم ایدرک درگاه عزتمزدن طرد و تبعید ایلدک. ایشه سن ده محقق بیلیسین که اگر اولمعاون، بر لحظه قرینک اوله جق اولورسه، مطلقا سنی ابدی آتسه القا ایدر. بوصورتنده نصل اولورکه سن اولیه بردشمن دین و ایمانی طرد و تبعید ايله مشتغل اولمورسین؟ اولیه ایسه هیچ طورمه! همان (اعوذ بالله من الشیطان الرجیم) دهرک بکا صیغغه باق!»

اون دردنجی نکته

قائل دیه ییلیرکه.

الدون مرتبه ده اولان برملک دخی شیطانی دفعه کفایت ایدرکن سبب نه درکه الله تعالی بوکو پکی اسم پاکی مقابله نده ذکر ایلدی ده بزه (اعوذ بالملائکة) دیمه مزی امر بیورمندی.

جواب. — الله تعالی کائه بیوررلرکه: «قول! شیطان سنی کورر؛ سن ایسه آتی کوره مزسین. ایشه اوخیٹک کید و مضرته اوغرامه کزک باشلیجه سبی ده بودر. بناءً علیه سز شیطانی کورر فقط شیطان آتی کورمز اولان ذات واجب الوجوده تمسک ایدکرده (اعوذ بالله من الشیطان الرجیم) دیکنر.»

اون بشنجی نكشه

(الشیطان) لفظنه الف و لامك دخولی تعریف ایچوندر .
 زیرا کورینور کورنمز شیطانلر چوقدر . بلکه ده اکثریا کورینور
 شیطان کورنمز شیطاندن اشد اولور .




بعض اهل تذکیردن محکیدرکه بردفعه محاسن ذکرنده «برکیمسه
 فقرایه تصدق ایتمک ایستدکده یتمش قدر شیطان اللرینه . ایاقلرینه
 قلبنه صاریلوب آصیلرلرده آتی اعطای صدقه دن منعه چالیشیرلر .»
 دیدی .

حاضر بالمحاسن اولانلردن بری «بن اوشیطانلرک یتمش ایلده
 محاربه ایدرم» دهرک همان قالقوب خانه سنه واردی . اتکنه حنطه
 طولدیروب فقرایه طاعتق اوزره طیشاری چیتقمق ایستدیه ده
 زوجیه سی یرندن صجرا یوب بیچاره نك یاقه سنه صارلدی وحنطه یی
 برافدیرنجه یه قدر اوغراشدی طوردی . زواللی آدجغزده خائب
 مسجده دوندی کلدی . مذکر اکا «نه یاپدک باقهلم؟» دیه سؤال
 ایدنجه :

«شیخیم ! بن شیطانلرک یتشنه ده غلبه ایتشدم؛ فقط الکصره
 آنالری چیه کلدی ده نصلسه او بنی منزم ایلدی» جوابی
 ویردی .

ایشته کورینور شیطانلرک شری کورنمز لردن دها شدید
اولدیغنه بو حکایه کوزل برمالدر .



(الشیطان) لفظنه داخل اولان الف ولامک عهده موضوع
اولمسیده جائدر . زیرا جمیع معاصی بوشیطانک رضائنه مقرون
اولوب برشیدن راضی اولان ایسه اوشیئک فاعلی حکمندهدر .
شاید بونی استبعاد ایدیورسهک ! مسأله شرعیه ایلهده خل
مشکل ایده بیلیر سین . چونکه امام اعظم ابوحنیفه الکوئی
حضر تارلی غندنده امامک قرائتی مقتدینک قرائتی حکمندهدر .
سببیده مقتدینک قرائت امامه رضا کوسترمه سی و امام آرقه سنده
سکوت ایدوب طورمه سیدر .

اون التنجی نکنه

شیطان، معنای بعدی متضمن اولان (شطن) ماده سنیدن
مأخوذدر . انکچون شیطان، بعید عن الحق اولقله محکوم علیهدر .
مطیع، ایسه قریب الی الحقدر . الله تعالی (واسجدوا اقرب
— و الله قریب منك — و اذا سألك عبادى عنى فانى قریب)
بیوردی .

رجیم؛ دخی مرجوم دیمکدرکه خدنگ لعن وشقاوتله مرمی
اولق معناسندن کنایتدر .

سکا کلنجہ : سن لہ الحمد جبل متین سعادتہ موصولین . اللہ تعالیٰ مؤمنارک شانندہ (والزمہم کلمۃ التقوی) بیوردی .
 ایشہ بودلالت ایدرکہ اللہ تعالیٰ شیطانی رحمتدن بعید ،
 وسہام لعن وشقاوتلہ مرجوم قیلدینگی کبی ، سنی دہ رحمت الہیہ سنہ
 قریب ، وسعادت ابدیہ یہ موصول قیلشدر .
 بردہ حقدن بعید اولان شیطانی قریب وقرین رحمت ایتیمہ .
 جکنی دہ اخبار ایلدی . زیرا (ولن نجد لسنۃ اللہ تحویلاً) بیوردی .
 بناءً علیہ معلوم عرفان ملزومک اولسون کہ مولای متعال
 حضر تتری مادام کہ کمال لطف و کریمہ سنی مظهر شرف قرب
 ایتدی . فضل ورحمتدن آرتق طرد وتبعید ایلز .

اون یدنجی نکتہ

امام جعفر صادق ، رضی اللہ عنہ بیورمشہر کہ : «قرائت
 قرآندن اول مطلقا تعوذ ایتلیدر . » طاعات سائرہدہ ایسہ تعوذ
 اولٹماز . بوندہ کی سر و حکمت شودر کہ : عبدک لسانی بعضاً کذب ،
 غیبت ، نیمیہ ایلہ متنجس اولدیغندن اللہ ذوالجلال حضر تتری عبده
 تعوذ ایلہ امر بیوردی . تاکہ عبدک لسانی طاهر اولسونده طیب
 وطاهر اولان رب العالمینک کلام منزلی لسان طاهرلہ اوقوسون .

اون سکنجی نکتہ

طرف خدادن کائنہ عبد مؤمنہ شویلہ خطاب عزت کلیر کہ :

«اوشيطان رحيم در، بن ايسه رحمان رحيم ؛ بناءً عليه شيطان
رحيمدن ايراق اول كه رحمان رحيمه واصل اوله سين .»

اون طقوزنجي نكته

شيطان، دشمنكدر . سن ايسه آندن غافلسين . غائبسين .
نصل كه الله تعالى « انه يراكم هو و قبيله من حيث لا ترونهم » بيورمشدر .
ديمك كه سنك بردشمن غائبك ، برده حيب غالبك وار .
چونكه الله تعالى « والله غالب على امره » بيورمشدر .
ايمدى دشمن غائب سكا قصد ايتديكنده ، حيب غالبه التجا
ايت ! « والله سبحانه و تعالى اعلم بمراده »

باب رابع

« اعوذ بالله من الشيطان الرجيم » قوله ملحق اولان مسائل بيانده در »

برنجی مسأله

« اعوذ بالله » ديمکه « بالله اعوذ » ديمه نك بيننده فرق عظيم واردر . زیرا اولکيسي حصر افاده ايتمز . ايکنجيسي ايسه حصر افاده ايدر .

مادام که بويله در . يا نيچون او اکیسیله امر ، وارد اولدی ده ايکنجیسیله امر وارد اولمادی ؟ مع هذا که بز بونک ايکنجیسی اکمل اولدیغنی ده یرنده بیان وایضاح ایتمشزدر .
 كذلك حمدده هم « الحمد لله » حمده « لله الحمد » وارد اولوب استعاذه ده ايسه يالکمز « اعوذ بالله » ديلدی ده « بالله اعوذ » ديلدی .
 عجا بونک فرقی نه در ؟

ايکنجی مسأله

« اعوذ بالله » قولنک لفظی خبردر . معناسی ده « اللهم اعذنی » تقدیرنده اوله رق دعادر . کورمز میسین که واجب تعالی و تقدس

حضرت تری ام مریمدن حکایه « وانی اعیندها بك وذریتها من الشیطان الرجیم » بیورمشدر .

اعوذ بالله، قوی « اللهم اغفر لی » مغفاسنه اولان (استغفر الله) کی در .

بونك دعا مغفاسنه اولدیغنهده دلیل شودرکه : اعوذ بالله قوی
یا لکز مستعینک فعلندن اخباردر . بوقدر جفنده ایسه فائده یوقدر .
فائده عبد مستعیندی جناب حقت اعاده ایتمه سندهدر . اویله ایسه
سبب نهدرکه « اعوذ بالله » دیدی ده « اعذنی » دیمدی ؟

جواب

رب ایله عبد بیننده عهد واردر ، نته کم حق تعالی (و اوفوا
بعهد الله اذا عاهدتم) برده (و اوفوا بعهدی اوف بعهدکم)
بیورمشدر . بناءً علیه عبد کائنه دیرکه « بن لؤم انسانیت و نقص
بشریته برابر اعوذ بالله دیهرک یعنی سکا صیغینه رق عهد عبود .
یتمه وفا ایتدم . ایدمی سن، یاربی ! نهایت کرم، و غایت فضل
و رحمتله « انی اعینک من الشیطان الرجیم » یعنی بن ده سنی
شیطان رجیمک شرندن حفظ و صیانت ایدرم دیهرک عهد ربو .
یتمه وفا ایتمه اولاسین . »

مسأله [ج]

اعوذ، کلمه سی فعل مضارعدر : فعل مضارع ایسه حالدهده،
استقبالهده صاحدر . ایدمی بوکله، حالدهده، استقبالدهده حقیقتیدر ؟

حق اولان حالده حقیقت، استقباله مجاز اوله سیدر .
استقباله اختصاصی آنجق (سین) و (سوف) نك علاوه سیله در .

د

فعل مضارعك حال حاضر و مستقبل بیننده مشترك اولوب ده
حال حاضر و ماضی بیننده مشترك اولماسنه سبب نه در ؟

ه

مضارع ایله اسم بیننده کی مشارکت نصلدر ؟

و

مضارعه عامل نصلدر ؟
حالبوکه مضارعك معمول اولدیغنه شبهه یوقدر .
ایمدی مضارعك عاملی هانکی سیدر ؟

ز

« اعوذ » قولى كرك حالده، وكرك جميع زمان استقباله
عبدك مستقراً مستعید اولدیغنه دلالت ایدر که کمال دخی بودر .
ایمدی قول مذکور اشبو استعاده نك جنده ده باقی اولدیغنه
دلالت ایدر می ؟

ح

« اعوذ » قولى نفس متكلم وحده اولوب (اتین) قولنده
مذکور اولان درت حرفدن بریسی کنندده بولنق لابد و لازمدر .

كلهلم « اعوذ بالله » قولندهكى بايه متعلق اولان مباحث
عقلیهیه : بونلر چوقدر .

۱

باللهدهكى (با) باى الصاقدر .
بونده بر قاج مسأله واردر .

برنجی مسأله

بویای بصریون (باى الصاق) وکوفیون (باى آلت) تسمیه
ایدرلر . بشقهلری ده بوکا (باى تضمین) نامنی ویررلر .
الحاصل ، بوباشبهه یوق که بر فعله متعلقدر . فعله متعلق اولمسندهكى
فائدهده شودر که او فعلك باشلی باشنه الصاقی ممکن دکدر . فعلك
الصاقی همه حال اشبو بانك مدخول علیهى اولان شیئك واسطه .
سنه محتاجدر .

بناءً علیه الصاقه سبب اولدیغی ایچون بو بايه باى الصاق
دنیلدیكى کبی آلت اولان شیئسه داخل اولدیغی ایچونده باى
آلت دنیلیر .

ایکنجی مسأله

باللهدهكى باده بر فعلك لزوم اضمارى متفق علیهدر .

ایمدی سن یالکز « بالقلم » دیرسهك بو سوزك بر كلام مفید اولماز. بلکه سوزك مفید اوله نيك ايچون « کتبت بالقلم » دیمهك لازم کایر. ایشته بودلات ایدرکه باللهدهکی حرف با بر مضمره متعلقدر. و بونك نظیری ده « بالله لافعلن » قولیدرکه « احلف بالله لافعلن » معناسنه درده كلامك « احلف » یه دلاتندن ناشی « احلف » حذف اولندی. ایشته باللهدهده اولیه در.

و بونك بر نظیری ده شودرکه بریسی نیت سفر ایدوبده دیگر برذاتدن استیدان ایتدکده اوزات، مستأذن سفر بره « علی اسم الله » دیرکه « سر علی اسم الله » تقدیرنده در.

اوچنجی مسأله

مادامکه اضمارك لزومی ثابت اولمشدر. دیرزکه:

بو مقامده حذف ضمیر، افصحدر. افصح اولمسنده سبب شودرکه فعل مضمر تصریح اولنسه « اعوذ بالله » قوی او حکم معینه مقصور اولور. اما عند الحذف وهم هر مذهبه ذاهب اولقله برابر جمیع مهماتك انجی الله ذوالجلاله استعاذه والتجاء واسطه سیله، و عند الابتداء اسم اللهك ذکر یله تمام اولدیغنی ده خاطره کتیرر.

بونك ده نظیری « الله اکبر » قولیدر. « الله اکبر من الشئ الفلانی » بیور میوبده (الله اکبر) دیمهسی مجرد افاده عموم ایچوندر. ایشته اعوذ باللهدهده اولیه در.

دردنجی مسأله

سیویه دیدی که «اشبو بانك كسردن بشقه عملی یوقدر .
 بوسیدن ناشی بای مذکور، مكسور اولدی .»
 دیرسه که «كاف تشیهكده كسردن بشقه عملی یوقدر .
 مع هذا كه كاف تشیه، مكسور دكل، بالعكس مفتوحدر .
 جوابنده دیرزكه :

كاف تشیه، اسم مقامنده قائمدر . اسم ایسه عمده ضعیفدر .
 اما حرثك وجودی آنحق بواثر حسیللهدر . بناءً علیه كلام آنده
 قوی اولور .

بشنجی مسأله

(با) بعضاً اصلیه اولور . (قل ما كنت بدعا من الرسل) قول
 کریمده اولدیغی کی . و بعضاً زائده اولور . و بوده درت وجه
 اوزره در .

۱ — الصاق ایچوندر . کافی قولنا «اعوذ بالله» و «بسم الله»

۲ — عند الشافعی رضی الله عنه تبعیض ایچوندر .

۳ — تأکید نفی ایچوندر . کقوله تعالی (وما الله بظلام للعبيد).

۴ — تعدیه ایچوندر . کقوله تعالی (ذهب الله نبورهم) ای

اذهب نورهم .

۵ — فی، معناسنه اولان بادر . قال « حل باعدائک ماحل
بی » ای حل فی اعدائک .
کله لم باء قسمه : بو با (بالله) قولنده کی با اولوب بای الصاق
جنسنددر .

التنجی مسأله

بعضیلری دیدی که (وامسحوا برؤسکم) قول کرئمنده واقع اولان
(با) باء زائده در . و مضمون آیت « وامسحوا برؤسکم » تقدیرنده در .
امام شافعی ایسه بونده کی (با) تبعیض افاده ایدر دیدی .
امام شافعی نیک حجتی وجوه آیه در .

۱ — بو آیتده کی (با) ایچون یا لغودر؛ یا مفیددر دیه جکر؛
احتمال اول ایسه باطدر . زیرا رب العالمین ، واحکم الحاکمین
حضر تلتزینک کلام شریفی لغو وبی معنادر دیمک امر بعیددر .
چونکه کلامدن مقصود ، اظهار فائده در . بناء علیه آتی لغوه
حمل اتمک اصلک خلافدر .

ایشته بای مذکورک بر فائده زائده افاده ایتدی کی ثابت اولدی .
وبوکا هرکیم قائل اولدی ایسه اوفائده زائده تبعیضدر دیدی .
۲ — « مسحت یدی المنديل » قولیه « مسحت یدی المنديل »
قولی بیننده کی فرق بای مذکورک تبعیض افاده ایتدی کنک سختی
اثباته کافیدر . چونکه اولکیسی اجزاء منديلن یالکتر بر جزئی ،
وایکنجیسی کافه اجزاء منديل الیه مسح ایتدی کنی مشعردر .

۳ — اهل لغتدن بعضیلری (با) بعضاً تبعیض معناسنی

افاده ايدر ديدى . بعضيلرى ده بونى انكار ايتدى . لکن تببيض افاده ايدر دينلرک روايتى راجحدر . بناءً عليه (با) تببيض افاده ايدر اولدينى ثابت و متحقق ايسهده او بعضك مقدارى غير مذکور ايدوکندن بعض تسميه اولتان مقدار نه ايسه ايشته اوقدرجنى مفيد اولهسى لازم کلدی، و بوتقديرجه رأسك اقل جزئى مسح ايله اکتفا واجب اولدی .

ايشته امام شافعينك قولى بودر .

حضرت امامك بقولنه شوييله بر اشكال وارد اولور . « واجب تعالى حضرتلرى (فامسحوا بوجوهكم و ايديكم) دخى بيوردی . بناءً عليه امام شافعينك شوقولنه كوره اجزاء وجه و يدك افانى مسح تيممده كافى اولمق لازم كلير . حال بوكه عند الشافعى تيممده كافه اجزاء وجه و يدك مسحى لابد ولازمدر . » بوكا شو وجهله جواب ويريلوب دنيليركه اشبو نصك مقتضاسى تيممدهده اجزائك اقليله اکتفا ايتمكدر . شوقدركه عند الشافعى نص اوزرينه زياده مسح دكلدر . بناءً عليه دلائل سائر دن ناشى اتمامى ايجاب ايتدك . مسح رأسده ايسه اتمامك وجوبنه دلالت ايدر دليل بولنمديغندن بونك حقندهكى نصدهده قدر مذکور ايله اکتفا ايتدك .

يدنجى مسأله

امام اعظم ابوحنيفه نك رضى الله عنه احبابى باء الضاقه بعض مسائل تفريع ايتديلر .

۱ — امام محمد (کتاب الزیادات) ده دیدی که کشی زوجه.
سنه (انت طالق بمشیئة الله تعالی) دیسه طلاق واقع اولماز. بوسوز
(انت طالق ان شاء الله) قوی کی در.

فقط (لمشیئة الله) دیسه طلاق واقع اولور. زیرا بونی تعلیل
مخرجنه اخراج ایلدی.

وکذلك (انت طالق بأرادة الله) دیسه طلاق واقع اولماز.
فقط (لأرادة الله) دیسه طلاق واقع اولور.

اما (انت طالق بعلم الله) یا خود (لعلم الله) دیسه ایکی وجهه ده
طلاق واقع اولور. انکچون نصل سویلیدیکی فرق ایتک لازمدر.

۲ — ینه امام محمد کتاب الایمانده دیدی که کشی زوجه سنه
(ان خرجت من هذه الدار الا باذن فان طالق) دیسه خاتون
اودن هر چیقیشنده قوجه سنک اذننه محتاج اولور؛ یوقسه بوشانیر
کیدر.

فقط (ان خرجت الا ان اذن لك) دیسه، و صکرده بر کره
اکا اذن ویرسه کافیدر.

انکچون نصل سویلیدیکی فرق ایتک لازمدر.

۳ — کشی زوجه سنه (طلق نفسك ثلاثاً بالف) دیسه،
زوجه سی ده نفسی طلقه واحده ایله تطلیق ایتسه، قوجه سنک
شرط ایتدیکی بیکک ثلثه واقع اولور. چونکه بوراده یعنی
(بألف) قولنده کی (با) بدلیته دلالت ایدر. بناءً علیه بدل مبدله
توزیع اولنورده هر بر طلقه یه بیکک ثانی موازی اولمش اولور.
واکر (طلق نفسك ثلاثاً على الف) دیسه، خاتون ده نفسی

طاقه واحده ايله تطليق ايسسه، امام اعظم عندنده برشيئه واقع اولماز. زيرا (على) لفظى كلمه شرطدر. شرط ايسه برلئادى كه مشروط واقع اولسون. فقط امامين عندنده خاتون طاقه واحده ايله ثلث الفه واقع اولور.

بن ديرم كه بوراده بابه متعلق مسائل كثيره وازدر.

ا — امام اعظم ابو حنيفه ديمش كه ثمنه با داخل اولورسه، ثمن مئندن تميز ايدر. آنچون (بعت كذا بكذا) ديديكده بانك مدخول عليه ياكز ثمندر و بيع فاسدك مسألهسى بو فرق او. زرينه بنا قلمشدر. زيرا امام اعظم ديمش كه كشي (بعت هذا الكرياس بمن من الحمر) ديدكه بيع، عقد فاسد ايله منعقد اولمش اولورسهده صحيحدر. فقط (بعت هذا الحمر بهذا الكرياس) ديدكه بيع صحيح اولماز. فرقى ده شودر كه خمر، صورت اولاده ثمن اولوب صورت ثانيهده ايسه ثمن در. خمرى ثمن قيلق ايسه جائزدر. اما مئمن قيلق جائز دكلدر.

ب — امام شافعى ديمش كه (بعت منك هذا الثوب بهذا الدرهم) ديدكه او درهم تعين ايدر.

فقط امام اعظم ابو حنيفه عندنده تعين ايتمز.

ج — الله تعالى (ان الله اشترى من المؤمنين انفسهم واموالهم بان لهم الجنة) بيوردى. وجنتى نفس وماله ثمن قيلدى.

اصول فقه‌ن‌ده بایه متعلق بعض مسائل واردر .

ا. — با سببیه دلالت ایدر . الله تعالی (ذلك بانهم شاقوا الله) بیورددی . ایسته بو آیت جلیله‌ده‌کی با سببیه دلالت ایدر .
برده دنیله‌کی بانك سببیه دلالتی صحیح اولماز . زیرا بانك سبب اوزرینه ادخالی جائدر شویله‌که (ثبت هذا الحكم بهذا السبب) دئیر .

ب. — با سببیت افاده ایدر دیدیکم‌زده باء سببیه ایله لام سببیه بیننده فرق نه اولدیغنی‌ده بیان ایتك لازمدر .

ج. — «سبحانك اللهم وبحمدك» قولنده‌کی بادن‌ده بحث ایتك لازمدر .

زیرا بوراده‌کی بانك نهیه متعلق اولدیغنی بیتمور . كذلك «و نحن نسبح بحمدك» قولنده‌کی بانك ده متعلق مجه‌ولدر . بناءً علیه بو بادن‌ده بحث ایتك لازمدر .

د. — دنیله‌کی که علومك كافه‌سی کتب اربعه‌ده ، کتب اربعه‌نك علومی قرآنده ، قرآنك علومی — فاتحه‌ده . فاتحه‌نك علومی — بسم‌له‌ده . بسم‌له‌نك علومی‌ده بسم‌اللهک باسنده مندرجدر .

بن دیرم‌که بو طوغریدر . زیرا کافه علوم‌دن مقصود ، عبدك جناب خالق و صولیدر . بو باایسه بای الصاقر . بناءً علیه بای مذکور عبدی جناب خالق الصاق ایدر‌که کمال مقصود دخی بودر .

نوع ثالث

از مباحث ابن باب

مباحث حرف جر

اشبو کله — یعنی اعوذ بالله من الشيطان الرجيم — حروف
جردن ایکی نوعی مشتملدر .

اولکیسی حرف (با) ایکنجیسی لفظ (من) در .

ایمدی دیرزکه (من) لفظنده مباحث کثیره وارددر .

۱. — سن « اخذت المال من ابنك » دیرسینده. (من) ك

نوتی مکسور اوقورسین. صکره « اخذت المال من الرجل »

دیرسینده بوندهده مفتوح اوقورسین. ایشه بو مقامده کله

مذکوره نك آخری عواملك اختلافیه مختلف اولدی. عاملک

ایسه اشبو حرکاته مستحق اولمقدن بشقه معناسی یوقدر. بناءً علیه

اشبو کله نك دخی معرب اولمهسی لازم کلیر .

ب. — (من) کلهسی درت وجه اوزره وارد اولمشدر .

ابتدای غایت (۱) تبعیض (۲) تبیین (۳) زیاده . (۴)

ج. — مبرد، دیدی که (من) ده اصل اولان ابتدای غایتدر

باقیلری اکا مفرعدر . بشقهلری دیدی که اصل اولان تبعیضدر .
باقیلری اکا مفرعدر .

د . — بعضیلری (من) کله سنک کله زائده اوله سنی انکار
ایتدی .

(یغفرلکم من ذنوبکم) آیت کریمه سنده واقع اولان (من)
کله سنه کلنجه : بونک ده فائده زائده افاده ایتدیکنی بیان ایتشلردر .
الله تعالی کویا (یغفرلکم بعض ذنوبکم) بیوره شددر . حالبو که
ذنوبک هر بعضنی عفو ایدن هپسیده عفو ایدر .

ه . — (من) ایله (عن) بیننده کی فرقی ده ذکر و بیان ایتک
لابددر . شیطان علیه اللغه (ثم لا یتنبه من بین ایدیهم ومن خلفهم
وعن ايمانهم وعن شئائهم) دیدی .

بو قولده ایکی سؤال واردر .

(۱) نیچون برنجیسی ایله ایکنجیسی (من) و او چنجیسیله
دردنجیسی (عن) لفظنه تخصیص اولندی ؟

(۲) مادام که شیطان کړک (من) و کړک (عن) لفظلرینک
ایکیسنی ده ذکر ایلدی . یا نیچون استعاذه (من) لفظیله کلدی
یعنی نیچون «اعوذ بالله من الشیطان الرجیم» دنیلدی ده «عن
الشیطان» دنیلدی ؟

نوع رابع

از مباحث این باب

شیطان، لفظی شیطنتده مبالغه معناسنه در. — نصل که رحمن، رحمتده مبالغه معناسنه اولدینی کبی. — و شیطان حقنده «بر رحیم» فعیل بمعنی مفعولدر که مرجوم دیمکدر. نته کم حق باریده (رحیم) فعیل بمعنی فاعلدر.

شو کله، شیطان رجیدن رحمن رحیمه فراری اقتضا ایدر. و بوده ینهماده مساواتی مقتضیدر. ایشه حاشا «الله و ابلیس، اخویندر. شوقدر که (الله) اخ کریم، رحیم، و فاضلدر. ابلیس ایسه اخ لیئم، خسیس، مؤذی در بناء علیه عاقل اولان بواخ شیریدن اواخ خیره فرار والتجا ایدر دین ثویه نك منشاء قولى بودر.

ب. — (الله) رحیم و کریم میدر؟ ایمدی اگر رحیم، کریم ایسه یا نیچون شیطانی یار اتدی ده عباد اوزرینه مسلط ایتدی؟ و اگر رحیم کریم دکلسه کندینه رجوعا، و شر شیطاندن اکا استعاذه والتجاده نه فائده واردر؟

ج. — کوکلرده ملکدر «اعوذ بالله من الشیطان الرجیم»

دیرلرمی ؟ اگر ملکک دخی استعاده ایدیورلرسه، دیمک که کندی
نفسلرینک شرورندن استعاده ایدیورلر. یوقسه شرور شیطاندن
استعاده ایدیورلر.

د. — اهل جنت، جنتده «اعوذ بالله» دیرمی ؟

ه. — اینیا و صدیقین نچون «اعوذ بالله» دهرک شر
شیطاندن الله صغیرلر ؟ مع هذا که شیطان (فبغزتک لاغونهم
اجمعین الاعبادک منهم المخلصین) قولنده کندینک اینیا و صدیقته
تعلق اولمادیغنی اخبار ایتدی.

و. — شیطان (وماکان لی علیکم من سلطان الا ان
دعوتکم فاستجیت لی فلا تلوومونی ولوموا انفسکم) قولنده عباد
الله مجرد دعوتدن بشقه تعلق اولمادیغنی اخبار ایتدی. دیمک که
انسان کندی کندی بلایه القا ایدیور. بو تقدیرجه انسان
شر شیطاندن زیاده کنیدن استعاده ایتلدر. حال بویله ایکن
یانچون انسان استعاده ده اک مهم طرفی براقیورده اک ضعیف
طرفدن باشلايور ؟



تم الجزء الاول بعون الله عزوجل و بایه الجزء الثاني
فی ۱۴ جمادی الاخره ۱۳۰۲ وفی ۱۹ مارت ۱۳۰۱

والله الموفق والمرشد



خطا صواب جدولی

صواب	خطا	سطر	صحیفه
جمیل	جلیل	۱۰	۴
علی سبیل الاجمال	علی سبیلی الاجمالی	۵	۶
نعمه	نعمته	۴	۱۰
تجری	تجری	۱۶	۱۲
متخیزاتک	متخیزانک	۱۸	۱۲
احجار	اصجار	۲	۱۳
تخلیصک	تخلیصک	۱۷	۱۳
آفاتک	آفاقک	۱۹	۱۳
بر بحر	بی بحر	۴	۱۴
شو	سو	۱	۱۶
معاد	معاذ	۵	۱۶
.	اولان	۳	۱۸
ذوالجلالک	ذوالجلالک	۱۴	۱۸
بونوع	برنوع	۳	۲۱
بر منهج خاصی	منهج خاصی	۷	۲۱
سبیلهدر	سبیلیهدر	۱۷	۲۴
سبیلهدر	سبیلیهدر	۲	۲۵

صواب	خطا	سطر	صحیفه
تفسیر دیرکه	تفسیر درکه	۱۶	۳۸
طیرانندن	طریانندن	۶	۳۹
سیاحت	سیاحت	۵	۴۳
انتقال ایتمدکه	انتقال ایتدکه	۸	۴۳
معبرکه منبر وزننده	معبر، منبر وزننده	۱۷	۴۳
کلامه	کلهمه	۱۲	۴۴
براعت	براغت	۱۶	۴۴
حدوشنده	حدودنده	۶	۴۵
تخصیصی	تخصیص	۵	۶۰
مفروضدن	مفروضدن	۹	۶۵
تصفیق ید	تصفیق یر	۱۰	۶۹
جوهر نفسی	جوهر نفس	۱۳	۷۱
محرَقْ	محرَقْ	۱۹	۷۱
اصوات مقطعه	اصوات ومقطعه	۱۵	۷۲
بالفرض والتقدير	بالفرض والتحقیق	۱۶	۷۲
کلام نفسی	کلام نفس	۸	۷۳
اعتقادده	اعتقادده	۳	۷۵
مقدمین مذکور تینک	مقدمین مذکور تینک	۱۱	۷۶
حدوثیه	حدیثیه	۱۲	۸۳
تمیز بها	تمیز بها	۵	۸۵
حنث	حنث	۶	۹۰

صواب	خطا	سطر	صحیفه
قدیم نفسی	قدیم نفس	۱۷	۹۱
حرفدن	صرفدن	۵	۹۷
تبعض	تبعضی	۱۲	۱۰۵
اسند	استد	۱۸	۱۰۶
مسند اولور فقط	مسند فقط	۱	۱۰۷
کلمه در	کلمه در	۲	۱۰۸
نقی محض	نص محض	۱۱	۱۰۹
وحصل	وحاصل	۱۸	۱۰۹
لفظك	لفظنك	۱۵	۱۱۲
معتبر اولان	حقیر اولان	۱۵	۱۱۲
مبنی در	مبنی در	۵	۱۳۱
بیوردی	بیورءی	۱۶	۱۳۷
تعوذ	نعوذ	۱۵	۱۴۰
تعوذ	نعوذ	۸	۱۴۳
فائده سی	قاعده سی	۲	۱۴۴
که	کی	۵	۱۴۵
نقی	نفعی	۱۹	۱۴۵
ده کی	بی	۳	۱۴۶
ك	نك	۳	۱۴۶
مرجوم	مرقوم	۱۹	۱۵۰
طوتمق	طوتمتی	۱۳	۱۵۱

صواب	خطا	سطر	مصحفہ
اولمشدر	ایدلمشدر	۸	۱۵۲
مسموعی	مسموع	۱۳	۱۵۲
قرآنہ	قدآنہ	۲۱	۱۵۲
عالم اولدیغنی	عالم	۹	۱۵۴
اولدیغنی ده	اولندیغنی ده	۱۸	۱۵۴
اغات	اعاثت	۱	۱۶۰
اعانت	اغانت	۱	۱۶۰
تحصیلده ده	تحصیلده ده	۲۱	۱۶۰
قوله	قول	۱۳	۱۶۱
واصبروا	واصبرو	۱۴	۱۶۱
من عبادہ	ومن عبادہ	۱۵	۱۶۱
بناء علیہ ثابت اولدی که	بناء علیہ	۱۶	۱۶۲
موجد	موجب	۱۶	۱۶۲
مطلوب	مطلب	۶	۱۶۶
ارواح	اوراح	۱۰	۱۷۱
برامردر	برامر ایدر	۴	۱۷۳
صرف	حرف	۴	۱۷۴
اضربوه	اخر بوه	۸	۱۷۵
انی	آنی	۱۹	۱۷۶
(جاهلین) دن ده	(جاهلین) ده	۲۲	۱۷۶
اعوذ برب	اعوذ رب	۷	۱۷۸

صواب	خطا	سطر	صفحه
عائد	عائد	۳	۱۸۵
يتحيطه	يتحيطه	۶	۱۸۶
كرسى	كرس	۱۴	۱۸۷
جباله	جبابه	۲۰	۱۸۷
متمزق	متمزق	۱	۱۸۹
تعزيمه	تغريمه	۱۵	۱۸۹
تائب	تائب	۱۶	۱۸۹
عزيمته	غريمته	۲۲	۱۸۹
جدعك	جدعك	۲	۱۹۱
يرملائكهسى	يرملائكهسى	۲۲	۱۹۲
شخص معين	اشخاص معين	۴	۱۹۶
ناريه در	ناريه	۱	۱۹۶
حجيمته	حجيمت	۱	۱۹۷
يهدى	يهدى	۲۰	۱۹۸
واتبعوا	واتبعوا	۱۱	۱۹۹
وتمايل	وتمايل	۱۳	۱۹۹
حيب خدا	جيب خدا	۸	۲۰۱
دعاسنى	دعاسن	۱۶	۲۰۱
ليس شئ	ليس شر	۱۸	۲۰۱
وبكلمات الله	بكلمات الله	۱۹	۲۰۱
باشى	ياشى	۱۱	۲۰۲

صعینه	سطر	خطا	دواب
۲۰۴	۲۰	معناسنه کلیر	معناسنه ده کلیر
۲۰۶	۹	یخطبه	یخطبه
۲۰۸	۶	حلی	حلی
۲۰۸	۱۲	اهلی	اهل
۲۰۹	۳	جوابندن	جوابدن
۲۱۰	۱۳	قابنده	قابده
۲۱۲	۶	بالذاته	یا لذاته
۲۱۵	۹	ایمدی	ایشته
۲۱۶	۱۶	اولیویرسه	اولیویرسه
۲۱۷	۳	خارجنک	خارجینک
۲۱۷	۶	بیودیغی	بیوردیغی
۲۲۴	۶	طنوندن	طنوندن
۲۲۷	۱۴	اکلهسه	اکلاسه
۲۲۹	۱۰	حقنده	حقده
۲۳۱	۱۸	قراآنده	قراآنده
۲۳۳	۱۳	ظاهر	ظاهر
۲۳۳	۱۴	ان یمودکم بخمسه	ان یمودکم ربکم بخمسه
۲۳۴	۵	منقون	مفتون

فهرس سر قران

صفحه

۲ مقدمه مترجم

فصل اول

- ۶ سورة فاتحه نك متضمن اولدينى علومى مجملأ بيان ايدر .
 ۱۶ مسائل عقليه محضه .
 ۱۷ مسائل سمعيه .

فصل ثانى

- ۲۲ الفاظ قايلاه دن مسائل كثيره استنباطى ممكن اولديغنه
 دلالت ايدر بر مشرع اخرك تقديرى .
 ۲۴ بحثك دردنجى و بشنجى مرتبه سى .
 ۲۵ بحثك التجبى مرتبه سى .
 ۲۶ بحثك يدنجى سكرنجى طقوزنجى مرتبه لرى .

فصل ثالث

- ۲۷ اشو سورة جليله دن مسائل كثيره استنباطى ممكن
 اولديغنه دائر تقدير .

برنجی کتاب

(اعوذ بالله من الشيطان الرجيم) قولندن مستنبط اولان
علوم بیانده در.

برنجی کتابك قسم اولی

کلمه به متعلق مباحث ادبیه بیانده اولوب برقاج بابی مشتملدر

باب اول

صغیره	
۳۰	کلمه به و مجراً کلمه ده جاری اولان الفاظه متعلق مباحثك بیاننده اولوب برقاج مسئله یی مشتملدر .
	برنجی مسأله — اشتقاق .
۳۲	ایکنجی مسأله — کلمات ثلاثیه ده اشتقاق .
۳۲	اونچنجی مسأله — کلمه نك تفسیری .
۳۵	دردنجی مسأله — کلمه نك صورت اطلاق .
۳۶	بشنجی مسأله — کلمه نك صورت استعمال دیگرى .
۳۷	التنجی مسأله — قول .
۳۹	یدنجی مسأله — لغات .
۴۱	سکزنجی مسأله — لفظ .
۴۲	طقه زنجی مسأله — عباره .
۴۵	اوننجی مسأله — کلمه و کلام .
۴۷	اونبرنجی مسأله — » »

ضعیفه

- ۴۷ اون ایکنجی مسأله - کله وکلام
- ۴۷ اون اوچنجی مسأله - الفاظ مهمله و غیر مستعمله .
- ۴۸ اون دردنجی مسأله - اصوات مترکبه نك صورت تسمیه سی
- ۴۹ اون بشنجی مسأله - قولك صورت ترکیبی .
- ۴۹ اون التنجی مسأله - قولك مجازاً استعمالی .
- ۵۰ اون یدنجی مسأله - قال .
- ۵۰ اون سکرنجی مسأله - کلام نقسی .
- ۵۲ اون طقوزنجی مسأله - حدیث .
- ۵۴ یکرمنجی مسأله - نطق .
- ۵۴ یکر می برنجی مسأله - کله نك حد تعریفی بیاننده در .
- ۵۵ یکر می ایکنجی مسأله - لفظك مهممل و مستعمل اولدینی .
- ۵۶ یکر می اوچنجی و یکر می دردنجی مسأله - لفظ و معنا .
- ۵۷ یکر می بشنجی مسأله - تعریف کله .
- ۵۸ یکر می التنجی مسأله - قول معتزله .
- ۵۹ یکر می یدنجی مسأله - کله نك اصح تعریفی .
- ۵۹ یکر می سکرنجیدن اوتوز سکرنجی به یعنی اون مسأله ده الفاظك صورت دلالتی تعریف و تفصیل اولمشدر ،
- ۶۷ اوتوز طقوزنجی مسأله - معنی .
- ۶۷ قرقنجی مسأله - الفاظله تعریفلری ممکن اوله میان معانی .
- ۶۹ قرق برنجی مسأله - معانی به الفاظك وضعنده کی حکمت .
- ۷۰ قرق ایکنجی مسأله - کمال انسان .

صحیفه

- ۷۲ قرق او چنجی مسأله کلام لسانی .
- ۷۳ قرق دردنجی مسأله - اراده واعتقاد .
- ۷۵ قرق بشنجی مسأله - مدلولات لفظیه نك قسم مغایری .
- ۷۵ قرق التنجی مسأله - لغاتی بیله نك یولی .
- ۷۷ قرق یدنجی مسأله - لغاتك صورت انتقالی .
- ۷۸ قرق سكرنجی مسأله - الفاظك تواتری .
- ۷۹ قرق طقوزنجی مسأله - لغاتك روایت مستند اولسی .
- ۸۰ اللنجی مسأله - الفاظك معنالیینه دلالتی .

باب ثانی

- صوت و حروفدن مستنبط اولان مباحثه و صوت
و حروفك احكامنه دائر اولوب چند مسأله یی مشتملدر
- ۸۱ برنجی مسأله - صوت .
- ۸۳ ایکنجی مسأله - صوتك جسمیتی رد .
- ۸۴ اوچنجی مسأله - صوتك غیر مبصر اولسی .
- ۸۴ دردنجی مسأله - تموج هوا .
- ۸۵ بشنجی مسأله - تعریف حرف .
- « التنجی مسأله - حروفك تقسیمی .
- ۸۶ یدجیدن اونجی یه قدر اوچ مسأله ده حرفلرك حرکت
وسکونی وابعاضی واحوالی بیان اولنور .

صحنه

- ۸۸ اونجی مسأله - كلامك قديم اولماسى .
 ۹۰ اونبرنجى مسأله - كلام الله تعبيرينك على سبيل المجاز اولمى .
 ۹۲ اون ايكنجى مسأله - قولى حشوينك ردى .
 ۹۳ اون اوچنجى » - كراميلرك قول مردودى .
 ۹۳ اون دردنجى » - قرآن حقنده اشاعره نك جوابى .

باب ثالث

اسم وفعل وحرفه متعلق مباحث بياننده اولوب مسائل
 شتاي مشتملدر

- ۹۶ برنجى مسأله - كلمه نك تقسيماتى .
 ۹۷ ايكنجى » - نحو يونك فعل وحرف حقنده كى اقوالى .
 ۹۹ اوچنجى » - اسم .
 ۱۰۰ دردنجى » - كلمه نك تقسيمدن نوع ثاينك تقريرى .
 ۱۰۱ بشنجى » - اسمك تعريفى ،
 ۱۰۶ التنجى » - اسمك علاماتى .
 ۱۰۶ يدنجى » - فعلك تعريفاتى .
 ۱۱۳ سكرنجى » - كلمه نك معلوميت ومفهوميته كى حالى .
 ۱۱۳ طقوزنجى » - صيغه ماضى ايله تعين ايدن سؤال .

صعيفه

- ۱۱۴ اوننجي » - حرفك تعريف ديکری .
 ۱۱۵ اونبرنجي » - اسم وفعل وحرفدن ممکن اوله بيلان
 ترکیات .
 ۱۱۷ اون ايکنجي - جمله مرکبه .

باب رابع

اسمک کندی انواعه تقسیماتی

- ۱۱۹ تقسیم اول .
 ۱۲۰ تقسیم ثانی وثالث .
 ۱۲۲ تقسیم رابع .
 ۱۲۴ تقسیم خامس .

باب خامس

اسمای اجناس ایله اسمای مشتقه نک احکامی بیاننده در

- ۱۲۴ اسمای اجناسک احکامی .
 ۱۲۶ اسمای مشتقه نک احکامی .

باب سادس

اسمى معربه، مبنی به تقسیم ایلہ برابر بویکی قسمه متفرع اولان
احکام بیاننده اولوب مسائل شتایی مشتملدر

صغیفه

- ۱۲۷ برنجی مسأله - اعراب
۱۲۷ ایکنجی » - احوال مختلفه لفظیه .
۱۲۸ اوچنجی » - افعال وحروف .
» دردیجی » - اعرابك كلمه نك حرف اخیرینه وجوه
اختصاصی ،
۱۲۹ بشنجی » - اعراب نه در .
» التنجی » - حرفه متحرك وساكن دنیلسی مجازآدر .
یدنجی مسأله دن اون یدنجی مسأله یه قدر یوقدر
۱۳۰ اون سکرنجی مسأله - تعریف اعراب .
اون طقوزنجی مسأله دن یکر می دردیجی مسأله یه قدر
متروک .
۱۳۱ یکر می بشنجی مسأله - کلمه نك مضاف اولسی .
یکر می التنجی ویکر می یدنجی مسأله متروک .
۱۳۲ یکر می سکرنجی ویکر می طقوزنجی مسأله - استملک
اعرابی .

صعيفه

۱۳۳ اوتوزنجي مسأله - مرفوع، منصوب، مجروريتك اسبابي
اوتوز برنجي مسأله - مرفوعات .

برنجي كتابك ايكنجي قسمي

استعاذهيه متعلق مباحث ثقله وعقليه يي متضمن اولوب
چند بابي مشتملدر.

باب اول

- ۱۳۵ برنجي مسأله - وقت استعاذه .
۱۳۸ ايكنجي مسأله - استعاذه ايجون جمهورك حجتى .
۱۳۹ اوچنجي مسأله - قول فقها .
» دردنجي مسأله - استعاذهك صورت قرائتى .
۱۴۰ بشنجي مسأله - تعوذك لزوم تكررى .
۱۴۱ التنجي مسأله - جمله تعوذيه
۱۴۲ يدنجي مسأله - نمازده تعوذ .
۱۴۳ سكرنجي - قرآنك ترتيباً قرائتى .
۱۴۴ طقوزنجي واوننجي مسأله قرآنك جهراً قرائتنده تجويدك
لزومى وحروف متشابهاتك تلفظى حقنده .
۱۴۵ اون برنجي مسأله - لام مغلظه .
۱۴۶ اون ايكنجي مسأله - وجوه شاذه ايله قرائت قرآن
غير مجازدر

صغیره

۱۴۶ اون اوچنجی مسأله - قرآت مشهوره .

باب ثانی

جمله تعویذدن مستنبط اولان مباحث عقیده بیاننده در .

رکن اول

استعاذه

۱۴۸ برنجی مسأله - جمله تعویذه نك بحسب اللغة تفسیری .

۱۵۳ ایکنجی مسأله - ماهیت استعاذهدن بحث عقلی .

۱۶۲ اوچنجی مسأله - مذهب اهل جبر ایله مذهب قدریه

کوره استعاذه نصل صحیح اوله بیلیر .

رکن ثانی

۱۷۰ مستعاذه .

رکن ثالث

۱۷۳ مستعید .

رکن رابع

۱۸۶ مستعاذه منه .

- ۱۸۶ برنجی مسأله - جن وشیاطین .
- ۱۹۸ ایکنجی مسأله - جن وشیاطینک وجودینه دلالت ایدن آیات قرآنیه و اخبار .
- ۲۰۳ اوچنجی مسأله جن آتشدن یرادلمشدر .
- ۲۰۴ دردنجی مسأله جنک وجه تسمیه سی .
- ۲۰۵ بشنجی مسأله - طوائف مکلفین .
- » التنجی مسأله - جنک بو اطن بشره نفوذی بحی .
- ۲۰۷ یدنجی مسأله - جن وشیاطینک تأکل و تشارب و توالد ایلدکلیینه دائر .
- ۲۰۷ سکزنجی مسأله - وسوسه .
- ۲۰۹ طقوزنجی مسأله - امام غزالیکنک وسوسه حقنده کی کلامنک تحقیقی مبین در .
- ۲۱۱ اوننجی مسأله - تحقیق الکلام فیما ذکره الغزالی .
- ۲۱۸ اونبرنجی مسأله - حروف وکلمات مسعوعیه تخیلده جمهور فلاسفه نك قولی .
- ۲۲۱ اون ایکنجی مسأله - شیاطینک احوال فوق العاده یه قدرتی اولوب اولدیغی بحی .
- ۲۲۳ اون اوچنجی مسأله - جن غیبی بیلیرمی .

رکن خامس

- ۲۲۵ باعث استعاذه اولان مطالب .

باب ثالث

جمله تعویذہ دن مستنبط اولان لطائف بیانندہ در

معنی

- ۲۲۸ برنجی نکتہ - اعوذ باللہ قول شریفک معناسی
- ۲۲۹ ایکنجی نکتہ - قول مذکور ایلہ نفسک عجز وافتقاری
وخالقک قوت و اقتداری مطلوبدر
- ۲۳۰ اوچنجی نکتہ - طاعنہ اقدام استعاذہ ایلہ اولور.
- ۲۳۱ دردنجی نکتہ - استعاذہ نک سری.
- ۲۳۲ بشنجی نکتہ - شیطان.
- » التنجی نکتہ - استعاذہ ایلہ طہور حصولی.
- ۲۳۳ یدنجی نکتہ - استعاذہ نک قلب ولسان ایلہ اجراسی
- ۲۳۴ سکزنجی نکتہ - قلب مؤمن.
- ۲۳۷ طقوزنجی نکتہ - استعاذہ ایچون ایقاظ.
- ۲۳۸ اوننجی نکتہ - انسان.
- ۲۳۹ اون برنجی نکتہ - اعوذ باللہ قولک تفصیلی.
- ۲۴۰ اون ایکنجی نکتہ - عبدک استعاذہ سندن مقصد.
- ۲۴۰ اون اوچنجی نکتہ - استعاذہ ده صفت.
- ۲۴۱ اون دردنجی نکتہ - جمله تعویذہ اسم شیطانک سبب
ذکری.
- ۲۴۲ اون بشنجی نکتہ - الشیطان.

صغينه

- ۲۴۳ اون التنجي نكته — شيطانك معناسى .
- ۲۴۴ اون يدنجي نكته — قرايت قرآندن اول لزوم تعوذ .
- ۲۴۵ اون سكرنجي واون طقوزنجي نكته لر — شيطاندن اجتناب و جناب حقه التجا ايدلسى حقنده در .


باب رابع

اعوذ بالله من الشيطان الرجيم، قولنه ملحق اولان
مسائل بياننده در

- ۲۴۶ برنجي مسأله — اعوذ بالله ديمكه بالله اعوذ ديمكه
بيننده كي فرق .
- ۲۴۶ ايكنجي مسأله — اعوذ بالله قولنك معناسى .
- بالله ده كي (با) باي الصاق اولوب بونده برقاچ
مسأله واردر
- ۲۴۹ برنجي مسأله — بوبا قاچ صورته ياد اولنوز .
- ۲۴۹ ايكنجي مسأله — بالله ده كي باده بر فعلك لزوم اضمارى .
- ۲۵۰ اوچنجي مسأله — حذف ضميرك افصحتى .
- ۲۵۱ دردنجي مسأله — اشبو با حقنده سيويونه نك قولى .
- ۲۵۱ بسنجي مسأله — بانك انواعى

صفحہ

- ۲۵۲ التجی مسألہ — با حقندہ امام شافعیؒ قوی .
- ۲۵۳ یدنجی مسألہ — با حقندہ امام اعظم ابوحنیفہؒ قوی
- ۲۵۷ مباحث حرف جر .
- ۲۵۹ شیطان حقندہ کی اقوال مختلفہ .



سِرِّ قُرْآن

فَحْرِزِ الْإِسْلَامِ
مُتَرْجِمًا

مترجمی

سِرِّ کُرْدِی

والی ولایت انقره

جزء ثانی

باشلیجه صاتیلان محل باب عالی جاده سنده آراکل افندینک ۴۶
نومرولی کتابخانه سیدر

معارف نظارت جلیله سنک رخصتیه طبع اولمشدر
رخصتنامه نومروسی ۴۶۱

استانبول

(س) شرکت مرتبیه مطبعه سی — باب عالی جاده سنده نومرو ۳۴

۱۳۰۳



بِسْمِ اللَّهِ الرَّحْمَنِ الرَّحِيمِ

سِرِّ قُرْآنِ

کتاب ثانی

«بِسْمِ اللَّهِ الرَّحْمَنِ الرَّحِيمِ» ک مباحثی بیانده اولوب بر قانچ بابی شاملدر.

باب اول

مجرای مقدماتده جاری اولان مسائل بیاندهدر.

برنجی مسأله

«بِسْمِ اللَّهِ الرَّحْمَنِ الرَّحِيمِ» ده کی (با) نک بر مضموره متعلق اولدیغنی ما تقدمه بیان ایتمشدک.

بو مضمورك اسم اولمه سی ده، فعل اولمه سی ده محتملدر. وعلی کلا التقديرین بونک بای بسم اللهین متقدم اولمه سی ده، متأخر اولمه سی ده جائزدرکه بوحسابچه اقسامی درده وارر.

۱ — متقدم، فعل — ابدأ باسم الله.

٢ — متقدم، اسم — ابتداء الكلام باسم الله.

٣ — متأخر، فعل — باسم الله ابدأ.

٤ — متأخر، اسم — باسم الله ابتدائي.

بوراده دها ايكي شیدن بحث ايمك لازم كلير.

اسمك تقديمي مي تأخيري مي اولادر؟

بونلرك ايکيسي ده قرآن کریمده وارد اولمشدر.

(بسم الله مجراها ومرساها) قول کریمده تقديم، (اقرأ باسم ربك) قول شریفدهده تأخير بيورلمشدر.

بکا قالسه تقديم اولادر ديرم.

بونك اولويتنه وجوه آتیه دخی دلالت ايدر.

اولکيسي — الله تعالى قدیمدر. واجب الوجود لذاتهدر.

بناءً عليه وجود باری، وجود غیر اوزرینه سابقدر.

بالذات سابق اولان ايسه ذکردهده سبقه مستحقدر.

ایکنجیسی — الله تعالى (هو الاول والآخر) والله الامر

من قبل ومن بعد) بيورمشدر.

اوچنجیسی — ذکرده تقديمك تعظييده دخی زیادهدر.

دردنجیسی — الله تعالى (اياك نعبد) بيورمش. ايشته بوراده

فعل، اسمدن متأخردر. آنکچون (بسم الله ابتدئ) تقدیرنده

اولور.

بشنجیسی — پدرم شیخ ضیاءالدین عمردن «رضی الله عنه»

ایشتدم؛ دیر ایدی که:

شیخ « ابو القاسم الانصاری » دن مسوعم اولمشدر ؛ دیر
ایدی که :

استاذ « ابو القاسم القشیری » برکون شیخ « ابو سعید بن ابو
الحیر المینی » ایله برلشدیلر. قشیری، ابوسعیده دیمش که :
محققین، « مارأینا شیئاً الا و رأینا الله بعده » دیمشالر . یعنی
برشی کورمدک، آنک آردی صره الهی کورمیهلم .

شیخ ابوسعید دخی « بو، مریدلرک مقامی در . یوقسه محققلر
برشی کورمز لرکه، آندن اول الهی کورمش اولسونلر ! » یولنده
مقابله ایلدی .

بن بولامک تحقیقنده دیرم که :

مخلوقدن خالقه انتقال، برهان انی یه اشارتدر .

خالقندن مخلوقه نزول، برهان لمی یه اشارتدر .

برهان لمی ایسه معلومدرکه برهان انی دن اشرفدر .

بومادام که، ثابتدر . دیمک اولدی که، فعلی اضمار ایدن کیسه،

کندی فعلنی رؤیتدن، اسم الله ایله استعانه نك وجوبنی رؤیته
منتقل اولمش کی اولور .

وهر کی که اول — بسم الله دیرده ثانیاً — فعلی اضمار ایدرسه،

اوده الله نك استعانه نك وجوبنی کوررده آندن صکره استعانه
بالله ن کندی احواله نازل اولمش کی اولور .

ایکنجی مسأله

فعلک اضمارى می اولادر؟ اسمک اضمارى می؟

شیخ ابوبکر الرازی دیمش که :

(قرآن مینک نسق تلاوتی مضمرک (فعل) اولدیغنه دلالت ایدر. و بوفعل مضمر دخی امردن عبارتدر. زیرا بارى تعالى (ایک نعبد وایک نستعین) بیورمش که بو «قولوا ایک نعبد وایک نستعین» تقدیرندهدر.

ایشته بونک کبی «بسم الله الرحمن الرحيم» قولی دخی «قولوا بسم الله» تقدیرندهدر.

بکا قالیرسه بوبابده بر معترض حیقوب دیه بیلیرکه :

اسمک اضمارى اولادر !

زیرا بزکلام «بسم الله ابتداء کل شیء» تقدیرندهدر، دیدیکمز حالده بوسوزمز الله تعالانک ذاتنده جمیع حوادثک مبدئى، جمیع کائناتک خالقى اولمه سندن اخبار اولمش اولور. بونی قائل دیسون، دیمسور. بونی ذا کر، ذکر ایتسون ایتسون.

شو احتمال ایسه شبهه یوق که اولکنندن اولادر.

بوکلامک تامی «قولوا الحمد لله» می یوقسه یالکز «الحمد لله» می دیمک اولادر بختنده کله جکدر.

اوچنچى مسأله

جر، ايکى شيله حاصل اولور.

اولکيسى — حرف ايله،

«باسم» قولنده اولديغى کي.

ايکنجيسى — اضافته،

«باسم الله» قولنده کي لفظه اللهده واقع اولديغى کي.

«الرحمن الرحيم» قولنده کي جره کلنجه: بوجر، مجرد وصفک

اعرابده موصوفه تابعيتندن حاصل اولمشدر.

بوراده ذکره شايان برطاقم بختلر وار.

۱ — حروف جرك جري اقتضا ايتلرينه سبب ندر؟

۲ — اضافت نيچون جري اقتضا ايتدی؟

۳ — حرفک مى جري اقتضا ايتمه سی ده ها قوی در؟

اضافتک مى؟

۴ — اضافت، قاچ قسم اوزرينه واقع اولور؟

دیمشلرکه:

«اضافة الشيء الى نفسه» — شيئک کندينه اضافتی محالدر.

بو حالده اضافتک ايکى قسمی قاليرکه، برى — جز، وکل

بيننده، ديکرى — شئ ايله ذات شيئک خارج ومنفصلی بيننده

واقع اولان اضافتدن عبارتدر.

قسم اول — «باب حديد — و — خاتم ذهب» کي. زيرا

بومثالرده کي (باب) حديدک (خاتم) دخی ذهبک بعضيدرلر.

قسم ثانی - « غلام زید » قولك كی .
 زیرا بومثالدهده مضاف الیه، مضافه بالکلیه مغلیردر.
 نسب و اضافاتك اقسامنه کلنجه: بونلر ضبط و تعداددن خارج
 کی درلر.
 زیرا نسبك انواعی غیرمتناهی در.

دردنجی مسأله

اسمك بر شیئہ اسم اولهسی، اسمدن عبارت اولان لفظ
 مخصوص ایله مسمان عبارت اولان ذات مخصوصه یننده برنسبتدر.
 بونسبتك معناسی ده شو اولیورکه:
 ناس، اولفظ مخصوصی، بوذات مخصوصهیی معرف اولمق
 اوزره اصطلاح ایدی ویرمشلرده گویا « نهوقت، بزدن بولفظی
 ایشیدرسهکر، بیلش اولسکرکه، بزبولفظ ایله فلان معنایی اراده
 ایدیورز. » دیمشدر.
 ایمدی مادامکه، اسم ایله مسمی یننده شو نسبت حاصلدر.
 شبهه یوقکه اسمك مسمایه اضافتی ده صحیح اولور.
 ایشته اسمی، اللهه اضافتدن مراد بودر.

بشنجی مسأله

ابوعبید دیمشدرکه:

(بسم الله) قولنده اسمك ذكرى صله زائده اولوب (بالله)
قال) تقدیرنده در.

لفظ اسمك ذكرى ده مجرد، یا تبرک ایچوندر. یا خود بینه
وبین القسم فرق اولسون ایچوندر.
بن دیرم که:

«بسم الله» قولندن مراد، «ابدؤا بسم الله» — یعنی نام خدا
ایله باشلا یکنز! — دیمک اولوب ابو عیدک کلامی ضعیفدر.
زیرا بز وقتا که، ابتدا ایله امر اولندق. بو امر، افعالمزدن
یالکنز بر فعله شامل اولور که، او فعل دخی لفظمز وقولمزدن
عبارتدر.

بناءً علیه مراد، «ابدأ بذكر الله» اولمق لازم کلیر که مراد
«ابدأ بسم الله» در.

بونده کی فائده زائده شو اولیور که:

«ذات الله» اشرف ذوات اولدیغی کی «ذكر الله» ده اشرف
اذکاردر. (اسم الله) ده اشرف اسمادر. ونصل که، الله تعالی
وجودده جمیع ماسواسی اوزرینه سابق و متقدم ایسه، آنک
ذکرى ده کافه اذکاره، اسمى ده کافه اسمایه سابق و متقدم اولمق
لازم کلیر.

فعلى هذا التقدير محققدر که (اسم) لفظنده شو فوائد جلیله
حاصل اولور.

باب ثانی

قرائت و کتابتدن بولکله یه متعلق اولان مباحث بیانده در.

قرائته متعلق، مباحث چوقدر.

برنجی مسأله

اجماع علما واقع اولمشدرکه، (بسم) قولی اوزرینه وقف،
وقف ناقص در . وقف قیحددر . (بسم الله) یاخود (بسم الله
الرحمن) قولی اوزرینه وقف، وقف کافی در . وقف صحیح در .
(بسم الله الرحمن الرحیم) قولی اوزرینه وقف، وقف تام در .
معلوم اولسون که، وقف، مطلقا شو و جوه ثلاثه دن خالی
اولماز . یا وقف ناقص، یا وقف کافی، یاخود وقف کامل اولور .
ایمدی هر هانکی کلامک که، معناسی بنفسه منفهم اولیه: او
کلام اوزرینه واقع اولان وقف، وقف ناقص در . و هر هانکی
کلامک که، مفهوم المعانی اولمسيله برابر مابعدی ماقبلنه متعلق بولنه؛
او کلام اوزرینه واقع اولان وقف، وقف کافی در . و هر هانکی کلامک که
مابعدی منقطع اوله؛ او کلام اوزرینه واقع اولان وقف دخی وقف
تام در .

بوراده بریسی حیقوب دیه بیلیر که ؛

(الحمد لله رب العالمین) قولی کلام تام در . شو قدر وارکه،

(الرحمن الرحيم مالك) قولى ماقبلنه متعلق در . زیرا بوکلمات،
صفتدر لر . صفتلر ايسه موصوفاته تابعدر لر .

ايمدى اكر صفتى موصوفدن قطع ايله يالكزجه آنى بر آيت
قيلق جائز اولورسه، يا نيچون (بسم الله الرحمن) بر آيتدر .
(الرحيم) ده آيت ثانيه در ديمديلر ؟

اكر بو، جائز اولمازسه، يا نصل اولمشكه، (الرحمن الرحيم) ي
بر آيت مستقله قيلديلر ؟
ايشته بواشكاله جواب ويرمك لازم كلير .

ايكنجى مسأله

(بسم الله) و (الحمد لله) قوللرنده لامك تغليظنى تركده
قرا متفقدر .

بونكده سببي شودر كه :

كسرده دن لام مفتحه يه انتقال، ثقيلدر . زیرا كسره، تسفلى
ايجاب ايدر . لام مفتحه ايسه مستعلى بر حرفدر . حال بوكه
تسفلدن تصعده انتقال، ثقيلدر .

لفظه جلاده كي لامك تفخيم وتغليظنى، يالكز حالت رفع
ونصبده استحسان ايتملردر .

(الله لطيف بعباده) و (قل هو الله احد) و (ان الله اشترى
من المؤمنين انفسهم) اقوال كريمه سنده واقع اولدينى كى .

اوچنجی مسأله

دیمشکر که :

شو تفخیمدن مقصود اوچ امر در .

اولکیسی - لفظه الله ایه (لات) لفظی ذکرده فرق ایتمکدر
ایکنجیسی - تفخیم، مشعر تعظیم در . لفظه جلال دخی
تعظیمده مبالغهیه مستحقدر .

اوچنجیسی - لام رقیقه یالکز طرف لسان ایه مذکور اولور .
اما لام مغالظه مجموع لسان ایه ذکر اولور . آنکچون لام مغالظه یی
تلفظده عمل دها زیاده در . بوسیدن ناشی ثوابدهده آنک دخی
زیاده اولمق لازم کلیر .

کذلک تور اتده (یاموسی ! اجبر بک بكل قلبک) بیورلمشدر
ایشته بومقامدهده انسان مولاسنی مجموع لسانیه ذکر ایتمش
اولور که، بو، مجموع جنانیلهده ذکر ایتمیکنه دلالت ایدر . آنک
ایچون شبهه یوق که، شو تفخیمک تعظیمده دخی زیاده در .

دردنجی مسأله

بریسی دیه بیلیر که :

لام رقیقه نک، لام غلیظهیه نسبتی، دالک طایه، وسینک
صاده نسبتلری کی در .

زیرا (دال) یالکز طرف لسان ایله (طا) ایسه مجموع
لسان ایله ذکر اولنور .

کذلک (سین) طرف لسان ایله (صاد) ایسه مجموع لسان
ایله ذکر اولنور .

ایشته تبین ایتدی که، لام رقیقه نك لام غلیظه به نسبتی، دالک
طایه نسبتی کی در .

برده بز کوز مشزدر که، خلق (دال) برحرفدر . (طا)
دخی بشقه برحرفدر . کذلک (سین) برحرفدر . (صاد)
دخی حرف دیکردر . دیور .

بو حالده واجب اولان لام رقیقه بی بشقه، لام غلیظه یی ده
ینه بشقه برحرف اعتبار ایتلی ایدیلر . حال بو که ایتدیلر . مع هذا
یکدیگرندن آیرمق - یعنی بولام رقیقه در . شوده لام غلیظه در
دیمک لازم کلیر .

بشنجی مسأله

(الله) قولکده کی لامک تشدید ایددی اچوندور . زیرا
بونده ایکی لام، حاصل اولمشدر .

اولکیسی - لام تعریفدر که بو، سا کندر .

ایکنجیسی - لام الاصلدر که بو، متحرکدر .

حال بو که، ایستر کلمه واحده ده، ایستر سه کلمتین متعاقبتین ده

اولسون، جنس واحدن ایکی حرف التقا ایدوبده بونلرک

اولکیمی ساکن، وایکنجیسی متحرک اولورسه، حرف ساکن
حرف متحرکه ادغام اولنق ضروری در .

(فاربحت تجارتهم —و— ما بکم من نعمة، مالهم من الله) قول
کریمی کلمتین ده التقایدن حرفین مثلیک ادغامنه مثالدر .
(الله) لفظی ده، کلمه واحده ده برلشن حرفین مثلیک ادغامنه
مثالدر .

شوراسیده بیلغیدرکه، انف، لام، واو، یا حرفلری اکر
ساکن بولورلرسه، اجتماع مثلین ممتنع اوله جغندن ادغام دخی
ممتنع اولور .

اگر متحرک بولنوب ده بونکله برابر کلمه واحده ده مثلین
اوله رقی برلشیرلرسه، ادغام جائز اولور .

التنجی . مسأله

ارباب اشارات و مجاهدات، بویابده بر دقیقه بیان بیورمشلر .
دیمشلر که :

لفظة المهدده لام تعریف ایله لام الاصل مجتمع اولوب احدها
ثانییه ادغام اولندیغندن لام معرفه ساقط اولدی ده لام لفظه الله
باقی قالدی . بویاسه حضرت معروفه معرفت حاصل اولنجیه؛
معرفت ساقط وفانی و باطل اولورده معروف ازلی کماکان زیاده سز
نقصانسز باقی قالیر اولدیغنه تنبیه کی در .

يدنجي مساله

(الله) قولمزدن لفظده الفك حذفى جائز دكلدر . فقط
 شعرده (الله) قولمز اوزرينه وقف، واقع اولورسه، اولوقت
 ضرورت شعر ايچون تجويز اولنور : شاعرك برى
 اقبل سيل جاء من عند الله
 يچود جود الجنة المغلة
 ديمش در .

بو بحث اوزرينه بعض مسائل شرعيه تفرع ايديور .
 شويلاه كه :

۱ — بر كيمسه عند الحلف (بله) ديسه، يمىنى منعقد اولورمى
 اولمازمى ؟

كيمي ديمش كه :

خير ! زيرا (بله) قولى رطوبتك اسمى در . بناءً عليه
 آنكه يمين منعقد اولماز .
 بشقه لرى ديمشار كه :

(بله) قوليله يمين منعقد اولور ! زيرا معنای اصلی لغوی
 حسیله (بله) ديمك جائزدر . (بله) دين كيمسه ايسه، بولفظ ايله
 حلف، قصد و نيت ايتمش اولنجه يمىنى منعقد اولمق لازم كلير [۱]

[۱] لكن عند الحنفيه يمينلر معانئ عرفيه اوزرينه ميندرلر . معانئ
 لغوية اصليه اوزرينه مبنى دكلدرلر . « للمترجم » .

۲ — لفظة اللهی عند الذبیحه بوصفت اوزره ذکر ایتک
صحیح اولورمی اولمازمی؟

۳ — (الله اکبر) یرینه (الله) دینلسه بونکله صلات
منعقد اولورمی اولمازمی؟

سکرنجی مسأله

بعض روایاته کوره قتیبه دن بشقه سی لفظة اللهی اماله ایله
اوقوما مش در .

طقوزنجی مسأله

(الرحمن الرحیم) قولنده رانک تشیدی، لام تعریفی رایه
ادغام ایچوندر .

لام تعریفک ایسه هم لامه، همده دیکر اون اوچ حرفه لزوم
ادغامی حقنده بین القراء اختلاف یوقدر .

او، اون اوچ حرف شونلردر .

ص، ض، س، ش، د، ذ، ر، ز، ط، ظ، ت، ث، ن .

(التائبون العابدون الحامدون السائحون الراکعون الساجدون)

الآمرون بالمعروف والنساهون عن المنکر) قول کریمده واقع
اولدینی کبی .

شو ادغامده جوازک علت موجب سی قرب مخرجدر . زیرا

کرك لامك وكرك بالجملة حروف مذکوره نك مخرج لری طرف

لسان ايله اكا قریب اولان محلدز . بناءً علیه بو حرفلرك ادغامی بجا در .

بو اون اوچ حرفك ماعداسنده لام تعریفك عدم جواز ادغامی دخی كذلک بین القراء تحت اختلافده دكلدر .

(العابدون الحامدون الآمرون) قول كریمنده واقع اولدیغی کبی که بونده لام تعریفلرك هیچ بری ادغام اولغیوب جمله سی اظهار اولغش در .

مذکور اون اوچ حرفك ماعداسنده لام تعریفك ادغامی جائز اولماسی دخی بعد مخرجدن ناشیدر . زیرا حرف اولك مخرجی حرف ثانینك مخرجندن اوزاقلاشدیغنده ایکسیله دفعهً نطق، لسانه آغیر کلیر .

بناءً علیه ایکسندن هر برینك او برندن تمیزی لازمدر . مخرجلری یکدیگرینه قریب اولان حرفین ایسه اولیه دكلدر . زیرا بویله قریب المخرج اولان حرفلرك عند التلفظ یکدیگرندن فرق و تمیزی مشكلدر . کوچدر .

اوننجی مسأله

(الرحمن) لفظنك عدم اماله سنده علمای فن قرائت یكزبان وفاقدر .

اماله سنك جوازی خصوصنده نحو یونك ایکی قولی واردر . قول اول - (الرحمن) لفظنك اماله سی جائدر .

— احتمال که بو، سیدویهك قولى اوله ؛ علت جوازی ده
 الفدن صکره نونك انکساری در .
 قولثانی — امالهسی جائز اولماقدیرکه نحو یون عندنده اظهر
 اولان رأی بودر .

اون برنجی مسأله

(الرحمن الرحیم) ك اعرابی جر اولدینی تحت اتفاقده در .
 چونکه بویکی لفظ شریف، مجرور اولك صفتلریدرلر .
 شوقدر وارکه، بونلرده بحسب النحو رفع ونصب جائزدر .
 شویله که :

(بسم الله هو الرحمن الرحیم) تقدیرنده مرفوع اولور .
 (بسم الله اغنى الرحیم) تقدیرنده نصب اولنور .

نوع ثانی

خط و کتابته متعلق مباحث

برنجی مسأله

کتابتده (بسم الله) ك باسنی اوزاتمشلرده، (بسم الله) ك
غیری مواضعده اوزاتماشملر .

بونك فرقنده ایکی وجه بیان ایتشلردر .

وجه اول - بای بسم اللهدن صکره الف وصل، حذف
اولنجه، بایی اوزاتمشلر که، آنک طولی مابعدندن حذف اولنمش
اولان الفه دلالت ایتسون .

کورمز میسین که، کاتبلر (اقرأ باسم ربك) یازدقلری وقت،
بایی صفت اصلیه سی اوزره رد ایدر لر .

وجه ثانی - قیبی دیدی که، بای بسم اللهی تطویل ایتملری
مجرد، کتاب اللهی بر حرف معظم ایله استفتاح مقصدینه منبی در .
حتی (عمر بن عبدالعزیز) کاتبلرینه « کتاب اللهی تعظیماً
بسم الله شریفه نك باسنی تطویل، سیننی اظهار، مینی تدویر ایدکر »
دیه امر ایدر ایدی .

ایکنجی مسأله

اهل اشارت دیمش که :

(با) صورتده منحفض برحرف ایکن لفظة اللهك یازیسنه متصل اولنجه، کسب ارتفاع واستعلا ایلدی . آنکچون بزده اومارزکه، قلمز خدمت خدایه اتصال ایدنجه، دل سائمزك حالی مرتفع، شانی عالی اولور .

اوچنجی مسأله

اسمك الفی (بسم الله) قولندن حذف (اقرأ باسم ربك) قولنده اثبات ایتشله .

بونكده فرقی ایکی وجهندن کایر .

وجه اول - (بسم الله) کلمه سی اکثر اوقاتده، اکثر افعاله شروعده مذکور اولدیغیچون، لاجل التخفیف الی حذف ایتشله . مواضع سائر ایه بویله دکادر . زیرا مواضع سائرده واقع اولان اسم، قلیل الذکر در .

وجه ثانی - امام خلیل دیمشکه، (بسم الله) قولنده الف حذف اولندی . چونکه بوالفک اسم اوزرینه دخولی سین ساکنه ایله ابتدا غیر ممکن اولدیغیچوندر .

اسم اوزرینه (با) داخل اولنجه، بو (با) الفک نائی اولدی ده آنکچون الف، خطدن ساقط اولدی . (اقرأ باسم ربك) قولنده الفک عدم سقوطی ایه (بسم الله) ده اولدیغی کبی بوراده (با) الفه نیابت ایدمدیکچوندر . زیرا سن (اقرأ باسم ربك) دن (با) یی حذف ایتسه کده، یالکمز (اقرأ اسم

ربك) ديسهك، معنائك صحتته خلل كلز، اما (بسم الله) دن (با) يي
حذف ايتسهك، معنى بوزولور
ايشته فرق ميدانه چيقدى .

دردنجي مسأله

لفظة اللهى ايكي لام ايله (الذى) يي ايسه يالكز برلام ايله
يازمشلر . مع هذا كرك لفظه، و كرك السنه ناسده كثرث دورانده
ولزوم تعريفده ايكيسي ده مساوى درلر .
بونلردهكى فرق دخى برقاچ وجهدن كلير .
شويلاه كه :

- ۱ — (الله) قولمز اسم معربدر . اسمانك تصرفي كي
متصرفدر . آنكچون بونك كتابتنى اصلى اوزره ابقا ايتمشلر .
(الذى) قولمز ايسه مبنى در . چونكه ناقصدر .
زيرا صله يه مقرون اولماقجه برشى افاده ايتمز .
بناءً عليه (الذى) عادتا كلهنك بعضى كي در . كلهنك بعضى
ايسه معلومدر كه (مبنى) در . ايشته (الذى) يه نقصانى
بوسيدن ناشى وضع ايتمشلر . كورمز ميسين كه (اللذان) قولنى
ايكي لام ايله يازمشلر . چونكه تننيه حالى آنى حروفه مشابهدن
چيقارمش در . زيرا معلومدر كه (حرف) تننيه قبول ايتمز .
- ۲ — (الله) قولمز يالكز برلام ايله يازلسه (اله) قوايله
ملتبس اولور . (الذى) قولنده ايسه بوالتياس غير حاصلدر .

۳ — لفظده ذکر اللهك تفخیمی واجب اولدینی کبی
خطدهده واجیدر . حذف ایسه تفخیمه منافی در . واما (الذی)
قولمک معناه تفخیمی مشعر اولدینی جهتله خطدهده تفخیمی
ترك ایتشلر در .

بشچی مسأله

خطده (الله) قولمزدن قبل الها تلفظ اولنان الفی حذف
ایتملی — یعنی لفظه جلالک آخرنده کی هادن اول برده الف
یازماملری مجرد، صورتده متشابه اولان حروفک عند الکتابه
اجتماعی کریه کوردکار یچوندیر . و بوده لفظده متماثل اولان
حروفک عند القرائه اجتماعی کریه کورملرینک مثلی در .

التبجی مسأله

دیمشدر که :

(الله) قولمزدده اصل اولان (الآله) درکه بوالتی حرفلی
برکله در . وقتاکه بو (الآله) ی (الله) قولنه بدل قیلدیلر .
رسم خطده (همزه) ایله ایکی (لام) دن برده (ها) دن
عبارت اوله رق درت حرف قالدی . (همزه) اقضای حلقدن
(لام) طرف لساندن (ها) دخی کذلک اقضای حلقدن در .
بوایسه برحالت عجیبه اشاره در .

زیرا اقضای حلق حروف ایله تلفظک مبدئی در .

شویله که :

اقصای حلقدن طرف لسانه واصل اولنجیه قدر مخارج
حروف آزر آزر ترقیدن خالی قالماز ، آندن صکرده داخل
حلقده ، و محل روخده واقع اولان (ها) یه عودت ایلر .
کذلک عبد دخی حالت نکره وجهالت اولان حالت اولاسندن
باشلا یه رق تاوسع و طاقت بشریه مراتبنک آخرینه واصل ، و عالم
مکاشفات و انواره داخل اولنجیه قدر ، مقامات عبودیتده آزر آزر
ترقی ایلر . بعده بحر توحیدده فنایه منتهی اولنجیه ده کذلک آزر آزر
رجوعه باشلار که بو حالت شریفه « نهایت ، بدایته رجوع در . »
مضموتی مفید اولان (النهایه رجوع الی البدایه) سرینه رمز
و اشارتدیر .

یدنجی مسأله

(الرحمان) یازلیوب ده الفک حذفیه (الرحمن) یازلمه سی
مجرد علی سبیل التخفیف جائز اولوب ، مع هذا فی اثبات ایله
(الرحمان) دخی یازیله بیلیر .

فقط (الرحیم) دن یانک حذفی جائز دکلدیر .
زیرا (الرحمن) دن الفک حذفی کلمه خلل ویرمز و کلمه
التباس دخی حصوله کثیرمز . اما (الرحیم) دن یانک حذفی
آکا بکره مز . زیرا بو ، هم کلمه یی اخلاص ایدر . همده حصول
التباسه سبب اولور .

باب ثالث

اسمک مباحثی

اسمک مباحثی ایکی نوع در ..
 نوع اول - اسمته متعلق اولان مباحث نقلیه .
 نوع ثانی - اسمته متعلق اولان مباحث عقلیه .

نوع اول

مباحث نقلیه

برنجی مسأله

اسم، لفظنده ایکی لغت مشهوره واردر .
 عرب (هذا اسمته وسمته) دیر .
 شاعر « باسم الذی فی کل سورة سمته » دیمش .
 دینلدی که :

اسم، لفظنده شو ایکی لغتدن بشقه ایکی لغت ده وار . بری
 کسر سین ایله (سم) و دیگر ی - ضم سین ایله (سم) در .
 امام کسائی دیمش که :
 عرب بعضاً الفک کسریله (اسم) دیر . بعضاً دخی الفی

ضم ایدر. الفی طرح ایتدکلرنده الفک کسری لغتاری اقتضاسندن
اولانلر کسر سین ایله (سم) دیرلر. الفک ضمی لغتاری اقتضاسندن
اولانلر دخی ضم سین ایله (سم) دیرلر.
ثعلب، دیمش که :

اسم لفظک اصلنی (سمی یسمی) دن اعتبار ایدنلر همزه نك
کسر یله (اسم) وسینک کسر یله (سم) دیدیلر.
(سما یسمو) دن اعتبار ایدنلر دخی همزه نك ضمیله (اسم)
وسینک ضمیله (سم) دیدیلر.
مبرد دیمش که :

عربدن ایشتم، همزه نك کسر یله (اسمه) و ضمیله (اسمه)
وسینک کسر یله (اسمه) و ضمیله (سمه) و فتحیله (سماء) دیور.

ایکنجی مسأله

اسمک تصغیری - ضم سین^۱ فتح میم، تشدید یا ایله - (سمی)
وجعی (اسما) و (اسامی) در دیو اجماع علما واقع اولمشدر. [۱]

اوچنجی مسأله

اسمک اشتقاقده ایکی قول واردر.
قول اول - بصریونک قولیدر.

[۱] (اسما) اسمک جعی در. (اسامی) جمع الجمع در (قاموس).

بصريون، (اسم) علو و ظهور معناسنه اولان (سمالسمو) دن
 مشتقدر ديدكدن صكره « فاسم الشئ » ماعلاه حتى ظهر به ذلك
 الشئ (يولنده ماهيت اسمي تعريف ايتشلردر .
 بن ديرم كه :

لفظ ، معنائك معرفي در . برشيئك معرفي ايسه معلوميتده
 معرف اوزرينه متقدمدر . آنكچون (اسم) معنادن اوستون
 و متقدم اولق لازم كلير .

قول ثاني - كوفيونك قوليدر .
 كوفيون، اسم (وسم، يسم، سمة) دن مشتقدر . (سمة)
 ايسه علامت معناسنه اولديغندن (اسم) مسمائك علامت معرفه سي
 و نشاني كي اولمش اولور ديديلر .
 بصريونك حجتى شودر كه :

اسمك مأخذ اشتقاقى (سمة) اولسيدى، تصغيرى ده واوك
 ضمى، سينك فتحى يانك سكونيله - (وسم) وجمى (اوسام)
 كلمك لازم ايدى .

مادام كه تصغيرى (وسم) جمى (اوسام) دكل، (سمي)
 و (اسما) در . اسمك اصلى (سمة) دكل، (سمو) در .

دردنجي مسأله

اسمك (سمة) دن مشتق اولديغنه قائل اولانلر ديمشلكه :
 اسمك اصلى (وسم يسم) در . صكره (وسم) كله سندن

واو، حذف اولندی . و بو واو محذوفه بدل، الف وصل علاوه
قلنه رق (اسم) اولدی . (عدة) و (صفة) و (زنة) کله لری
کبی که بونلر کده اصلاری وعد، وصف، وزن، ایدی ده صکره
واولری اسقاط ایله کنیدیلرینه برر (ها) علاوه قلنه رق عدة،
صفة، زنة شکلنه کیردیلر .

(اسم) علو معناسنه اولان (سمو) دن مشتقد دینلرک
دخی بوبابده ایکی قولی واردر .
قول اول - اسمک اصلی (سما یسمو) و (سما یسمی) دندر .
وبونک امر، صیغه سی ده همزه نک و میمک ضمیمه (اسم) در .
(دعوت) کله سنک امر حاضر، صیغه سی اولان (ادع)
قولز کبی .

یاخود صیغه الامر ی همزه نک و میمک کسریله (اسم) در .
(رمیت) کله سنک امر حاضر صیغه سی اولان (ارم) کبی .
صکره شو (اسم) صیغه سنه وجنوه اعرابی ادخال ایدوب
آنی حد افعال دن چیقاردیلر ده همزه نک کسری، سینک، میمک
سکونلریله (اسم) دیدیلر .

بونلر شونی ده علاوه کفتار ایتشلر که :

بو، عربک بعیری (یعمل) تسمیه ایدیشلرینه بکزر [۱] .

[۱] بعیر دوه نک اسم جنسی در (یعمل) دخی اوپله در . (یعمله)

ناقۀ نجیبة مطبوعه ده دتیر .

« قاموس »

قول ثانی - اسمك اصلی (علو) معنای اولان (سمو) در.
 فقط (اسم) لفظی السنه ناسده کثیر الدوران اولدیغندن؛ بناءً
 علیه و او اوزرینه حرکاتک تعاقبی ثقیل کلدیگندن (واو) حذف
 اولندی. و او آرهدن قالقدیغی کبی (میم) کلمه نك صوك حرفی
 اولدی. و اوک حرکه سی آکا نقل اولندی. کله ده بری ساکن،
 دیگرى متحرك ایکی حرف قالدی. و وقتا که حرف اخیر ساکن
 تحريك اولندی. حصول اعتدال ایچون حرف متحرکی ده
 تسکینه لزوم کورندی. ایشته سینک تسکینی ده بو سببله حاصل
 اولدی. لغت عربیه ده ایسه حرف ساکن ایله ابتدا متعذرومحال
 اولدیغندن مجرد امکان ابتدا ایچون کلمه نك اولنه برده همزه
 کتیرلدی. (اسم) اولدی.
 امکان ابتدا ایچون دائماً اوائل کلماته همزه نك کتیرلمه سی ده،
 مجرد همزه، زائد حرفلردن اولدیغیچوندر.

نوع ثانی

مسائل عقلیه

اسمك حدی، اقسامی، انواعی بوكتابك اولنده بیان او.
لشیدی. بورادهده آکا متفرع بعض مسائل باقیه یی ذکر
ایده جکز.

برنجی مسأله

حشویه، کرامیه، اشعریه بالاتفاق دیمشکر که :

(اسم) مسمانك عینی، و تسمیه نك غیری در .

معترله دیمش که :

اسم، مسمانك غیری، و تسمیه نك عینی در .

بزم عندمزده رأی مختار بودر که (اسم) مسمانك ده، تسمیه .

نك ده غیری در .

بویابده کی دلائلی بیاندن اول بر مقدمه نك تقدیم و تمهیدینه

لنوم کورینور .

مقدمه

اسم، نفس مسمانیدر دکلیدر؟

اسمك نفس مسمی اولوب اولمادیغنه نظر اولنه یلك ایچون

اولا اسم ندر؟ مسمی نهیه دبرلر؟ بوراسنی آکلاملی یز.

شویله که :

اسم ایله مراد، اگر اصوات مقطعه و حروف مؤلفه دن عبارت اولان شو اسم، دیدیکمز لفظ ایسه، مسی ایله ده مراد، اگر ذات مسمانک عینی و حقیقی دیمک ایسه، (اسم) مسمانک غیری اولدیغنه علم ضروری حاصلدر. و بو حالده شو مسأله نك تدقیقه کیرشک عبث و بی لزومدر.

واگر اسم ایله مراد، مسمانک ذاتی - مسی ایله ده مراد ینه اوزاتک کندی ایسه. او حالده « اسم مسمانک عینی در » قولمز « ذات الشئ عین الشئ » کبی بر معنایی مفید اولور که بومعنی کرچه طوغریدر. فقط ایضاح و اضحات بایندن اولور که بوده عبثدر. ایشته شو ایضاحات ایله تین ایتدی که علی جمیع التقادیر بو بحثه کیرشک مجرای عبثه جاریدر.

ایکنجی مسأله

معلومک اولسون که بز « اسم، مسمانک عینی در. » دینلرک سوزی ایچون لطیف، دقیق برتاویل استخراج ایلدک. شویله که :

اسم، بر زمان معینه دلالت ایتیه رک یالکز بر معنایه دال اولان هر لفظک اسمیدر که (اسم) لفظی ده او یله در. یعنی (اسم) لفظی دخی ازمنه ثلاثه دن برینه مقارن اولمقسزین یالکز بر معنایه دلالت ایدیور. بناءً علیه لفظ اسم کندی نك ده یعنی اسمک ده

اسمی اولمق لازم کلیر . بوحالده (اسم) لفظی ده لفظ اسم ایله
مسمی اولمش اولور .

ایشته بوصورتده اسم، مسمانک عینی در .
بونده یالکز بر اشکال وارد در .
شویله که ؛

اسمک اسم مسمی اولمهی، اسم مضاف باینسنددر : احد
مضافینک ایسه مضاف آخره مغایر اولمهی لابد ولازمدر .

اوچنجی مسأله

اسمک نفس مسمی اولمهی غیر جائز ایدوکنی اثبات ایدن
دلائل بیاننده در .

بویابده برقاچوجه وارد در .

وجه اول - بعضا اسم، موجود - مسمی معدوم اولور .
زیرا بزم (المعدوم منفی) قولمز (سلب لاثبوتله) معناسنی
افاده ایدر . بونده ایسه الفاظ موجوددر . مع هذا بوالفاظك
مسماسی عدم محض، ونفی صرفدر .

بعضا دخی مسمی موجود، اسم ، معدوم اولور . اسمنی
معینه موضوعهسی اولیان حقائق کی .

وباجمله اسم وسمادن برینک عدمی حالنده او برینک ثبوتی
معلوم ومقرردر .

ایشته بوده اسم ایله مسمی ییننده مغایرتی ایجاب ایدر .

وجه ثانی - بعضا (اسما) متعدد (اسم) واحد اولور .
اسمای مترادفه کبی .

بعضا دخی (اسم) واحد (مسمیات) متعدد اولور . اسمای مشترکه کبی .
ایشته بوده اسم ایله مسمی یئینده . مغایرتی ایجاب ایدر .
وجه ثالث - اسمک اسم مسمی اوله سی ، مسمیانک ده اسم ایله
مسمی اوله سی اضافت بایندندر .
مالکیت و مملوکیته کبی .

احد مضافین ایسه مضاف آخره مغایردر .
بوراده بر معترض حیقوب دیه یلیرکه :
شئیک کندی کندی کندی بیلسی ایله شو استبدال ، دوچار
اشکال اولور چونکه بونده بیان ده بیان ده بر اولوب بیان ایله
بیان شی ارسنده مغایرت یوقدر .

وجه رابع - اسم دنیا لان شی مسمیاتی تعریف ایچون وضع اولنش
بر طاقم اصوات مقطعه در . او اصوات ایسه اعراض غیر باقیه در .
مع هذا کاد اولور که مسمی « باقی » و بلکه ده « واجب الوجود
لذاته » اولور .

وجه خامس - بز (آتش - قار) لفظ لرینی تلفظ ایتدی کمز
وقت ، شو ایکی لغت لسان مزده موجود در . دیمک اولدی که
(اسم) نفس مسمی اولسه ، بولفظ لری تلفظ ایدنجه ، السنه مزده
نار و تلج ، حاصل اولمی ایدی . بوکا ایسه قائل اوله حق بر عاقل
دکل ، بر ساده دل بولنماز .

وجه سادس - واجب تعالى (ولله الاسماء الحسنی فادعوه بها)
بیورمشدر.

حدیث شریف نبویه دخی الله تعالانك طقسان طقوز اسم
شریفی اولدینی بیان بیورلمشدر.

ایشته بونده (اسما) متعدد، و حال بوکه ذات باریدن عبارت
اولان (مسمی) واحددر.

وجه سابع - (بسم الله) و (تبارك اسم ربك) آیتلرنده مذکور
اولان اسمك الله تعالایه اضافتی اقتضا ایدر. حال بوکه (اضافه الشیء
الی نفسه) محالدر.

وجه ثامن - بز كرك (اسم الله) و كرك (اسم الاسم) و كركسه
(الله الله) قوللرمزك آرهلرنده ضروری بر ییوك فرق بولیورز.
ایشته بوده دلالت ایدرکه اسم مسمانك غیری در.

وجه تاسع - بز اسمایی « اسمای غریبه، اسمای فارسیه » دیه
وصف ایدیورز. (الله) بر اسم عربی در؛ (خدای) دخی
بر اسم فارسی در دیورز. ذات اقدس باری ایسه شبهه یوق که
بویله بشقه بشقه اولمقندن منزهدر.

وجه عاشر - خدای متعال (ولله الاسماء الحسنی فادعوه بها)
قول کریمنده کندینه اسمای حسناسیله خطاب ایتمه مزی بزه امر
بیورمشدر. دیمك اولورکه (اسم) آلت دعا در. مدعو دخی
جناب مولادر. ذات مدعو ایله، دعانك مابه الحصولی اولان لفظ
یئینده مغایرت اولدینی ایسه بالضروره معلومدر.

« اسم نفس مسما در » دین دخی بوجه آتی نص ایله، حکم
ایله احتجاج ایتمش در .

نصدن حجتی

« تبارك اسم ربك »

قولی کریمیدر . دیمش که :

متبارك و متعالی اولان، الله تعالی در . یوقسه صوت و حرفدن
عبارت اولان اسم دکلدر .

حکمدن حجتی

شودر که :

مثلا (زینب) نامنده برزوجه سی اولان کیسه، (زینب،
طالقدر) دیسه، اوخاتون اوزرینه طلاق واقع اولور .
حال بوکه (اسم) مسمانک غیری اولسه، اوکیسه طلاق امرئه
مرقومه نك غیری اوزرینه ایقاع ایتمش اولوردی ده زوجه سی اولان
(زینب) بوشامش اولمازدی .

نص ایله احتجاجنه جواب

شویله دنیله بیلیرکه :

حق تعالانک نقائص و آفاتدن منزله اولدیغنی اعتقاد ایتمه من
اوزریمزه نصل واجب و لازم ایسه، ذات و صفات مقدسه سی ایچون
موضوع اولان الفاظی ده عبثدن، رفتدن [۱] سوء ادبدن تنزیه
ایتمه من واجبدر دینلک نیچون جائز اولمسون ؟
[۱] رفت، عبث و زننده، فحش معنائنه در .

حکم ایله احتجاجنه جواب

(زینب . طالقدر) قولز — زینب، لفظیله معبر اولان —
یعنی زینب، دینیلن ذات، طالقدر معناسی مشعر اولدیغندن ایشته
سبب بودرکه اوخاتون اوزرینه طلاق، واقع اولور .

دردنجی مسأله

بزم عندمزده تسمیه، اسمک غیری در .
دلیلزده شودرکه :

(تسمیه) ذات معینهیی تعریف ایچون لفظ معینی تعییندن
عبارتدر . اوتعیننکده معناسی واضعک قصدی وارادهسی در .
اسمه کلنجه : اسم او لفظه معینهدن عبارتدر . بونلرک بینندهکی
فرق ایسه بالضروره معلومدر .

بشنجی مسأله

او معانییه دال اولان لفظلر، بعضیستک بعضی آخری ایله
ارتباطنه دلالت ایلیندیگر برطاقم الفاظک ذکرینی مستتبع اولور .
ایشته بوسبب ظاهر دن ناشیدرکه اسما وانعالمک وضعی، حروفک
وضعی سبق ایتمش اولق لازم کلیر . فاما اسما و افعالدن هانکیسی

اسبق واقدمدر؟ ديه صوريلورسه دیرزکه: اظهر اولان وضع اسماء،
 وضع افعال اوزرينه سابق ومتقدم اولمقدر .
 بوکاده برقاچ وجه دلالت ايدر .

وجه اول - اسم، ماهيته دلالت ایدن لفظدر . فعل ايسه
 اشيادن برشیده، وبرزمان معینده ماهيتک حصـولنه دال اولان
 لفظدر . بوصورتده (اسم) مفرد (فعل) مرکب اولمش اولور
 مفرد ايسه، ذات ورتبه جه مرکبدن ایلریدر . بناءً عليه مفردک
 ذکردهده، لفظدهده مرکبی سابق ومتقدم اولمسی لازم کلیر .

وجه ثانی - فعل، فاعله اسناد ایدلمدکجه، یالکز فعل ايله تلفظ
 ممتنعدر . اما فاعله دال اولان لفظ، آکا فعل اسناد ایدلمکسزینده
 تلفظ اولنه ییلیر .

ایشته بوسبیه مبنی درکه، (فاعل) فعلدن مستغنی در . فقط
 (فعل) فاعله محتاجدر . مستغنی ايسه رتبه جه محتاج اوزرينه
 سابق ومتقدمدر . بناءً عليه فاعلک ذکردهده فعل اوزرينه سابق
 ومتقدم اولمسی لازم کلیر .

وجه ثالث - اسمک اسم ايله ترکیبی بر ترکیب مفیددرکه بوده
 مبتدا ايله خبردن مرکب اولان جمله در . اما فاعلک فعل ايله ترکیبی
 البته مفید اولماز . بلکه جمله ده اسم، حاصل اولمادکجه اصلا مفید
 اوله ماز . ایشته بوندن معلومنز اولدی که اسم، بالرتبه فعلدن
 ایلریدر . بناءً عليه اسمک بحسب الوضع فعل اوزرينه حق تقدیمی
 واردر .

التنجی مسأله

معلومات اولمشدرکه، اسم بعضاً ماهیتک « من حیث هی هی »
اسمی اولور . بعضاًده اسم مشتق اولورکه بوده شئیک صفت فالانیه
ایله موصوف اولدیغنه دلالت ایدن اسمر .
عالم وقادر کی .

اظهر اولان بودرکه اسمای ماهیات بالرتبه مشتقات اوزرینه
مقدم وسابقدرلر . زیرا (ماهیات) مفرددرلر . (مشتقات)
مرکبدرلر . مفرد ایسه معلومدرکه رتبهجه مرکبدن ایلری در .

یدنجی مسأله

بکزرکه اسمای صفات، بانفسهاقائم اولان اسمای ذوات اوزرینه
بالرتبه مقدم وسابقدرلر .

زیرا بز (ذواتی) ینه او (ذوات) ایله قائم اولان صفات
واسطه سیله بیله بیلیرز . معرف ایسه قبل المعرف معلوم اولمق لازم
کلوب بناءً علیه شو معرفته کی سبق ذکردهده سبقه مناسبت
آلیرر .

سکرنجی مسأله

مسمیاده واقع اولان اسمک اقسامی بیانندهدر .

معلوم اولسونکه، اقسام اسماء طقوزدر .

اولیکسی - اسم ذات. اینجیسی - اجزای ذاتند بر جزء
حسیله شیء واقع اولان اسم .

مثلا، جداره (جسم و جوهر) دیشمز کبی .

اوچنجیسی - شیئ بذاته قائم اولان صفت حقیقه حسیله
واقع اولان اسم .

مثلا، برشیئه (شو ، اسوددر ، ایضدر . حاردر .
بارددر .) دیشمز کبی .

زیرا سواد و بیاض، حرارت و برودت، ذات موصوف ایله
قائم برر صفت حقیقه درکه، بوصفتلرک اشای خارجییه تعلقلری
یوقدر .

دردنجیسی - یالکر صفت اضافیه حسیله شیء واقع اولان
اسم .

مثلا برشیئه (شو ، معلومدر . مفهومدر . مذکوردر .
مالکدر . مملوکر .) دیشمز کبی .

بشنجیسی - حالت سلییه حسیله شیء واقع اولان اسم .
مثلا . برکیسه حقنده (او ، اعمادر . فقیردر .) برده (فلان
آفادن سالمدر . محافادن خالیدر .) دیشمز کبی .

التنجیسی - هم صفت حقیقه، همده صفت اضافیه حسیله
واقع اولان اسم .

مثلا ، برکیسهیه (او ، عالمدر . قادردر .) دیشمز کبی .
زیرا عندالجهور (علم) برصفت حقیقهدر . وبو صفت
حقیقه نك معلوماته اضافتی واردر .

(قدرت) دخی بر صفت حقیقه در که بونک ده مقدوراته
اضافتی واردر .

یدنجیسی - صفت حقیقه و سلیه حسیه واقع اولان اسم .
مثلا، قادردر . برشیدن عاجز دکلدر . علندر . بیلدیکی
برشی یوقدر . (قولزک مجموعنک مفهومی کبی .

سکزنجیسی - صفت سلیه و اضافیه حسیه واقع اولان اسم .
(الاول) لفظی کبی .

زیرا بولفظ، آتی الذکر ایکی امرک مجموعندن عبارتدر .
بری - غیرى اوزرینه سابق اولمسی که بو، صفت اضافیه در .
دیگری - کندینی بشقه سی سبق ایتامش اولمسی که بوده، صفت
سلیه در .

برده (القیوم) کبی .

زیرا بولفظ دخی « بنفسه قائمدر . غیرینی مقومدر »
معناسنی مفید اولوب ، شیدنک بنفسه قیامی ایسه، بشقه سنه محتاج
اولمادیغنی، و غیرینی تقویمی دخی غیرینک آکا محتاج بولندیغنی
مشعردر که اولکیسی سلب، وایکنجیسی اضافتدر .

طقوزنجیسی - صفت حقیقه و اضافیه و سلیه حسیه واقع اولان
اسمدر .

ایشته تقسیم اسماء حقنده سویلنن سوز بوندن عبارتدر .
اسم، کرك حق سبحانه و تعالی حضر تدرینک، و کرك اقسام محدثاتدن
اولان غیرینک اسمی اولسون؛ شو بیان ایتدیگمز اقسام اسمادن
خارج بر قسم دیگر بولنه ماز .

طقوزنجی مسأله

جناب حَقِّك بحسب ذاته المخصوصه براسمی وارمیدر؟

معلوم اولسون که بومسأله مهمهیه شروعدن مقدم، مباحث
آلهیه دن بعضی مقدمات عالیه نك تقدیمی لازم کلیر .

مقدمه اولی

محققدرکه واجب تعالانك ذات مخصوصه سی - صفات زائده دن
هیچ بر صفت منضم اولیه رق - ذوات مخلوقاته مخالفدر .
بونك دلیلی ده شودرکه :

ذات باری، سائر صفتلردن مع قطع النظر، هویت ذاتیه سی
اعتباریله، ذوات مخلوقاته یا مخالفدر، یا موافق و مساوی در .
احتمال اوله کورده، مدعا ثابت اولور .
احتمال ثانییه کورده ، ذات پا كنك ذوات سائرده مخالفتی،
لامحاله بر صفت زائده دن ناشی اولوق لازم کلیر .

ایمدی ذات بارینك، بینهماده مدار مخالفت اولان صفته
اختصاصی، البته بر امر آخرك یا ثبوتیه، یا عدم ثبوتیه اوله جقدر
شق ثانییه کورده، (جائز) لک . مرجحسز رجحانی لازم کلیر .
شق اوله کورده، او، امر آخرله اولان اختصاص، ینه
دیگر امر ایله اختصاصه متوقف اولوب، دلم جبراً، یا اختصاصاتك

تسلسلی و یا خود دور، لازم کلیر، حال بوکه دور و تسلسلک
ایکیسی ده محالدر .

دینیلیر سه که :

بزمده رأیمز بوندن عبارتدر .

بوده مخالفتک مابه الحصولی اولان صفتک صفت اخرایه خاص
اولمه سنی اقتضا ایدر . بوندن ده تسلسل لازم کلیر . تسلسل ایسه
محالدر .

مترجم حقیر دیر که :

الحاصل حق اولان، صفات زائده دن هیچ بر صفت، منضم
اولیه رق مجرد ذات مخصوصه الهیه سنک کندی مخلوقانه مخالف
اولمه سی در . « وهو المطلوب »

مقدمه ثانیه

بز دیرز که :

الله تعالی نه جسمدر ! نه جوهردر !

زیرا جسمیت و جوهریتی سلب، بر مفهوم سلبی در .

الله تعالی ذات مخصوصه سی ایسه بر امر ثابت در . سلب
و ثبوت، بیننده کی مغایرت دخی بالضروره معلومدر . كذلك
واجب تعالی و تقدس حضرتلرینک ذات مخصوصه سی نفس عالمیت
وقادریتدن ده عبارت دکلدر .

زیرا علیت و قدرت دن مفهوم اولان معانی مفهومات
اضافیه در . آنک ذات اقدس و اعلاسی ایسه، بر ذاتدرکه بنفسها
قائم در . بالنفس قائم اولان موجود ایله اعتبارات نسبیه و اضافیه
بیننده کی فرق دخی بالضروره معلومدر .

مقدمهٔ ثالثه

بزم شو و وقته جناب حقک ذات مخصوصه سنی بیله مدیکمزک
بیاننده در .

بوکاده بر قاج وجه دلالت ایدر .

وجه اول — بز کندی عقول و افهامزده مراجعتله معرفه الهی
تخص واستقصا ایتدیکمز وقت الله تعالانک یا موجود اولدیغنی،
یادوام وجودینی، یا اعتبارات سلبیه دن عبارت اولان صفات
جلالنی، و یا خود اعتبارات، اضافیه دن اولان صفات اکرامنی،
الحاصل شو امور اربعه دن یالکز برینی بوله بیلیرز .

مع هذا دلیل ایله ثابت اولمش که، حق تعالانک ذات مخصوصه سی
شو امور اربعه نک کافه سنه مغایر در .

زیرا ینه دلیل ایله تبیین ایتمش که، الله تعالانک حقیقتی وجودینک
غیری در . حقیقتی وجودینک غیری اولنجیه دوام وجودینه ده
مغایر اولمش اولور .

کذلک شوراسی ده تبیین ایتمش که، حقیقت خدا، حقیقت سلبیه نک ده
حقیقت اضافیه نک ده، غیری در .

مادام که، عند الخلق شو امور اربعه نك برندن ماعداسی معلوم دكلدر ! مادام که، بوامور اربعه نك ده حقيقت مخصوصه الهيه سنه مغايرتی تبين ايتمشد .

حقيقت مخصوصه الهيه سنه معلوم بشر اولماديني ثابت اولور .
وجه ثانی — استقراء تام، دلالت ايدر که، بزم برشیئی تصور ايتمه من ايچون آتی الذکر امور اربعه يوللرندن بشقه يول بولمه مزك امکاني يوقدر .

- ۱ — حواس خمسك بريله ادراك ايتديكمز اشيا .
- ۲ — ابدانمذك احوالنندن ادراك ايتديكمز احوال .
- الم، لذت، آچاق، صوسزلق، فرح، غم کي .
- ۳ — بحسب عقولنا ادراك ايتديكمز احوال .
- حقيقت وجود و عدمی، وحدتی، کثرتی، امکاني ييليشمز کي .
- ۴ — عقل و خيالک شو اوچ شيدن ادراك ايلديکي احوال .

ايشته بزم ايتمه من ومن حيث هي ادراك ايدمه ييله من ممکن اولان شيلر بونلردن عبارتدر .

مادام که بوده متين در . مادام که حقيقت الهيه نك شو اقسامه مغايرتی ده ثابتدر . تبين ايتدی که حقيقت خدا، معلوم بشر دكلدر .

وجه ثالث — اللهك حقيقت مخصوصه سي، صفات حقيقيه واضافيه وسليه دن اولان جميع لوازمك عاتي در . علت علم ايسه معلولی ده ييله سبب و علت اولوب، حال بو که واجب تعالانك

« لا اول له » قولمز صفت ثبوتیه میدر ؟ صفت عدمیه میدر ؟
بوراسی تحت اختلافده در .

کیمی دیمش که :

« لا اول له » قولمز عدم سابقی نفیه اشارتدر . نفی النفی
ایسه اثباتدر . بناءً علیه « لا اول له » قولمز کرچه بحسب اللفظ
(عدم) در . انحق حقیقتده (ثبوت) در .

کیمی دیمش که :

« لا اول له » قولمز مفهوم عدمی در .

زیرا بو، شیئك مسبوق بالعدم اولمه سنی نفی در .
(عدم) ایله (مسبوق بالعدم) بیننده ایسه فرق عظیم
واردر .

چونکه شیئك مسبوق بالعدم اولمه سی کیفیت ثبوتیه در .
بوصورتده « لا اول له » قولمز او کیفیت ثبوتیه بی سلب در .
بناءً علیه (لا اول له) قولمز مفهوم عدمی اولمش اولور .
اولکیلر بواسطه دلالة شو وجهله مقابله ایتشملر که :

الله تبارک وتعالی حضرتلرینک مسبوق بالعدم اولمی ، ا کر
ذات پاکي اوزرینه زائد بر کیفیت وجودیه اولسه یدی . او کیفیت
زائده حادث اولق لازم کلیردی ده بناءً علیه مسبوقه بالعدم اولمش
اولوردی .

آنک بویله اولمی ده صفت اخیری دیمک اوله جفی جهته
تسلسل لازم کلیردی . تسلسل ایسه محالدر .

الاسم الرابع

الابدی

بواسم، زمان مستقبل حسیله دوام افاده یدر .

الاسم الخامس

السرمدی

بولفظ، توالی و تعاقب معناسنه اولان (سرمد) دن مشتقدر .
 أشهر حرمك صفتته عليه الصلاة والسلام افدمن (واحد
 فرد وثلاثة سرد) بیور مشلرکه (سرمد) متعاقب ایله مفسر در .
 و چونکه زمانک بقاسی، اجزاسنک تعاقبی، وابعاضنک تلاحقی
 سببیه اولوب اوتعاقب و تلاحق دخی (سرمد) ایله مسمی بوئندیغندن
 بومعناده مبالغه افاده ایتک ایچون (سرمد) لفظنه بر میم زائده
 ادخال ایدی ویردیلرده (سرمد) دیدیلر .

بوراسی معنوم اولنجه دیرزکه :

(سرمد) یالکز اجزاسنک یکدیگری عقینده حادث و حاصل

اولان شیئه اطلاق اولنور .

ایشته لفظ سرمدده اصل اولان بودر .

شومعنانک حق باریده حصولی ایسه محالدر .

آنکچون جناب واجب الوجوده (سرمد) اطلاق علی

سبیل المجازدر . یوقسه حقیقت دکلدر .

بوراسی اکلاینجہ دیرز کہ :
 بز محدثاتک بر محدث وخالقه احتیاجنی بیلدیکمز وقت، الله
 تعالایی معرفت عرضیه ایله بیلش اولورز .
 بزم الان تقسمزدن نفی ایتدیکمز علم، سالف الذکر معرفت
 ذاتیه در .
 ایشته بودقیقه مهممیه لایقیله عطف نظر دقت ایتلیسین که
 غلط وخطاده واقع اولمیه سین .

مقدمه سابعه

معلوم اولسون که معرفت ذاتیه، تسمیه ایتدیکمز شو عرفان
 وادراک — شاهده ایکی وجه ایله واقع اولور .
 بری — علم و معرفت، و دیکری — ابصار و رؤیتدر . زیرا
 بز مثلا — سواد کورسهک، آندن صکره کوزمزی یومسهق
 حالتین (۱) بیننده بدیهی اوله رق بفرق بولیورز .
 ایشته بوندن معلوممز اولدی که بیلک بشقه در . کورمک
 بشقه در .

بوراسی معلومک اولدقدن صکره دیرز که :
 خلق ایچون معرفت ذاتیه نک امکان حصولی تقدیرنده
 عجبا اوعرفان وادراکک طریق حصولی بر میدر ؟ یوقسه شاهده
 بیلک و کورمک مثللو، معرفت وادراکک یوللری ایکیشدیکی کی
 (۱) حالت اغماض و رؤیت .

بونده ده طریق معرفت، متعدد می در . برده شاهدده کی صکی
طریق معرفت وادراك، عجباً یالکز ایکی یه می منحصر در ؟ یوقسه
بونده طرق کثیره و مراتب مختلفه می وارد ؟
شبهه یوق که بورالزینی قطع و جزمه، عقل قاصر انسان،
طریق امکان بوله ماز .

ایشته بو مقدماتده سویلنه جک سوز، بوندن عبارتدر .

اونجی مسأله

الله تعالانک بحسب ذاته المخصوصه بر اسمی وارمیدر یوقیدر ؟
قدمای فلاسفه دن بونک انکاری منقولدر .
دیمشکرکه :

جناب حقلک بحسب ذاته المخصوصه اسمی یوقدر .
بونک ده دلیل شودرکه :

اسم، وضعندن مراد، او اسمی ذکر ایله مستمایه رمز و اشارتدر .
دیمک اولورکه، الله تعالانک بحسب ذاته بر اسم شریفی اولسه
ایدی، او اسمک وضعندن ده مراد، آتی ذکر ایله مستمایی تعریف
اولق لازم کلیردی .

مادام که هیچ بر مخلوق، حقیقت خدای بیلیور ! و بوده
ثابتدر . او حقیقته رمز و اشارت ایچون اسم، وضعنده نه فائده
قالیر .

ایشته تبیین ایتدی که اسمک بونوعی مفقوددر .

فلاسفۂ مومی الیہم بوجہاہ سرد مقال ایہ اونوع اسمک
فقدانہ استدلال ایتدکن صکرہ شوراسنی دہ علاوہ کفتار
ایتملردرکہ : حقیقت مخصوصۂ الہیہنک براسم مخصوصی یوقدر
بلکہ جناب حقک لوازم معرفتی وارددرکہ اولوازم دخی شونلردر:
[جناب حق، برازی درکہ زائل اولماز . برواجبدرکہ عدم،]
قبول ایتمز .)

اللہ تعالیٰ و تقدس حضرتلرینک بعض مقرب، قوللرینی حقیقت
مخصوصۂ الہیہسنہ عارف و آگاہ قیلتاہ مشرف بیورمسی قدرتندن
خارج و تمتع دکلدرد دینلرہ کلنجہ : بونلر دخی « مادام کہ بو .
تحت قدرت خدادہدر . او حقیقت مخصوصہ یہ اسم، وضعی تمتع
و محال دکلدرد . » دیدیلر .
ایشتہ تین ایتدی کہ بومسألہ شو مقدمات سابقہ اوزرینہ مبنیدر .

اون برنجی مسأله

حقیقت مخصوصۂ الہیہ اسم، وضعی رھین امکان اولدینی
تقدیرده او اسم پاکک اعظم الاسما، آنک ذکریدہ اشرف الاذکار
اولدیغنه جزم و یقین حاصل اولمق لازم کلیر . زیرا علمک شرفی معلومک
شرفہ کوردهدر . ذکرک شرفی دہ مذکورک شرفہ تابعدر .
مادام کہ (ذات اللہ) معلومات و مذکوراتک اشرفیدر
(علم باللہ) اشرف العلوم (ذکر اللہ) اشرف الاذکار، او اسم
شریف دخی اشرف الاسما اولمق طبعیدر .

ایشته (اسم الله الاعظم) ديه السنه ناسده دوران ایدن کلام
 مشهور دده مراد بودر . وبالقرض بر ملک مقرب یا خود بر نبی
 مرسل ، او اسم الله الاعظمک معنای منیفی کنندینه تجلی ایتدیکی
 بر حالده آکاواقف اولی ویرسه ، جمیع عوالم جسمانیات و روحانیاتک
 کنندینه مطیع و منقاد اولسی بر امر بعید دکدر .

اون ایکنجی مسأله

الله تعالانک بر اسم اعظمی واردر دینلر دخی او اسم اعظمک
 هانکی اسم اولدیغنده اختلاف ایتمشلدر .
 کیمی دیدی که :
 اسم اعظم « ذوالجلال والاکرام » قولمزد .
 (الظوا بیاذاجلال والاکرام) حدیث عالسی ده بونک حقنده
 شرفوارد اولمشدر .

بکا قالیرسه بوقول ضعیفدر .
 زیرا (جلال) صفات سالییه (اکرام) دخی صفات
 اضافیه اشارتدر . حال بوکه حقیقت مخصوصه الهیه اولجده
 بیان ایتدی کمز وجهله سلوب و اضافاته مغایردر .

کیمی دیدی که :

اسم اعظم « حی و قیوم » قولمزد در .
چونکه علیه الصلاة والسلام اغندمن حضرت تری، ابی بن کعبه
« آیات قرآنیہ نك اعظمی هانکیسیدر؟ » ديه سؤال بیورمشلردی .
جناب ابی، دخی (الله لا اله الا هو الحی القیوم) در دیدی بونك
اوزرینه حضرت پیغمبر (لیهنك العلم بالمنذر) مقال تاطیف
اشتالیله ابی بن کعبك جوابی استخسان بیوردیلر .

بكا قالیرسه بوقولده ضعیفدر .
زیرا (حی) دراك وفعال اولاندر . بواسم ایسه کثرت
عظمتی مشعر دکلددر . چونکه (حی) صفتدر . (قیوم) دخی
مبالغه فی الایامدن عبارتدرکه واجب تعالانك بنفسه قائم، و غیرینی
مقوم اولهسی معناسنی مفیددر . واجب تعالانك بنفسه قائم اولهسی
ایسه مفهوم سابی درکه ذات اجل واعلاسنك غیریندن استغناسی
دیملکدر . غیرینی مقوم اولهسی ده صفت اضافیه در .
دیك اولورکه (قیوم) سلب و اضافتک مجموعنه دلالت ایدر
برلفظدر . آنکچون بوده اسم اعظم اوله ماز .

کیمی دیدی که :
اسماء اللهك کافهسی ده عظیمدر . مقدسدر . اسماء اللهدن یالکر
برینی اعظمیتله وصف جائز دکلددر . زیرا بووصف، ماعداسنك
تقصان ایله وصفی مقتضی در .

بكا قالیرسه اولکیلری کبی بوقولده ضعیفدر .

زیرا بالاده بیان ایتمش اولدیغمز وجهله اسماء، طقوز قسمه منقسم
اولوب بونلردنده ذات مخصوصه دال اولان (اسم) اعظم
واشرف اسماء اولق لازم کلیر . و بوده مادام که دلائل ایله ثابت
اولمشدر . آرتق آنی انکاره یول یوقدر .

کیی ده دیدی که :

اسم اعظم (الله) قولمدر .

ایشته بنجهده دها زیاده مقرون عقل و حکمت اولان رأی بودر
زیرا قریباً اقامه دلیل و برهان ایله اثبات ایده حکمز وجهله
(الله) اسم شریفی، حق باریده اسم علم مجراسنده جاری اولدیغندن
جناب حق ذات مخصوصه سینه دال اولمش اولور .

اون اوچنجی مسأله

معناك اجزای ماهیتندن بر جزء حسیله مستمایه دال اولان
اسمه کلنجه : حق باریده بودرلو بر اسم اثباتی محالدر .
زیرا بواسم، آتجق ماهیتی اجزادن مرکب اولان کیسه
حقنده تصور اولنه یلیر . بواسمه حق باریده محالدر . چونکه
هر مرکب، ترکبنده کندی جزئه محتاجدر . مرکب جزئی ایسه
مرکب غیری در [*] مادام که هر مرکب کنیدن غیرییه
محتاجدر .

[*] بن دیرم که مرکب جزئی، مرکب نه عینی در ! نه غیری در ! (للترجم)

مادام که کندیدن غیریه محتاج اولان هرشی (ممکن) در .
هر مرکب (ممکن لذاته) در .

بوصورتده « ممکن لذاته » اولیان شیئک مرکب اولهسی
ممتنع در . مرکب اولیان شیئک جزء ماهیتی حسیله اسمی اوله
بیلی ایسه کذلک ممتنع ومحالدر .

اون دردنجی مسأله

ذاته دال اولان اسم، حق باریده حاصلدر دکلیدر ؟ کړک
بوراسنی وکړک تاسک بوبایدکی اختلافنی بالاده بیان ایتشدک .
شیئک جزء ماهیتی حسیله کندینه دال اولان اسم کلنجه : بو
درلو اسمک حق باریده حصولی ممتنع ایدوکنده برهان قاطع، اقامه
البتشدک . بوحالده اسمک اقسام تسعهسندن یدیسى قالدى .

ایشته آنلریده برربرر موقع تدقیقه چکهکړک دیرزکه :
اسمک اقسام تسعهسندن بریده مسمانک ذات مخصوصهسیله
قائم اولان صفت حقیقه حسیله واقع اولان اسم دکلیدر ؟ اوله
ایسه مسمانک ذات مخصوصهسنه دلالت ایدن اوصفت حقیقه نهدن
عبارتدر ؟

اولا بوراسنی اکلايهلم.

مسمانک ذات مخصوصهسیله قائم اولان صفت حقیقه،
یا (وجود) دن عبارت ، ویا کیفیات وجوددن برکیفیت، ویاخود
وجودده، وجودک کیفیاتنده مغایر آخر برصفت اوله جقدرکه
بزده شو اقسام ثلاثه اوزرینه تفرع ایدن مسائلی باب آتی ده صردهسیله
بیان ایده جکز . « والله الهادی »

باب رابع

صفات حقیقیه دال اولان اسما بحثنده در

مسأله سالفه دن معلومك اولمشدركه، بوبحث اوج قسمه
منقسم اولور.

قسم اول

وجوده دلالت ایدن اسملردركه، برقاج مسأله ضمیمه بیان
اولنور.

برنجی مسأله

الله تعالیه (شی) دینلك جائز میدر؟
اکثر علماء، بواطلاقك جوازینه بالاتفاق قائل اولمش ! یالکز
(جهنم بن صفوان) عدم جوازینه ذهاب ایله جمهوره مخالفت
ایتمشدر.

جوازینه قائل اولان جهورك حجتلری

حجت

۱

ایشته (قل ای شیء اکبر شهادة قل الله) قول کریمی الله
ذوالجلاله (شی) دینلك جائز اولدیغنه دلالت ایدر.

شاید بر معترض چيقارده دیرسه که :

کلام اکر (قل الله) اوزرینه مقصور اولسهیدی، بودلیکنز
بجا اولوردی. لیکن امر اویله دکلدر. بلکه مذکور اولان (قل
الله شهید بینی وینکم) قول کریمدر. بوقول ایسه باشلی باشنه
برکلام مستقل اولوب، ماقبانه متعلق دکلدر. بو حالده الله تعالانک
اسم شی ايله مسمی اولمسی لازم کلز.
آکا شووجهله مقابله ایلرزه :

(ای شی اکبر شهادة) قول کریمنی (قل الله شهید بینی
وینکم) جمله جمیله سی تعقیب اتمکله شو جمله اخیره (ای شی
اکبر شهادة) قولندن جواب، مجرا سنده جاری، و بناء علیه باری
تعالایه (شی) دنیسی جائز اولمق لازم کلیر.

حجت

۲

الله تعالی (کل شی هالک الا وجهه) بیورمشدر.
بونده کی (وجه) ایلده مراد (ذات الله) در.
ذات پاک مولی ایسه، اکر (شی) اولمسه، آتی (کل شی هالک)
قولندن استثناء جائز اولماق لازم کلیردی.
ایشته شو استثنانک جوازی، الله تعالانک (شی) نامیله بنام
اولدیغنه دلالت ایدر.

حجت

۳

«عمران بن الحصین» دن مرویدر که رسالت پناه افتدمز (کان
الله ولم یکن شی غیره) بیورمشدر.

ایشته بو حدیث عالی دخی باری تعالیه (شی) دنیلدیکنه
دلالت ایدر.

حجت

۴

عبدالله الانصاری (فاروق) تسمیه ایتدیکی کتابده حضرت
عایشه دن «رضی الله عنها» نقل و روایت ایتمشدرکه: مشار الیها
رسول اکرم واعلم صلی الله علیه وسلم افندمن حضرت ترینک
(مامن شیء غیر من الله عزوجل) بیوردقلرینی ایشتمشدر.

شی «ما یصح ان یعلم و یخبر عنه» تعریف عزیزی ناطق
اولدینی اوزره یلنسی و کندیدن اخبار اولنسی صحیح اولان
موجوددن عمارتدر.

ایشته الله تعالانکده ذات اجل واعلاسی هم یلنک، همده
مخبر عنه اولق شاننددر.

بناءً علیه جناب باری یهده اسم شی، اطلاق اولنه یلیر.

عدم جوازیی ادعا ایدن جهمک احتجاجی

حجت

۱

حق سبحانه و تعالی حضرت تری (الله خالق کل شیء) برده
(وهو علی کل شیء قدیر) بیورمشدر.

مادامکه بو آیتلر، هر شیئک مخلوق و مقدور اولمه سنی اقتضا
ایدر.

مادام که الله تعالی نه مخلوق قدر . نه مقدور در . بودند استنتاج
اولنور که جناب باری عز اسمه (شی) دکلدر .
شاید کړك (الله خالق كل شیء) و کړك (وهو علی كل شیء قدير)
کلاماری برر کلام عام اولوب ، تخصیص آنلره صکرده دن داخل
اولمش دنیسه ، بوکا ایکی وجه ایله جواب ویریایر .
اولا - تخصیص ، خلاف الاصل در ، دلائل لفظیه بی تقریرده
ایسه بو قدری کفایت ایدر .

ثانیا - جواز تخصیص ده اصل اولان بودر که ، اهل عرف
(اکثر) کله سنی (کل) لفظی مقامنده استعمال ایدر لر .
بوسبیدن ناشیدر که عموماتده تخصیصک دخوانی بجویز ایدر لر .
شوقدر وار که (اکثر) ک مجرای کل ده اجرایی آنجق
حکمدن خارج ، حقیر ، قلیل القدر اولوب وجودی یوق حکمنده
طوتیلان ، و بناءً علیه باقیسنه حکم کل ایله حکم اولنان صورتده
جائز اولور .

ایشته شو ایضاح ایله تبیین ایتدی که تخصیصک جوازی حقیر
ودر جه دن ساقط اولان صورته منحصر در .
شوراسنی ده علاوه کفتار ایدر ز که :

الله تعالی (شی) نامیله مسمی اولسه ، اشیانک اعظم واجلی
او اولور . و آرتق ذکر اولنان آیتلرده تخصیصک جواز حصولی
کسب امتناع ایدر .
بناءً علیه فصل اولسه بوا دعای تخصیص ، محالدر دیه حکم ایتک
لازم کلیر .

حجت

۲

(ليس كمثله شيء وهو السميع البصير) آیت جلیله سنده
 الله تعالى و تقدس حضرت تباری کندی مثلنک مثلی شی دکلدر دیه
 حکم ایلدی . مع هذا شبهه یوق که هر شی کندی مثلنک مثلی در .
 مادام که مثل اللهک مثلی شی اولمادیغی بو آیت کریمه ایله تین
 ایتشدور . بوندن استنتاج اولنور که الله ذوالجلال (شی) دکلدر .

شاید دیر لسه که :

(کمله) ده کی کاف، کاف زائده در . کاف تشبیه دکلدر .
 دیرزکه، بسبالی بوسوزک مدلولی نره یه طوقندیغنه دقت
 اولنمور .

چونکه کلام اللهک هیچ بر حرفی لغو، عبث، باطل دکلدر .
 حال بوکه (کمله) ده اولان کاف، دخی کلام الله جمله سندنر .
 بناءً عایه بوکافه (حرف زائدر !) دیمک (لغو و عبث
 و باطل در !) دیمکه نتیجه ویررکه، بیانه حاجت اولمادیغی اوزره
 بوسوز بدیهی البطالاندر . و هر نه وقت؛ بو حرفک باطل وزائد
 اولمادیغی اعتراف ایلر سهک، بزم ده حجت مسروده مزک غایت
 قوت و کماله اولدیغی میدانه چیقار .

مادام که (شی) لفظی جلال و عظمت و مدح و ثناء صفتلرندن
 هیچ بر صفتی مفید دکلدر .

مادام که الله تعالیٰ اسمای حسنا می. بوصفتاری مفید اولمق لازم کلیر .

بوندن استنتاج اولنور که (شی) لفظی اسم الله دکلدر .

اسم شی، مدح و جلال، افاده ایتمز دیک . بویک ظاهر در .
زیرا (شی) لفظنک مفهومی ذره حقیره ایله اشرف اشیا بیننده
قدر مشترک اولوب بوحالده مفهوم مذکور، اشیانک اک
خسیسندهده حاصل اولمش اولور .

ایشته اسم شی، مدح و جلال، افاده ایتمز اولدیغنه بوبردیل
قطعی در .

برده اسماء الله، صفت مدح و جلاله دال اولمق لازم کلیر دیک
بوده طوغریدر .

زیرا جناب حق (ولله الاسماء الحسنی فادعوه بها وذروا الذین
یلحدون فی اسمائه) بیورمشدر .

ایشته بوآیت جلیلهدن استدلال واستنباط اولندیغنه کوره
استانک کوزللیکی، صفات حسننه رفیعنه و جلیلیه دال اولمارندن
بشقّه معنایه محمول دکلدر . دیمک اولور که، بویله برمعنایه دلالت
ایتمین اسم، اسمای حسنان معدود اوله ماز .

الله ذوالجلال، اسمای شریفه سنک اسمای حسنی اولدیغنی
بیاندن صکردهده، کندینه بو اسمای حسنی ایله خطاب ایتمه مری بزدامر
بیوردی . و بو امری ده (وذروا الذین یلحدون فی اسمائه) قول
کریمی تعقیب ایلدی . بوا یسه او اسمای حسنانک غیری اسمارله

جناب عزتہ خطاب ایدنلرک، اسماء اللہدہ الحاد ایتمش اولدقلرینہ
تنبیہ کبی در .

بناءً علیہ بو آیت کریمہ، عبدک خالق تعالیٰ یه مدح و جلال،
صفتلرینہ دلالت ایدن اسمای حسناتک غیرى اسملرله خطاب
ایتمسی صحیح و جائز اولمادیغنه دلالت قویه ایله دلالت ایدر .

ایشته شو ایکی مقدمه ثابت اولدینی وقت، مطلوبده حاصل
اولور .

حجت

۴

الله تعالیٰ یه (یا شیء !) دیه خطاب ایتدکلی نه حضرت
رسول الله صلی الله علیه وسلم افندمزدن، ونهده اصحاب کرامتک
هیچ برندن منقول و مروی دکلدیر .

همده الله تعالیٰ یه (شیء !) نصل دینیلیرکه، بونک قدر، مشعر
حقارت بر لفظ یوقدر . بو حالده عبدک الله تعالیٰ یه (شیء !) دیه
خطاب ایتسی نصل جائز اوله بیایر ؟

کرتک رسالتیناه افندمزدن، و کرتک آنک اصحاب کرامندن
منقول اولان بودرکه، آنلر اثنای مناجاتلرندہ (یا منشیء الاشیاء
یا منشیء الارض والسماء) دیرلردی .

معلومک اولسونکه بعض کیمسلر بوبحی بر نزاع معنوی
اولمق اوزره تاقی ایتمشلر . فقط آنلر بو ظن وتلقیلرندہ اصلاً
مصیب دکلدیرلر . زیرا جناب حقک « موجود » « ذات » « حقیقت »

اولديغنده نزاع يوقدر . نزاع يالكز كندينه (شى) لفظنك اطلاق
جائز اولوب اولماه سى بخشوده در . بو ايسه مجرد بر نزاع لفظى
اولوب، نزاع معنوى دكلدر . وبونك سبيله تكفير و تقسيق
جارى اولماز .

ايسته انسان، بو دقيقه يه واقف و آگاه اولملى كه غلط و خطاده
واقع اولسون .

ايكنجى مسأله

الله تعالىه (موجود) اطلاق اولنورمى ؟
بو بحثه كير شمزدن مقدم بر مقدمه نك تقديم و تهديدنه لزوم
كورينور .

مقدمه

(وجود) لفظى بالاشتراك ايكي معناده مستعملدر .

اولكىسى - (وجود) ايله (وجدان، ادراك، شعور) مراد
اولمقدركه هر نه وقت (وجود) ايله (وجدان و ادراك) مراد
اولورسه (موجود) ايله ده لامحاله (مدرک و مشعوربه) اراده
ايدلمش اولور .

ايكنجيسى - (وجود) ايله (فى نفسه حصول و تحقق) مراد
اولمقدر . بين الامرین ايسه فرق عظيم واردر .

زيرا واجب تعالانك اعيانده معلوم الحصول اولمى اول

باول فی نفسه حاصل اولسنه متوققدر . فقط عکسی اویله دکلدن
چونکه فی نفسه حاصل اولسی، اعیانده معلوم الحصول اولسنه
توقف ایتمز . زیرا هیچ برکیمه نك معلومی اولماقوله برابر فی
نفسه حاصل اولهسی متمتع دکلدن .

بوراده مهم بر بحث دهان وار !

شویله که :

(وجود) لفظی، عییاك اول (ادراك ووجدان) معناسنه می
وضع اولنمشده، شیئك فی نفسه حصولی معناسنه صکرده می نقل
ایدلشدن ؟ یوقسه امر بالعکس می در ؟ ویاخود ایکی معنایده
بردن می وضع اولنمش در .

ایشته بز بوبابدهده دیرزکه :

بو بحث بر بحث لفظی در . عقله قریب اولانیده احتمال
اولدر . زیرا انسانك او شیئه شعوری اولسه . (وجود) لفظی
شیئك فی نفسه حصولی معناسنه وضع ایتسه می ممکن اوله مازدی .

شومقدمه اکلانشنجه صدهده شروع ایله دیرزکه :

الله تعالیه (موجود) اطلاق ایکی وجه ایله اولور .

شویله که :

الله تعالیك هم معلوم، مشعوریه اولهسی، همده فی نفسه ثابت
ومتحقق بولنمسی حسبیله کندینه (موجود) اطلاق اولنور .
معلوم؛ مشعوریه اولهسی حسبیله الله تعالیه (موجود)
اطلاق قرآن کریمدهده کلشدر .

شویله که :

کتاب مجیده (لوجدوا الله) بیورلمشدر .
 بوراده کی لفظ وجود ایسه وجدان و عرفان معنانه در .
 اما فی نفسه ثابت و متحقق اولمه سی حسیله الله تعالیه (موجود)
 اطلاقی قرآنده غیر موجود در .

دیرلر سه که :

لفظ وجود ، (وجدان) معناسنی مشعر اولنجیه ، آنده ثبوت
 و تحقق معناسنک ده حصولی لازم کلیر .
 چونکه اگر عدم محض اولسه یدی : بویله اولمازدی .
 بو کاده شو جوابمز واردر .
 دیرزکه :

بو ، بر قول ضعیفدر .

چونکه اولاً - لفظ وجودده « وجدان و معرفت » معناسی
 حاصل اولقله ثبوت ، معناسنک ده حصولی لازم کلیر . زیرا مثبتدرکه
 (معدوم) دخی بعضاً (معلوم) اولور .
 ثانیاً - بز آنفا بیان ایتشدککه بوبحث ، مجرد بر بحث لفظی در .
 بناء علیه اسمک بر معناجه حاصل اولمه سندن دیگر معناجه ده
 حصولی لازم کلیر .

بعدازین دیرزکه :

الله تعالیه (موجود) اطلاقی اجماع مسلمین ایله ثابتدر .
 آنکچون جناب حقه (موجود) اطلاق اولندیغنه قائل اولدمز
 لازم کلیر .

بویابدهده دیرلر سه که :

« اسماء اللهك مدح و ثنایه دال اولملری واجبدر . » دین
سنر دکیسکز ؟ (موجود) لفظی ایسه، مدح و ثنا افاده ایتمز .

جواب ویزر زکه :

دالات اجماع ایله بودیلدن عدول ایلدک .

کذلک (موجود) لفظنک مدحه دالاتی (شی) لفظنک مدحه
دالاتندن اکثردر .

شویله که :

۱ — چوق کیسه لر موجوددهده، معدومهده (شی) دیرلر .
اما معدومه هیچ کیسه نك (موجود) دیدیکی یوقدر . بناء علیه
(موجود) لفظی (شی) دن زیاده مدحی مشعر اولغه لایق وروادر .

۲ — « معلوم » معناسنه اوله رق (موجود) لفظی مدح
و ثنا صفتی افاده ایدر . زیرا الله تعالی نك وجودینه، الیهینه،
دالات ایدن دلائل کثرتی سببیه، ذات اقدس واعلاسنک هر
کسه (معلوم) هر کسک عننده (وار) هر عقله کوره (واجب
الاقرار) کبی اولدیغی، بو (موجود) لفظی افاده ایدیور . بو
وجهدن طولانی دزکه، (موجود) لفظی مدح و ثنای مفید
اولور .

ایشته (موجود) ایله (شی) لفظلری بیننده اولان فرق کلی
ظاهر اولدی .

او چنجی مسأله

جناب باری به (ذات) اطلاق اولنور می :

عبدالله الانصاری الهروی (فاروق) تسمیه ایتدیکی کتابده
(ذات) لفظنه دلالت ایدر بر چوق خبرلر نقل و روایت
ایتمش در.

۱ — حضرت عایشه دن « رضی الله عنها » مرویدر ؛
دیمش که ، رسالتپناه افندمز حضرتلری (ان اعظم الناس اجراً
الوزير الصالح من امیر یطیعه فی ذات الله) بیورمش در.

۲ — ابو هریره دن « رضی الله عنه » مرویدر : دیمش که ،
اعلم الرسل افندمز (ان ابراهیم لم یکذب الا فی ثلاث ثمتین فی
ذات الله) بیورمش در .

۳ — کعب بن عجره پدرندن « رضی الله عنه » روایت
ایدوب دیمش که . رسالتپناه افندمز (لاتسبوا علیاً فانه کان مخشوشاً
فی ذات الله) بیورمش در . [ع]

۴ — ابو ذردن « رضی الله عنه » مرویدر ؛ دیمش که ،
« بنی اکرم صلی الله علیه و سلمدن — افضل جهاد ، هانکیسیدر ؟ —
دیه صورمشدم . جوابنده (ان مجاهد نفسك و هواك فی ذات الله)
بیوردیلر .

۵ — نعمان بن بشیردن مرویدر ؛ دیمش که ، جناب رسا .
لثأب افندمز (ان للشیطان مصادید و فحوخاً منها البطر بأنهم الله
[ع] مخشوش ، دخول — معناسنه اولان (خش) دن مشتقدر .

والفخر بعطاء الله والكبر على عباد الله واتباع الهوى في غير ذات الله
 بیوردیلر . [ط]
 بن دیرم که :

هرهانی شیده اموردن برامر، حاصل اولورسه، اوشیئه
 دال اولان لفظه نظر اولنور . اکر مذکر ایسه، آکا « ذو ذلک
 الامر » دینر . اکر مؤنث ایسه، آکاده « ذات ذلک الامر » دینر .
 دیمک اولورکه، بو (ذات) لفظی مجرد شونسبتی وشو
 اضافتک ثبوتنه دلالتی افاده ایچون وضع اولنمش در .
 بوراسی معلوم اولدقن صکرده دیرزکه :

شوصفتک برصفت ثانییه، آنک ده برصفت ثالثیه، — هکذا
 الی غیر النهایه — ثبوت وتحقیق محالدر . بلکه صفت مذکوره نک
 کیده کیده بنفسها قائم، ماهیتنده مستقل اولان حقیقت واحدهیه
 منتهی اولمه سی لایم لازمدرکه بوضورتده اوحقیقت واحده حقنده
 « شو صفتلرک ذاتی در ! » دینلک صادق اولور . بزم « ذات
 کذا وکذا » دیشمز دخی فی الحقیقه یالکر بنفسها قائم اولان او
 حقیقت واحده حقنده صادق اولور .

[ط] فحوخ، فانک فتحی وخای معجمه نک تشدیدیه اولان (فح) نک
 جعیدرکه قوش اولامغه مخصوص آلت صیدمعناسندهر . آغ، فق، طوزاق
 کبی . احتمالکه (فق) بوندن التشددر .
 (بطر) بالتحریک — سوینک . حیرت ودهشت . وتکبر معنالربنده
 کلیر .

(بطر) بالکسر — برشی عبث بره ضایع اولق وانکارایتک معنالربندهر .

ایشته سبب بودر که (ذات) لفظی اوحقیقت واحدهیه
 دال اولان لفظه مفرده کی قیلشار .

مادام که حق تعالی حضرتلری ذاتنده (قیوم) در . آکا
 (ذات) اطلاقی حقددر . بجادر .

انصاریء هر ویدن نقل ایتدی کمز خبرلره کلنجه : بوخبرلردن
 هیچ بری بومعنایه دلالت ایتمز .

زیرا بوخبرلرده مذکور اولان (ذات) لفظندن مراد،
 ماهیت وحقیقت خدا دکلددر . بونلرده کی (ذات) ایله مراد،
 رضوان اللهی طلبدن عبارتدر .

کورمز میسین که، حضرت پیغمبر علیه الصلاة والسلام افندمزه
 (لم یکنذب ابراهیم الا فی ثلاث نیتین فی ذات الله) حدیث عالیمسی
 « ای فی طلب مرضاة الله » یولنده تفسیر ایتمشلددر . اخبار سائرده
 مذکور اولان (ذات) لفظلریده بوقیلدنددر .

دردنجی مسأله

جناب حقّه (نفس) دینیرمی ؟

نفس، لفظی هم قرآن کریمده، هم احادیث نبویهده وارد
 اولمشدر .

کتاب مجیدک بریرنده (تعلم ما فی نفسی ولا اعلم ما فی نفسک)
 دیگر یرندهده (ویحذركم الله نفسه) بیورلمشدر .

لفظ نفسی مشتمل اولان احادیث نبویهده شونلرددر .

١ — حضرت عایشہؓ دن مرویدر : دیمش کہ، بروقت جنب رسول اللہؐ دہ او بیوہ قالمشدم . بر آراق او یانوب جناب رسالتاً بلرینی یاتمدہ بولہ مدم . اوتہ بری آراشدیر رکن الیم مبارک آیاق لرینہ ایلشمدی . مکر صلی اللہ علیہ وسلم افندمز سجده و ارمش لردہ (اللهم انی اعوذ برضاک من سخطک واعوذ بمعافاتک من عقوبتک واعوذ بک منك لا احصى ثناء علیک انت کما اثبتت علی نفسک) دعاسنی او قور لردی .

٢ — ابوہریرہؓ دن مرویدر کہ، صلی اللہ علیہ وسلم افندمز (یقول اللہ تعالیٰ انا مع عبدی حین یدکرنی فان ذکرنی فی نفسه ذکرته فی نفسی وان ذکرنی فی ملاء ذکرته فی ملاء خیر من ملأه وان تقرب منی شبراً تقربت منه ذراعاً وان تقرب منی ذراعاً تقربت منه باعاً وان جاءنی یمشی جئته اهرول) بیور مشلر .

٣ — ابو صالحؓ، یتہ جناب ابی ہریرہؓ دن نقلاً روایت ایتمش کہ، رسول اللہؐ صلی اللہ علیہ وسلم (لما خلق اللہ الخلق کتب فی کتابہ علی نفسه وهو مرفوع فوق العرش — ان رحمתי تغلب غضبی) بیور مشلر .

٤ — عبد اللہ بن مسعودؓ دن مرویدر کہ، خاتم الانبیاء صلی اللہ علیہ وسلم افندمز (لیس احد احب الیہ المدح من اللہ تعالیٰ ومن اجل ذلك مدح نفسه و لیس احد اغیر من اللہ تعالیٰ ومن اجل ذلك حرم الفواحش . و لیس احد احب الیہ العذر من اللہ تعالیٰ ومن اجل ذلك انزل الكتاب و ارسل الرسل) بیور مشلر .

۵ — حضرت عایشہ دن منقولدرکہ، جناب رسالتاب افندمنز
کندینسنہ تسبیح آتی الذکری تعلیم بیورمشلر .
(سبحان الله وبحمده عدد خلقه و مداد کلماته و رضی نفسه
وزنة عرشه .)

۶ — جناب ابی ذر، نبی اکرم و محترم صلی الله علیه وسلم
افندمنز دن نقل و روایت ایتمش کہ، « باری تعالی و تقدس حضرت تلمری
(حرمت الظلم علی نفسی وجعلته محرماً فلا تظالموا) بیورمشدر . »
بو خبرک تمامی مشهوردر .

۷ — ابن عمر، دیمش کہ « ان النبی صلی الله علیه وسلم قرأ
ذات يوم علی المنبر (و ما قدروا الله حق قدره) ثم اخذ یجمد الله
نفسه — انا الحیار، انا المتکبر، انا العزیز، انا الکریم — فرجف
برسول الله المنبر حتی خفنا سقوطه »

۸ — جناب ابی هریرہ، نبی آخر الزمان افندمنز دن نقلاً
دیمش کہ، آدم و موسی علیهما السلام عالم مغاده ملاقات ایتمشلر .
حضرت موسی، حضرت آدمہ « انت الذی اشقیت الناس
فاخرجتهم من الجنة » دیمش !! آدم علیه السلام دخی آکا « انت
الذی اصطفاک الله برسالته، و اصطنعک لنفسه، و انزل علیک
التوراة فهل وجدت کتبه علی، قبل ان یخلقنی » جوابی ویرمش .
رسالتپناه افندمنز مشار الیهمانک محاوردرینی بو وجهله بیان
بیوردقدن صکره (ففتح آدم موسی ثلاث مرات) بیورمشلر .

٩ — جابر بن «رضی اللہ عنہ» مرویدر: دیمشک، سید
الرسالہ افندمن حضرتلری (یقول اللہ هذا دین ارتضیتہ لنفسی
وان یصلحہ الا السخاء وحسن الخلق فاكرموه بهما) بیورمشلر.

١٠ — انس بن مالکدن منقولدرکہ قافلہ سالار انبیا افندمن
مولای متعالدن روایۃ (من اهان لی ولیاً فقد بارزنی بالمحاربة فلا
ابلی فی ای واد من الدنيا اهلكه واقذفه فی جهنم وماترددت فی
نفسی فی قضاء شیء اقضیتہ ترددی فی قبض عبیدی المؤمن یکره
الموت ولا بدمنه واكره مساءته) بیورمشلر.

١١ — عبد اللہدن مرویدر؛ دیمشک، نبی الرحمة افندمن
«برعبد یوق کہ کندینه هم وحزن، اصابت ایتدیکی زمان [اللهم
انی عبدک، وابن عبدک، وابن امتک، ناصیتی بیدک، ماض فی
حکمک، عدل فی قضاؤک؛ اسئلك بكل اسم هولک، سمیت به نفسك،
وانزلته فی کتابک، او علمته احداً من خلقک، او استأثرت به فی علم
الغیب عندک، ان تجعل القرآن ربيع قلبي، ونور صدري، وجلاء
حزني، وذهاب همي وغمي] دعاسنی او قوسونده اللہ تعالی آنک
هم وغمی کیدرمسون. و حزتی فرحه تبدیل ایتسون.»
بیورمشلر.

١٢ — ابوسعید الخدری دن «رضی اللہ عنہ» مرویدر:
دیمشک، نبی ذیشان افندمن (ان اللہ بعثی رحمة للعالمین وان

اکسر المعازف [۱] والاصنام واقسم ربی علی نفسه ان لا یشرب
عبد خمرًا ثم لم یتب الی الله منه الاسقاء الله تعالی من طینة الحبال
بیور مشلر.

بن ده یار رسول الله! طینة الحبال نه در؟ دیه صوردم. «صدید
اهل جهنم» در جوانی ویر مشلر. [۲]

شوراسی ده معلومک اولسون که، (نفس) شیتک ذاتندن،
حقیقتندن، هویتندن عبارتدر. یوقسه اجزادن مرکب اولار،
جسم دکلدر.

زیرا جسم، مرکبدر. هر مرکب ده ممکندر. هر ممکن ده محدثدر.
ترکیب وامکان وحدوث ایسه، حق بازیده محالدر. بناءً علی ذلك
(نفس) لفظی ذات و حقیقت وهویت. معانسه حمل ایتک لازم
کلیر.

بشنجی مسأله

جناب حقه (شخص) دینیری؟

سعید بن عبادہ روایت ایدوب دیش که، رسول الله صلی الله علیه
وسلم افندمز حضر تدری (لاشخص اغیر من الله ومن اجل غیرته
حرم الفواحش مظهر منها وما بطن، ولاشخص احب الیه العذر

[۱] معازف، طنبور و مزمار مثلوا الات لهو وطریه دینیر.

[۲] صدید، قان ایله قاریشق اولان ماء رقیق معانسه در.

من الله ومن اجل ذلك بعث المرسلين مبشرين ومنذرين، ولا شخص احب اليه المدح من الله) بيور مشلر.

بوراسی ده معلومك اولسونكه، شو حديث شريفده مذکور اولان (شخص) لفظندن مراد، تشخصی، حجمیتی اولان جسمدر ديمكه امكان يوقدر. بلكه بو (شخص) دن مراد (ذات مخصوصه) ونفسنده متعين اولوبده اوتعين، اعتباريله غيريسندن ممتاز اولان (حقيقت معينه) در.

التنجي مسأله

الله تعاليه (نور) اطلاق جائز ميدر؟

كتاب مجيده (الله نور السموات) بيورلش، بعض احاديث نبويه ده (نور) لفظی وارد اولمشدر.
مرويدرکه:

عبدالله بن عمر، (الشي من شقي في بطن امه) ديرايش!
بناء عليه بوسوزك اصلي كنديسندن صور مشلر. ديمشكه:
رسول الله صلى الله عليه وسلم افندمزي ايشتم (ان الله خلق الخلق في ظلمة ثم اتى عليهم من نوره فمن اصابه من ذلك النور شيء فقد اهتدى ومن اخطأ فقد ضل) بيورلردی.
آنکچون بن ده (جف القلم على علم الله) ديرم، جوابی ويرمشدر.

فقط شوراسی ده بیلایدیر که « الله تعالی و تقدس حضرتلری
بونوردندر ! یاخود بونورک جنسندندر ! » دیمک باطل و خطا در.
بونک بطلاننده برقاچ وجه دلالت ایدر.

وجه اول - (نور) یا جسمدر . یا جسمده واقع برکیفتدر.
جسم ایسه محددر . بناء علیه آنک کیفیاتی ده محدث اولمق
طبیعیدر. حال بوکه (آله) محدث اولمقدن عالی در.

وجه ثانی - نوره ظلمت، ضد اولور . حال بوکه (آله)
کندینک ضدی اولمقدن منزهدر .

وجه ثالث - نور، زائل و آفل اولور . الله تعالی ایسه زوال
وافولدن منزهدر.

یا (الله نور السموات والارض) آیت کریمه سننده مذکور
اولان نور نهدر ؟

بونکده جوابنده دیرزکه : بو آیت کریمه آیات متشابهاتدندر.
وبونک آیات متشابهاتدن اولدیغنه ده آنفاً ایراد ایتدیکمز دلایل
عقلیه دلالت ایدر.

کذلک حق تعالی شو آیتک عقینده (مثل نوره) بیوروب،
ملکک مالکنه اضافتی قیلندن اوله رق (نور) ی نفسنه مضاف
قیلیدی .

ایشته بوده دلالت ایدرکه، واجب تعالی و تقدس حضرتلری
ذاتنده نور دکادر . بلکه ذات اجل و اعلاسی خالق نوردر.
بوراده سویلنه جک ده ا برسوز وار.

شویله که :

یا الله تعالیه (نور) اطلاقک بجا اولمسنی مقتضی نهدر ؟
ایشته بوسؤالک جوابنده دیرزکه : بونده برقاچ وجه
واردر.

وجه اول — بعضیلری آیت کریمه بی الفسز (الله نور السموات
والارض) او قودیلر. ایشته بوقرائته کوره شبهه زائلدر.
وجه ثانی — الله تعالی حضرتلری انوارک منوری، مبدعی،
خالق در. ایشته بوتأویل سببیه خالق تعالیه (نور) اطلاق
بجادر.

وجه ثالث — مصالح عالم، امور دنیا و آخرت، جناب حقک
حکمت بالغه صمدانیه سیله نسقیافته حصول وانتظام اولور. بین
الناس ایسه ناظم مصالح، وساعی فی الخیرات اولانلره بیله بعضاً
(نور) دنیلدیکی واردر. شویله که : برکیمسه صفت مذکوره ایله
موصوف اولنجیه، آکا «فلان نور هذه البلد» دینیر.

وجه رابع — جناب مولی، اول ذات اقدس واعلادرکه
ایمان و هدایت و عرفان ایله عبادی اوزرینه تفضل بیورمشدر.
بوصفتلر ایسه انوار، جنسندندر. بوصفتلرک انوار، جنسندن
اولدیغنه قرآن مبینده، اخبار سید المرسلین ده دلالت ایدر.

قرآنک دلالتی

الله تعالی (نور) آیتک آخرنده (نور علی نور، یهدی الله
لنوره من یشاء) بیورمشدر.

اخبار نبویه ده شونلردر :

۱ — ابو امامة الباهلی نك، پیغمبر انور افندمزدن روایت ایتدیکی خبر معتبردر . رسالتناه افندمن حضر تلری (اتقوا فراسة المؤمن فأنه ينظر بنور الله) بیورمشدرکه مؤمنك فراستندن صاقینك !! زیر او، نور الله ایله نظر ایئر دیمکدر .

۲ — انس بن مالکدن مرویدر؛ دیمشکه، امام الهدی صلی الله علیه وسلم افندمن برکون « ناسک زیاده کیاستلوسی کیمدر بیلیر میسکز؟ » دیه صورمشلر .

حاضر بولسانلر دخی « الله ورسولی بیلیر. » جوابی ویرمشلر .

بونک اوزرینه اعلم الانیا افندمن « اعقل ناس، اولومی الحقوق تذکر وخطر ایدن، اولومه حاضرلغی زیاده کوزل اولاندر. » مألنده کی (اکثرهم للموت ذكراً واحسنهم له استعداداً) حدیث عالیه کشف راز بیورمشلر .

احباب کرام « یارسول الله ! بونک برعلامتی وارمیدر ؟ » دیه سؤال ایتشلر .

حضرت پیغمبر دخی (نعم، التجا فی عن دار الغرور، والانا به الى دار الخلود فاذا دخل النور فی القلب الفصح واتسع للاستعداد قبل نزول الموت) حدیث شریفیه علامتی بیان وایضاح بیورمشلر ۳ — ابن مسعوددن مرویدر؛ دیمشکه، جناب رسالتاب

افندمن برکون (افمن شرح الله صدره للاسلام فهو على نور من ربه)
آیت جلیله سنی تلاوت بیوردیلر . بنده « یارسول الله ! جناب حق
انسانک قلبنی فصل شرح ایلر ؟ » دیه صوردم . اعرف الانیا
افندمن (اذا دخل النور القلب انشرح وانفسح) مقال حکمت
مألیله اعطای جواب بیوردیلرکه ، نور الہی جلوہ کاهی اولان
قلب فسحتسرای الشراح اولور دیمکدر .

« یا بونک علامت ونشانی نہدر یارسول الله ! » دیه طلبکار
وضوح زائد اولنجہ (الانابة الى دار الخلود والتجا في عن دار الغرور
والتأهب للموت قبل نزول الموت) بیوردیلرکه ، بونک علامت
ونشانی دنیادن یوز چویروب آخرتی قارشیلایمق وحلول
موتدن مقدم اولومه حاضر لایمقدر دیمک اولور .

۴ — انس دن « رضی الله عنه » مرویدر : دیمش که ، حضرت
رسول اکرم صلی الله علیه وسلم برکون یولده کیدرکن « حارثة
صحابی » یه راست کلدیلر .

رسالتپناه افندمن صحابی مومالیہی تاطیفاً (کیف اصبحت
یا حارثة) بیوردیلر .

حارثة شو پرسش نوازش اثر حضرت پیغمبری یه جواباً
اصبحت مؤمناً حقاً دیدی .

حضرت پیغمبر (انظر ما تقول فان اكل حق حقيقة فاحقيقة
ایمانک) یولنده مقابله بیوردیلر . یعنی سونلیدیکنک سوزہ دقت

ایت ! زیرا هر حقك بر حقیقتی وارد ر . امدی حقیقت ایمانك
نهدر ؟

حارثه « عزفت نفسی عن الدنيا واسهرت لیلی واطمأت نهاری
وكانی انظر الى عرش ربی بارزاً وکانی انظر الى اهل الجنة يتزاوون
فيها والى اهل النار يتعاونون فيها » جوانی ویردی .

یعنی دنیادان یوز چویردم . کیجه می اویقوسز کوندزمی
صوسز کچیردم ! ریمك عرشنی پیش نظرمده کبی کوریورم !
کویا که جتده یکدیکرینی زبارت ایدر اولدقلری حالدہ اهل جنته
عطف نظر تماشا ایدیورم ! کویا که اهل جهنمك یکدیکریله عوعوه
لشدکارینی ایشیدیورم !

اعرف الانبیا افندمن (عرفت فالزم) بیوردیلرکه . بونطق
همایون جناب رسالتپناهی دخی حارثه نك بهرمدند معرفت ، اولدیغی
مبشر ، ومسلکنده مداوم وملازم اولمه سنی آمردر .

بعده سمت اصحابه عطف نظرله (من سره ان ينظر الى رجل
نورالله الايمان في قلبه فلينظر الى هذا) مقال بشارت مایله قدر
وشان حارثه بی اعلایبیوردیلرکه « نور ایمان ایله منور الجنان اولان
کیسه بی کورمکدن هرکیم کسب سرورایلرسه بوذاته نظر ایتسین ! »
دیمکدر .

بوصرمدده حارثه « یا رسول الله ! ادع الله لي بالشهادة » کلامیله
شرفند شهادت اولمسیحون جناب قاضی الحاجاته دعا بیورملرینی
حضرت پیغمبردن رجا ایلدی .

نبی ذیشان عمیم الاحسان افندمزده دعا بیوردیلر .

آرددن چوق کچمکسزین « یاخیل الله ! ارکبی » نداسیله
فرسان امت، جهاده دعوت اولندی .

اگ اول آتیه بین، اگ ایلری رزمکاهه سکردن جناب حارثه
ایدی که عاقبت، الله یولنده شهید اولدی .

۵ — ابن عباسدن مرویدر : دیمش که برکون نزدعالی
جناب رسالتناهیده اوطورییوردم . جانب فوقدن برصندای
سامعه نواز کلدی . درحال رسول الله افندمزک نظر لاهوتی اثرلری
سمت سمایه منعطف اولدی . آندن صکره حضاره متوجه اوله رق
بیوردیلر که :

« ابواب آسماندن شمدی برقپو آچلدی که هنوز آچلدیغی
یوق ایدی ! »

متعاقباً ابواب سعادتآبدن برملک حیقوب حضور پر نور
رسول الله نازل اولدی . و (یا محمد ابشر بخورین لم یؤتھما احد
من قبلك ، فاتحة ان کتاب و خواتیم سورة البقرة) دیهرک حضرت
پیغمبری آندن اول کیمسه نصیب ومیسر اولیان بویکی نورمین
ایله مژده لهدی .

۶ — یعلی بن منبهدن مرویدر .

دیمش که :

صلی الله علیه وسلم افندمز (یمر المؤمن علی الصراط یوم القیامة

فتناده النار جز غنى يا مؤمن فقد اطفاء نورك لهي (بيورديلر كه مؤمن، يوم قيامتده صراط اوزرندن كچركن، نار جهنم آكا ندا ايدرك ديركه : يانمدين چاپك كچ اى مؤمن ! زيرا سنك نورك بنم الهى سوندر ييور ! ديمكدر ،

۷ — نافع ، عبد الله بن عمر دن روايت ايدوب ،
دئمش كه :

نبى ذیشان افدمز (اللهم بك نصبح، وبك نمسي، وبك نحى وبك نموت، واليك النشور. اللهم اجعاني من افضل عبادك عندك حظاً ونصيباً في كل خير اوضر تكشفه، اوبلاء تدفعه، تقسمه اليوم من نور تهدي به اورحه تنشرها، اورزق تبسطه اوقتته تصرفها) دعاسنى اوقورلردى .

۸ — على بن ابى طالب عليه السلام دن مرويدر .
دئمش كه :

جناب رسالتآب افدمز اهل جنتدن صورلدى . آنلرده (اهل الجنة شعث رؤسهم، وسخة ثيابهم، لو قسم نور احدهم على اهل الارض لوسعهم .) جوانبى ويرمشر كه، اهل جنت، باشلرى توزلو طوپراقلى ! روبهلى كيرلى ! اولان شول بختياران امتدر كه برينك نورى اهالى روى زمينه تقسيم اولنه جق اولسه، جمله يي تنويره كفائيت ايلر ديمكدر .

۹ — ابوهريره دن مرويدر .

دیمش که :

صاحب شریعت افندمن حضرتلری (ان اهل الجنة كل اشعت
اغبر، ذی طمرین، اذا استأذنوا علی الامراء لم یؤذن لهم، و اذا
خطبوا النساء لم ینکحوا، و اذا قالوا لم ینصت لقولهم، حاجة احدهم
تتلجلج فی صدره، لو قسم نور دلی اهل الارض لوسعهم) بیورمشارکه،
اهل جنت، صاچلری قارمه قاریشق ! اوستلری باشلری توز،
طوپراقله بولاشق اولار، دائما اسکی بوسکی یامالی روبه کیینن !
امرا حضورینه کیرمک ایستسهلر رثاات هیئتلری جهتیهله قبول
اولنیوب قوغولان ! تزوجنه طالب اولدقلری قادینلرک رغبتنه
مظهر اوله میان ! هر نه دیسهلر، ونصل تظلم حال ایتسهلر، سوزلری
دیکندیکی ایچون حاجتلری روا اولنیهرق دائما مضطرب القلب
بولنان شول بختیاران امتدرکه، برینک یوزنده لمعان ایدن نور
آلهی، اهالی روی زمینه تقسیم اولنه حق اولسه جمله بی تنویره کفایت
ایدر دیمکدر.

۱۰ — «انس بن مالک» دن مرویدر.

دیمش که :

رسول الله صلی الله علیه وسلم افندمن (ان الله يقول نوري
هداي، و « لا آله الا الله » کلتي، فن قالها ادخلته حصني، ومن
ادخلته حصني فقد امن) بیورمشلر.

مأل حدیث — الله تعالى بیوردرکه: بنم نورم، هدایت

ورشادم در. و « لا اله الا الله » کلمه در. بولکه منجیه بی هر کیم تکلم
ایدرسه، آتی حصن حصین حفظ و صیانت ایدخال ایدرم. بنم
حصن صیانت ایدخال ایتدیکم کیسه ایسه، محققدرکه مکارهدن
امین اولور.

۱۱ — هشام بن عروه، پدرندن، اوده حضرت عایشه دن
«رضی الله عنها» روایت ایدوب دیمش که:

نبی محترم، صلی الله علیه وسلم افندمن حضرت تری (اعوذ
بکلمات الله التامة، وبنوره الذی اشرقت له الارض، واضاءت
به الظلمات، من زوال نعمتک، ومن تحول عافیتک، ومن فجأة نعمتک
ومن درک الشقاء وشر قد سبق) دعاسی اوقورلردی.

۱۲ — رسول اکرم، صلی الله علیه وسلم افندمن حضرت تری
مرویدرکه: جناب رسالتی بلری (اللهم اجعل فی قابی نوراً، وفی
سمعی نوراً وفی بصری نوراً) بیورلردی.
بوبر حدیث مشهوردر.

یدنجی مسأله

س

جناب مولایه (صورت) اطلاق جائز میدر؟

بولفظک اطلاق حقندوده برطاقم خبرلر روایت ایتشلردر.

اولکیسی

ابوهریره دن مرویدر .

دیمش که :

حیب خدا، صلی الله علیه وسلم افندمز (ان الله خلق آدم علی
صورته) بیورمشلر . [۱]

ابن عمر دن مرویدر .

دیمش که :

رسول الله صلی الله علیه وسلم افندمز (لا تقبجوا الوجه فان الله
تعالی خلق آدم علی صورة الرحمن) بیورمشلر .
اسحاق بن راهویه دیمش که :

رسول الله صلی الله علیه وسلم افندمزك (ان الله خلق آدم علی
صورته) بیوردقلری صحیحدر .

معاذ بن جبل دن مرویدر .

دیمش که :

رسول الله صلی الله علیه وسلم افندمز برکون بزمله برابر
صبح نمازینی ادا بیورمشلردی . بعداء الصلاة جماعت حاضره دن
بری وجه مبارک ارینه عطف نظر دقت ایدوب « یارسول الله !

[۱] صورتی اوزره خدا آدمی خلق ایتدیکنه

کورمه دن ماه رخک کلپور انسانه یقین

« للمترجم »

ذات علیا کزی بوکونکی قدر منورالوجه کوردیکم یوغیدی ! «
دیمش

المح الرسل افدمن دخی (وما ابالی وقد بدالی ربی فی احسن
صورة، فقال فیم یختصم الملاء الاعلی یا محمد! قلت انت اعلم ای ربی!
فوضع کفه بین کتفی فوجدت بردها، فعلت ما فی السموات والارض)
حدیث حکمت تحدیثله کشف راز بیورمشار .

معلوم اولسون که علای کرام شوخبرلرک تأویلنسه بروجه آتی
بعض وجهلر بیان ایتشاردر .

۱ — «ان الله خلق آدم علی صورته» حدیث شریفدهکی
ضمیر، مضروبه عائددر .

یعنی الله تعالی حضرت آدمی ده مضروبک صورتنده یاراتمش
اولدیغندن برکیمسه دیکرینی دوکدیکی وقت، آنک یوزینی تقبیلدن
یوزینه اورمقدن — احتراز ایتلی در .

۲ — بو حدیث شریفدن مراد، «ان الله خلق آدم علی صورته
التي كان فی آخر امره» دیمکدر .

یعنی جناب ابوالبشر، نطفه دن، قانندن، متولد دکلدر . جنین
ورضیع اولمادی . آنی الله تعالی دفعهً واحدهً رجل کامل اوله رق
خلق ایلدی . [۱]

۳ — حدیث شریفدهکی صورتدن مراد، صفتدر . «صورة
هذا الامر کذا» دینرکه : «ای صفته» دیه صفته تقبیر اولنور .
[۱] دیمک استرکه بزم کبی حضرت آدمی اطوارسبعه سبق ایتامشدر .
للمترجم رندن بره یارادلمشدر .

بوصورتده « خالق الله آدم على صورة الرحمن » حديث عالينسنة
 « اى على صفته فى كونه خليفته فى ارضه متصرفاً فى جميع الاجسام
 الارضية نافذ القدرة فى جميع العالم » يولنده معنى ويريلير .
 يعنى الله تعالى نصل كه كندى ذات پا كى كافه عوالمده نافذ
 القدرة ايسه، جناب ابوالبشرى دخی روى زمينده كندى خليفه سى
 اولوق، جميع اجسام ارضيه ده تصرف ايدى بيلك خصوصاً صرلنده
 صفت رحمانيه سى اوزره خلق ايتمش در .

سكزنجى مسأله

اللهه (جوهر) دينيرمى ؟

فلاسفه ايله نصارى، الله تعالىك ذات اقدس واعلاسنه (جوهر)
 اطلاقى تجويز ايتمشار سده، علمای متكلمين بواطلاقدن امتناع
 ايدرلر .

فلاسفه ديرلر كه :

جوهر دن مراد، محلدن موضوع دن مستغنى اولان ذاتدر .
 ايشته جناب بارى ده اويله در . بناءً عليه ذات پا كنك جوهر
 اولمه سى لازم كلير .

كذلك جوهر (فوعلى) دركه، ظهور معناسنه اولان
 (جهر) دن مشتقدر . بناءً عليه (جوهر) شخصيت و حجميتى
 سببيله ظاهر و آشكار اولديغى چون، جوهر، تسميه قلمش در .
 ديمك اولور كه، آنك جوهر اولمه سى ظاهر الوجود اولمه سندن
 عبارتدر .

۸۴ جوهر ك حجميته كلنجه : حجميت، نفس جوهر دكلدر .
بلكه جوهر ك جوهر اوله سنه سبب و علتدر كه بوده وجودينك
ظهورندن عبارتدر .

حق تعالى حضرتلری ایسه، کندی وارلغه دلالت ایدن
دلائلك کثرتی حسیله هر ظاهر دن اظهاردر .

بناءً علیه جوهریتده اشیانك اولاسی، احق اودر . یعنی
موجودات ایچنده جوهر اولغه اك زیاده لایق وشایان اولان
جناب باریدر .

علمای متکلمین دخی دیمشدرکه :

جناب حقه جوهر، اطلاق ممتنع اولدیغه اجماع مسلمین واقع
اولغله بز آکا « جوهر » دیه میز ! اوزرمزه واجب ولازمدرکه
بواطلاقدن امتناع ایدلم .

طقوزنجی مسأله

حق تعالیه (جسم) اطلاق اولنورمی ؟

گرامیهنك ا کثری الله تعالى حضرتلرینه (جسم) اطلاق
ایتمشدر ! بونکله برابر (بزهرنقدر « الله تبارك وتعالی جسمدر ! »
دیر ایسه کده، بواطلاق ایله « حق تعالی اعضادن مرکبدر . » دیمک
ایسته میز . « موجوددر بالنفس قائمدر . محل دن غنی در . » دیمک
ایسترز) دیمشدر .

اما سائر فرق اسلامیه، بواسطی انکارده همزبان وفاق اولوب
 « الله تعالى جسم در دینم » دیدیلر .

بزم بوبابده « کرامیه » ایله ایکی مقاممز واردر

مقام اول

بزم کرامیه نك جناب حقّه اثبات ایتدکری جسمیتدن مراد لری
 بو اولدیغنی — یعنی طول و عرض و عمقندن بشقه برمعنی اراده
 ایتدکری نی تسلیم ایتیمز .

نصل تسلیم ایدلم که : آنلر (جاشا) جناب باری عرشك
 فوقنده در ! دیرلر . بونکله برابر کوچکلکده جوهر فرد و جزء
 لایقیزی منالودر . « ده دیمیوب بلکه عرشدن بیوکر دیه اعتقاد
 وادعا ایدرلر .

بویله فوق العرش کندینه مکان اثبات و عرشدن بیوکر فرض
 و اعتقاد اولنان بر موجودك ایسه، ذاتی عرشك براوجندن او بر
 اوجنه قدر ممتد، بناءً علیه طویل، عریض، عمیق اولمق لازم کلیر .
 ایشسته شو افاده مزله تین ایتدی که، کرامیه نك « بزم الله
 تعالی نك جسمیتله بومعنادن بشقه برمعنی اراده ایدرز ! » دیدکاری
 کذب محض، و تزویر صریح در .

مقام ثانی

جسم بر لفظ در که باطل بر معنای ایهام ایدر .
 باخصوص نه قرآن مجیدده، نه ده احادیث نبویهده بولفظك
 حق باریده ورودینه دلالت ایدر هیچ بر نص و اثر یوقدر . بناءً
 علی ذلك « الله تعالی جسمدر ! » دیمکدن امتناع واجتناب ایتمهمن
 لازم کلیر .

لاسیما متکلمین دخی « جسم، لفظی طول و عرض و عمق
 حسیله کثرت اجزایی افاده ایدر . » دیمشدر .
 آنکچون لفظ جسم، بومعنائك اصانی مفید اولمق لازم کلیر .

اوننجی مسأله

الله تعالیه (انیت) لفظی اطلاق اولنورمی ؟

معلوم اولسون که فلاسفه شو لفظه یی حق باریده پك چوق
 اطلاق واستعمال ایدر لر .

بونك اصل لغت حسیله شرحی شودر که، (ان) — وجودده
 تأکید و قوت — افاده ایدر .

حق سبحانه و تعالی حضرت تیری ده مادام که، واجب الوجود
 لذاته در . مادام که واجب الوجود اولان كرك تأکید وجودده،
 و كرك قوت وجودده اکمل موجوداتدر . فلاسفه بوتأویل ایله
 الله تعالیه (انیت) لفظی اطلاق ایلدیلر .

اون برنجی مسأله

حق یاریده (ماهیت) اطلاق جائز میدر ؟

معلوم اولسون که (ماهیت) لفظی بحسب اصل اللغة برلفظ مفرد دکلدر . بلکه کئی حقائقدن برحقیقتک اصلی صوروب اکلامق ایستدیکی وقت « ماتلک الحقیقه و ماهی » دیر . رسول الله صلی الله علیه وسلم افندمن (ارنالاشیاء کماهی) بیوررلردی .

وقتا که شو (ما) لفظیه معرفت حقائقدن سؤال چوغالدی . (ماهی) قولزک مجموعنی لفظه مفرده کبی قیلدیلر وبو لفظه یی حقیقه موازی وضع ایستیلرده دیدیلر که :
 « برشیئک ماهیتی ، اوشیئک حقیقت مخصوصه سی ، ذات مخصوصه سی دیمکدر . »

اون ایکنجی مسأله

الله ذوالجلاله (حق) دینیری ؟

معلوم اولسون که شو (حق) لفظی اکر برشیئک ذاته اطلاق اولنورسه ، اوشیئک فی نفسه وجود حقیقی ایله موجود اولقلغنی مراد اولور .

بوکاده دلیل شودرکه :

حق، مقابل باطلدر . باطل دخی معدومدن عبارتدر .

شاعر مشهور « لید » دیمش که :

الاكل شيء ماخال الله باطل [۱]

مادام که، حَقْ مقابلی (معدوم) در . (حق) موجوددن

عبارت اولق لازم کلیر.

اگر (حق) اعتقاده اطلاق اولنورسه، او اعتقادك صواب

وواقعہ مطابق براعتقاد اولدینی مراد اولور .

بویله صواب، وواقعہ مطابق اولان اعتقاد ایسه، واجب

التقرير والابقادرده آنکچون (حق) تسمیه اولنور .

اگر (حق) قول و خبره اطلاق اولنورسه، او اخبارك

طوغری وواقعہ مطابق اولدینی مراد اولور .

زیرا بویله صادق وواقعہ مطابق اولان سوز، هر حالده واجب

التقرير والابقادر .

ایشته بوراسی ثابت اولدینی حالده دیرزکه، هر وجهله (حق)

اسمه مستحق اولان یالکز جناب حقدر.

بحسب ذاته، بواسمه مستحق اولان اودر.

زیرا کندی اول موجوددی الجوددرکه عدم وزوالی متمتع در .

بحسب الاعتقاد، بواسمه مستحق اولان ینه اودر .


زیرا آنک وجود، ووجوبنی اعتقاد، براعتقاد صواب، بر

اعتقاد مطابقه، كندی ذات اقدسى بوصفتدن اصلا متغیر و متحول اولماز .

بحسب الاخبار والذکر، دخی بواسمه مستحق اولان اودر .
زیرا صدق اولمقده، واجب التقرير اولمقده بوخبر، احق الاخباردر .

ایشته شو افادات و ایضاحات ايله تبیین ایتدی که، جمیع اعتبارات و مفهومات حسیله (حق) اولان آنجق جناب حقدر .

« والله الموفق الهادی »



قسم ثانی

کیفیت وجوده دلالت ایدن اسملر

معلوم اولسون که بوبابده ایراد اولنه حق کلامدن مقدم بعض
مقدمات عقلیه نك تقدیم و تمهیدی لازم کلیر .

برنجی مقدمه

بیلیملیدر که مولای متعال حضرتلرینک ازلی، ابدی اولمسی
آخری اولمیان - یعنی نهایتسز - برزمانک وجودینه قائل اولمیه
ایجاب ایتمز .

زیرا بز دیرزکه :

شیئک فی ذاته دائم الوجود اولمسی، آنک یا برزمان ایچند،
حصولنه متوقفدر؛ یا دکلدر .

احتمال ثانییه کوره مقصود، حاصل اولمش اولور .

زیرا بوتقدیرجه زمان آخرک وجودینه قائل اولمغه حاجت
قالمقسزین ازلیت وابدیت خدا ثابت اولور .

احتمال اوله کوردهده دیرزکه :

اوزمان دخ، یا ازلی اولور ! یا اولماز .

شق اول، التزام اولنورسه، الله تعالانک ازلی اولمسی، بشقه

درلو تقرر ایتمز؛ الا زمان آخر سببیلہ تقرر ایدر دیمک اولور .
 بوتقدیرجه زمانک زمان آخره افتقاری، بناءً علیه تسلسل
 لازم کلیر .

شق ثانی التزام اولنورسه، الله تعالی اوزماندن اولدخی ازلی،
 موجود اولمش اولور ،

زمانک ازلی اولمه سی، والله تعالی انک اوزماندن اولدخی
 ازلی، موجود بولمه سی ایسه، دلالت ایدرکه، دوام وجود الهی
 زمان آخر، اثباته محتاج ومفتقر دکلدر . « وهو المطلوب »
 ایسته شوتفصیل ایله ثابت اولدی که، الله تعالی انک ازلی اولمه سی
 زمانک ازلیتینی اعتراف ایتمه یی ایجاب ایتمز .

ایکنجی مقدمه

برشی مادام که، ازلی در، باقی در .
 لکن برشیئک باقی اولمه سیله ازلی ده اولمه سی لازم کلز .
 (باقی) لفظی ایسه کتاب مجیدده وارد اولمش در .
 شویله که :

بر یرده (و یبقی وجه ربک) دیگر یرده ده (کل شیء هالک
 الا وجهه) بیورلمش در .

هالک اولمیان شی ایسه لامحاله باقی اولور .
 ینه قرآن مینده (هو الاول والآخر) بیورلمش در .
 ایسته بوقول کریمک منطوقجه، جناب ذوالکبریا، ذات اجل

و اعلاسنی کافه ماسواسنک اولی قیلدی . هر ماسواسنک اولی اولان
 شینک ایسه اولی اولق ممتنع و محالدر .
 چونکه جمیع ماسواسنک اولی اولان شینک ده اولی اولسه ،
 کندی اولنک اولی اولهسی ممتنع اولوردی .
 مادام که؛ کندی جمیع ماسواسنک هم اولی در . هم ده
 آخری در . کندینک اولی و آخری اولهسی ممتنع در .
 ایشته بولفظ ، دلالت ایدر که ، الله تعالی ازلی در . اولی یوقدر
 ابدی در . آخری یوقدر .

اوچنجی مقدمه

صانع عالم اگر محدث اولسه ، کندی ده صانع دیگره مفتقر
 اولور ، و او جهته تسلسل لازم کلیردی . تسلسل ایسه محالدر .
 بناءً علیه صانع عالم ، قدیمدر .
 صانع تعالانک قدمی تبیین ایدنبجده ؛ زوالی ممتنع اولق لازم کلیر
 زیرا قدمی ثابت اولانک عدمی ممتنع در .
 ایشته بومقدمات ثابت اولدقدن صکره تفسیر اسمایه باشلارز .

الاسم الاول

القديم

معلوم اولسون که ، لفظ قدیم ، اصل لغتده طول مدت ،
 افاده ایدر . نفی اولیت ، افاده ایتمز .

برخانه نك؛ بر بنانك مدت انشاسی اوزاینجه، آكا « دار قدیم »
 « بناء قدیم » دینیر .

جناب باری کتاب مقدس سده (حتی عاد کالعر جون القدیم)
 و (انك لفی ضلالك القدیم) بیور مشدر .

الاسم الثاني

الازلی

شو لفظ، ازله انتسابی افاده ایدر .
 بناءً علیه بو اسمده « ازل برشیدرکه، الله تعالانك ذاتی، آنده
 حاصل اولمش در ! » کبی بر ایهام قبیح واردر . بوایسه باطلدر .
 چونکه امر بویه اولسه یدی، ذات الله (ازل) دینیلن شیئه
 محتاج ومقتقر اولمق لازم کلیردی که، بو، محالدر .
 یا اسم ازلی دن مراد نه در ؟
 بوندن مراد، البته اولی اولیان بروچوددر .

الاسم الثالث

لا اول له

بولفظ، معنای مقصودی صریحاً افاده ایدر .

« لا اول له » قولمز صفت ثبوتیه میدر ؟ صفت عدمیه میدر ؟
بوراسی تحت اختلافده در .

یکی دیمش که :

« لا اول له » قولمز عدم سابقی نفیه اشارتدر . نفی النفی
ایسه اثباتدر . بناءً علیه « لا اول له » قولمز کر چه بحسب اللفظ
(عدم) در . انحق حقیقتده (ثبوت) در .

یکی دیمش که :

« لا اول له » قولمز مفهوم عدمی در .

زیرا بو، شیئک مسبوق بالعدم اولمه سنی نفی در .
(عدم) ایله (مسبوق بالعدم) بیننده ایسه فرق عظیم
واردر .

چونکه شیئک مسبوق بالعدم اولمه سی کیفیت ثبوتیه در .
بوصورتده « لا اول له » قولمز او کیفیت ثبوتیه یی سلبدر .
بناءً علیه (لا اول له) قولمز مفهوم عدمی اولمش اولور .
اولکیلر بواسطه دلالة شو وجهله مقابله ایتمشلر که :

الله تبارک و تعالی حضرت تارینک مسبوق بالعدم اولمسی ، ا کر
ذات پاکی اوزرینه زائد بر کیفیت وجودیه اولسه یدی ، او کیفیت
زائده حادث اولمق لازم کلیردی ده بناءً علیه مسبوقه بالعدم اولمسی
اولوردی .

آنک بویله اولمسی ده صفت اخیری دیمک اوله جفی جهتله
تسلسل لازم کلیردی . تسلسل ایسه محالدر .

الاسم الرابع

الابدی

بواسم، زمان مستقبل حبیبیله دوام افاده ایدر .

الاسم الخامس

السرمدی

بولفظ، توالی و تعاقب معناسنه اولان (سرد) دن مشتقدر .
 اشهر حرمتك صفتنده عليه الصلاة والسلام افندمن (واحد
 فرد و ثلاثة سرد) بیور مشلرکه (سرد) متعاقب ایله مفسر در .
 و چونکه زمانك بقاسی، اجزاسنك تعاقبی، و ابعاضك تلاحقی
 سببیله اولوب اوتعاقب و تلاحق دخی (سرد) ایله مسمی بوتندیغندن
 بومعناده مبالغه افاده ایتك ایچون (سرد) لفظنه بر میم زائده
 ادخال ایدی و یردیلمده (سرد) دیدیلر .

بوراسی معنوم اولنجه دیرزکه :

(سرد) یالکز اجزاسنك یکدیگری عقینده حادث و حاصل
 اولان شیئه اطلاق اولنور .

ایشته لفظ سرمده اصل اولان بودر .

شومعناك حق باریده حصولی ایسه محالدر .

آنکچون جناب واجب الوجوده (سرد) اطلاق علی
 سبیل المجازدر . یوقسه حقیقت دکلددر .

مع مافیه بواسم ، اکر کتاب وسنتده وارد اولدی ایسه
بزده آنی الله ذوالجلاله اطلاقده تردد ایتمز . والا فلا .

الاسم السادس

المستمر

بو، بنای استفعالدر . اصلی ده مرور و ذهابدر .
زمانك بقاسی، بعض اجزاسنك بعض آخری عقینده مرور
و ذهابی سیبیلده .

ایشته بونك ایچوندركه، زمانه «مستمر» اطلاق ایتدیله .
شوقدر وارکه، بواسم، یالکز (زمان) حقنده صادق اولور .
یوقسه باری تعالی و تقدس حضرتلری حقنده «مستمر» اطلاق
محالدر .

زیرا باری تعالانك بقاسی ذات معینه و مقدسه سی حبسیله در .
ابعاض و اجزاسنك تعاقب و تلاحق حبسیله دکلددر .
للترجم — چونکه ذات پاك خدا ، ابعاض و اجزادن مترکب
دکلددر . « تعالی الله عن ذلك علواً کیراً » بتدی .

الاسم السابع

الممتد

مدته مدت دنیلسی، اجزاسی بری برینه متصل و متعاقب
اوله رق اوزامقده اولدیغیچونددر .

بوصورتده بزم (فلان شیئك وجودی امتداد ایتدی)
 دیشتمز الحبق زمان ایله زمانیات، حقنده صحیح اولور. اما حق
 باریده (ممتد) اطلاقی عل طریق المجازدر.

الاسم الثامن

الباقی

الله تعالی (ویبقی وجه ربك) بیورمش.
 شوراسی ده معلوم اولمیدرکه، هرازی، باقی در. فقط هر باقی
 ازلی اولمق لازم کلز.
 زیرا بعضاً برشی باقی اولورده نه ازلی، نه ده ابدی اولماز.
 نته کیم اجسام واعراض باقیده اولدینی کی.
 بعض ناس دیمش که:
 «باقی، دوام افاده ایدر.» [*]
 بوصورتده اجسامك (باقی) ایله وصفی صحیح اولماق لازم
 کلیر. حال بوکه امر بالعکس در.
 زیرا اهل عرف، عندنده متفق علیهدرکه، خالقك یکدیگرینه
 (ابقاك الله) دیمه سی صحیح در.

الاسم التاسع

الدائم

الله تعالی (اکلهادائم) بیورمش.

[*] باقی لغتده اولکی حالت اوزره ممتد و مستمر اولان، زائل و فانی وغائب
 اولمیان شیئنه دینیر. للمترجم

مادام که دوامده - یعنی دوام اوزره برقرار ، و وجود
و کونی بلا نهایت اولمده احق الاشیا جناب مولادر . حقیقده
دائم و برقرار اولان انحق اودر .

الاسم العاشر

قولنا

واجب الوجود لذاته

بو اسم ، «وجودینی موجب اولان کندی ماهیت و حقیقتی در.»
و تعیر دیگرله - «ذاتی وجودینی مقتضی در.» معناسنی مفیددر .
ایمندی هر هانکی موجودک که شانی بو اوله ، او تمتع العدم
و الفنادر .

معلوم اولسون که ، بویه ذاتی وجودینی مقتضی اولان هرشی ،
قدیم و ازلی اولمق لازم کلیر . فقط هر قدیم و ازلی اولانک واجب
الوجود - یعنی ذاتی وجودینی مقتضی اولمسی لازم کلز .
زیرا شئتک علت ازلیه ابدیه ایله معلل اولمسی بعید دکلدر .
بو تقدیرده علتی ازلی ، ابدی اولدنی چون آنک دخی ازلی ابدی
اولمسی لازم کلیر .

ایشته بوشی ، واجب الوجود لذاته اولماق له برابر ازلی ،
ابدی اولمش اولور .

لسان فارسیده جناب واجب الوجوده (خدای) دینیلیر :
ایشته بواسم فارسی دخی . (واجب الوجود لذاته) معناسنی
متضمندر .

زیرا (خدای) فارسیده ایکی لفظدن مرکبدر .
اولکیسی - شئیک ذاتی، نفسی، حقیقتی دیمک اولان (خود)
وایکنجیسی - (جاء) معناسنه اولان (آی) لفظلریدر .
دیمک اولورکه (خدای) قولمز « انه بنفسه جاء » معناسنی
مشعردر . بوایسسه واجب تعالی و تقدس حضرتلرینک بنفسه
وبذاته وجوده کلدیکنه، و بزم کبی وارلقده آخره محتاج
اولمادیغنه اشارتدر . [۱] بوحالده (خدای) قولنک تفسیری
« انه لذاته کان موجوداً » دیمک اولور .

الاسم الحادی عشر

الکائن

معلوم اولسون که (کائن) لفظی بحسب صفات الله تعالی
قرآن کریمده کثیر الورددر .
الله تعالی بریرده (وکان الله علی کل شیء مقتدر) دیکر یردهده
(ان الله کان علیماً حکیم) بیورمشدر .
اما بحسب ذات الله تعالی قرآنده وارد اولمامشدر .
لکن بعض اخبار نبویهده وارد اولمشدر .
[۱] بعض اذکاردهده (موحود لامن علة) وارد اولمشدر .

حضرت رسول اکرم صلی الله علیه وسلم افندمزدن مأثور
اولان بعض ادعیه ده (یا کائناً قبل کون . ویا حاضرأ مع کل کون ،
ویا باقیأ قبل انقضاء کل کون) بیورلدینی ویا خود بومعنایه قریب
وبعض وجوه دن آکا مناسب اولان لفظ ، استعمال اولدینی
مرویدر .

معلوم اواسون که ، بویابده بر بحث لطیف نحوی واردر .
شویله که : نحو یون (کان) لفظنک ایکی قسم اولدیغنده
مطابق الفکر درلر .

قسمنک بری — فعل تام اولان (کان) در که ، (حدث ،
وجد ، حصل) معناسی مشعردر .

الله تعالی (کتم خیر امة اخرجت للناس) بیورمشدرکه
» حدثتم ووجدتم خیر امة « دیمکدر .

دیگری — فعل ناقص اولان (کان) در .
(کان الله علیمأ حکیمأ) قولک کبی .

زیرا بوتفسیره کوره (کان) لفظی ایچون بر مرفوع وبر
منصوب ، لازمدر .

نحو یون عندنده بوراسیده متفق علیه درکه (کان) لفظی
علی کلا التقدیرین (فعل) در شو قدرکه وجه اوله کوره فعل
تامدر . وجه ثانی یه کوره فعل ناقصدر .

بن بروت علمای خراسانه دیمشدم که ، اکر (کان) لفظی
فعل اولسهیدی ، زمان معینده بر حده دال اولمق لازم کلیردی .

هایدی او یله اولسون ! لکن بز آنی اسم واحده اسناد ایتدی کمز وقت، مسند الیه ایچون بر حدثک حصوله دال اولمش اولور که او صورتده کلام کلام تام اولور . بناءً علیه (کان) نك ذکر منصوبدن استغنا حاصل ایتمه سی و او حالده فعل تام اولمه سی لازم کلیر ایشته بونکله ثابت اولدی که « بونکله ناقصه فعلدر » دیمک، آنک کله ناقصه دکل، بالعکس کله تامه اولمه سی ایجاب ایدر . ثبوتی کندینی نفیه مفضی و مؤدی اولان شی ایشه باطلدر .

ایشته بو افاده مزله تین ایتدی که، « کان، کله سی کله ناقصه در. » سوزی بر قول باطلدر .

کندیلرینه ایراد ایتدی کم بوسؤال اوزرینه علمای مشار الیه مک اذکیا و فضلاسی بر زمان متخیر قالب، جواب اعطاسنه مقتدر اوله مدیلر .

بالآخره ینه بن بوباده بالتأمل شبهه یی ازاله ایده جک جواب حقیقی بی بولدم .
شویله که :

کان، لفظی آنجق حدوث، حصول، وجود، افاده ایدر . شوقدر که، بوده ایکی قسمدر . بر قسمی — شیئک فی نفسه حدوثی دیگر قسمی — شیئک شیء آخرله موصوفیتی افاده ایدندر . کله لم قسم اوله : محققدر که (کان) لفظی او، شیء واحد اسناد ایله فعل تام اولور . زیرا بولفظ عندالاسناد او شیئک حادث و حاصل اولدیغنی افاده ایدر .

کله لم قسم ثانییه : ینه محققدر که، اسمینی ذکر ایتدجکه، (کان) نك

فائده سی تمام اولماز . زیرا اسمین ذکر اولندوقده (کان) نك معناسی
مثلاً - زيدك علم ايله موصوفيتك حصولدن عبارت اولور .
حال بوكه ايکيسنی بردن ذکر ایتدکجه زيدك علم ايله موصوفیتی
ذکر ایتک ممکن اوله ماز . آنکچون شبهه یوق که ايکيسنی بردن
ذکر ایتدکجه ممکن دکل، مقصود تمام اولماز . بوصورته « کان
زيد علماً » قولزك معناسی « زيدك علم ايله موصوفیتی حادث
وحاصل اولدی . » ديمك اولور .

ایشته تبين ایتدی که (کون) لفظی آنجق حصول و وجود
افاده ایدر .

شوقدر که . (کان) نك قسم اولده يالکز اسم واحده اسنادی
کافی ایکن، قسم ثانی ده اسمینی ده ذکر ایتک لابد و لازمدر .
ایشته بویجق، علم نحوه متعلق لطائف نفیسه دندر .

بوراسی معلومك اولنجه، دیرز که :

شو تقدیره کوره (کائن) ايله (موجود) لفظلری بیننده
معناجه فرق یوقدر . بناءً علیه جناب باری به (کائن) اطلاقی
جائز اولق لازم کلیر .

قسم ثالث

كرك وجوده وكرك كفيات وجوده مغاير اولان صفات حقيقه

بوصفتلرك ذات الله ايله قيامی جائز اوله بيليرمی؟
ايشته معلومك اولسون كه شويحت، بوكا مبنی در .
معتزله ايله فلاسفه بوصفتلرك ذات الله ايله قيامنی اشد انكار
ايله انكار، وبوبابده برقاج وجه ايله احتجاج ايتشلردر .

حجت اولی

بوصفات حقيقه يا واجبة لذاتها، يا خود ممكنة لذاتها اولمق لازم
كلير . حال بوكه بونك ايكیسی ده باطلدر . ممتنع الثبوتدر . غیر
جائزدر . بناءً علیه بوصفتلرك ذات الله ايله قيامی حقنده سويلتن
سوز باطلدر .

بوصفتلرك (واجبة لذاتها) اوله ينله سنی، ممتنع عدايد شمز
ايکی وجهدن ناشی در .

۱ — حکمتجه ثابتدر كه (واجب الوجود لذاته) آنحق
واحد اولور. متعدد اوله ماز .

۲ — (واجب الوجود لذاته) اول ذات اجل واعلادر كه
ماسواسندن غنی اولور . صفت دينيلن شی ايسه موصوفه محتاج

و مقتدر در . بناءً عليه وجوب ذاتي ايله غيرك صفتي اوله سی بینی
جمع ایتک محالدر .

بوصفتلرك (ممکن لذاته) اوله سنی ده غیر جائز عداید شمز
کذلک ایکی وجهدن ناشی در .

۱ — ممکن لذاته، ایچون بر سبب لابد و لازمدر . بونک
سببی ده ذات اللهک غیری اوله سی جائز اولماز .
زیرا اوزاتک بوصفتدن خاوی، متمتعدر . بوصفت ایسه کنیدین
بشقه سنه مقتدر در .

بوصورتده اوزاتک غیره مقتدر اوله سی؛ و چونکه بویله غیره
مقتدر و محتاج اولان شی (ممکن لذاته) دیمک اوله جغندن او حالده
(واجب لذاته) نک (ممکن لذاته) اوله سی لازم کایر . بوا یسه محالدر .
سبب مذکورک عین ذات الله اوله سی ده جائز اوله ماز . زیرا
اوصفتی قابل اولان ذات اللهک کنیدیر .

انکچون ذات الله، اوصفتده مؤثر اولسه، شی واحدک ینه
اوشی واحدده نسبتله هم فاعل، همده قابل اوله سی لازم کلیردی .
بوا یسه محالدر . زیرا امور ثابته دندرکه، واحد اولان شیدن آنجق
اثر واحد، صادر اولور . فعل و قبول ایسه مختلف ایکی اثردر .

۲ — اثر، مؤثره مقتدردر . اثرک مؤثره افتقاری ده یا اثرک
حدوشندن صکره، یا حال حدوشنده، و یا خود حال عدمنده اولور .
احتمال اول، باطلدر . زیرا باطل اولسه، او مؤثرک ایجاد
اثرده تأثیری حاصلی تحصیل قیلندن اولمق لازم کلیردی . بوا یسه
محالدر . بوتقدیرجه یالکز صکره کی ایکی قسم قالیر . بوده شونی

اقتضا ایدرکه، برشی، شیء آخرک اثری اولنجہ، اوشی مطلقا حادثر.
بناءً علیه شونی اقرار و اعتراف ایتک لازم کلیرکه، حادث اولیمان
شیء، غیرک اثری اوله ماز.

حجت ثانیہ

معترله ایله فلاسفہ دیمشارکه :

بوصفات حقیقیه، یا قدیم، یا خود حادث اولق لازم کلیر.
احتمال اول ایسه باطلدر.

زیرا محنده بیان ایتش اولدیغمز وجهله قدیم، صفت
شوتیه در.

بناءً علیه بوصفتلر قدیم اولسه، (ذات) قدمده صفاته مساوی
اولق لازم کلیردی.

برده ذات وصفاتدن هر بری ماهیت معینه سنک خصوصیتی
سببیه آخره مخالف اولمش اولور. مابه المشارکه ایسه مابه المخالفتک
غیری در.

بوصورتده اواشیای قدیمه دن — یعنی ذات وصفاتدن هر بری
ایکیشر جزءدن مترکب اولق لازم کلیر.
شوراسنی ده علاوه کفتار ایدرزکه :

جزئین مذکوریندن هر برینک قدیم اوله سی لازم کلیر.
زیرا قدیمک جزء ماهیتی ده قدیم اولق امور طبیعیه دندر. بوتقدیره
کوره جزئین مذکورین، صفت قدمده متشارک، خصوصیتده
مختلف اولمش اولورلر.

بناءً عليه بونلرك هر برى. جزئين دن مركب اولمق لازم كلير .
بوايسه محالدر .

زيرا او حالده كرك ذاتك حقيقى وكرك اوصفتلردن هر برينك
حقيقى اجزاي غير متساهيدن مركب اولمق لازم كلير كه اوده
محالدر .

« ذات الله ايله قائم اوله جق صفتلرك حادث اوله سى متنع در »
ديشتمز دخى بر قاچ وجهدن ناشى در .

۱ — ذات الله ايله حوادلرك قيامى محالدر .

زيرا محققدركه، (ذات) صفتك وجودنده ، يا خود عدمك
دوامنده يا كافى در . يادكلدر .

احتمال اوله كوره ، اوصفتك دوام وجودى ، يا خود دوام
عدمى ذاتك دوامنه وابسته اولمق لازم كلير . احتمال ثانى به
كوره، اوزات بوصفتك وجوديله، ويا خود عدميله، واجبه
الاتصاف اولمش اولور .

حالبوكه، غيره موقوف اولانه موقوف اولان شى غيرده موقوف
ديمكلدر .

بويله غيره موقوف اولان شى دخى (ممكن لذاته) در كه بوده،
(واجب لذاته) اولانك (ممكن لذاته) اوله سنه نتيجه ويرر . بو
ايسه محالدر .

۲ — محققدركه، ذات پاك خدا، انكر قابل حوادث اولسه ،
او حوادلرك قابليتى، ذات اللهك لوازمندن اولمق لازم كليردى .
و چونكه ذات الله، ازلى اولدينى اجلدن بو حالده قابليت مذكوره .

نكده ازلی اولهسی لازم كلیر. لکن حوادلک ازلی اولهسی ممتنع در. چونکه قابلیت حوادث، امکان وجود حوادلله مشروط در. حال بوکه ازله وجود حوادلک امکانی محالدر. بناءً علیه ازله قابلیت حوادلک وجودی ده محال و ممتنع در.

۳ — اوصفتلر مادام که حادثلرلر. صفات الیهیت ایله موصوف اولان اله، بوصفتلرک خدوشندن اول دخی موجود اولمق لازم كلیر.

بوتقدیرجه ثبوت الیهیده صفات مذکوره مستغنی عنها اولمش اولور.

بناءً علیه بوصفتلری نفی ایتک لازم كلیر. مادام که بوصفتلرک یا قدیم، یا حادث اولهسی لازم کله جکی تبیین ایتمش در مادام که، بوایکی صورتکده فسادی ثابت اولمش در تبیین ایدرکه، وجود صفت، ممتنع در.

حجت ثالثه

بوصفتلر یا آنسزده الیهیت تمام اولور یا اولماز بر حیثیتده اولمق لازم كلیر.

احتمال اوله کوره، وجود صفات، فضله وزائد برشی دیمک اوله جغندن آتی نفی لازم كلیر.

احتمال ثانییه کوره، اله قادر، صفت الیهیتی تحصیلده شیء آخره مفتقر اولمش اولور. محتاج ایسه اله اوله ماز.

حجت رابعه

الله تبارك وتعالى حضرت تارینك ذات پاکی مدائح و كالاتده
معتبر اولان جمیع صفاتده یا کاملدر . یادکدر .
احتمال اوله کوره ذات پاک خدا (حاشا) ذاتنده ناقص،
و غیر یله مستکمل دیمک اولمق لازم کلیر . بو حال وشانده اولان
ذاته ایسه، صفت الیهیت یاقیشماز .

حجت خامسه

مادام که (اله) مجموع ذات وصفاتدن عبارتدر . بوتقدیرجه
(اله) تجزی وتبعضی قابل ومنقسم اولمق لازم کلیر .
حال بوکه اله العالمینک بویه تجزی وتبعض ایله انقسامی قابل
اولمه سی عقلدن پک بعیددر .
زیرا هر مرکب، ممکندر . واجب دکدر .

حجت سادسه

الله تعالی نصاری، تثلیث خصوصنده تکفیر ایلدی . سبب
تکفیر دخی شو ایکی سبیدن خالی دکدر .
نصاری، یا ذوات ثلاثه اثبات ایتدکلری و یا خود ذات مع
الصفاته قائل اولدقلری ایچون تکفیر اولنمشلردر .
شق اوله ایسه نصاری قائل دکدرلر .

بناءً عليه الله تعالى نصارایی کنديلرينك قائل اولمادقلری
 بر مقاله سبيله تکفير ايتمش در ديه ميز .
 بوحالده شق ثانی قالیور که بوده ذات پاک خدایه اثبات صفات
 کفر اولمهی ایجاب ایدر .
 ايشته صفاتی نفی وانکار ایدنلرک تمسک واستناد ایتدکاری
 وجهلر بونلردر که، امر بویله اولمق لازم کلسه، صفت حقیقه نك
 بذاته قیامی سبيله الله تعالى ایچون براسمک حصولی تمتع اولور .

مسألة ثانية

الله تعالیه اثبات صفات ایدنلرک دلائلی بیاننده در .

معلومک اولدینی اوزره دلائل ایله مبتدیر که، اله عالمک
 عالم، قادر، حی اولمسی لازم کلیر .
 ایمدی دیرز که :
 اله عالمک علمی، قدرتی، عین ذاتی اوله ماز .
 بوکاده برقاچ وجه دلالت ایدر .
 وجه اول — بز (ذات الله ذات) قولزله (ذات الله عالمه
 قادرة) قولمز بیننده ضروری وبدیهی بر فرق بولیورز. بوتفرقه
 ایسه دلالت ایدر که، الله تعالانک عالم وقادر اولمسی، ذات اجل
 واعلا سنک عینی دکدر .
 وجه ثانی — الله تعالانک قادر وعالم اولدیغندن ذهول ایله برابر
 موجود اولدیغنی در خاطر ایدوب بیلک ممکندر .

كذلك الله تعالى انك عالم اولديغىدن ذهول ايله برابر قادر
اولديغى وبالعكس قادر اولديغىدن ذهول ايله برابر عالم اولديغى
درخاطر ايدوب بئلك دخی ممكندر .

ايشته بوده دلالت ايدوکه ، الله تعالى انك عالم وقادر اولمسی
اودات پاكك عینی دکلدر .

وجه ثالث - الله تعالى انك عالم اولمسی - واجبه ، ممتعه ، ممکنه
نسبتله عام التعلقدر . قادر اولمسی ایسه شواقسام ثلاثیه نسبتله
عام التعلق اولیوب بلکه قادریتی یالکر جائزه مختصدر . حال بوکه
علم ايله قدرت بینده فرق اولماش اولسه اولیه اولماق لازم
کلیردی .

وجه رابع - الله تعالى انك قادر اولمسی ، وجود مقدورده
مؤثر اولور . فقط عالم اولمسی ، وجود مقدورده مؤثر اولماز .
حال بوکه ، علم و قدرت بینده مغایرت اولسه اولیه اولماق لازم
کلیردی .

وجه خامس - محققدرکه (موجوددر) قولمزی (موجود
دکلدر) قولمز مناقض اولوب ، فقط (عالم دکلدر) قولمز آنی
مناقض اولماز . بوايسه دلالت ایدرکه ، (موجود دکلدر) قولمزه
منفی اولان شی (عالم دکلدر) قولمزه منفی اولانه مغایردر .
قادر اولمسه سنده دنیله جک سوزبودر .

ايشته بونلر بر طاقم دلائل واضحدرکه ، الله تعالى و تقدس
حضرتلرینک صفتلری وار اولديغى اقرار ایتک لابد و لازم
ایدوکنه دلالت ایدرلر .

بوراده سويلنه جك برسوز دها وار .

شويله كه :

بو صفتك صفات نسيه واضافيه اولسي نچون جائر

اولسون ؟

جائر اولديغي تقديرده الله تعالانك قادر اولمهنك معناسي ،

كنديدن ايجاد ، صحيح اولور برحيثيه ملابس اولمهيدير كه اوصحت

دخي ذات پا كيله معلدر .

عالم اولمهنك معناسي ده شعور وادرا كدر كه بوده بر حالت

نسيه اضافيه در . واو نسبت حاصله دخي ذات مخصوصه سيله

معلدر .

ايشته بوبابده كي سوزك تماي بودر .

مسألة ثالته

برصفات حقيقيه قائل اولديغمز وقت ديرزكه :

صفت حقيقيه ، يانست و اضافتك حصولى كندينك لازم غير

مفارقى اولان برصفتدر .

علم و قدرت كي .

زيرا علم برصفتدر كه معلومه متعلق اولمق آنك لوازمنددر

قدرت دخي برصفتدر كه آنك ايجاد مقدوره صحت متعلق كندينك

لوازمنددر .

ايشته بوصفكار هر تقدر حقيقى ايسهلرده كنديلرينه نسب

واضافات، بایندن برطاقم لوازم لازم اولور .
 حق باریده نسبت و اضافتدن عاری اولان صفت حقیقیه
 کلنجه : بوده صفت حیاتدن بشقه برصفت دکدر . اولیه ایسه بو
 صفتدن ده بحث ایدلم !
 دیرزکه :

فلاسفه، (حی) دراک وفعال اولاندر دیمشالر .
 شوقدرکه، دراکیت برصفت نسبیهدر . فعالیتده کذلک
 اولیهدر . بوتقدیرجه یعنی شو قوله کوره (حیات) علمه، قدرته
 مغایر برصفت اولماش اولور .
 متکلمین دخی « حیات برصفتدرکه، او صفت اعتباریه
 الله تعالی انک عالم وقادر اولمسی صحیح اولور . » دیمشالر و بوبابده
 وجه آتی اوزره احتیاج ایشلر .
 دیمشلرکه :

ذوات، ذاتیتده متساوی وشو صحتده مختلفدرلر . آنکچون
 او ذواتک صفت حیاتی قبولدهده مختلف اولملری لابدولازمدر
 بنا، علیه او ذواتک صحت مذکورده قبول ایتملری برصفت
 زائدهدن ناشی اولمق لازمکلیر .

متکلمینه دینیلیر که :

بذات اللهک سائر ذواته مخالف اولدیغنه دلیل اقامه
 ایتشزدر . بناء علیه شو ایراد ایتدیکنز دلیل، حکمدن
 ساقطدر .

كذلك (ذوات) صفت حیاتى قبولده مختلفدرلر . بناءً علیه
ذاتك حیاتى قبول ایتمه سنك صحتى صفت دیگر واسطه سیله اولمق
واجب اولوب تسلسل لازم کایر .

ایشته بوکا جواب ویریه من .
مکر دنیله که، حیاتى قبول ایتمه سنك صحتى ذات مخصوصه سنك
لوازمنددر .
بناءً علیه بوسوزى حیاتك صحتنده دکل، عالمیتك صحتنده ذکر
ایتملیسکئر !

برقوم ثالث دخى دیمش که :
« الله تعالانك حى اولمه سنك معناسى کندی سنك قدرتی، علمى
اولمه سى ممتنع ومحال اولما مقدر . »
بومعنى ایسه نفى امتناعدن عبارتدر . لکن (امتناع) عدمدر .
بنابرین امتناعى نفى — عدماً للعدم — اولمش اولورده بالآخره
ثبوتیه نتیجه ویرر .
آنلره دینیلیر که :

بو، کرچه مسلمدر . لکن بو (ثبوت) اوزات مخصوصه سنك
تا کندی سى اولمق نه دن جائز اولمسون ؟

بونك اوزرینه دیرلر سه که :
« بزم قولمك مستند اولدیغى دلیل شودر که بزواذات مخصوصه یی

حي اولديغنده شك ايله برابر تعقل ايدرز . بناءً عليه آنك حياتي،
ذاتنه مغاير اولمق لازم كليز .
شوجهله مقابله اولنور .

بز ذات الله تعقل ذاتي ايله تعقل ايدمهديكمزه و آنجق
تعقل عرضي ايله تعقل ايدمهديكمزه دليل ، اقامه ايتمشدور .
بوخالده سرك شودليلكز حكمدن ساقط اولور .
ايشته بوبابده سويلنهجك سوزكده تمامي بودر .

مسأله رابعه

جي، لفظي قرآن كريمده واردر .
الله تبارك وتعالى (الله لا اله الا هو الحي القيوم) و (عنت
الوجود للحي القيوم) (هو الحي لا اله الا هو فادعوه مخلصين
له الدين) يورمشدر .
دينليرسهكه :

حيك معناسي دراك وفعل اولان ياخود عالم وقادر اولمهسي
ممتنع اولياندز . بونده ايسه مدح عظيم يوقدر . يا سبب نه دركه
الله تعالى كندينك حي اولديغني مدح عظيم معرضنده ذكر ايلدي ؟
جواب ويزيليركه :

تمدح، الله تعالانك مجرد حي اولمهسيه حاصل اولماز . بلكه
« حي وقيوم » اولمهسك مجموعهيله حاصل اولور . چونكه « قيوم »
جميع ماسواسنك اصلاح حاليله قائم اولاندز . بوقيام ايسه آنجق
علم تام، قدرت تامه ايله تمام اولور .

«حی» دخی دراك وفعال اولاندز.

بناءً علیه (حی) قولى دراك وفعال اولدیغنی (قیوم) قولى

دخی جمیع ممکناتی دراك، جمیع محدثات و ممکناتی فعال اولدیغنی
مشعردر.

ایشته بو وجهدن طولانی مدح عظیم حاصل اولمش اولدی.

بشنجی باب

صفات احنافیه دان اولان اسمای پاننده در

معلوم اولسون که، بو بایده سویلنه جک سوز بر مقدمه عقلیه
ایله مسبوق اولق لازم کلیر.

مقدمه

تکون، مکنون [*] عینی می دگلی؟
معتزله ایله اشعریه، «تکون، مکنون عینی در!» بشقه لری،
«تکون. مکنون غیری در.» دیمشار.
صفت تکوینی نقی ایدنلر برقاج وجه ایله احتیاج ایتمشار.

حجت اولی

تکون ایله مسماة اولان صفت، یا علی سبیل الصحه ویا علی
سبیل الوجوب مؤثر اولق لازم کلیر.
صورت اولایه — یعنی تأثیری علی سبیل الصحه اولمسنه کوره

[*] مکنون، اسم مفعول.

بو صفت، صفت تکوین دکل، صفت قدرتدر. زیرا وجود
مقدورده علی سبیل الصحه مؤثر اولان صفت، صفت قدرتدر
بشقه سی دکلدرد.

صورت ثانیهیه - یعنی تأثیری علی سبیل الوجوب اولدینی
تقدیره کوره واجب تعالی و تقدس حضر تیرینک فاعل مختار دکل،
بالعکس موجب بالذات اولمسی لازم کلیر.

حجت ثانیه

شو تکوین، دینیلن صفت، اگر قدیم ایسه آنک قدمندن
آنارک ده قدیمی لازم کلیر. و اگر محدث ایسه کندینک ده تکوین
و ایجادی تکوین دیگره محتاج و مفتقر اوله رق تسلسلی لازم کلیر.

حجت ثالثه

قدرت ایله مسماة اولان صفت، علم و اراده دن عبارت بولنان
شرائط سائرته نک حصولی حالنده صلاحیت تأثیری یا حائزدر.
یا دکلدرد.

صورت اولایه - یعنی (قدرت) صفتک صلاحیت تأثیری
حائز اوله سنه کوره اثرک عدمدن وجوده خروجنده بو صفت،
کافیدر. و علی هذا التقدير دیگر بر صفت اثباتنه حاجت قالماز.
صورت ثانیهیه - یعنی (قدرت) صفتک صلاحیت تأثیری
حائز اولمادیقی تقدیره کوره او قدرتک قدرت اولمامه سی لازم کلیر.
بو ایسه تناقضی ایجاب ایدر.

صفات اللهك قدمنى اثبات ايدنلر دخی شو وجه ايله احتجاج ايتملر؛ ديمشلكه:

فعله قادر اولان بعضاً ايجاد فعل ايدرز. بعضاً ايتمز. کورمز ميسينکه. مکنون کائنات و خالق ممکنات اولان الله تعالى و تقدس حضرتلری بوسمى دنياده بيک شمس منير، بيک قمر مستنير خلق و ايجاد ايتمه قادر ايکن برر دانهدن زياده خلق و ايجاد ايتماشدر.

ايسته شونى و اثباتك حتى الله تعالىك موجد اوله سندن معقول اولان معنى. قادر اوله سندن معقول اولانه مغاير ايدوكنه دلالت ايدرز.

بعدازين ديرزكه:

الله تعالىك موجد اوله سنك معناسى. يا اثرك وجودده دخوليذر. يا خود برامر زاندر. صورت اولى ايسه باطلدر.

زيرا بز شواثرك سلسله وجودده دخولنى، فاعلك اوثرى موجد اولمقلغيه تعليل ايدرز.

كورمز ميسينکه. (عالم نيچون يارادلدى) دينلديكى وقت (زيرا الله تعالى آنى ايجاد ايتدى.) ديرز.

آنکچون اگر موجدك عالمى موجد اوله سنك معناسى - شواثرک - يعنى عالمک - عینى ديمک اولسیدی! اثرک وجودینى موجدیت ايله تعلیل. وجود اثرک نفس اثرله معلل اوله سنى اقتضا ایدردی.

للمترجم - یعنی اثر واحدك هم علت، همده معلول اولهسنه
تیجه ویرودی که بو، محالدر. بتدی.

حال بوکه اثر، نفسیه معلل اولسیدی! امر ایجادك آخره
اسنادی تمتع اولق لازم کلیردی.

ایشته تین ایتدی که، موجدیتی وجود اثرله تعلیل، نفی
موجدیتی اقتضا ایدر.

مع هذا برشیئك که، ثبوتی کنیدی نفیه مؤدی اوله، اوشی
باطلدر.

بونکله ده ثابت اولدی که، موجدیتی وجود اثرله تعلیل،
برکلام باطلدر.

بناءً علیه موجدك موجد اولهسی، فاعلك وجود اثره قادر
اولهسنه مغایر برامر اولق لازم کلیر.

ایشته تین ایتدی که، (تکوین) مکنونک غیری در.
بواصل، معلومك اولنجه دیرزکه:

تکوینك نفس مکنون ایدوکنه قائل اولانلر - جناب بارینك
خالق، رازق، محي، ممت، ضار. نافع اولهسنك معناسی
برنسبت مخصوصه. براضافت مخصوصه دن عبارت اولوب. بونسبت
واضافت مخصوصه دخی شو اشیانك حصولنده قدرت الملهك
تأثیری دیمکدر. دیدیلر.

*
*
*

تکوین، مکنونک غیری در دینلر دخی. جناب بارینك خالق
ورازق اولهسنك معناسی بالکثر صفت اضافیه دن عبارت دکلدر.

بلکه صفت اضافیه ایله موصوف اولان صفت حقیقه دن عبارتدر
دیدیلر.

*
*

معلوم اولسون که، صفات اضافیه برقاچ قسمدر.
اولکیسی - واجب تعالی و تقدس حضر تلرینک معلوم.
مذکور، مسیح. محمد اوله سیدر. بناءً علیه (یا ایها المسیح بکل
لسان، یا ایها الممدوح عند کل انسان. یا ایها المرجوع الیه فی کل
حین و اوان) دینیلر.

بونوع، صفات اضافیه نک ایسه نهایتی یوقدر. آنک ایچون
بونوع، صفتلر حسب الله تعالی و تقدس حضر تلرینه اطلاق
ممکن اولان اسملر دخی نامتناهیدر.
ایکنجیسی - تکوین اشیا، صفت زائده دکلدر. بناءً علیه
الله تعالانک فاعل افعال اوله سی. صفت اضافیه محضه در.

*
*

ایشته بوراسی مالمومک اولنجه شوراسنی ده اخطار ایدرزکه:
تکوین، لفظنک مخبر و مشعر اولدینی معنی، الله تعالانک
یا مجرد موجد اوله سیدر، یا خود - فلان حکمته مبنی فلان نوعک
موجدی اوله سیدر.

قسم اوله کوره، تکوین، باری تعالی و تقدس حضر تلرینک
یا لکزموجد اولدیغنه دلالت ایدر بر لفظ دیمک اولور.
بومقامده ایسه، موجد، محدث، مکنون، منشی، مبدع

مخترع، صانع، خالق، فاطر، باری کی برطاقم الفاظ وارد رکه،
بونلر الفاظ مترادفه دن اولمغه قریبدرلر.

ایشته بونلر اون عدد لفظدرکه، متقارب المعنی اولقله برابر
ینه آرهلرنده فرقه ده واردر.
شویله که:

(موجد) لفظنک معناسی، وجودده مؤثر اولان دیمکدر.
(محدث) لفظنک معناسی، یوقدن وار ایدن دیمک اولوب،
بو، مطلق ایجاددن اخصدر.

(مکون) موجدده مرادف اولمغه قریبدر .
(منشی) نشو و نمادن مشتق اولوب آزر آزر علی التدریج
تکوین و ایجاد ایدندر .

(مبدع) دفعةً واحدةً تکوین ایدندر .
منشی ایله مبدع، جنس موجد تحتده ایکی نوع کی درلر .
(مخترع) معنایه مبدعه قریبدر .
(صانع) علی سبیل التکلف فعلی اتیان ایدنک اسمی اولمغه
قریبدر .

(خالق) تقدیردن عبارتدر .
بو، حق باریده علمه رجوع ایدر .
(فاطر) شق معناسنه اولان فطرندن مشتقدر .
بونک معناسی دفعةً احداث اولمغه بکزرر .
(باری) شیئی مصلحته موافق وجه اوزره احداث ایدندر .

بر کیمه قلمی ایشنه الیوره جک صورتده آچوب اصلاح
ایدنجه آکا (بری القلم) دینیر .

ایشته الله تعالانک علی سبیل العموم، موجد اولدیغنه دال
اولان شو الفاظک بیانی بودر .

برشی ئی بعینه ایجاده دلالت ایدن الفاظه کلنجه :

بولفظلر همان همان غیر متناهی کبی درلر .

آنلردن ده بوباید بر قاج مثال ایراد ایدلم .

۱ — الله تعالی برشی نافع یاراتدیغنده کندی (نافع) برشی
مؤلم، خلق ایتدیکنده (ضار) تسمیه اولنور .

۲ — حیاتی خلق ایتدیکنده (محی) موتی یاراتدیغنده
(میت) نامنی آلیر .

۳ — قوللرینی اکر ام آله سیله مکرم ایتدیکنده (بر، لطیف)
قهره لائق کوردیکنده (قهار، جبار) تسمیه اولنور .

۴ — عطائی تقلیل بیوردیغنده (قابض) تکثیر ایتدیکنده
(باسط) ناملرینی آلیر .

۵ — ذنوب عبادده عقاب ایله مجازات ایدرسه (منتقم)
اوجزایی ترک ایدرسه (عفو، غفور، رحیم، رحمان) تسمیه
اولنور .

۶ — منع واعطاء، اکر اموالده حاصل اولورسه (قابض،

باسط (جاہ و جلالہ حاصل اولورسہ) خافض ، رافع (ناملرینی آلیر .

بوراسی معلومك اولنجہ دیرزکہ :

انواع واجناس حسیله مقدورات اللہک اقسامی غیر متناہیدر
بناءً علیہ شبہہ یوقکہ بواعتبار ایله اللہ تعالیٰ ایچون اسمای غیر
متناہیہ حاصل اولور .

بلله !

بومقامده برطاقم دقائق واردرکہ آنلری ده بھمہ حال ذکر
ایتملی یز .

دقیقہ

۱

شیئك مقابلی بعضاً اوشیئك ضدی ، بعض کرہدہ عدمی اولور
(معز ، مدل) قولمزله (محیی ، میت) قولمز بیندہ تقابل
تضاد واردر .

(قابض ، باسط ، خافض ، رافع) اسملری بیندہ کی تقابل دخی
تقابل العدم والمملکہ اولمغه قریبدر .

زیرا (قبض) مال کثیر (خفص) جاہ کیر اعطا ایتامہ سندن
عبارتدر .

اعزاز واذلال ، دخی متضاداندر ،

زیرا جناب حقك عبدینی اعزاز ایتامہ سیلہ ، اذلال ایتامہ سی
بیندہ فرق عظیم واردر .

دقیقه


۲

بعض الفاظ وارکه، مترادف اولغه یا قلاشیور .
 لکن تأمل تام، آرا رنده کی فرق لطیفه دلالت ایلر .
 بونکده مثاللری وار .

مثال اول - رؤف و رحیم، بونلر الفاظ مترادفه دن اولغه
 قریبدرلر . شوقدرکه (رؤف) ایصال نفع، جانبیه (رحیم)
 دخی دفع ضرر، جانبیه ده زیاده مائلدر .
 مثال ثانی - (فالح و فتاح، نافع و نفاع، واهب و وهاب)
 لفظلریده بونلر دندر .

شوقدرکه (فاتح) سبب خیرک احداثی مشعردر .
 (واهب) اوخیرک عبده ایصالی مشعردر .
 (نافع) آنکله منتفع اولسون دیه تفعلک عبده ایصالی
 مشعردر .

ایشته بوبابده معتبر اولان شوقانون وقاعده یی بلله دیکک حالده
 بونوع اسمانک حقائقنه وقوف واطلاعک ممکن ومتیسر اولور .



التنجی باب

صفات سلینہ حسینیلہ واقع اولان اسما بیانده در .

معلومك اولسونكه، قرآن کریم بواسطه مملودر .
 بونكه ده طریق ضبطی شودر .
 (سلب) یا ذاته، یا صفاته، و یا خود افعاله عائد اولور .
 ذاته عائد اولان سلوب « الله تعالی نه جوهر در . نه جسم در .
 نه بر مکنده در . نه متحیز در . نه حالد در . نه محلد در . » کی شیلدر .
 شوراسی ده معلومك اولسونكه، بز ذات اللهك سائر ذوات
 وصفاته مخالف اولدیغنه دلیل کتیرمش ایدك . لکن ذاته مغایر
 اولان ذوات وصفاتك انواعی غیر متناهی در . آنکچون شبهه
 یوق که، بوبابده دها برطاقم سلوب غیر متناهی حاصل اولورکه،
 (والله الغنی واتم الفقراء) و (ربك الغنی ذو الرحمة) آیتلری
 ایشته او، سلوبك جمله سندن درلر .

زیرا الله تعالی غنی اولمهی، نه ذاتنده، نه صفات حقیقیه سنده
 ونه ده صفات سلینیه سنده کنیدن غیری بر شینیه محتاج اولماز
 دیمکدر .

(لم یلد ولم یولد) قول کریمی ده کذلک سلوب مذکوره دندر .

صفاته عائد اولان سلوبه کلنجہ : اولاً شوراسی معلوم اولمیدرکہ
صفات نقائصدن اولان هر صفتدن الله تعالیٰ تنزیہ ایتک لازم کلیر.
ایشته علمک، قدرتک، استغنائک، وحدتک اضدادی بابندن
اولانلر اوجمله دندرلر .

علمک اضدادی بابندن اولان سلوبه کلنجہ، بونارده برقاج
قسمدر .

۱ — نفی نوم .

قال الله تعالى « لا تأخذه سنة ولا نوم »

۲ — نفی نسیان .

قال الله تعالى « وما كان ربك نسياً »

۳ — نفی جهل .

قال الله تعالى « لا يعزب عنه مثقال ذرة في السموات ولا في الارض »

۴ — علم آلم یسنک بعض معلوماته تعلقی غیریسنه تعلقدن

آنی منع ایتمز . زیرا جناب ذوالکبریاسنی هیچ برشان، شان دیکردن
اشغال ایلر .

صفت قدرته عائد اولان سلوب دخی برقاج قسمدرلر .

۱ — افعالنده ذات پاکنک تعب و مشقتدن منزله اولمسی .

قال الله تعالى « وما مسنا من لغوب »

۲ — فعلنده آلات و ادواته، و تقدیم ماده و مدته محتاج

اولماز .

قال الله تعالى « انما امرنا لشيء اذا اردناه ان نقول له كن

فيكون »

۳ — فعل کثیر ایله فعل قلیل بیننده قدرتی متفاوت
دکدر .

قال الله تعالى « وما امر الساعة الا كلمح البصر او هو اقرب »

۴ — انتهای قدرتی، و حصول فقری نفی .
قال الله تعالى « لقد سمع الله قول الذين قالوا ان الله فقير ونحن
اغنياء »

صفت استغنايه عائد اولان سلوب دخی « وهو يطعم ولا يطعم ،
وهو يحير ولا يحار عليه » قول کریمی کبی شیردر .

صفت وحدته عائد اولان سلوب دخی شرکا، اضداد،
واندادك نفی مثللو شیردرکه، قرآن عظیم الشان بونارله مملودر .

افعاله عائد اولان سلوبه کلنجه، بونلرده « الله تعالانك شونی
بونی ایشله مر » اولمه سیدرکه قرآن کریم بونلرده مشخوندر .
از جمله :

۱ — الله تعالى باطل، خلق ایتمز .

قال الله تعالى « وما خلقنا السموات والارض وما بينهما باطلاً
ذلك ظن الذين كفروا »

وقال تعال حکایة عن المؤمنین « ویتفکرون فی خلق السموات
والارض ربنا ما خلقت هذا باطلاً »

۲ — الله تعالى لعب، خلق ایتمز ،

قال تعالى «وما خلقنا السموات والارض وما بينهما الا عيان
ما خلقناها الا بالحق»

۳ — عبث يار اتماز .

قال تعالى «افحسبتم انما خلقناكم عبثاً وانكم اليها لاترجعون
فتعالى الله الملك الحق»

۴ — الله تعالى كفره راضى اولماز .

قال تعالى «ولا يرضى لعباده الكفر»

۵ — الله تعالى ظلمى اراده ايتمز .

قال تعالى «وما الله يريد ظلماً للعباد»

۶ — الله تعالى فسادى سومز .

قال تعالى «والله لا يحب الفساد»

۷ — الله تعالى سابقه جرمى اولميانه عقاب و عذاب ايتمز .

قال تعالى «ما يفعل الله بعذابكم ان شكرتم»

۸ — الله تعالى مطيعلرك طاعاتيله متفع ، مذنبلرك معا .

صيسيلاهده متضرر اولماز .

قال تعالى «ان احسنتم احسنتم لانفسكم وان اساتم فلها»

۹ — الله تعالى انك افعال واحكامنده فرد آفريدهنك اعتراضه

حقى يوقدر .

قال تعالى «لا يسئل عما يفعل وهم يسألون»

وقال تعالى «فعال لما يريد»

۱۰ — الله تعالى وعندنده، وعيدنده خلف ايتمز .

قال تعالى «ما يبدل القول لدى وما انا بظلام للعبيد»

ایشته شواصل وقاعده معلومك اولنجه دیرزکه :
بحسب الذات وبحسب الصفات وبحسب الافعال اولان سلوبك
اقسامی غیر متاهیدر .

کذلک بوجنسدن ده غیر متاهی اقسام اسماحاصل اولور .
ایمدی بویابه مناسب اولان بعض اسملری ذکر ایدلم .
اولکیسی — قدوس و سلام در .
قدوس ، حقیقت ذات خدانک فی انفسها نقائصدن بشقه بر
شی اولیمان ماهیاته مخالف اوله سندن عبارت اولغه بکزر .
سلام ، اودانک صفات نقصدن برشیه موصوف اولماسندن
عبارتدر .

دیمک اولورکه (قدوس) ذاته (سلام) صفاته عائد
بررسلیدر .

ایکنجیسی — عزیزدرکه نظیری بولنمیان دیمکدر .
اوجنجیسی — غفاردرکه کناهکارلردن عقابی اسقاط ایدندر .
دردنجیسی — حلیمدرکه عقوبتی تعجیل ایتمین ومع ذلک ایصال
رحمتدن ده امتناع المین در .


بشنجیسی — واحددرکه بوده « حقیقت مخصوصه ده ، صفت
التهیده ، خلق ارواح واجسامده ، نظم عالمده ، وکړک برذرء
حقیره نك ، کرکسه عرش اعظمک احوالی تدبیرده کندینه کیسه
مشارك اولماز » معناسنی مشعردر .

التجیسی — غنی درکه ، جناب حقک حاجات و ضروراتدن
منزه اوله سیدر .

یدنجیسی — صبور در . صبور ایلہ حلیم اسماری بینده کی
 فرق شودرکه، (صبور) اجرای عقابہ قدرتی وار ایکن، مسیئی
 معاقبہ ایتمین در .

(حلیم) ینه او قدرته صاحب اولمقله برابر مسیئه نعمتی
 ایصال دده برمانعی اولمیاندر .

« وقس علیہ البواقی » واللہ الهادی .



یدنجی باب

صفات اضافیه الیه برابر صفات حقیقیه به دال اولان اسمایاننده اولوب بر قاج
فصلی مشتملدر .

فصل اول

صفت قدرت، سببیله حاصل اولان اسمایاننده در .

صفت قدرته دال اولان اسملرچو قدر .

اولکیسی — القادر در .

قال الله تعالى « قل هو القادر على ان يبعث عليكم عذاباً من فوقكم او من تحت ارجلكم » وقال في اول سورة القيامة « يحسب الانسان ان لن نجتمع عظامه بلى قادرين على ان نسوى بنانه » وقال في آخر السورة « اليس ذلك بقادر على ان يحيى الموتى » .

ایکنجیسی — القدير در .

قال تعالى « تبارك الذى بيده الملك وهو على كل شىء قدير »
بو، (قدير) لفظی وصف قدرته مبالغه افاده ايدر .

اوچنجیسی — المقتدر در .

قال تعالى « وكان الله على كل شىء مقتدراً »
وقال « فى مقعد صدق عند مليك مقتدر »

در دنجیسی — یاری تعالی شو صفت قدرته ذات پا کندن
 صیغه جمع ایله ده تعیر بیور مشلر در .
 قال تعالی « فقد رنا قنع القادرون »

معلوم اولسون که (ملک) لفظی دخی بر شرط خاص ایله
 قدرت افاده ایدر .

بو (ملک) لفظی قرآن مبینده وجوه مختلفه اوزره کش در .
 اولکیسی — المالك در .

قال الله تعالی « مالک يوم الدين »

ایکنجیسی — الملك در .

قال تعالی « فتعالی الله الملك الحق »

وقال « هو الله الذی لا آله الا هو الملك القدوس »

وقال « ملک الناس »

بوده معلوم اولسون که قرآن کریمده (ملک) لفظتک

ورودی (مالک) لفظتک ورودندن زیاده در .

سبی ده شودر که (ملک) شائاً (مالک) دن اعلا در .

اوچنجیسی — المالك الملك در .

قال تعالی « قل اللهم مالک الملك »

در دنجیسی — الملیک در .

قال تعالی « عندملیک مقدر »

بشنجیسی — الملك در .

قال تعالى « الملك يومئذ الحق للرحمن »

وقال تعالى « له ملك السموات والارض »

برده معلوم اولسون که (قوت) لفظی معناه (قدرت)


لفظه قریبدر . و بو (قوت) لفظی دخی قرآن کریمده وجوه
مختلفه اوزره کلمش در .

اولکیسی — القوی در .

قال تعالى « ان الله لقوی عزیز »

ایکنجیسی — ذو القوه در .

قال تعالى « ان الله هو الرزاق ذو القوة المتین »



فصل ثانی

صفت علم سببیه حاصل اولان اسما بیانده اولوب برقاج لقطی شاملدر

لفظ

۱

علم، و علمدن مشتق اولان لفظلردر که بونده برقاج وجه
واردر .

۱ — الله تعالیه علم، اثبات ایتک .

قال الله تعالى « ولا یحیطون بشئ من علمه » وقال تعالى « ان الله
عنده علم الساعة » .

۲ — عالم .

قال تعالى « عالم الغیب والشهادة »

۳ — علیم .

بواسم شریف، قرآنک چوق یرنده وارد اولمشدر .

۴ — علام .

قال تعالى حکایة عن عیسی علیه السلام (انک انت علام
الغیوب) .

۵ — اعلم، (صیغه تفضیل)

قال تعالى (الله اعلم حیث یجعل رسالته)

۶ — علم، (صیغه ماضی معلوم)

قال تعالى (علم الله انكم كنتم تحتانون انفسكم)

۷ — يعلم، صيغه مستقبل معلوم)

قال تعالى « وما تفعلوا من خير فان الله يعلمه » وقال تعالى « والله يعلم ما تسرون وما تعلنون »

۸ — علم، (تفعيل بابندن صيغه ماضی معلوم)

قال تعالى « وعلم آدم الاسماء كلها »

وقال في حق الملائكة « سبحانك لا علم لنا الا ما علمتنا »

وقال (وعلمك ما لم تكن تعلم)

وقال (الرحمن علم القرآن)

شوراسی ده معلومك اولسون كه، تفعیل بابندن اولان شو
لفظ هر نه قدر قرآنده کثیر الورد ایسه ده ینہ اللہ تبارک وتعالی
حضر تری نه « معلم » اطلاق جائز دکدر . زیرا (معلم) لفظی
برنوع تقیصه بی مشعردر .

۹ — علامه، لفظی ده هر نه قدر مبالغه افاده ایدرسه ده

علمده کی بومبالغه نك كدوعنا وپك چوق زحمت واعتنا ايله حاصل
اولدینغی ده مفید اولوب بوايسه حق باریده محال ایدوکندن
الله تعالیه (علامه) اطلاق جائز دکدر

لفظ

۲

خبر — خبره

بولفظ، علمك مراد فی کبی در .

حقى بعضیاری حد علمه « علم، خبردر . » دیشلر .
 ایشته بوراسی معلومك اولدقده دیرزكه :
 قرآنده حق باریده (خیر) لفظی پك چوق وارد اولمشدر
 لفظ

۳

شهود - مشاهده

حق باریده اطلاق اولنان (شہید) لفظی ده بوندن مأخوذدركه
 « مشاهدأ لها عالمأ بها » یولنده تفسیر اولنور.
 اما شهادت ایله تفسیر ایتدیكمز وقت صفت کلامدن معدود
 اولور.

لفظ

۴

حکمت

بولفظ ایله ده بعضأ (علم) مراد اولور .
 بعضأ دخی « ترك ما لا ینبئ وفعل ما ینبئ » اراده اولنور.

لفظ

۵

لطیف

بولفظ ایله ده بعضأ دقائقه علم، مراد اولور.
 بعضأ دخی طرق خفیه وعجیبیه ایله عباد خدایه ایصال منافع
 اراده اولنور.

اوچنچی فصل

صفت کلام، سببیلله حاصل و مجرای کلامده جاری اولان اسمای بیاننده در.

لفظ

۱

کلام

بوننده برقاق وجه وارددر.

وجه اول — لفظ کلامدر.

قال الله تعالى «وان احد من المشركين استجارك فأجره حتى يسمع كلام الله»

وجه ثانی — کلام، لفظنک صیغه ماضیسیدر.

قال تعالى «وكلم الله موسى تكليماً»

وقال «ولما جاء موسى لميقاتنا وكلمه ربه»

لفظ

۲

قول

بولفظدهده برقاق وجه وارددر.

وجه اول — صیغه ماضیدر. (قال)

الله تعالى «واذ قال ربك للملائكة» بیورمشدر.

قرآن کریمده بونک نظائری چوقدر.

وجه ثانی — صیغه مستقبلدر. (يقول)

قال الله تعالى « أنه يقول انها بقرة »
وجه ثالث - قيل وقولدر .

قال تعالى « ومن اصدق من الله قيلاً »
وقال « ما يبدل القول لدى »

لفظ

۳

امر

بوامر، لفظی قرآنك مواضع متعدده سنده كلشدر .

قال الله تعالى « الامر من قبل ومن بعد »

وقال « الاله الخلق والامر »

وقال حكاية عن موسى عليه السلام « ان الله يأمركم ان تدبجوا

بقرة »

لفظ

۴

وعد

حق سبحانه وتعالى « وعداً عليه حقاً في التوراة والانجيل

والقرآن » و « وعد الله حقاً انه يبدؤ الخلق ثم يعيده » بيورمشدر .

لفظ

۵

وحی

خدای متعال (وما كان لبشر ان يكلمه الله الا وحياً)

و (فاوحى الى عبده ما اوحى) بيورمشدر .

لفظ

۶

الله ذوالجلالک عبادینه شا کر اوله سیدر.
 قال تمالی (فاولئک کان سعیهم مشکوراً)
 وقال (وکان الله شا کرّاً علیما)



در دنجی فعل

اراده، و اراده به قریب اولان الفاظ بیانده در.

لفظ

۱

اراده

الله تعالی (یرید الله بکم الیسر ولا یرید بکم العسر) بیورددی.

لفظ

۲

رضا

حق تعالی (وان تشکروا یرضه لکم)

برده (ولا یرضی لعباده الکفر)

برده (انقد رضی الله عن المؤمنین اذینا یعونک تحت الشجرة)

وسابقین اولینک وصف شریفارنده (رضی الله عنهم ورضوا عنه)

وحضرت موسادین حکایه (وعججات الیک رب لترضی) بیورمشدر.

لفظ

۳

محبت

الله تعالی (یحبههم ویحیونه)

برده (ویحب المتطهرین) بیورمشدر.

لفظ

:

کراهت

حق تعالی (کل ذلک کان سیئه عند ربک مکروهاً)

برده (ولکن کره الله اتباعهم) بیورمش در .

اشعریه ویش که :

کراهت، ایشه مامه بی اراده ایتکدن عبارتند .

معتزله دیش که :

کراهت، اراده دن یشقه برصقتدر .

« والله اعلم بالصواب »

— — —

دردنجی فصل

اراده، واراده به قریب اولان الفاظ بیانده در.

لفظ

۱

اراده

الله تعالی (یرید الله بکم الیسر ولا یرید بکم العسر) بیوردی.

لفظ

۲

رضا

حق تعالی (وان تشکروا یرضه لکم)

برده (ولا یرضی لعباده الکفر)

برده (لقد رضی الله عن المؤمنین اذینا یعونک تحت الشجرة)

وسابقین اولینک وصف شریفارنده (رضی الله عنهم ورضوا عنه)

وحضرت موسادن حکایه (وعجلت الیک رب لترضی) بیورمشدر.

لفظ

۳

محبت

الله تعالی (یحبههم ویحبونه)

برده (ویحب المتطهرین) بیورمشدر.

لفظ

۴

کراحت

حق تعالی (کل ذلک کان سیئه عند ربک مکروهاً)

برده (ولکن کره الله انبعاثهم) بیورمش در .


اشعریه دیمش که :

کراحت، ایشله مامه بی اراده ایتمکدن عبارتدر .

معتزله دیمش که :

کراحت، اراده دن بشقه برصفتدر .

« والله اعلم بالصواب »



بشنجی فصل

سمع وبصر بیانده در

حق سبحانه و تعالیٰ حضرت تبری (لیس کمله شیء و هو السميع البصیر)

برده (لثیه من آیاتنا انه هو السميع البصیر)

برده (اتی معکما اسمع واری)


برده (لم تعبد ما لا یسمع ولا یبصر)

برده (لا تدركه الابصار و هو یدرك الابصار)

بیورمش در .

ایشته صفات اضافیه ایله صفات حقیقیه حقنده کی کلامک

مجموعی بودر .



التعجی فصل

صفات سلبیه الیه صفات اضافیه بیانده در :

معلوم اولسون که ،

(الاول) کندی غیری اوزرینه سابق و متقدم اولوب غیری کندی سبق و تقدم ایتامش اولاندر .

ایمدی غیری اوزرینه متقدم و سابق اولهسی (اضافت) در غیری کندی سبق و تقدم ایتامش اولهسی ده (سلب) در .
دیمک اولورکه (الاول) لفظی اضافت و سلبیدن مترکب برحالت افاده ایدر .

(الاخر) کندی غیریسندن صکره باقی قالان، غیری کندیدن صکره قالمیاندركه، بوده اضافت و سلبیدن مترکب برحالتی مفیددر .
(الظاهر) بو، اضافت محضه در . زیرا بونک معناسی جناب بارینک بحسب الدلائل ظاهر اولهسیدر .

(الباطن) بوده سلب محضدر . زیرا بونک معناسی جناب حَقْک بحسب الماهیه خفی اولهسیدر .


(القیوم) دخی اضافت و سلبک مجموعنه دال اولان اسمادن بری در . زیرا بولفظ « معنای قیام » ده مبالغهیه دلالت ایدر .
بومبالغه دخی آتی الذکر ایکی امرک اجتماعی حالنده حصوله کلیر .

اولکیسی — کنیدن ماعدا بر شیئه قطعاً و قاطبۀ محتاج
اولماقدر .

بوعدم احتیاج دخی کرک ذاتنده، و کرک جمله صفاتنده،
واجب الوجود اولما دقچه حاصل اوله ماز .

ایکنجیسی — کافۀ ماسواسی کرک ذاتلرنده و کرک صفتلرنده
کندینه محتاج اولمقدر که بوده کافۀ ماسواسنه کندی مبدأ اوله سیله
اولور .

بوصورتده اولکیسی (سلب) و ایکنجیسی (اضافت) در .
ایکیسنک مجموعی ده (قیوم) دن عبارتدر .



يدنجى فصل

هم ذاته، هم ده صفات حقيقه واصنافيه وسلبيه دال اولان اسما بياننده در.

(الله) قولمز بواسطه درند.

بواسطه پاك، شوصفتلر كه هپسنى افاده ايدر.

زيرا (الله) اسم شريفى جناب واجب الوجودك موجود اولديغينه ده، اووجودك كيفياتنه ده، يعنى كندينك ازلى، ابدى، واجب الوجود ايدوكنه ده، تنزيهه دال اولان صفات سلبيه ده، ايجاد وتكوينه دال اولان صفات اضافيه ده دلالت ايدر.

شو (الله) لفظى غيراللهه ده اطلاق اولنورمى؟

ايشته بوراسى مختلفيه در.

واقعا كفار قريش كندى صئلى حقينه ده (الله) اطلاق

ايدرلردى. فقط بواسطه عجايب دين اسلامده جائز اولورمى؟

مشهور اولان عدم جوازى در.

كرچه بعضيلرى «غيراللهه ده (الله) اطلاق جائزدر! زيرا بعض اذكارده (يا الله الآلهة) ديه وارد اولمشدر.» ديمشدر. فقط بو پاك بعيددر.

(الله) قولمزه كلنجه: قريباً بيان اولنه جنى وجهله بو، جناب

حقك اسم علمى در.


عجبا بوده شو صفتلره دلالت ایدرمی؟
 شبهه یوقکه، اسمای اعلام، اشارات مقامنده قائمدرلر.
 بونک معناسی شودرکه، الله تعالی حضرتلری کندی ذات
 اجل واعلاسنک مشارائیه اولهسی صحیح اوله حق بر حیثیه مابلس
 اولسهیدی، (الله) اسم شریفی او اشارتک مقامنده قائم اولوردی.

ذات مخصوصیه اولان اشارت، او ذات ایله قائم اولان
 صفاتهده شاملیدر؟

ایشته بوراسی ده تحت اختلافدهدر.
 اگر «ذاته اشارت، صفاتهده شاملدر» دیه جک اولور سهق،
 (الله) قولمز صفاتک جمله سنه دلیل اولمش اولور.
 دیرلر سهکه:

ذاته اشارت، صفات سلبیه شامل اوله ماز. بناء علیه (الله)
 لفظنک صفات سلبیه دلالت ایتما مہسی لازم کلیر.
 جواب ویررزکه:

حق باریده اشارت، علائق حسیه دن منز اولان اشارت
 عقلیهدر. اشارت عقلیهنک ایسه، بعضاً سلوبهده شمولی اولور.



سکزنجی فصل

بو فصل شول اسملرک بیانده درکه بونلرک اسمای ذاتنمی اسمای صفاتنمی نه دن اولدقلرینی تعیینده عقلا اختلاف ایتشلر در .

بو بحث، اهل تشبیه ایله اهل تنزیه بیننده قائم اولان منازعه دن ظهور ایتمش در .
شویله که :

اهل تشبیه « موجود، یا متخیز اولور؛ یا متخیزده حال اولور .
نه متخیز؛ نه ده متخیزده حال اولمیان شی شو ایکی قسمدن ده خارج قالیرکه، اوده محض عدم در؛ دیر .
اهل توحید و تقدیس دخی دیر که :

اولا موجود متخیزی اله آلام . موجود متخیز منقسم در .
هر منقسم اولان ده محتاج در . دیمک اولور که هر متخیز محتاج در .
محتاج اولمیان شیئک ایسه متخیز اولمه سی ممتنع در .
متخیزده حال اولان شیئه کلنجه : بوده احتیاجه اوته کندن
دها لائق و اولادر . بناءً علیه « واجب الوجود لذاته » نک کرک
متخیز و کرک متخیزده حال اولمه سی ممتنع اولور .

بواصل معلومک اولنجه دیرزکه :

بویابده بعض الفاظ وارکه آنلرک ظواهری جسمیتی، وحیز
ومکانده حصولی مشعردرلر .

ایشته اوالفاظدن بری ده (العظیم) در .
زیرا اهل تشیه، جناب بارینک ذات اجل واعلاسی حجمیت
ومقدارده عرشدن ده، ماتحت العرشک هپسندن ده بیوکدر .
و (العظیم) ک معناسی ده بودر دیدیلر .
الفاظمذ کورده دن بری ده (الکبیر) در .
بوندن مشفق اولان (اکبر، کبریا، متکبر) لفظلری ده
آنلردندر .

معلومک اولسونکه، بن « العظیم » ایله « الکبیر » لفظلری
ییتنده فرق. بیاننه تصدی ایتمش محققیندن کیسه یی کورما مشعدر
شوقدرکه. تحقیقده برقاق و جهدن طولای نینهماده فرق.
واردر .

وجه اول — اخبار الیه ده کلشدرکه الله ذوالجلال (الکبریا
ردائی، والعظمة ازاری) بیورلر .

ایشته بوحدیث قدسیده جناب مولی کبریایی (رداء) عظمتی
(ازار) مقامند، قیلش در . (رداء) ایسه معلومدرکه درجه ده
(ازار) دن یوکسکدر .

بناءً علیه صفت کبریآنک حالی، صفت عظمتدن دهاعالی
اولمق لازم کلیر .

وجه ثانی — شریعت مطهره شواییک حالک آردسنی آیرمش در

زیرا دین اسلامده معتاد اولان — تحریمه صلاتده (الله اکبر)
 دینمکدر . هیچ کیمسه تحریمه صلاتده (الله اعظم) دینامش در .
 وجه ثالث — (کبیر) دن مشتق اولان (اکبر) و (متکبر)
 کبی لفظلار حق باریده مذکوردر . اما (عظیم) اولیله دکلددر .
 زیرا (متعظم) لفظی حق باریده ذکر اولنمیش در .

معلوم اولسون که ، الله تعالی بوایکی لفظدن هر برینی آخرک
 مقامنده اقامه بیورمش در .

شویله که :

بر آیت جلیلهده (ولایؤده حفظهما وهو العلی العظیم) آیت
 کریمه دیکردهده (حتی اذا فزع عن قلوبهم ، قالوا ماذا قال ربکم ،
 قالوا الحق وهو العلی الکبیر) بیورمش در .
 بلله !

مباحث سابقه ، عظیم ایله کبیر بیننده فرق اولدیغنی ؛ شوایکی
 آیت کریمه ایسه بینهماده فرق اولمادیغنی مشعر ایدوکنندن
 بو عقدهیی حل ایچون بوندن ده براز بحث اتمه من لازم کلیر .
 « ومن الله الارشاد والتعليم »

بزدیرزکه :

کندیغنی غیریبی استکبار ایتسون ، ایتسون ! وبو
 صفت کبریایی بر کیمسه یلسون ، یلسون : (الکبیر) لفظی
 جناب بارینک ذاتنده کبیر ایدوکنی مشعر اولمغه

بکزر . اما عظمت اولیه دکدر . عظمت ، واجب تعالانک کنیدی
غیری استعظام ایدر بر حیثیه ملابس اوله سندن عبارتدر .

بو حالده صفت اولی (صفت ذاتیه) و صفت ثانیه (صفت
عرضیه) اولش اولور . امر ذاتی ایسه امر عرضی دن اعلی
واشرفدر .

ایشته بومقامده بیانی ممکن اوله بیلن فرق بودر . « والعلم
عندالله »

جمیعت وجهتی مشعر اولان اسملردن بعضیلری ده (علو)
دن مشتق اولان الفاظدرکه ، قوله تعالی (سبح اسم ربك الاعلی)
و (المتعالی) و برده سورۀ نحلک اولنده واقع (سبحانک وتعالی
عمایش رکون) آیت جلیله سنه امتثالاً نام پاک خدا ذکر اولندقچه
اهل ذکر طرفندن علی سبیل الاطباق آکا ارداف ایدیلن
(تعالی) لفظلری آنلردندر .

بلله !

الله تعالی و تقدس حضرتلرینک جهت و مکانده بولندیغنه
قائل اولانلر دیمشارکه :

جناب حقک علوی ، تعالیسی ، کنذینک جهت فوقده موجود
اولهسی معناسی مشعردر .

بوابده یکزبان وفاق اولدقدن صکره ایچلرندن کیمی « الله
ذوالجلال ، عرشک اوستنده جالسدر ! » کیمی « بعد متناهی ایله

عرشه مبیندر !! « کینی ده » خیر! بعد غیر متاهی ایله عرشه
مبیندر !! « دیدی .

مشبهه ، طبائقه سی (العظیم ، الکبیر) لفظلارینی جسمیت
ومقداره (العلی) لفظنی ده مکان وجهته علوه حمل ایتشلر .

اهل تنزیه وتقیدس دخی ، (العظیم ، الکبیر) لفظلارینی
جسمیت ومقدار افاده ایتمین وجوه آتییه حمل ایلدیلر .

وجه اول — باری تعالی « مدت وجود » حسیله عظیمدر .

شویله که، کندی ازلی در . ابدی در . ازلیک ابدیلک ایسه
وجودده، بقاده، دوامده عظمت وکبریانک نهایتی در .

وجه ثانی — باری تعالی علم وعملده عظیمدر .

وجه ثالث — باری تعالی رحمت وحکمتده عظیمدر .

وجه رابع — باری تعالی کمال قدرته عظیمدر .

(علو) لفظنی دخی اهل تنزیه، باری تعالی انک صفات نقائص
وحاجاتدن منزله اولمقلغنه حمل ایدرلر .

ایشته بوراسی بیلندکدن صکره اکلاشیلیرکه ، (العظیم ،

الکبیر) لفظلاری عندالمشبهه اسمای ذاتدن وعند اهل التوحید

اسمای صفاتندرلر . واما (العلی) عندالکل، اسمای صفاتندر .

شوقدرکه لفظ مذکور عندالمشبهه، علو الاعلادن عبارت اولان

حیزده حصولی مفید اولدینی حالده، عند اهل التوحید آلهیته

شایان اولمان هرشیدن منزله اولمقلغنی افاده ایدر .

ایشته بویابده کی بحثک تمامی بودر .

طقوزنجی فصل

الله تعالی ایچون اسمای مضمره بابندن حاصل اولان اسمای بیاننده در.

معلومك اولسونكه، اسمای مضمره اوچدر .

انا انت هو .

اقسام ثلاثه نك اعرفی (انا) قولمزددر . زیرا بو برلفظدرکه هرکس آنکله کندی نفسنه اشارت ایدر . هرکسك عندنده اعرف المعارف ایسه کندی در .

شواقسامك اوسطی ده (انت) قولمزددر . زیرا بو، مخاطبك حاضر اولمهسی شرطیه غیره خطایددر . وغیره خطاب اولدیغی اجلدندرکه ، (انا) قولنك دوننده اولور . برده بونده مخاطبك حاضر اولمهسی شرط ایدوکی اجلدندرکه (هو) قولندن اعلا در . ایشته تبین ایتدی که، اقسام ثلاثه مذکوره نك اعلاسی (انا) اوسطی (انت) ادناسی ده (هو) در .

کلمه توحید ایسه الفاظ مذکوره نك هر بریله وارد اولمشدر .

انا

سورة نحلک اولنده (ان اندروا انه لا آله الا انا) طه

سوره سنده ده (انتی انا الله لا آله الا انا) بیورلمشدر .

انت

(فنادی فی الظلمات ان لا آله الا انت) قول کریمنده کلمشدر .

هو

بولفظ قرآنك چوق یرنده وارد اولمشدر.
 اولی - سورۃ بقرده واقع (وآلهکم آله واحد لا آله
 الا هو الرحمن الرحیم) و آخری سورۃ مزملده (رب المشرق
 والمغرب لا اله الا هو فاتخذہ وکیلا) آیت جلیله لرنده کلمشدر.
 بو کلمه نك شو اسمای اربعه دن بشقه بر اسمہ مقرونأ و رودی
 بحثه کلنجہ: بو دخی (قال امنت انه لا اله الا الذی آمنت به بنو
 اسرائیل) آیت جلیله سننده فرعوندن محکی اولوب، مع ذلك
 فرعونك بو صورته آوردۃ زبان تکرار ایتدیکی کلمۃ توحیدك
 حائر عن قبول اولمادیغنی ده جناب باری متعاقبا بیان بیورمشدر.
 ایشته شمدی ده شو اقسامك احکامنی بیان ایدلم.

قوله

لا اله الا انا

الله ذوالجلالدين وياخود آندن علی سبیل الحکایه ذکر
 ایدندن بشقه سی بو کلام ایله تکلم ایتك جائز اوله ماز.
 زیرا بو کلمه قائله اثبات الهیتی مقتضی درکه، بوده الله تعالادن
 بشقه سنه لائق دکلدر.

شوراسی ده معلومك اولسون که، بو کلمۃ شریفه نك ییلتمه سی
 اول امرده (انا) قولنك - یعنی ذات احدیتك ییلتمه سیله مشروط
 اولوب، بو علم و معرفت ایسه علی سبیل التمام والکمال، الله
 ذوالجلالدين بشقه سی ایچون حاصل اوله ماز.
 زیرا هر کسك بیله کندی ذات مخصوصه سنه اولان علمی

غیر یسنگ آکا اولان علندن اکلدر . لاسیا حق باریده .
 ایشته تبین ایتدی که . (لاله الا انا) قول کریمک مدلول
 منیفی علی سبیل الکمال اللهدن بشقه سی بیه مز .
 قوله

لاله الا انت

ایشته بوکلامک طرف عبددن ذکر ی صحیح اولور . لکن
 شو شرط ایله که مخاطب، حاضر اوله؛ غائب اولیه .
 شوقدر که بو حالت شریفه کندینک جمیع حظوظ نفسدن
 غیبتی حالنده انحق یونس علیه السلامه حاصل اوله بیلش در .
 ایشته حضرت یونسک جمیع حظوظ نفسدن غائب اولمادقه
 بو حالت شریفه نک کندینه تجلی ایدمه مامسی شونی تنیه و اخطار
 ایلر که، انسان هر بر حظ نفسدن غائب اولمادقه مشاهده مقامنه
 واصل اوله ماز .
 اما درجه ثلثده اولان .

قوله

لاله الا هو

ایشته غائبین دن بوکلامک صدوری صحیح در .
 معلومک اولسون که، درجات حضور، قرب و بعد ایله
 و تجلینک کمال و نقصانیله مختلفدر که درجات حضوردن ناقص اولان
 هر بر درجه، درجه کامله یه نسبتله غیبتدر . و چونکه درجات
 حضور، غیر متناهی اولدیغندن کالات و نقصاناتک مرتبه لری ده
 غیر متناهی درلر .

بو صورتده حضورو غیبت درجه‌لری ده غیر متناهی اولمش
اولور .

ایمدی هرکیم که آنک حقنده « او، حاضر در . » سوزی
صادق اوله؛ اعتبار آخرله ده « او، غائبدر » سوزینه ماصدق
اولور . بونک عکسی ده اوله در . ایشته بومعنایی مشعر اولق
اوزره شاعر دیمش که :

ایا غائباً حاضر آفی الفؤاد

سلام علی الغائب الحاضر

حکیمدرکه، اولیای کرآمدن جناب شبلینک وفاقی یاقلاشدیغی
وقت، یاننده بولنلاردن بعضیلری کسدینه (لا اله الا الله) دیمه یی
اخطار ایتشار .

جناب مشار الیه دخی جواباً :

کل بیت انت حاضرده، غیر محتاج الی النمرج

وجهک المأمول حجتنا، یوم تأتی الناس بالعجج

قطعه سنی انشاد ایلشدرکه، خلاصه مالی - الهی ! عز
حضورکله شرفیاب اولان خانه، قنادیل فروزانه احتیاجدن مستغنی در
وحدانیتکی اثبات ایچون خالق عالم حجج و براهین ایله حضور
عزتکه کله جک لری کون، بزمده حجتمز، رؤیت و مشاهده سیله
شرفیاب اولمه من مأمول اولان دیدار پرانوارک اولسون! دیمکدر .

معلوم اولسون که، (هو) لفظنده برطاقم اسرار عجیبه و احوال
عالیه وارددرکه بونلاردن بعضیسنک شرح و تقریر و بیانی ممکن

ایسه ده بعضیسنک شرحی خارج حیز امکاندر .
مصنف کتاب دیرکه :

بن بتوفیق الله تعالی بولفظ شریفک بعضی اسرار لطیفه سنی
تحریر ایتمشدر . شوقدرکه (هو) دیدکجه قلمده بولدیغیم . انجبت
وسعادته او کلمات مکتوبه نی هر نه وقت مقابله ایدی ویردم ایسه .
کلمات مکتوبه نی او احوال مشاهده یه نسبتله پک حقیر . پک بیایغی
بولدم .

ایشته بو حالدن اکلادم که ، شو کلمه طیه نک قلبده بر تأثیر
عجیبی واردر . اوله تأثیرکه شرح و بیان ، اکا واصل اوله بیلک
پیرون حد امکاندر . آنکچون بزده یالکزر ممکن اوله بیله جکنی
ذکر ایدرزده دیرزکه :

بونده بر طاقم اسرار لطیفه واردر .

اولکیسی — برکیسه (یا هو !) دیدیکی وقت کویا دیمش
اولورکه ، « بن کیم که سنی بیلک هوسنه دوشهیم ! بن کیم که حتی
سکا مخاطب اوله بیلیم ! ترا بک حدینه می دوشمش که . رب الارباب
ایله مخاطبه یه قاتقشسین ! نطفه و دمندن متولد اولان عاجز ایله —
ازایت وقدمله متصف اولان قادر مطلق بیننده نه مناسبت واردر ؛
سن جمیع مناسباتدن اعلی و برترسین ! سن عقول و خیالات
علاققندن مقدس و مطهرسین ! »

ایشته بوسبیدن ناشیدرکه ، عبد جناب باری یه خطاب غائبین
ایله خطاب ایدرک (یا هو !) دیر .

ایکنجیسی - ایشته شو (هو) لفظی نصل که عبدک دنائت
وعدم نفسی اقراره دلالت ای دیورسه، کذلک جمیع ماسوی
اللهک محض عدم اولدیغنی مقرر بولندیغنه دلالت ایدر. زیرا
قائل (یا هو!) دیدیکی وقت، وجودده ایکی شیدک حصولی مفروض
اولسه، (هو) قولمز او ایکی شیئده جمیعاً صالح اولمق لازم کلیردی ده
بناء علیه قائلک (هو) دیمه سی سببیله او ایکی شیء موجوددن یالکز
بری متعین اولمازدی.

ایمدی عبد (یا هو!) دینجه، جمیع ماسوی اللهک عدم محض،
ونفی صرف اولدیغنه حکم ایتمش اولور.
نصل که جناب باری (کل شیء هالک الا وجهه) بیورمشدر.
جمیع ماسوی اللهدن فایه دائر اولان شو ایکی مقام، غایت
جلالده واقعدرکه، عبد جناب مولای (یا هو!) قولیله ذکره
مواظبت ایتدکجه بونلر حصوله کله مز.

اوچنجیسی - عبد، هر نه زمان الله تعالی اسمای صفاتدن
براسم ایله ذکر ایدرسه، معرفه اللهده مستغرق اولمش اوله ماز.
زیرا (یا رحمن!) دیدیکی وقت، الله تعالانک رحمت الهیه سنی
تذکر ایتمش، بناء علیه آنک طبعی طلب رحمتیه مائل اولمش
اولورده آندن حصه مند اولمق ایستر.

کذلک (یا کریم! یا محسن! یا غفار! یا وهاب! یا فتاح!)
دیدکجه ده بهره مند عنایت اولمق ایستدیکنی اکلایتمش اولور.
(یا ملک!) دیدیکی وقت دخی، جناب حقک ملکنی،
ملکوتی. و ملک و ملکوتنده کی اقسام نع سبحانیه سنی تذکر ایدرک

بالطبع اوجہتہ میلان وجدان حاصل اولورده آندن حصہ ربای
منفعت اولق ایستر .

ایشته سائر اقسام صفات دخی بوکا قیاس اولنسون .
اما (یاہو !) دیدیکی زمان، عبد ذا کر بیایرکہ، بو (ہو)
ضمیرینک مرجعی ذات پاک خدادر . بو ذکر شریف ایسہ البتہ
شبہہ یوق کہ . ذات اللہدن بشقہ برشیئہ دلالت ایتمز، بناءً علیہ
ذا کردہ نور ذکراللہ، حاصل اولورکہ بونور تابان، ذکر غیر
اللہدن متولد اولان ظلماتہ کدورتیدیر اولماز . ایشته بوصردہ
قلب ذا کردہ نور تام، کشف کامل حاصل اولور .

دردنجیسی — خلق تزدندہ معلوم اولان صفات مولی،
یا صفات جلالدر، یا صفات اکرامدر
صفات جلال شونلردر .

» جسم دکلدز . جوهر دکلدز . غرض دکلدز . حائر مکان
دکلدز . مکاندن محالین منزہدر . «

بونده ایسہ بر دقیقه واردر . شویله کہ :
برسلطان ذیشانک مخاطبہ سیلہ شرفیاب اولان کیسہ، اول
سلطان ذیشانہ خطاباً :

» سن کور دکلسین ! سن صاغر دکلسین ! سن شودکلسین !
بودکلسین ! « دیسہدہ انواع معایب و نقصاناتی صایوب طور سہ
شبہہ یوق کہ زجر و منع و تادیبہ مستحق اولور و آنک شو
یولده کی مخاطبہ سی سوء ادب عد اولنور .

صفات اکرام دخی « الله تعالى مخلوقاتك خالق، ونظم اكمل
اوزره مرتبي اولمه سيدر . »

ايشته بوندهده ايكي وجهدن طولايي بردقيقه واردر .
۱ -- شبهه يوق كه، كال خالق، كال مخلوقدن مراتب نامتناهي ايله
اجل واعلادر .

ايمدي جناب حقاك نعوت كاليله صفات جلالتي « بو مخلو -
قاتك خالقيدر » يولنده شرح ايتديكمزده ، بو مخلوقاتك كالني
كال جلال خالقه شرح وبيان كي قيلمس اولورز . بو ايسه كامل
متعالی يي، غایت خسیس و آلحق بر طریق ايله تعریف اقتضا
ايدركه، بوده سوء ادبدر .

۲ — بر كيمسه بر سلطان قاهري مدح و ثنا مقامنده « فلان
فقير . برا كمك پارچه سي — يا خود بر طمله صو ويردي ! » ديسه ،
او كيمسه زجر و منعي مستوجب اولور . مع هذا بيانه حاجت
يوقدر كه عرش اعلا دن . تانهايتي اولميان خلايه وارنجه ، عالم
مخلوقاتدن نه وار ايسه ، جمله سنك خزائن قدرة الله ده كي به نسبتی ،
برا كمك پارچه سيله بر طمله صويك جميع خزائن دنيايه اولان
نسبتندن ده آزدر .

ايمدي بر پادشاهي بويولده ثنا ايتكم سوء ادب اولنجه ، جناب
حق بو صورته مدح و ثنايه قالقيشته نك سوء ادب اولمسي اولي
بالطريقدر . ايشته تين ايتدي كه ، الله تعالايي طريقين مذكورين
ايله مدح و ثناده شو اعتراضلر وازد اولور .
بو مقامده يالكز بر سبب واردركه ، شو مدائحي ذكره بزه
رخصت ويرر .

اوسببده شودرکه، (نفس) عالم حس و خیالده مستغرق اولدیغندن انسان آتی عتبه علیای عالم قدسه جذب ایتک ایستدیکی وقت. آتی حضرت مقدسه نك کالنه متنبه قیلغه محتاج اولور. انسان ایچون ایسه الله تعالی نك معرفت کمال و جلالنه وصوله شو ایکی طریقندن - یعنی صفات جلال ایله صفات اکرامی ذ کردن بشقه یول یوقدر. بناءً علیه نفسی (عالم حس) دن اعراض ایتدیروب، عتبه قدسه وقوفه مألوف ایدجهیه قدر برایکی نوع اسمای شریفه نك ذ کرینه مواظبت ایلر.

ایشته شو حالت، حاصل اولجه، بونوعلرده وارد اولان اعتراضات مذکوردهیه متنبه اولورده اول حالده بواذکاری ترك ایدرك (یا هو!) دیمکه باشلار.

(یا هو!) ذ کرینه مواظب اولان عبد کویا دیر ایش که: «یارب! نقائص مخلوقاتی سندن سلب ایتک، یاخود کالات مخلوقاتی سکا اسناد ایدی ویرمک صورتیله بنم سنی مدح و ثنا ایدیشمدن حضرت ربوبیتک احلی واعالدر. زیرا اسنک کالک آندن اعلی و برتر، جلالک آندن اعظم و اکبردر. آنحق کندی هویتکله ینه کندی هویتکی مدح و ثنا ایدرم. کذلک سکا (انت) لفظیله ده خطاب ایتیم! زیرا بولفظ، کبری مفیددر، شویله که: روح. (ها! بن برمباغه بالغ اولمشدرکه حضرت واجب الوجودده حاضر کی ایشم!) دیمکه قالدیشیر. انکچون بنده (هو) قولی اوزرینه برشی قاتمام که بوقولم ربمک ذاتی ینه ذاتی ایله مدوح اولدیغنه و آنک حضرتی حضور مخلوقات ایله اکا

آکا مناسب‌تدن اعلیٰ واجل بولندیغنه براقراز واعتراف اولسون. «
ایشته بوکله واحده تجلی ومکاشفات مقامارنده شو اسرار لطیفه
تنیه ایدر اولدیغندن ناشی شبهه یوق که اسرار مذکورده تنبه شرطیه
بوذکر عالی اشرف الاذکار اولمش اولور .

بشخیصی - بوذکر شریفه مواظبت، شوق الی الله افاده ایدر
شوق الی الله ایسه مقاماتک الذی، وبهجه وسعادة اکثری در .
بونک بیانی شو وجهله درکه (هو) ضمیر غائبدر . آنکچون
عبد بوکله بی ذکر ایتدیکی وقت کنديک حقدن غائب اولدیغنی
بیش اولور . اندن صکره شوراسنی ده اکلا رکه بوغیت، مکان
وجهت سببیه محصل دکدر . مجرد کندي حدوث وامکان
نقصانرلیه موصوف، واحاطه مکان وزمانده عیب کون ایله معیوب
اولمه سی سببیه در . ایشته عقل ذا کر، شو دقیقه متنبه ومطلع
اولوبده، بوصفتک جمیع ممکنات ومحدثاتده حاصل اولدیغنی
یلنجیه، او آنده محدثات وابداعاتک عتبه علو خدادن غائب
اولدیغنی ده بیش اولور . وبوغیتک مجرد نقصان وکالده کی
حاجت واستغاده اولان فرق وتفاوت سببیه حاصل اولدیغنی ده
آکلا ر .

ایشته بوصرد، عبد عاجز، جناب حقک انواع کمال ایله
موصوف، وبوکالات مخلوقات مشابهن متعالی، وبو محدثاته
مناسب‌تدن مقدس ومنزه اولدیغنی ده اعتقاد ایلر . جناب حقک
تصوری عقلدن، فکردن، ذکردن غائب ایدوکنده معتقد اولور .
بوصورته او کالات، من وجه مشعور بها اولور . من وجه

اولماز . بوجالاته من وجه حاصل اولان شعور دخی آنلرک درجات و مراتبی ده بیلوب اklamغه انسانی تشویق ایلر . و چونکه او مراتب و درجاتک نهایتی اولمادیغی کی، کذاک بوشوقک مراتبنده نهایت یوقدر . و هر نه وقت که عبتک حالا بولندی مرتبه دن دها عالی بر مرتبه یه وصولی اسهل اوله؛ اودرجه دن ترقیه شوق اقوی و اکمل اولور .

ایشته شو افادات ایله تبین ایتدی که، (هو) لفظی شوق الی اللهی مفیددر .

شوق الی الله اعظم مقاماتدر دیشتمز دخی مجرد، (شوق) آلام و لذات متوالیه متعاقبه نک حصولی افاده ایتدی کچوندر .

زیرا محققدر که عبت، نائل اولدیغی شرف وصال مقدارنجه متلذذ، و شرف قرب مولایه وصولی تمتع اولدیغی درجه ددهده متالم اولور . ملک زوالی حالنده لذته شعور ایسه، مزید التذاذ و حجوی، فرط ابتهاج و سروری ایجاب ایدر، بوده دلالت ایدر که (شوق الی الله) مقامی اعظم مقاماتدر .

ایشته ثابت اولدی که (هو) کله سنک ذکرینه مواظبت (شوق الی الله) ایراث ایلر .

شوراسی ده تبین ایتدی که (شوق الی الله) مقاماتک هم اعظمی، هم ده بهجه و سعاده اکثری در .

بناء علیه شو کله یه مواظبت، مقاماتک اعلاسی، درجاتک انسانی افاده ایدر دینک لازم کلیر :

التخیسی - شو ذکر شریفک جلالتی شرحنده در .

معلوم اولسون که مقصود، آنجق ایکی مقدمه نك تقدیم
و تمهیدیه تمام اولور .

مقدمه اولی

علم ایکی قسمدر .

تصور، تصدیق .

تصور — نفس کندینه کرک حکم وجودی و کرک حکم عدمی
ایله حکم ایتمکسزین برشیئک ذهنده حاصل اولان صورتی در .
وتعبیر دیگرله — برشیده برحال و کیفیت بولندیغنه ویا بولنمادیغنه
حکم ایتمکسزین اوشیئی فکر ایلکدر .

تصدیق — ذهنده برصورت مخصوصه حاصل اولدقدن صکره
اوشیده برحال و کیفیت بولندیغنه ویا بولنمادیغنه حکم ایدرک ایدیلن
تصوردن عبارتدر . وعبارة اخرى، — حکم ایله اولان تصوردر .
ایشته بوراسی معلومک اولنجه دیرزکه، (تصور) مقام
توحیددر . (تصدیق) مقام تکثیردر .

مقدمه ثانیه

تصوردخی ایکی قسمدر .

برتصور وارکه آنده عقل انسان، تصرفه قدرتیاب اوله

بیلیور . دیگر بر تصور وارکه آنده عقل ایچون تصرفه امکان
واققدار مفقوددر .

تصورك قسم اولی — ماهیات مرکبه نك تصویری در . زیرا
عقل ایچون ماهیات مرکبه بی تصور، او مرکبك جزئارینك
ماهیاترینی ده استحضاره متوقفدر . عقل بو واسطه به مراجعت
ایتمکسزین ماهیات مرکبه بی تصور مقتدر اوله ماز . بو تصور
ایسه هم عمل وفکر در . هم ده بعض وجوه دن طولای تصرفدر
تصورك قسم ثانسی — جمیع جهات ترکیاتدن منز اولان
ماهیات بسیطه بی تصوردر .

زیرا انسان، بر عمل ایشلیه منز که او عمل ایله ماهیات مذکورده بی
استحضاره توسل ایده بیلسون .

ایشته ثابت اولدی که، تصورده نسبتله تصدیق، مجرای تکثیرده
جاری در . تصدیقه نسبتله تصور دخی توحیددر .

کذلک شوراسی ده تبیین ایتدی که ماهیت بسیطه بی تصور،
توحیدده وکثرتدن بعدده واصل مرتبه نهایتدر .
ایشته بوراسی معلومك اولنجه دیرز که :

حق باریده (یا هو!) دیشتمز، تصدیقدن خالی بر تصور محضدر .
برده شو تصور، جمیع جهات ترکیب وکثرتدن منز اولان
حقیقی تصوردر .

بناءً علیه (یا هو !) قولمز توحیدده، وکثرتدن بعدده واصل
مرتبه نهایت اولمش اولورکه، یوده اعظم مقاماتدر .

يدنجیسی — برشیئک تعریفی یا بنفسه اولور . یا کندیده
داخل اولان اجزا ایله — یاخود کندیدن خارج اولان امور ایله
اولور .

قسم اول که شیئی نفسیه تعریفدر؛ بو محالدر . زیرا معرف،
معرف اوزرینه سابق و متقدم اولغله شیئی نفسیه تعریف،
او تعریفدن مقدم، شیئی معرفک معلوم اولمسنی اقتضا ایدر .
بوایسه محالدر .

قسم ثانی که، شیئی کندیسندن داخل اولان امور ایله تعریفدر؛
بوده حق باریده محالدر .

زیرا بو تعریف یالکڑ ماهیت مرکبهده جاریدر . حق باریده
ماهیت مرکبه تصویری ایسه محالدر .

قسم ثالث که شیئی کندیسندن خارج اولان امور ایله تعریفدر
بوده باطل و محالدر .

زیرا خلقک احوالندن برشی یوق که قدیم اولان ذات واجب
الوجودک احوالندن برشیئه مناسبت آله بیلسون .

چونکه جناب واجب الوجودک ذات مخصوصه وهویت
معینهسی، جمیع ماسواسنه مخالفدر .

مادامکه امر بویهدر. خلقک احوالی الله ذوالجلالک ماهیتنی،
حقیقت مخصوصهسنی کاشف اوله یئلک حیز امتناعده واقعدر .

بو حالده جناب حقک هویت مخصوصه و ماهیت معینهسنه
نسبتله ابواب تعریفات، بالکلیه منسد اولمش اولور . بوبابده
یالکڑ جهت واحدهدن بریول قالیرکه اوده شودر .

« انسان، حدقه عقل و روحنی هویت مخصوصه الهیه‌نک
مطلع النورینه توجیه ایتلی، شو امیدایله که حدقه عقل و روح
آکا متوجه ایکن بلکه او نور الانوار، اشراق ایدی و پرده
آنک مطالعه سیله مستسعد اولور . »

ایمدی ذا کرک (یا هو !) دیمه سی شو سعادتک استحصالی
رجاسیله حدقه عقل و روحنی حضرت قدسیه توجیه دیمکدر .

سکزنجیسی - کشی مهابتلی برپادشاهک، قاهر برسلطان
شوکتپناهک حضور عظمت نشورینه چیقوب ده، عقل وهوشی
او مهابت و جلال سلطنته دوش اولنجه، مهابت حضور سلطانی
کندینی بر صورتده استیلا ایلرکه حائر عن حضور اولدینی مدتجه
زوالی جمیع ماسواسندن غافل اولور . حتی آچ بولنسه
دخی او حالده آچاغنی اونودر . برالم شدیددی اولسه بیله او
صرده آئی ده طویماز اولور . وکاه اولورکه او ائشاده باباسی،
اوغلی مصادف نظری اولورده برینی طانیه ماز . بو حیرت و غفلت
ایسه، مجرد مهابت حضور، بشقه شیئی ادراک و شعوردن کندینی
ذهوله مجبور ایتسندن ایلری کلیر .

ایشته عبد ذا کر دخی (یا هو !) دییوبده او هویتک
نور جلالندن عقلنه، روحنه برذره تجلی ایدی ویرنجه قلبنه دهشت
روحنه حیرت مستولی اولمق لازم کلیرده او هویتک ماسواسندن
غائب، او هویتدن بشقه برشیئه التفاتدن معزول اولور .

ایشته او حال استغراقده عقیده (هو!) لبانیله ده (هو!)
 دیمکدن بشقه عبد ذا کرده تصرفاتدن برشی قالماز .
 دیمک اولدی که عبدك (هو!) ذکرینه مواظبت واشتغالی
 مجرد او حال شریفیه اتصال، امید ورجاسیله برتشبهه در . او یله
 ایسه کریم متعال اولان الله ذوالجلالدن نیاز ورجا ایدرز که بزیده
 او حال شریفه ایله مستسعد بیورسون .
 طقوزنجیسی — مرویدر که حضرت نبی اکرم صلی الله علیه
 وسلم افندمز (من جعل همومه هماً واحداً كفاه الله هموم الدنيا
 والاخرة) بیورمش در .

آنکچون عبد ذا کر کویا دیر ایمش که :

« بنم دنیایه، عقبایه متعلق اولان هموم غیر متناهیدر . غیر
 متناهی اولان حاجاتک دفعنه ده، الححق قدرت غیر متناهی، رحمت
 غیر متناهی، حکمت غیر متناهی ایله موصوف اولان مولای
 متعال حضرت تبری مقتدر اولور . ایشته بویکا مبنی در که بن خود
 بخود، نه حاجتیریمی دفعه، نه ده مهماتی تحصیله قادر اوله مام .
 دکل بن، اللهم بشقه هیچ کیسه یوق که او حاجاتی دفعه، او مهماتی
 تحصیله مقتدر اوله بیلسون . آنکچون بن ده کړک هممی وکړک
 لسانمی یا لکړ آنک ذکر شریفیه مشغول ایدرم . او مارم که بن
 آنک ذکر شریفه حصر اشتغال ایدمجه اوده کمال رحمتیه دنیا
 و آخرت مهماتنده بکا کفایت واعانت ایلر . »

اوننجیسی — عقل انسان، برشینک کنه و حقیقته و ارمق

ایچون اعمال فکر ایتدیکی زمان بشقه شیه مشغول اوله ماز .
آنکچون انسان، برشیئه توجیه فکر ونظر ایدنجیه آرتق آنک
فکری شیء دیکری مطالعه دن معزول اولور .
بناءً علیه عبد ذا کر، کویا دیر ایش که :

« هر نه وقت ذهمنده بر شیئی استحضار ایدرسهم، دیکر
شیئه صرف ذهن ایتمکدن ذهول ایدرم . مادام که، بو
طبیعی ضروری برحالد . لائق اولان بنده قلبی، فکرمی
اشرف معلوماتک معرفتیه، اشرف مذکور اتک ذکر یله مشغول
ایتملیم . آنکچون (یا هو !) ذکر شریفه مواظبت ایلم . »
اون برنجیسی — محققدرکه، ذکر الله اشرف مقاماتدر .

علیه الصلاة والسلام افندمن جناب حقدن علی طریق الحکایه
بیورمشدرکه، (اذا ذکرنی عبدی فی نفسه ذکرته فی نفسی و اذا
ذکرنی فی ملاء ذکرته فی ملاء خیر من ملاء) .

ایشته بوراسی ثابت اولنجه دیرز که :

افضل اذکار، سؤال وطلبدن خالی اولان ثنا یله ذکر اللهدر
ینه رحمة للعالمین افندمن جناب مولادن علی سبیل الحکایه
بیورمشدرکه (من شغله ذکری عن مسألتی اعطیته افضل ما اعطی
السائلین) .

بو مقدمه دخی معلوم اولنجه دیرز که (عبد) فقیردر .
محتاجدر . فقیر. محتاج اولان کیسه، مخدومنه طاب وسؤاله مناسبت
آلیر برخطاب ایله ندا ایتدیکی وقت آنک بوندایی سؤاله محمول
اولور . سبب بودر که بر فقیر برغنییه (یا کریم !) دیسه، آنک

بوخطابنه طلب اکرام معناسی ویریلیر . (یانفاع !) دیسه، بوده
 طلب تقی مشعر اولور . (یارحمان !) دیسه، طلب مرحمت
 معناسی افاده ایدر . انکچون شو اذکار، مجرای سؤالده جاری
 اولمش اولور . بزایسه یوقاریدده بیان ایتشدک که، ذکرک شرفی
 آنجق سؤال وطلبدن خالی اولدینی وقت بیور . (یاهو !) نک
 معناسی ایسه، سؤال وطلبی اشعاردن خالی اولدینی ایچون (هو !)
 ذکرى اعظم اذکار اولمق لازم کلیر .

بعض کتب معتبرده کورمش اولدینم بر ذکر شریف ایله شو
 فصلی ختم ایدلم .

(یاهو ! یامن لاهو الا هو ؟ یامن لاله الا هو ! یا ازل !
 یا ابد ! یادهر ! یادیهار ! یا دیهور ! یامن هو الحی الذی لایموت)
 شوفصلک لطائفندن اولمق اوزره امام غزالی رحمه الله علیه
 بیورمشدرکه (لاله الا الله) توحید عوامدر .

(لاله الا هو) توحید خواصدر .

بن بوکلامی استحسان ایدرک قرآن ایله ده، برهان ایله ده تقریر
 و بیان ایلرم .

قرآن ایله تقریری

الله تعالی و تقدس حضر تلی (ولاتدع مع الله الیه آخر
 لاله الا هو) بیورقدن صکره (کل شیء هالک الا وجهه)

بیور مشدر . (الاوجهه) نك معناسی ایسه (الاهو) اولدیغی
ایچوندرکه، آنی (لاله) قولندن صکره ذکر ایلدی . ایشته
بودلالت ایدرکه غایت توحید، شو کلمه در .

برهان ایله تقریری

بعض کیمسلر « فاعلک تأثیری ماهیتی تحقیق و تکوینده دکلدر
بلکه ماهیته صفت وجودی ویرمکدن بشقه آنک بر تأثیری یوقدر . »
دیمشدر .

بن بونلره شویله مقابله ایدرم .
دیرم که :


« اوله ایسه وجود دخی بر ماهیتدر . آنکچون وجود دخی
فاعلک تأثیریه واقع اولماق لازم کلیر . »
شاید شو سوزلرینی التزام ایدرک دیرلرسه که :
« فاعلک تأثیریه واقع اولان شی، ماهیتک وجود ایله
موصوفیتدن عبارتدر . »

زده شو جوائی ویررزکه :

« موصوفیت، اگر ماهیته، وجوده مغایر بر مفهوم دکل ایسه،
آنی فاعله اسناد ایتک ممتنع در . واکر ماهیت وجوده مغایر
بر مفهوم ایسه، او مفهوم مغایرک دخی لابد بر ماهیتی اوله جقدرکه
بوصورتده کلام اول عودت ایدر . »
ایشته شو افاده مزله ثابت اولدی که « فاعل ومؤثرک ماهیاتده

تأثيری یوقدر. « سوزی تأثیری ده، مؤثری ده، صنعی ده، صانعی ده
بالکلیه نفی ایلر . بوا یسه بر رأی باطلدر .

شوده تبین ایتدی که مؤثرک ماهیاتده تأثیری واردر .
دیمک اولدی که، کندینک تگون و حصولی غیره تابع اولان
هر نه وارسه او، متبوعی اولان غیرک ارتقاعیه مرتقع اولور.
بناءً علیه اکر بر مؤثر اولیه حق اولسه، اوماهیت، ماهیت ده،
اولمازدی . حقیقت ده اولمازدی . مجرد مؤثر حقیقی نك تأثیر
قدرتیه در که ماهیتلر ماهیات، حقیقتلر حقائق اولملر در .
مؤثر حقیقی نك تأثیر قدرتندن اول ماهیت ده یوق ایدی .
وجود ده یوق ایدی . حقیقت ده یوق ایدی . ثبوت ده یوق ایدی
بو حالده (لاهو الاهو) قولمzk صدق ظاهر اولدی . یعنی
ماهیات، و حقائقدن هیچ برشی یوق که واجب تعالانک تقریر
و تخصیصی ایله مقرر و متخصص اولسون . [۱]
ایشته ثابت اولدی که . (لاله الاهو) یعنی اله العالمیندن بشقه اله
یوقدر . « والله اعلم » .



[۱] للمترجم .

وجودی کائناتک جود حقدر
سجود ایت تاجیقجه جان اوندن
ضیاباش اولماز ایدی شمس تابان
منور اولمسییدی یرتونندن

سکزنجی باب

اسماء اللہ متعلق مباحثک بقیہ سی بیانندہ در .

برنجی مسأله

اسماء اللہ. توقیفیہ میدر ؟ اصطلاحیہ میدر ؟

بومسأله بین العما تحت اختلافددر .

کیمی دیش که :

« کرک اسمادن، کرک صفادن قرآن وحیدشدہ وارد اولیان

شیثک اللہ ذوالجلالہ اطلاق غیر جائزدر . »

کیمی دیش که :

« جناب حقک جلالہ، صفاتہ لائق اولان معنایہ دلالت

ایدن هرلفظک اطلاق جائزدر . فقط اویله برمعنایہ دلالت ایتمین

لفظک اطلاق جائز دکلدر . »

امام غزالی « رحمۃ اللہ علیہ » دیش که :

اسم بشقہ، صفت بشقہدر . زیرا بنم اسم محمددر . سنک

اسمک ایسه ابو بکردر . ایشته بو . اسما بایندندر . صفات دخی

مثلا (فلان کیمہ اوزون بویلودر . فقیہدر . شویلهدر بویلهدر)

دیہ ایدیلن وصفدر . »

بوراسی معلومک اولنجہ دینیلیر که :

الله تعالیٰ یہ اسم، اطلاقی قرآن و خبرده وارد اولمش اولمادجه جائز اولماز . اما صفات او یله اولیوب اطلاق صفات، توقیفه متوقف دکلدر .

اولکیلر شویله احتجاج ایدوب دیدیلرکه :
 «عالمك [۱] چوق اسملری وار ایکن بزالله ذوالجلالی عالمدر
 دیه وصف ایدرزده «طیبدر . فقیهدر . متیقندر . متیندر .»
 دیه وصف ایتمیز . ایشته بوده توقیفه [۲] لزوم واحتیاج اولدیغنه
 دلالت ایدر» .

آنلرک بو احتجاجلرینه جواب ویریلوب دینلشددر که :
 اولاً — طیب، لفظنی تدقیق ایدلم .
 منقولدرکه، ابوبکر الصدیق «رضی الله عنه» خسته لنجه، آکا
 «برطیب چاغردلم» دینلرد «الطیب امرضی» جوابی ویرمشدر
 که آنک بویله [بنی خسته ایدن طیبدر] دیمسی جناب حقه
 طیب اطلاقی جائز اولدیغنی ایما ایدر .
 فقیه، لفظنه کلهلم [۳] بو اسمک معناسی متکلمک کلامنه شبهه
 داخل اولدقندن صکره، او کلامدن غرضی نه اولدیغنی اکلا یوب
 بیلکدن عبارتدر که، واقعا بوقید، حق باریده متمتع الثبوتدر .

[۱] اسم فاعل .

[۲] توقیف، اذن شرع دیمکدر .

[۳] فقه، فانک کسر یله — برشیئی ذهن وفطنتله کرکی کی اکلا یوب
 بیلک .

متیقنه کلنجه، بودخی عربك « یقن المساء فی الحوض اذا اجتمع
فیه » قولندن مشتقدر .

بوصورتده (یقین) مجموعی جزم، افاده ایده جك رادهیه
بالغ اولنجیه قدر برچوق اماراتك تعاقب وترادفی سبیلله حاصل
اولان علم دیمکدرکه، بوده حق باریده محالدر .
کلهلم تبیین، لفظنه [۱] بونكده معناسی ظهور بعد الخفادن
عبارتدر .

چونکه (تبیین) بینونت [۲] وابانهدن [۳] مشتقدر .
وبوده امرین متصلین بینتی آیرمقدن عبارتدر .
شویلهکه :

قلبدده متحصل ایکی صورت: یکدیگرینه مشتبّه اولوبده صکره
بری او برندن منفصل اولنجه، بینهماده بینونت، حاصل اولمش اولور.
ایشته بوسبیدن ناشیدرکه، شو تفرقه (بیان) و (تبیین) تسمیه
قلنشدر . بوحال ایسه معلومدرکه حق باریده محالدر .

توقیفه حاجت یوقدر دینلر دخی برقاچ وجه ایله احتجاج
ایتمشلردر .

وجه اول — كرك اسماء الله، و كرك صفات الله فارسی، ترکی
هندی لسانلرندهده مذکور اولوب حال بوکه، بولسانلرده مذکور

[۱] تبیین، واضح و آشکاره اولمق . واضح و آشکاره قبیلقی معنالرندهده
مستعملدر .

[۲] بینونت ، آیرماق .

[۳] ابانه — اظهار، کسمک، آیرمق .

اولان استا وصفات آیه دن هیچ بری نه قر آنده، نه ده اخبار نبویه ده
وارد اولمش دکدر . مع هذا السنه مذکوره مذکور اولان
اسمانک، صفاتک جواز اطلاقده اجماع مسلمین واقع اولمش در .
وجه ثانی - باری تعالی و تقدس حضرت تری قرآن کریمده
(ولله الاسماء الحسنی فادعوه بها) بیورمشدر .

اسمک کوزللیکی ایسه مجرد صفات مدحه، ونعوت جلاله
دلالتدن ناشیدر . دیمک اولدی که، شو معانییه دلالت ایدن هر بر
اسم، (اسم حسن) در . بناء علیه شو آیت جلیله استناداً دیرز که
او اسمک جناب حق اطلاق جائز اولمق لازم کلیر .

وجه ثالث - محققدر که، الفاظده معانییه رعایتدن بشقه
فائده یوقدر . بناء علیه مانی، معانی صحیحه اولنجه، لفظ معنی
اطلاقدن منع، عبث اولمش اولور .

امام غزالی « رحمه الله علیه » سویلدیکی سوزده کلنجه :
آنک حجتی شودر که :

بزدن بر کیمسه نک حقنده بویه بر اسم طابق سوء ادب عد
اولنور . حق باریده بونک سوء ادب اولمه سی ایسه اولی بالطریقدر
اما الفاظ مختلفه ایله صفاتک ذکر ی بزم حقمزده من غیر منع جائز
اولدینی ایچون کذلک باری تعالی حقنده جائز اولور .

ایکینجی مسأله

قرآن کریمده بر طاقم صفتلره دلالت ایدر بعض الفاظ وارد
اولمشدر که بونلرک حق باریده اثباتی ممکن اوله ماز .

الفاظ مذکور در بعضی ازین تعداد ایدم .
۱ — استهزاء .

الله تعالی (الله یستهزئ بهم) بیورمش در . استهزا ایسه
جهلدر . جهل دیمک اولدیغنه دلیلز شودرکه : ذبح بقره قصه سنده
مذکور اولدینی وجهله بنی اسرائیل موسی علیه السلامه (اتخذنا
هزواً) دینجه ، حضرت کلیم الله دخی (اعوذ بالله ان اكون
من الجاهلین) دیه جواب ویروب استهزائی جهل ایله تفسیر
بیورمش در .

۲ — مکر .

الله تعالی (ومکروا ومکر الله) بیورمش در .
۳ — غضب .

الله تعالی (وغضب الله علیهم) بیورمش در .
۴ — تعجب .

الله تعالی (بل عجبت ویسخرن) بیورمش درکه (عجبت)
کله سنی ضم تا ایله کیم او قورسه (تعجب) جناب الله منسوب
اولمش اولور . تعجب ایسه بر شیئک سبی یلنخدیکی حالدله قلبه
عارض اولان حالتدن عبارتدر .

۵ — الله تعالی (العزیز الحیار المتکبر) بیورمش در . تکبر
ایسه صفت ذمدر .

۶ — حیا .

الله تعالی (ان الله لا یستحي ان یضرب مثلاً) بیورمش در .

حیا ایسه برشی قبیح ایشلندیکی وقت، وجه وقلبدہ حصولہ کلن
تغیردن عبارتدر .

معلومک اولسون که بو الفاظ حقندہ کی قانون صحیح شودر .
دیرزکہ :

شو ذکر اولنان احوالک هربری ایچون برطاقم امورواردرکہ
اوامور، بدایتدہ بو احوال ایله برابر بولنور . برطاقم آئاردخی
واردرکہ نہایتدہ او احوالدن صادر اولور .

بونک مثالی دہ شودرکہ (غضب) خون دلک غلیانی، ومزاجک
سخوتی حالندہ حاصل اولور برحالتدر . وبو حالت غضبیہ دن
نہایتدہ حصولہ کلن اثر دخی مغضوب علیہہ ایصال ضرردن
عبارتدر .

بناءً علیہ بحق بازیدہ غضب سوزینی ایشتدییک وقت، آئی
بدایات اعراضہ دکل، نہایات اعراضہ حمل ایتملیسین . باقیسنی دہ
بوکا قیاس ایت !

اوچنجی مسأله

بعض کتب تذکرده کوردم که، اللہ تالانک درت بیک اسم
شریفی واردر . بونلردن بیکی قرآن کریم ایله اخبار صحیحہ دہ
بیکی توراتده، بیکی انجیلده، بیکی دہ زبورده ددر .

برده دینیلیرکہ بونلردن بشقہ لوح محفوظدہ بیک اسم شریفی
دها وارکہ بونلر عالم بشرہ واصل اولمامش در :

بن دیرم که :

بو، مستبعد دکلدر . زیرا بز یوقاریدهده بیان ایتمشدک که بحسب السلوب والاضافات، صفات الالهک اقسامی غیر متاهی در . همده بو بجنی غایت بلیغ وواضح بر صورتده شرح ایتمشزدر .
بناء علیه بزاله العالمینک بیکلرجه اسمی اوله بیله سنی استبعاد ایتمز . بلکه دیرزکه عالم اعلانک، عالم اسفلک تدبیرنده کی آثار حکمت الهیه اطلاعی دها زیاده اولان کیمسهنک کرک اسماء اللهه اطلاعی وکرک مدح وتعظیمی موجب اولان صفاته وقوفی ده دها چوق اولور .

بناء علیه فن تشریحی مطالعه ایدن کیمسه، جناب حقک بدن انسانی یار اتمه سنده کی انواع رحمت و حکمتدن اون بیک نوعه قریب، رحمت و حکمت ربانیه سینه کسب وقوف ایدرکه بوصورتده او کیمسهنک عقلنده مدح وتعظیه دال اولان اسماء اللهدن اون بیک نوع اسم، حاصل اولمش اولور .

برده بدن انسانده کی شوا اقسام رحمت و حکمت ربانیه واقف اولان کیمسهنک بو وقوف واطلاعی، بدن انسانی تخلیقده کی اقسام رحمت و حکمت ربانیه دن بیلدکارینه نستله بیله مدکارینک دها چوق اولدیغنی ده عقله منبه ومخطر اولور .
شویله که :

واسطه فن تشریح ایله کاشف اسرار خلقت اولان کیمسه، عصبدن مخلوق، ارواح دماغیه نک یدی دانه اولدیغنی اوکره نجه، بونلردن هر برینک برر فائده، برر حکمت ایچون یار اولدیغنی ده

آكلار . صكره بواارواحدن هر برينك اوچر ويا دردر قسمه
منقسم اولديغني ده اوكره نجه، اقسام مذكوره نك هر برنده كي وجه
حكمتي ده، جيلت شديد ايله فهم ايلر .

آندن صكره ده عقل انسان بيايركه، شواقسامك هر برى برطاقم
شظايای دقیقه [*] و او شظايای دقیقه دن ده هر برى ديكر برطاقم
قسملره منقسم، و او اقسام دن ده هر برى معين براتصال ايله بر
عضو معينه متصل اولور . و اوقسمك او عضو معينه وصولي ده
برمر معين ده وقوع بولور . شو قدر كه بواقسام اول قدر
چو غاليركه، آنلك عديني ضبط و احاطه دن عقل، عاجز قالير .
ايشته تبين ايتدي كه واسطه فن تشریح ايله بيلين شواونيك
رحمت و حكمت ربانيه، صانع تعالانك بدن انساني ياراتمسنده كي اقسام
حكمت الهيه سنك تعديد و محدوددن، احصا و استقصادن خارج
اولديغني عقله تنبيه و اخطار ايلر .

نصل كه جناب باري دخی (وان تعدوا نعمة الله لا تحصوها)
بيورمش در .

ديك اولدي كه هر كيم شو مكشوف اولان انواع حكمت
الهيّه دن بشقه، برنوع حكمته واقف اوله بيليرسه، اسماء الله دن
براسم ديكر ده اوكره نرك معرفت اسماده كي مرتبه سي يوكسلير .
و مادام كه مراتب حكمت و رحمت سبحانيه نه ايت يوقدر . اسمای
حسناسنك ده صفات علياسنك ده نه ايتي يوقدر .

[*] شظي، عصبر . جعی (شظايا) كلير . « تشظي العصب تشظيا —
انشق وتفرق » (شظايا) شظيه نك ده جعيدر (شظيه) قوسه برده باجاق
يككنه دينير . ده ايشقه معناري ده واردر .

جالینوس حکیم (منافع الاعضا) نام کتابنده دیمش که :
 « بن بوکتابی تصنیف ایتدیگمده منافع مجمع النورک شرف
 عالسی جهتله خلقه تعمیم وتعلینی اسیرکده رک، آنی عن قصد
 یازمامشدم . برکیجه عالم منامده کوردم که کویا کوکدن یره برملک
 اینمشده، بکا خطاباً (یا جالینوس ! حکمت ربانیه سنی، قولارندن
 نیچون کیزله دیککی آلهک سندن صوریور! » دیمش . بنده او یقودن
 اویانجه، منافع مجمع النور حقنده برکتاب مخصوص تصنیف ایدوب
 منافع مذکورده بی بالاطراف شرح و بیان ایلدم . »
 ایشته شوافد اتمزله تبیین ایتدی که اسمای حسنای خدایه نهایت
 یوقدر .

دردنجی مسأله

[۱]

بشنجی مسأله

محققدرکه، خلق ایله اسماء الله آردسنده مناسبات عجیبه واردر
 عاقل اولان کیمسه ایسه او مناسباتی نظر اعتباره آلق لازمدر .
 تا که ذکر ایله منتفع اوله بیلسون .
 بوبابک شرحنده سویلنه چک سوز بز مقدمه عقلیه اوزرینه
 مبنی در .

مقدمه

بزم عندمزرده مثبتدرکه، نفوس ناطقه بشریه جوهر و ماهیتده

[۱] طلسمات وعزائمه کی بعض اذکاره دائر اولوب ترجمه سندن صرف
 نظر اولمشدر .

مختلفه در لر . نفوس مذکوره دن بعضی لری آلهی در . مشرق
و نورانی در . حردر . کریم در . بعضی لری ده سفلی در . ظلمانی در .
خسیس در . بعض دیگر ی ده رحیم در . عظیمة الرحمة در . بعضی لری
قاسی در . قاهر در . بعضی لری نك شو جسمانیاته محبت لری و میل لری
پك آذر در . بعضی لری ریاست واستعالایی سور .

احوال خلقی سنجیده میزان اعتبار ایدن اهل تدقیق، شو
افادتمزك صحتی تصدیق ایلر .

صکرده بز کوریورزکه، بواحوال، جواهر نفوسك لازم
غیر مفارقی کبی در .

شوراسنی ده محقق بیلورزکه، هر کیم کندی احوال
ذاتیه سنه مراعات ایدرسه، اراده ده، کراهنده، رغبتده، رهبتده،
کندینك بر منهج معینی، بر طریق مینی اولوب، ریاضت
و مجاهده نك نفوس بشریه یی احوال اصلیه و مناهج طبیعیه سنندن
تقلیب و تحویل ایده مز . ریاضتك تأثیری یالکز انسانك اخلاق
محبوله سنی ضعیفلا تمقله کندینه مستولی قیلامغه منحصر اولوب
یوقسه ریاضت انسانی بر صفتدن صفت دیگره تقلیب و تحویل
ایده مز . حضرت بنی اکرم صلی الله علیه وسلم افندمز دخی
(الناس معادن كعادن الذهب والفضة) و (الارواح جنود مجنده)
حدیث شریف لریله بو معنایه اشارت بیورمشلردر .

بوراسی معلوم اولنجه، دیرزکه :

جنسیت، ضمه سبب و علتدر . هر اسم پاك خدا ایسه بر معنای

معینه دال اولدیغندن، هر هانکی نفس اوزرینه او معنای منیفک تجلیاتی غلبه ایلرسه، او نفس ناطقه انسانیه، او اسم شریفه شدیدة المناسبه اولور. آنکچون نفس انسان او اسمی ذکره مواظبت ایتدیکنده کندینک او اسم پاکک تجلیاتندن انتفاعی سریع و آسان اولور.

بن ایشتم که «ابوالنجیب بغدادی السهروردی» مریدینه کوردیکی لزوم وایجاب کوره بر کره، یاخود ایکی کره اربعین ایله امر ایلر ایش!

صکره آکا طقسان طقوز اسم پاک خدای او قور، او قودقه مریدک یوزینه باقار طور رمش!

بو اسمای شریفه نك اثنای ذکر وقرائتده اگر مرید اصلا متأثر اولمازسه، درحال آکا (هایدی چارشویه چیق! اموردنیا ایله مشغول اول! زیرا سن بو طریقت علیه ایچون یارادلمش آدم دکلسین!) دیر ایش.


شاید اسماء اللمدن بر اسم خاص ذکر اولنورکن زیاده جه متأثر اولدیغنی کوررسه، آکا بالخاصه او اسم شریفک ذکرینه مواظبت ایتمه سنی امر ایدر ایش!

بن دیرم که، معقول اولان حرکتده بودر. زیرا مادام که نفوس ناطقه بشریه مختلفدر. بونلردن هر برینک بر حالت مخصوصهیه مناسبتی اولق طبیعی در.

بناءً علیه هر نفس انسان، کندینه مناسبت آلان حالتله مشغول

اولنجه، اوحالتك قوه دن فعله خروجی ده اسهل و آسان اولور.
 ایشته مطلق اسمادن بحشه متعلق اولان کلاممزلده ده صوکی
 بو اولسون !

« والله الهادی »



طقوزنجی باب

الله، قولمزه متعلق مباحث بیاننده اولوب مسائل عیدیه بی مشتلدیر .

برنجی مسأله

الله

بزم عندمزده مختار اولان بودرکه، شو لفظه جلاله، الله
تعالانک اسم علیدر . هیچ برشیدن مشتق دکلدر .
بورای صواب، امام خلیک، سیدویک، واکثر اصولیون
وفقهانک رایدر .
بونکده صحتته وجوه و حجج آتیه دلالت ایدر .

حجت

۱

(الله) لفظی بر لفظ مشتق اولسیدی، بونک معناسی بر
معنای کلی اولمق، بناءً علیه اومعناده دیکر لرینک وقوع اشتراک
مانع اولماق لازم کلیردی .
زیرالفظ مشتق، مشتق منهک معناسی متضمن برشی مبهم اولمقدن

بشقه بر معنی افاده ایتمز . شومعنی ایسه دیگر بر چوق اشخاصك ده
او معناده اشتراکنی مانع دکلدر .

ایشته تبین ایتمدی که، (الله) لفظی مشتق اولسیدی . آنک
مفهومی اشخاص کثیره بیننده مشترک اوله بیلیردی ده او حالده
(لا اله الا الله) قولمز توحید حق، اولماق، یعنی مفهوم شریقی
امر توحیدده اشخاص کثیره نك وقوع شرکستن مانع اولماق
لازم کلیردی .

زیرا (الله) لفظ مشتق اولدیغی تقدیرده مدلولی او مدلولك
تحتنده اشخاص کثیره نك دخولنه مانع اولماز . بو صورتده ده
(لا اله الا الله) قولمز توحید محضی موجب اولماش اولور .
حالبوکه عقلای امت (لا اله الا الله) قولمز توحید محضی موجبدر
دیه متفق الکلامدر . بناءً علیه بزده جزماً و یقیناً بیلدک که، (الله)
قولمز جناب حقك ذات معینه سه موضوع بر اسم علمدر . الفاظ
مشتقه دن دکلدر .

حجت

۲

بر ذات معینه بی صفاتیه برابر ذکر ایتک ایستین کیسه اول
انک استنی، عقبنده ده صفاتی ذکر ایلر .
شویله که :

مثلاً (زید الفقیه الخوی الاصولی) دیر .

بوراسی معلومك اولنجه دیرزکه :

هرکیم جناب مولایی صفات مقدسه سیله ذکر ایتک ایسترسه

اولا (الله) لفظی. صکرده آنک عقینده صفات مدائی ذکر ایار.
شویله که :

مثلا (الله العالم القادر الحکیم) دیر .

فقط بالعکس (العالم القادر الله) دیمزلر .

ایشته بوده دلالت ایدرکه. (الله) قولر اسم علمدر .

دینیلیرسه که :

«الله تبارک وتعالیٰ حضرت تباری سورة ابراهیمک اولنده (العزیز

الحمد الله الذی له ما فی السموات وما فی الارض) بیورمدیمی؟»

شویله مقابله ایدرزکه :

بو آیت جلیله ده ایکی قرائت واردر .

قرادن بعضیاری (الله الذی) دهکی لفظه جلاله بی مرفوع

الآخر او قودیلر . بو صورتده سسؤال زائل اولور . زیرا بویله

او قویانلر لفظه الهی مبتدا قیلقله، ماقبلنه صفت قیلقدن اخراج

ایتمش اولدیلر .

مجرور او قویانلره کلنجه : بونلرک قرائتی (هذه الدار ملک

للعالم الفاضل زید) قولرک نظیریدر . بو مثالده ایسه مراد زیدی

عالمه، فاضله صفت قیلقی دکلدر .

یا نه در؟

قائل (هذه الدار ملک للعالم الفاضل) دینجه، صاحب الدار

اولان او عالم وفاضل عجب کیمر دیه ذهن سامعده برشبهه قالیرده

ایشته اوشبهه بی ازاله ایچون عقینده (زید) دیهرک علم وفضل

ایله موصوف اولان صاحب خانه نک زید اولدیغنی خبر ویرر .

ایسته فصل که بومثالده اسم علم اوله رق مذکور بولنان (زید)
صفت واقع اولدی دیمک لازم کییورسه، شو آیت کریمه ده مذکور
اولان لفظة الله دخی اوله در .

حجت

۳

کتاب مجیدده جناب باری (هل تعلم له سماً) بیوردی . شو
آیت جلیله ایه اسمدن مراد، صفت دکدر . والا بو (هل
تعلم له سماً) قول صادقی، کاذب اولمق لازم کلیردی .
بناءً علیه بونده کی اسمدن مراد، اسم علم اولمق لازم کلیر .
برده هرکیم جناب مولایه اسم علم، اثبات ایتمش ایه «اسم علم
خدا (الله) لفظیدر . لفظ اخر دکدر» دیدی .

(الله) اسم علم خدا دکدر دینلر دخی وجوه و حجج آیه
ایله احتجاج ایتشلردر .

حجت

۱

الله تعالی (وهو الله فی السموات) و (هو الله الذی لاله
الاهو) بیورمشدر .
بو آیتلرده کی (الله) قولی ایه مطلقاً صفت اولمق لازم کلیر .
اسم علم خدا اولمق جائز اوله ماز .
بو دعوا مزده دلیاسز دکدر .
زیرا معلومدرکه، (هو زید فی البلد وهو بکر) دینیک جائز

اولماز . فقط (هو العالم الزاهد في البلد) دينيك جائز اولور .
 ايسته شو طريق ايله نحو يونك «خير، نه موصوف واقع
 اولور! نه صفت!» قوله اعتراض اولنور .
 (الله) لفظنك شو آيتلرده صفت، واقع اولديني تين ايدنجهده
 ارتق آنك اسم علم اولسي ممتنع ومحالدر .

حجت

۲

اسم علم، اشارت مقامنده قائمدر . مادامكه حق باريده اشارت،
 ممتنع در. انك حقنده اسم علم، اثباتي ده ممتنع ومحال اولمق لازم
 كلير .

حجت

۳

اسم علمه، مجرد حقيقت وماهيته يكديكره بکزه ين شخصلرك
 بريني او برندن تميز ايچون مراجعت اولنور . بوايسه حق باريده
 ممتنع در. انکچون آکا اسم علم، اثباتي ده محال اولمق لازم كلير .

حجت اولانك جوابي

شو مثالک (هذازيد الذی لانظيرله فی العلم والزهد) دينيله نك
 مجراسنده جاري اولمق نه دن جائز اولمسون!

حجت ثانيه نك جوابي

اسم علم، ذات معينه ي تعين ايچون وضع اولنش بر لفظدر .

بونده ایسه او مسمانك حس ایله مشارالیه اولمسنه، یاخود اولماسنه
حاجت یوقدر .

ایشته بو، حجت نالته یه ده جواب اولور .

ایکنجی مسأله

(الله) لفظی اسم مشتق دینلر بو بایده برقاق فرع، بیان
ایتمشلدور .

فرع اول

آله، معبود دیمکدر .

معبود بالحق اولسون، اولسون .

صکره عرف شرعه معبود بالحق اولان واجب تعالی و تقدس
حضر تباری حقنده استعمالی غالب اولدی .

بو تفسیره کوره معبود بالحق اولان جناب بارینک ازله
الهیاتی ثابت اولماق لازم کلیر .

معاومك اولسون که عبادته لائق و مستحق انجق جناب حقدر .
زیرا جمیع نعمك اصولی، فروغنی منعم اولان آنجق اودر .
چونکه موجودات ایکی قسمدر . بری واجب، دیکری
ممکن در . «واجب الوجود» اولان دخی آنجق واحددر که اوده
جناب حقدر . آنک ماسواسی ده (ممکن) در . بوراسی ده محققدر که
ممکن الوجود اولان مر جحسز وار اوله ماز .

بناءً عليه جميع ممکنات یا ابتداءً، یا خود بواسطه جناب
واجب الوجودك ایجاد و تکوین نماید زینت ساز صحیفه وجود اولمشدر.
دیمك اولدی که اقسام نعمدن عبدك حصه مند اولدینی
نعمتلك کافه سی الحق طرف حقندن حصوله کلمشدر .

بو صورتده ثابت اولدی که، غایت انعام، الحق خدای علامدن
صدور ایدر. عبادت ایسه، غایت تعظیمدر. بناءً عليه غایت انعامك
مصدری جناب حق اولدینی تبیین ایدنجه دیرز که : غایت تعظیم
دخی الحق سزاوار رب کریمدر .

فرع ثانی

یعض کیمسلر وار که، جناب معبوده مجرد طلب ثواب ایچون
پرستش ایدرلر. بو ایسه محض جهلدن، عقلسنزلکدن ایاری کایر .
بوکاده برقاق وجه دلالت ایدر .

۱ — عبادتی ایله شیء آخره توصل ایچون حضرت
معبوده عبادت ایدن کیمسه نك حقیقته معبودی جناب حق
دکلدر . بالعکس کندینه رهیاب وصول اولق ایستدیکی شیدر .
بناءً عليه الله تعالیه طلب ثواب ایچون عبادت ایدن کیمسه نك
حقیقته معبودی او اومدینی ثواب دیمك اولوب، الله تعالی
مجرد او معبوده وصوله وسیله حکمنده قالیر . بو ایسه جهل
عظیمدر .

۲ — بر کیمسه (اصلی لطالب الثواب) یا خود (اصلی للخوف
من العقاب) دیه بو نیتله نمازه طورسه، نمازی صحیح اولماز .

۳ — مجرد غرض دیگر ایچون بر عملده بولنان کیمسه شبهه

یوقدرکه، او غرض و مقصودینه طریق اخرا له دسترس اوله بیاسه، آکا واسطه اتخاذ ایتدیکی عملی ترک ایله او واسطه اخرایه تشبث و توسل ایدر .

دیمک اولدی که مجرد طلب اجر و ثواب ایچسون جناب رب الاربابه عرض عبودیت ایدن کیمسه، آرادیغی اجر و ثوابه طریق دیکرله ظفریاب اوله نك قولایغی بولسه، الله ایتدیکی عبادتی ترک ایده جکدر . بو فکره خدمت ایدن کیمسه ایسه دیمک اولدی که محب خدا، راغب عبادت مولی دکلدرد . بونلرک هپسی ایسه اثر جهل و نادانی و موجب پشیمانی در .

بعض کیمسه لرده وارکه، شو غرضدن ده اعلی بر غرض ایچون پر ستشکار خدا اولور .

بو غرض اعلی دخی خدمت جناب رب العزة ایله تشرفدن عبارتدر .

زیرا عبد مصلی ادای صلواته شروع ایدنجه اولا — قلبنده نیت حاصل اولور . بو نیت ایسه عزت ربوبیتی، ذلت عبودیتی بیلکدن عبارتدر .

ثانیا — لساننده ذکر، جوارح و اعضاسنده خدمت، حاصل اولورده بو صورتله وجود عبدک مترکب اولدیغی اجزادن هر بری خدمت مستلزمة المفخرة خدا ایله تشرف ایدرکه، عبدکده مقصود واملی ایشته شو شرف عال العالک حصولندن عبارتدر .

فرع ثالث

بعضی لری آله لفظنه معبود معناسی ویرنلرک قولنه برقاچ وجه
ایله طعن و اعتراض ایتمشلردر .
دیشلرکه :

۱ — اوانانه دخی عبادت ایدنلر واردر . مع هذا بتلر
آله دکلدرلر .

۲ — الله تعالی جماداتک ده، بهائم و حیواناتک ده آلهی در .
مع هذا آنلردن عبادتک صدوری محالدر .

۳ — الله تعالی مجنونلرک ده، چوجقلرک ده آلهی در .
مع هذا بونلردن عبادت، صدور ایتمز .

۴ — معبودک مجرد معبود اولمسلیله آلهیت آنک صفت
مخصوصه سی اولمق لازم کلز . زیرا (معبود) لفظی، انسان عابدک
ذکریله مذکور، علیه معلوم — خدمتی ده — ینه اوانسانک
اراده سیله مراد اولمقدن بشقه بر معنایی مفید دکلدر .

بو تقدیره کوره (آلهیت) صفت مخصوصه جناب رب
الغزة اولماش اولور .

۵ — آله معبود دیمک اولسه، الله تعالانک ازله الهیتی
ثابت دکلدی دینیلک لازم کلیر .

فرع رابع

بعضی لری ده (آله) معبوددن عبارت دکلدر . بلکه (آله)
معبود اولمغه مستحق اولاندر دیدی . بوکاده (اولیه ایسه جناب
حق جماداتک، بهائمک، اطفالک، مجانینک الهی اولماق، وازله

الهیّی ثابت اولماش اولمق لازم کایر یولنده بر اعتراض وارد اولور .

کیمی ده (الله) شول افعاله قادر اولان ذاتدرکه او افعالی ایشلیه جک اولسه، کندیلرندن صدور عبادت، صحیح اولانلر طرفندن عبادت اولغنه لائق و مستحق اولور دیدی .

معلومک اولسونکه، (الله) لفظی اولیکی ایکی تفسیر ایله تفسیر ایتدیکمزده الله تعالانک ازلهده الهیّی ثابت اولماز . اما او چنجی تفسیر ایله تفسیر ایتدیکمزده ازلهده الهیّی ثابت اولور .

*
* *

الله، لفظی (الهت الی فلان ای سکنت الیه) قولندن مشتقدر آنکچوندرکه، اضطراب عقول عقلا، ذکر اللهده سکونت بولور .

آنکچوندرکه، ارواح علویّه سعدا، معرفه الله ایله معارج یقینه مترقی اولور .

بومعنی برقاچوجه ایله بیان وایضاح اولنه بیلیر .

— کمال، لذاته محبوبدر . ماسوی الحق، لذاته ناقصدر . ماسوی الحقک نقصان ذاتی ایله ناقص اولمه سی شونک ایچوندرکه (ممکن) ممکن اولدینی حیثیله (معدوم) دیمکدر . (عدم) ده اصل نقصاندر . بویله بذاته ناقص اولان برشی اینه، بذاته کامل اولان موجود حقیقی طرفندن اکمال ایدلدکجه کسب کمال ایده مز .

کامل، لذاته محبوبدر . مادام که، خدانک لذاته کامل اولدینی
مثبتدر . کندينک لذاته محبوب اولسی لازم کلیر .

— جميع ماسوی الحق، لذاته ممکندر . لذاته ممکن اولان
برشی ایسه شیء دیگره متعلق و مربوط اولمادقچه باشلی باشنه دائم
وپایدار اوله ماز . زیرا ممکنک وارلنی دیگر بر وارک وارلغنه
متوقفدر . ایسته بوسیدندر که هیچ بر ممکن باشلی باشنه پایدار
و برقرار اوله ماز .

پایدار و برقرار اولق شویله طورسون، بلکه جناب واجب
الوجوده متعلق و مربوط اولمادقچه وار بیله اوله ماز .
مادام که، وجود خارجیده امر بویلهدر . وجود عقلیده
اویله اولق لازم کلیر .

آنکچون عقول، حضرت آلهک عتبه رحمتده مترقب رحمت
بی پایانی خواطر، متمسک ذیل فضل واحسانی در .

*
* *

الله، (وله) دن مشتقدر .
وله، ذهاب عقل معناسنهدر که، شیفته و سرسم اولمقدن
کنایه در .

معلومک اولسون که خلق جهان ایکیه منقسمدر .
بر قسمی — ساحل بحر معرفه اللهه واصل اولانلر، دیگر
اوشرف وصولدن محروم قالانلردر .
محرومین — ظلمات حیرت، وبادیه جهالتده قالب ککرده
راه عقل واذعان، برکشته رفاه دل و دجان اولدیلر .

واجدین - عرصه پنهای نور کماله، فسحتسرای کبریا و جلاله
وصول ایله میدان بی منتهای صمدیتده واله و حیران، ساحه حیرتفرای
فردانیتده محو و بی نشان اولدیلر .

ایشته شو ایضاح ایله تین ایتدی که، بالمله خلق جهان،
معرفة الله واله و حیراندر . فلاجرم خلقك اله حق، آنجق
جناب حقدور .

- و بعبارة اخرى - ارواح بشریه، توحید و تمجید باری
میدانلرنده مسابقته چیقیدیلر . بعضیلری کبری قالب بعضیلری
ایلری واردیلر . تخلف ایدنلر ظلمات غبارده قالب ایلریلیانلر،
عالم انواره واصل اولدیلر .

اولکیلر - اودیة ظلماتده سرفروبرده خیت و خسران،
بریکیلر - عالم کراماتده مستغرق انوار عرفان اولدیلر .

*
* *

اله، ارتفاع معناسنه اولان (لاه) لفظدن مشتقدور .
حق سبحانه و تعالی حضرتلری ایسه ممکناته مشاهیدن،
محدثاته مناسبتدن مرتفع و عالیدر .

زیرا واجب لذاته، آنجق اودور . کامل لذاته، آنجق اودور .
هویتده احد حق، آنجق اودور . جمیع ماسواسنی موجد اولان
آنجق اودور ، كذلك « ارتفاعی بحسب المكاندر » دینلکندنده
مرتفع و عالی اولان ینه آنجق اودور .

چونکه مکان، سبیلله حاصل اولان بر ارتفاع، او مکان مرتفعه
کوره بالذاتدر . متمکنه نسبتلهده - کندینک او مکان ایچنده

حصولی جهتیله - بالعرضدر . بالذات اولان شی ایسه بالعرض
اولاندن اشرفدر .

آنکچون جناب حق ارتقاعی مکان، سببیه اولسه، او مکان،
ذات رحماندن اعلی و اشرف اولق لازم کلیرکه، بوبدی بی البطالاندر
ایشته بوندن بیلدک که، اله العالمین کندینک علوتی مکان سببیه
اولمقدن ده اعالدر . عالم امکانده حاصل اولان اشیا دن برشیته
نسبت اولمقدن ده اشرفدر .

* *

اله، « اله فی الشئ اذا تحیر فیہ ولم یهد الیه » لفظندن
مشتقدرکه، بوده معنای حیرتی مشعردر .

چونکه عبد، حق تعالانک ذات اجل واعلاسنده تفکره
باشلانجه دوچار وله وخیرت اولور .

زیرا انسان، هر نه بی فکر وخیالنه کتیررسه، هر نه بی تصور
ایدرسه، محققدرکه ذات اله آنک خلاقهدر .

عقل، اکر وجود الهی انکار ایدی ویرسه، در حال نفسی
کندینی تکذیب ایلر . زیرا الهک جمیع ماسواسی محتاجدر .
محتاجک ایسه محتاج الیهسز حصول و تکونی محالدر .

عقل، اکر حس وخیالک ضبط ایلدیکی برشیته اشارت
ایتسهده دیسه که، (ایشته اله بودر !) ینه نفسی کندینی تکذیب
ایلر . زیرا حس وخیالک ضبط ایده یلیدیکی شلرک کافه سنده
امارات حدوث و امکان، ظاهر و نمایاندر .

دیمک اولدی که عقل، نه قدر درین دوشو نورسه دوشو نسون !

عاقبت حقیقت الهیه بی ادراکدن اعتراف عجزایله برابر وجود
و کمال خدای متعالی اقراره مضطر اولور .

ایشته بومقامده (العجز عن درك الادراك ادراك) مصداقجه
اعتراف عجز، عرفاندر .

بو بر موقف عجیبرکه، سر نهانی و لهرسان عقل انساندر .

* *

الله ، لفظی (لاه یلوه) دن مشتقد رکه بوده معنای احتجایی
متضمندر .

اسم آله ده کی معنای احتجاب دخی بر قاچ و جهدن کلیر .
اولسکیسی - بز شمس منیری وسط سماءه واقف، غیر متحرک
فرض ایتسه ! لازم کلیردی که هر کون خانه مزك درو دیواری
یالیز لایان اشعه زرین آفتاب، دائم و پایدار اولسون . اوحالده ده
خاطره کله بیلیردی که بو انوار تابان، قرص آفتابدن فیضان ایتیمور !
بلکه بو آیدینلق درو دیوار مزه مخصوص بر امر ذاتی در .
شو قدر که بز هراقشام شمسك پیش نظر مزدن غائب و آفل،
واثنای افول و غیوب تنده شو انوارك ده در و دیوار مزدن زائل
اولدیغی کور ییور زده بوندن آکلایور زکه بو انوار تابان، قرص
شمسدن فیضان ایلر .

فکذا جناب قدرة اللهدن جمیع عالم مخلوقاته واصل اولان
فیض وجود، قرص شمسدن کره زمنه واصل اولان نور مشهود
کبی در .

دیمك اولدی که حق باریده ده طلوع و غروب، غیبت و حضور،

صحیح اولور دیه فرض و تقدیر ایتسهک، جناب حقک غروبی
 حالده ممکناتدن ضؤ وجود، زائل و نابود اولمق لازم کلیردی.
 بوتقدیرجه ظاهر و متبین اولدی که، کافئه عوالمه افاضه اولنان
 نور وجود آله ذی الجوددن منتشر و رونمود اولور.

لکن آکا کوره طلوع و غروب، محال و تمتع ایدوکنندن
 فکر و نظرلری ادراک حقائقدن قاصر اولان بعض محرومان
 فیض رشاد، کائناتک هر برینی باشلی باشنه قائم برر موجود واجب
 الوجود، ظن و اعتقاد ایتشلرده بیچاره لر اقتاده چاه ضلال
 اولشلردر.

شو ایضاح ایله تبیین ایتدی که، نور عالمکیر خدانک احتجابنه
 سبب، ینه او نور ساطعک کمال ظهوریدر.
 بو حکمت و حقیقتدرکه سرائر آشنایان وحدت اولان اهل
 تحقیقه (سبحان من احتجب عن العقول بشده ظهوره و اختفی عنها
 بکمال نوره) سوزینی دیدیرتمشدر.

للمترجم

ظاهرده نهان جان کی جانانمز اما
 اعیان مظاهرده عیان نوری کماهی
 ایشته میدانه حیقدی که حقیقت صمدیت؛ عقول ناسدن
 محتجبدر.

احتجاب ایله حجاب آردسندده معناجه فرق اولدیغندن
 (حقیقت صمدیت، عقولدن محجوبدر) ذینلک جائز دکلدر.

زیرا محبوب، مقهوردر. مقهوریت ایسه سزای عبد
برقصوددر.

اما جناب حق، قاهردر. صفت احتجاب دخی صفت قهردر.
حاصل کلام، حق، محتجبدر. خلق محجوبدرلر.

* *

آله، لفظی (اله الفصیل [*] اذا ولع بامه) قولندن مشتقدر.
بوصورتده (آله) لفظی عبادك جمیع احوالده جناب حقه
تضرع و نیازه مولع و مجبور اولدقلری معناسنی متضمن اولمش
اولور.

بوکاده امور آتیه دلالت ایدر.

اولکیسی - انسان، خدا نکرده بر بلای عظیمه، بر آفت
قویهیه اوغراینجه درحال الله ذوالجلالندن بشقه هرشیئی اونودرده
همان قلبیه، لسانیه، (یارب! یارب!) دیمکه، آندن استمداد ایتمکه
باشلار.

او بلادن قورتیلوبده، نائل نعم راحت و آسایش اولنجه،
خلاصنی برطاقم اسباب ضعیفه، واحوال خسیسهیه عطف واسناد
ایلر. بوایسه، حقیقت حالده بر فعل متناقضدر. زیرا کندینی
آفادن رهایاب، منزلس خیر و صواب ایدن اگر جناب رب
الاربابدن بشقهسی ایمشه! بلانک وقت نزولندهده الله دکل، آکا
مراجعت، آندن طلب مدد و معاونت ایتلی ایدی.

اگر وقت بلادده مصلح مهمات، قاضی الحاجات اولان خالق

[*] فصیل، دوه یاوروسنه، وبومناسبتله طفل رضیعه دینیر.

کائنات ايسه، اوقات سائر دده مرجع و ما آب او اولمق لازم گزمی؟
یا لکز وقت ضرورت و بلاده، رب العباده فریاد، رب العبادن
استمداد ایدوب ده، حال راحت و صفاده آندن یوز چویر مک،
حقیقه ارباب هدایت ورشاده یاقیشیمان یوز سز لکلر دندر.

ایکنجیسی - خیر و راحت، اللهدن مطلوبدر.

اوچنجیسی - ظاهرده محسن. یا اللهدر. یا غیر اللهدر.

احتمال ثانی به کوره ینه محسن حقیقی اولان الله، آنک قلبنده
داعیه احسانی خلق بیور مدقه، او دخی کیمسه به برجه احسان
ایده مز. دیمک اولدی که حقیقت حالده انسانی مستغرق احسان
بی پایان ایدن ینه الله عظیم الشاندر. محسن ايسه. هر وقت مرجع
و ما آب، و خلق جهان آکا مراجعتله کامیاب اولور.

حکایه

بعض مریدان، شیطانک ذهن انسانه القاسندن خالی اولمادیغی
وسوسه نك کثرتندن مرشد رشادت پناه لرینه شکایت ایتشار .
مرشد حقائق آگاه آنلره دیمش که « بن اووساوسی دفع
ایچون اون سنه دمیرجیلک، اون سنه چیریچیلک، اون سنه قدرده
قچوجیلک ایتدم . »

مریدان تعجبکنان دیمش لکه. بز جناب رشادت ما بکڑک بو
صنعتلره مألوف اولدی عکزی کورمده .

مرشد رشید دیمش که. بن بوايشلری یاپدم اما سز نصاسه

گورده مامشسیکز ! بیلیور میسکز که، قلب، آهن قدر سختدر . ایشته
آنی نار خوف خدا ایله یومشادنجیه قدر اون سنه مدت، آهنکرلک
ایتدم . آندن صکره اوساخنی ییقامقوله مشغول اولوب، بوایشلهده
تام اون سنه وقت کچیردم .

بو احوالدن صکره سیف صارم (لااله الا الله) ی تشهیر ایلیه رک
اون سنه مدت دها درکاشانه دلدده اقامتکترین ترصد اولدم . تادرون
دلدن محبت غیر الله چیقمینجه، تادرون دله محبة الله کیرمینجه،
اوقپودن مفارقت ایتدم . عرصه قلب، غیر اللهدن خالی اولوبده
درون دلدده محبة الله اساسکیررسوخ اولنجه جلال، عالمک دریا لرندن
برقطره نور ساطع، ساقط اوله رق، کوکل درحال اوقطره نوره
مستغرق، وهر شیدن فانی اولی ویردی ده شمدی آنده سر لااله
الا الله دن بشقه برشی قلمادی .

*
*

آله، لفظی (اله الرجل یأله - اذا فزع من امر نزل به) دن
مشتقدرکه، بردرد و بلایه مبتلا اولان کیمسه نک ایتدیکی فریاد
وواویلا معناسنی مشعردر .

بو حالده (الهه - ای اجاره) یولنده تفسیر ایدمک لازم کلیر .
واقعا جمیع خلائی هر درلو خسار و مضاردن، حفظ و صیانت
ایدن، آله العالمین در .

نته کیم کندی کتاب مجیدده (وهو یحیر ولا یجأر علیه) منع
حقیقی ده اودر .

نصل که (وما بکم من نعمة فمن الله) بیورمش در .

مطعم حقیقی ده اودر .

نته کیم (وهویطعم ولایطعم) بیورمش در .

دیمک اولدی که، عدمک - وجود و تحصیل ایله - قهاری ده
حضرت اللهدر . - قوت و فعل و تکمیل ایله - جباری ده حضرت
اللهدر .

دیمک اولدی که، حقیقته موجود اودر . آنک ماسه واسی
هیچدر .

*
*

بومقامده اولان بعض لطائف و فوائدی ده بیان ایدم .

فائده

۱

مدیونک عادتیدر که آلاچقلسنی اوزاقدن کورنجه، بر طرفه
سیویشیر ! الله کریم ایسه، باق بزه نه امر بیوریور .
بیوریور که :

« ای بنم کناهکار قوللرم ! کترت ذنوبکیز سببیه سز بنم
غرماسیکیز . لیکن غرماسیکیز دیه بندن قاجچکیزه هیچ برسبب
یوقدر . سز بندن قاجچکیز ! بن سزی قاجیره حق حالده بولنام .
بالعکس سزه (ففروا الی الله) دیرم . یعنی بنم جانجه قاجچکزی
ایسترم . زیرا سزک دیونکزی قضا ایدمک ، ذنوبکزی عفو
و مغفرت ایلیمک ذات اقدس و اعلی بنم . کذلک ملوک و امرا
قولرینی فقرایه قبالی، اغنیایه آچیق طوتارلر . بن ایسه بونک
عکسنی یاپارم - باب رحمتی اغنیای غیر شا کرینه قاپارم . فقرای
صابرینه آچارم ! »

فائده

۲

صلی الله علیه وسلم افندمن بیورمشلرکه :
 « الله تعالانک یوز رحمتی واردر . بورحتلرندن یالکز برینی
 جن، انس، طیر، بهائم، هوام آرسنه انزال بیورمش در . شو
 مخلوقاتک یکدیگرینه تعاطی وابدال ایده کلدکاری عاطفت و مرحمت،
 اورحت واحد الیهنک اثر فیضی در . دیگر طقسان طقوز
 رحمت سبحانیه سنی ده جناب حق یوم قیامتده عبادینه بذل
 ایده جکدر . »

بن دیرمکه، بنی الرحمه افندمنک بو حدیث عالیرنده رحمت
 رحمانی، بویله یوز عدده حصر بیورملری مجرد علی سبیل
 التقهیمدر . یوقسه بحار رحمت خدا، بیرون حد واحصا در .
 بناء علیه رحمت الهیهی حدمعین ایله تحدید، صوابدبد عقل
 رشید اوله ماز .

فائده

۳

صلی الله علیه وسلم افندمندن مرویدر . بیورمشلرکه :
 جناب ارحم الراحمین روز رستخیزده عباد مذنبینه خطاباً
 سز بنم شرف اقام ایله مشرف اولمهی امید ایده بیلیرمیسکتر ؟
 بیوره جقلر .

کنهکاران امت دخی « اوت ! یارب ! » جوانی ویره جک
 « سزی بوامیده دوشورن نه در ؟ » یولنده ایکنجی بر خطاب

عزته دخی « عفو و فضل و احسان کز در » تضرعاتیله مقابله ایدیله .
 جک، بونک اوزرینه رحمت واسعة الهیه دریای بی پایانی جوشه
 کله رک (قد اوجبت لکم مغفرتی) مژده سیله جملہ سی مستبشر
 اوله جقدر .

فائده

۴

عبدالله بن عمر دن « رضی الله عنهما » مرویدر ؛
 رحمة للعالمین وسید المرسلین افندمز بیور مشلردر که :
 « خدای عزوجل، روز جزاده بعض قولارینه هزبری - مثل
 مد البصر - یتیم سچل معتبر نثر ایدوب ذیه جک که (بودفاتر
 اعمالک مندر جاتندن انکار ایده جکک بر شی وارمیدر ؟ کراماً
 کاتین، ملکری سکاظم ایتیمش اولسونلر ؟)
 اوده (خیر ! یارب !) دیر .

ینه خطاب عزت کله جک که (قولم ! شوکناهار ی ایشله مکده
 معذور می ایدک، بر عذرک وارمیدر ؟)

عبد مذنب بوکاده (خیر !) دیرده همان قلبی آتسه وضع
 ایدر ایتیمز جناب احم الراحمین (بوکونکی کون فرد آفریده ظلمیده
 اولماز . سنک اینه بنده بر اییلکک وار .) دیر ؛ اوزرنده (اشهد
 ان لا اله الا الله و اشهد ان محمداً رسول الله) کلتین منجیتینی یازیلی بر
 ورقپاره اخراج و ابراز ایدر .

عبد مذنب آنی کورنجه دیر که (یارب ! بوورقپاره شو سجالاته
 نصل مقابل کله بیلیر ؟)

متعاقباً میزانك بر كفه سینه او ورقپار دینی، دیگر كفه سینه ده سجالات اعمالی قورلر؛ ورقپاره مذكورك موضوع اولدینی كفه میزان در حال آغیر باصهرق سجالات معاصی موضوع اولان كفه یوقاری فیرلار! ایشته اكلاملی كه، ثقلنده ذكر الله ایله متوازن اوله حق برشی یوقدر .

فائده



غزوندك برنده چوجغك برینی صایلغه چیقارمشلر. اوكونده غایت صیحاك برکون ایدی . برده چوجنی اناسی کورر؛ قوشار؛ قوجاقلار؛ ارقهسی اوستنه یره یاتار؛ چوجنی باغینه باصهرق صیجاغك تأثیرندن قورومغه چالیشیر؛ «او غلغزم! او غلغزم!» دیهرك رحم وشفقت مادرانه سنی اظهار واعلان ایدر؛ بوغریب تماشا عمومك رقت ومرتبتی جلب ایله مشغولیت مهمملرینی اونوتدیردق هرکسی کریه ریز تأثر ایلر؛ او صروده رسول الله صلی الله علیه وسلم افندمز، مجمع ناسه سایه انداز اقبال، ووقعه دن خبردار اولوب خاتونك ترحمندن متعجب ومتأثر اولانلره «شو خاتونك اوغلی حقنده اظهار ایتدیکی رحم وشفقته می تعجب ایدیورسیکز؟ الله سزك جمله کزه شو خاتونك اوغلنه اولان رحم وشفقتندن دهامرحتلودر.» بیوررلر. خاتونك باشنده طوپلانان خلق دخی جناب خیرالبشردن بوخبر بشارت اثری آلجه فوق العاده فرحناك اوله رق طاغیرلر .

اوچنجی مسأله

آله لفظنك بحسب اللغة كيفيت اشتقاقى

بعضيلرى ديمشلكه :

« لفظ آله عربى دكلدر ؛ عبرانى در ياخود سريانى در. زيرا بونلر (الها رحمانا و مرحيانا) دييورلر كه شوعبارده تعريب اولندقدده (الله الرحمن الرحيم) شكلنى آيلر. »
بوايسه عقلدن بعيددر .

لغتين ييننده حاصل اولان مشابهن، لفظ آلهك اصلى عربى اولماق لازم كلز. بوكاده دليلز شودر كه، جناب بارى (ولئن سألتهم من خلق السموات والارض ليقولن الله) و (هل تعلمه سميّاً) بيورمشدر .

برنجى آيتك دلالتى ايسه پك صريح اولديغى كى ايكنجى آيتده كى (سميّاً) دزده مراد، لفظه الله اولديغنه علما اتفاق ايتمشلدر .
بونكه برابر ا كثرى تشكىل ايدن علمى اعلام، بواسم پاك خالص عربى اولديغنده متفق الكلامدر .

« لفظه الله اسم علم خدادر » دينلر بوكشمكش اختلافدن قورتمشلدر .

لفظه اللهك اسم علم اولديغى انكار ايدنلر كده بوبابده ايكي قولى وارددر .

کوفیونک قولى

لفظة اللهك اصلى (الاه) ايدى . براى تعظيم الف ولامك
دخوليه (الآله) اولدى .

السنة ناسده كثر جريانندن ناشى همزه استنقال اولنه رق
حذف ايدلدى . كلمه ده مجتمع اولان ايكي لامك ده اولكي سى بالادغام
(الله) دينيلدى .

بصريونك قولى

لفظة اللهك اصلى (لاه) ايدى . الف ولامك التحاقيله (الله)
دينيلدى .

ايشته شو

كحلفة من ابى رباح

يسمعها لاهه الكبار

يتمده اصلى اوزره (لاه) استعمال اولدى .

دردنجى مسأله

امام خليل ديمشك كه :

كر (الله) وكر (آله) قولمك حق سبحانه وتعالى حضر تلى رينه
اختصاصنده عموم خلق متفقدر . اسم آلهى ، اللهدن غيرى يه اطلاق

ایدنلر وار ایسهده بونلرده آله استخی اضافله ذکر ایدرلر .
 مثلاً « شونک الہی ، بونک الہی » دیرلر . یاخود لفظ الہی
 تنکیر ایدرلر .
 فصل که قوم موسادن حکایه قرآن کریمده (اجعل لنا آلهاً
 کالہم آلهة قال انکم قوم تجهلون) بیورلمش در .

بشنجی مسأله

(الله) اسم شریفک بر طاقم خواصه اختصاصی واردرکه ،
 او خواص سائر اسماء الہدہ بولماز .
 شویله که :

خاصیت

۱

(الله) لفظندن الفی حذف ایتسهک ، باقیسی (لله) صورتندہ
 قالیرکه ، بودہ حق سبحانہ و تعالیٰ حضرتلرینہ مختصدر .
 نتہ کیم (لله جنود السموات والارض - لله خزائن السموات
 والارض) آیت جلیلہ لرندہ بویله اوقونور .
 (لله) دن ده برنجی لام ، حذف اولنسه ، بقیہ می (له)
 صورتندہ قالیر .
 فصل که (له مقالید السموات والارض - له الملك والحمد)
 آیتلرندہ بوصورتله واقع اولمش در .
 (له) ده کی لام ده حذف اولنورسه (هو) قالیرکه ، بودہ

اولکیر کبی حق سبحانه وتعالیٰ حضرت تارینه دلالت ایدر .
(قل هو الله احد) و (هو الحی لا اله الا هو) آیتارنده واقع
اولدینی کبی .

(هو) لفظنده کی واوک ایسه حرف زائد اولدینی تنیه
وجمع صیغه لرنده سقوطی دلیلده ثابتدر . زیرا تنیهده (هما)
جمعهده (هم) دیرزده واوی آردهدن کیدریرز .
ایشته بوخاصیت یالکز لفظه اللهده موجود اولوب سائر
اسملرده مفقوددر .

لفظه اللهده بوخاصیت، بحسب اللفظ حاصل اولدینی کبی
بحسب المعنی دخی حاصلدر .

زیرا سن الله ذوالجلاله خطاباً (یا رحمن !) دیدیکک زمان !
جناب ذوالکبریائی یالکز رحمتله وصف ایتمش اولورسین؛ قهرایله
وصف ایتمش اولمازسین .

(یا علیم !) دینجهده، آنی یالکز علم ایله وصف ایتمش
اولورسین؛ قدرت ایله وصف ایتمش اولمازسین .
اما (یا الله !) دیدیکک وقت، ذات پاکنی جمیع صفات ایله
وصف ایتمش اولورسین .

زیرا (اله) بوصفتلرک مجموعیله متصف اولماقچه اله اولماز
ایشته شو ایضاحات ایله تین ایتدی که (الله) قولمزدده حاصل
اولان بوخاصیت مغویه دخی سائر اسمای خداده حاصل دکلدر .

خاصیت


۲

کلمه شهادت که آنک سبیلہ کافر، کفر دن اسلامہ منتقل
اولور . او کلمه منجیہ ده بو اسم شریفدن بشقه سی موجود و مذکور
دکدر .

سبب بودرکه، کافر (اشهدان لا اله الا الرحمن - و - الا الرحيم
- و - الاملاک - و - الا القدوس) دیسه، کفر دن جیقوب اسلامه
کیرمش اولماز . اما (اشهدان لا اله الا الله) دیسه، او آنده کفر دن
جیقار، اسلامه کیرر .

ایشته بوده (الله) اسم مبارکنک بو خاصیت شریفه اختصاصه
دلالت ایدر .

« والله الهادی الى الصواب »



اوتنجی باب

« الرحمن الرحیم » قولمه متلق بر بحثی حاویدر .

معلومك اولسونكه، اشیا درت قسمدر .

- ۱ — نافع و ضروری .
- ۲ — نافع و غیر ضروری .
- ۳ — ضروری و غیر نافع .
- ۴ — غیر نافع و غیر ضروری .

قسم اول كه، هم نافع، همده ضروری اولان شیدر . بونك
دنیاده مثالی تنفس ایتدیكمز نفسدركه، سندن بر لحظه منقطع
اولی ویرسه، در حال موت، حصوله کلیر .
عقبادهده مثالی معرفة اللهدركه قلب انساندن كذلك بر لحظه
منقطع اولسه . متعاقباً موت قلب . واقع، وعذاب ابدی مستوجب
اولور .

قسم ثانی كه، یالکز نافع اولوب ضروری اولیاندردر .
دنیاده مال ، عقباده معرفة اللهدن غیری علوم و معارف بو
قسمدن معدوددر .

اوچنجیسی كه، ضروری و غیر نافع اولان قسمدر .
احراض، فقر، هرم كبی مضر تلدردر كه مضرات مذكوره
دنیایه مخصوص اولوب بونلرك آخرتده امثال و نظائر یوقدر .
دردنجیسی كه، نه نافع، ونده ضروری اولیان قسمدر .

دنیاده فقر واضطراب، عقباده عذاب کبی شیلردر .
 بواسی معلومک اولنجه دیرزکه :
 بالاده بیان وایضاح ایتدیگمز وجهله (نفس) دنیاده هم
 نافع، همده ضروری اولان قسمدندر .

بناء علیه انساندن بر لحظه منقطع اولسه، در حال حصول موت
 محققدر . ایشته معرفه الله دخی کذلک آخرتده بر امر لازم اولمغله
 قلبدن بر لحظه زائل اوله جق اولسه، شک یوق که او آنده موت
 قلب وقوع بولور .

لکن موت اول، موت ثانی دن اسهل و آساندر . زیرا موت
 اولده کشینک چکه جکی الم واضطرابک مدتی پک آز بر زماندر .
 موت ثانی نک المی ایسه ابدالآباد باقی قالیر .

وتنفسک نصل که بری - نسیم طیبی درون دله ادخال ایله
 انسانک اعتدال و سلامتی ابقا - ودیکری - حار . محترق، فاسد
 اولان هوایی قلبدن اخراج ایتک کبی ایکی اثر مخصوصی وارایسه،
 فکرک دخی کذلک بری - نسیم حجت و برهانی قلبه ایصال ایله
 ایمان و عرفانک اعتدالی درون دله ابقا - ودیکری شهادتن
 متولد اولان هوای فاسدی قلبدن اخراج ایتک کبی ایکی اثر
 مخصوصی واردر .

ایشته بواحواله واقف اولان اهل یقین، آفادن سالم و امین،
 خیرات و مسراته وصول ایله کامین اولور .
 بویکی امرک کالی ده ظفریاب اولدیغک نعمک کافه سی بحار

رحمت خدادن بر قطره، انوار احسان ذوالکبر بادن بر ذره اولدیغنی
یلمکدک ایله عقلکه منکشف و عیان اولور .

بوانکشافک حصولندن صکره قلبکده الله تعالانک رحمان،
رحیم اولدیغنی بیلدیره جک برباب معرفت آچیلیر .

بومعناى منیفی علی التفصیل ا کلامق ایسترسهک ! شوویره جکمز
ایضاحاته عطف نظر دقت ایتملیسین ! بیللیسین که، سن نفس، بدن
روح، وجسدن مرکب بر مخلوقسین .

اوله ایسه اولان نفسدن بحث ایدلم .
شبهه سزدرکه نفس انسان، مبدأ فطرته علوم و معارفدن
عاری اوله رق جاهل و نادان ایدی .

نته کیم باری تعالی (والله اخر حکم من بطون امهاتکم لا تعلمون
شیئاً وجعل لکم السمع والابصار والافئدة لعلکم تشکرون)
بیورمشدر .

ایشته بوراسنی در خاطر ایتدکن صکره اولان حساس،
محرك، مدرک، عاقل اولان قوائک ثانیانیا - معقولات ایله جهات
معقولاتک مراتبی نظر تأمله آلملیسین که ایجه ملاحظه ایدرسهک
بومراتبک غایت ونهایتی اولمادیغنی البته آکلارسین .
شویله که :

ذوی العقولدن بریسی، علم معقولاتی اکتسابه باشلاسه،
وبالفرض تحصیلنده برق خاطفک، ریح عاصفک سریانی قدر
بر سرعت سیر کوسترسه، بوسیر سریغندهده ابد آبدین، ودهر
داهرینه ذک دوام ایتسه، معارف و علومدن حاصل تحصیلینه

بر مقدار متاہیدن عبارت قالیر . بیلہ میہ جکی و تحصیل و اکتسابہ
 رہیاب وصول اولہ میہ جفی معلومات دخی نامتہای بولنور .
 مقدار متاہی ایسہ غیر متاہی یانندہ ہیج کیدر .
 ایستہ شو حالده او طالب علم اولان مرد رشیدہ ظاہر و آشکار
 اولورکہ : حکیم علامک (وما اوتیم من العلم الا قلیلاً) قول کریمی
 پک طوغری ، پک صحیح در .

* *

بدندن ده بحث ایدلم :
 معلومدرکہ بدن انسان ، اخلاط اربعہ دن مرکبر .
 بو اخلاطک ترکیب و تشریحی کیفیتنی ده دوشونور و بونک
 اعضا واجزاسندن هر برنده کی منافع عالیہی ، آثار شریفہی
 او کردیرسہک . او حالده (وان تعدوا نعمۃ اللہ لا تحصوها) قول
 کریمک صدق و صحتی سکا ظاہر و بیدیدار و بونور حقیقتک
 ظہوری تقدیرندہ خدای متعالک سنی یارادوب مظهر ہدایت
 ورشاد ایتہ منندہ کی کمال رحمت الہیہ سی آثارندن بر اثر منجلی
 و آشکار اولورده (الرحمن الرحیم) قول کریمک معناسندن
 از برشی خبردار اولورسین .

سؤال

رحمت خدادن بشقہ رحمت وارمیدر ؟

جواب

طوغری سنی صورارسہک یوقدر . رحمت آنجق اللہ مخصوصدر

بالفرض غير الله ايجونده رحمت ثابت اولسه بيله ينه بديميدركه،
رحمة الله، رحمت غير اللهدن اكل در .

بومجئده ايكي مقام واردر .

مقام اول

رحمت، جناب الله مخصوصدر .

رحمت، جناب حقه مخصوص اولديغنه برقچ وجه دلالت ايدر
وجه اول - جود، ماينبغی بی بلاعوض افاده دن عبارتدر [۱]
غير اللهدن ايسه عوضسز جود، صادر اولماز . شوقدر كه عوضك ده
اقسامی چوقدر .

عوضك كيكي جسمانی اولور .

مثلا - بر آرشون قماش آلق ايجون صاحبنه بر آلتون

ويرمك كي

کيكي ده روحانی اولور .

بوده برقچ قسمدر .

انسان، احسانی مقابلنده خدمت،

اعانه،

شای جميل،

ثواب جزيل ايسته مك ايجونده .

قلبدن حب مالی ازاله،

[۱] ماينبغی، لائق وشايان اولان شيدر .

قابدن رقت جنسيه يي دفع اچون ده بذل و اعطای مال ايدر .
 ايشته بو اقسامك كافه سي روحانی عوضاردر . و بالجملة جناب
 الله يدين غيری هر کرم و عطا صاحبی کرم و عطاسنی بر نوع کماله دسترس
 و ظرفریاب اولغه وسیله انخاذايدر .
 بو تقدیرجه آنک ویرکیسی معاوضه حکمنده قالیر . جوددن
 هبه دن معدود اوله ماز .

حق سبحانه و تعالیٰ حضرتلری ایسه کمال ذاتی ايله کامل
 اولدیلر اچون آنک جود و کرم و احسانی استفادۀ کمال مقصدينه مبنی
 اولوق محالدر . انکچون جواد مطلق ، راحم مطلق ، آنجق مولای
 متعالدر .

وجه ثانی — جمیع ماسوی الله (ممکن لذاته) در . ممکنک
 تکوینی ایسه ، مجرد ذاتی و جودینی مقتضی اولان جناب واجب
 الوجودک تکوین و ایجادینه وابسته در . مادامکه غیر الله یدين صادر
 اولان هر رحمتک سلسله و جوده دخولی ، خلاق کریمک ایجادینه
 محتاج در . حقیقته رحیم اولان اودر .

وجه ثالث — انسان اچون فعل و ترک ممکندر . بناءً علیه
 قلبده برداعیه جازمه حاصل اولمادقچه فعلک ترک اوزرینه رحمانی
 تمتع اولور .

مادامکه اوداعیه نك عدم حصولی تقدیرنده انساندن رحمتک
 صدوری تمتع اولور . مادامکه او داعیه نك حصولی حالنده ده
 رحمتک صدوری واجب و لازم اولور . حقیقته رحیم اولان
 اوداعیه يي قلب انسانده خلق ایدندرکه اوده جناب باریدر .

ديك اولدى كه حقيقتده رحيم اودر .
 وجه رايح — فرض ايدلم كه بر كريم آدم وارايمش ده
 فقرايه برچوق بغدادى طاغيديرمش !
 لكن دوشونملى كه طعامى هضم ايدهجك معده حاصل اولما.
 دقچه آنك بخش واحسان ايدهجكي حنطه دن كيسه منتفع
 اوله بيليرمى ؟

برده فرض ايدلم كه عاليجنايك برى سكا بر باغچه ارم مثال
 تمليك واحسان ايمش ! آخج كوزده قوه باصره حاصل اولما دقچه
 اوباغچه دن انتفاع واستفاده ايد بيليرميسين ؟ بونك طوغريسى
 شودر كه او حنطه نك، اوباغچه نك خالق ده. او حنطه دن، اوباغچه دن
 انتفاع واستفاده قوت وقدرت و برنده، بونلر دن منتفع اولنجيه
 قدر انسانى انواع آفات ومخافات دن حفظ وصيانت ايلين ده الله
 ذوالجلالدر . بناء عليه حقيقتده منعم وراحم او اولمق لازم كير .

مقام ثانى

غير الله دن ده رحمت ، صادر اولسه بيله الله تعالانك رحمت
 الهيمسى اكمل واعظم اولدينى بيانده در .

بومطلب دخى برقاج وجه ايله بيان وايضاح اولنور .
 وجه اول — انعام، منعمك علو حالى، منعم عليك ده منعمه
 نسبتله دنائت حالى ايجاب ايدر . ايمدى حضرت الله نسبتله

حاصل اوله حق تواضع بعض خلقه نسبتله حصوله كه جك تواضعدن البته خير ايدر .

وجه ثاني - انعام واحسان آلهی به مظهر اولديغك وقت جناب باری سندن نعم آخرته وصولكه وسیله اوله حق بر عمل طاب ايدر . بونكه ده گویا كه ینه كندی نفسك ایچون سعادت ابدیهی اکتساب ایت ! دیه امر ایلر . اما اللهك غیری او یله دكلدر . غیر الله سكا بر ایلك ایتدیكى وقت كندی خدمتیه مشغول ، كندی مقصودنی محصیله منصرف اولماکی امر ايدر . حالت اولانك ایسه حالت ثانیه دن افضل اولدیغده اشتباه یوقدر .


وجه ثالث - منع علیه ، منعك بنده درمخریده سی کنی اولور . الله عبودیت ایسه غیر الله عبودیتدن اولادر .

وجه رابع - صاحب احسان اولان انسان ، سنك تفصیل احوالكه واقف و آگاه اولمادیغدن بعضاً آنك انعامی سنك او انعامدن مستغنی اولدیغك بر زمانه تصادف ایده بیلیر . بعضاً دخی آنك انعامنه كرچكدن محتاج اولدیغك بر وقت او سندن لطفی کسر . بونكه برابر انسان ندقدر کثیر الاحسان برولی نعم بی امتنان اولسه دخی سنی هر وقت مستغرق نعم بی پایان ، هر مرادكه ایردیرمكه دائماً کامران ایده مز . خدای رحیم ایسه هر معلومی بیایر ؛ هر ممکنه قدرتی تعلق ايدر . آنکچون سنك بر حاجتك ظهورنده آتی بیلیر . آندن ایستیه جكك شیئی حصوله کتیرمكه قادردر . بناء علیه شبهه یوقكه بواوته كندن افضلدر .

وجه خامس - انعام ، متی ایجاب ايدر . متی حقندن قبول

ایتمک ایسه، خلقدن قبول ایتمکدن اولادر.
 ایشته شو ایضاحاتمزله تین ایتدی که (رحمن رحیم) آنجق
 الله تعالی و تقدس حضر تاریدر.

شو ایضاحاتمزله بوراسی ده ثابت اولدی که، صفت رحمتله
 متصف، آخر برذاتک ده وجودی فرض اولنسه بیا بهینه الله
 تعالانک رحمتی آنک رحمندن اکمل و افضل در. اعلی و اجل در.
 «والله اعلم»



اون برنجی باب

«بسم الله الرحمن الرحيم» قولمزدن مستنبط بعض نکته لر نیاننده در.

نکته

۱

مر ویدر که بروقت حضرت موسی علیه السلام شدتلی بروجع
بطنه او غرادی، بو آغریدن جناب حقّه شکایتله دواخواه اولدی.
شافی حقیقی آکا برکیاهه دلالت ایلدی. حضرت موسی او اوتدن
ییدی. باذن الله تعالی قرننک آغریسی کچدی. برمدت صکره
ینه او آغری عودت ایلدی. تکرار اوکیاه نافعی بولدی ییدی.
اما بو دفعه شفایاب اولیوب بالعکس مرضی مشد اولدی.
مناجاتنده (یارب! بو ییدیکم اوت ینه او اولکی اوت ایدی.
دفعه اولاده منتفع اولدم. بو دفعه ایسه مرضم مشد اولدی)
دیدى.

طرف الهیدن ده شویله خطاب عزت کندی که: «دفعه اولاده
سبزده زاره بنم طرفدن مأموراً مراجعت ایتمش ایدک. آنک ایچون
شفایاب اولدک. بودفعه ایسه کندی رأیکله کتدک. بوسبیدن ناشی
مرضک مشد اولدی. بیلور میسین که دنیا سم قاتلدر. آنک ده
تریاقی پنم اسم پاکدر.»

نکته

۲

بر کچه نمازینی، نیازینی بتورد کدن صکره صباحه قارشی
 اویقویه واران عابدۀ مشهوره رابعۀ عدویه نك حال منامندن
 بالاستفاده خانه سنه خرسز کیرر. درون خانه ده بوله بیلدیکی اشیایی
 طوپار لایوب قپویه متوجه اولور سده قپویی بوله ماز. اوموز لادیغی
 اشیایی یره قور. قپو او آنده کوزینك اوکنه کلیر. تکرار اشیایی
 اوموز لار. قپو کوزندن نهان اولور. بو حالی اوچ کره تجربه ایلر.
 او آراق اوک کوشه سندن قولاغنه بر ندا کلیر که «آدیغك اشیایی
 براق! طیشاری چیق! زیرا حیب اویقوده ایسه ده سلطان
 اویانقدر.»

نکته

۳

قیون کودمکه مألوف اولان عارفلردن برینك دائماً آغیلنه
 قوردلر کلیر کیدرمش!! فقط اغنامه ضررلری طوقماز ایمش! بر
 کون بر آدم یانه کلوب بو حالی کورنجه «قورد ایله قیون نه وقت
 بارشتمش؟» دیه صورمش. راعی عارف دخی آکا «چوبانك الله ایله
 بارشدیغی کوندنبری!» جوابی ویرمش در.

نکته

۴

بسم اللهك معناسی «ابدأ باسم الله» اولوب تخفیفاً (ابدأ)
 اسقاط اولندی. انکچون «بسم الله» دیدیکك وقت «ابدأ باسم الله»
 دیمش کی اولور سین.

بونندن ده مقصود، بسمه کش ابتدا اولان عبد، ايشه ايلك باشلا ديغند نبري مدار امری. تسهيل و تخفيف و مسامحه به مقرون اولديغنه تنبهدر .

کويا که الله تعالى سکا ايلك ذکر ايتديکي کلمه ده اوکله يي صفح و احسانه دليل قيلشدر .

نکته

۵

مرويدر که فرعون، دعوای الوهيته قيام ايتمزدن اول برقصر عالی بنا ايدوب طيش قپوسی اوزرينه (بسم الله) يازديرمش ايمش ! مؤخرأ دعوای الوهيته قيام ايتمسيله کندینی دين حقه دعوته مأمور اولان حضرت موسى تبليغ وارشادينک ثمره سنی کورده مينجه، مناجاتنده « الهی ! بن فرعونده اثر خير کورده ميورم » ديهرك فرعونك ايمانندن اظهار یأس و نا امیدی ایلدی . جانب حقندن ده « يا موسى ! سن غالبا فرعونك هلا کنی ايتيورسين؟ سن آنک کفرينه باقيورسين . بن ايسه آنک قپوسنه يازديغی شيئه نظر ايديورم ! » يوتنده خطاب عزت کلدی .

بونده شو نکته وارکه، خانه سنك طيش قپوسی اوزرنده بوکله طيبي يي يازان کيمسه — کافرده اولسه — هلا کدن امين اولور يا بوکله يي عمرينك اولندن آخرينه دكين سويدای قلبنده نقش ايدنك حالی نصل اولق لازم کليز ؟

نکته

۶

الله تعالى ذات پا کنی (رحمان، رحيم) تسميه بيورمشدر .

بو حالده نصل اولورکه قوللرندن رحمتی اسیرکه سون !
 مرویدرکه سائلک بری بر باب عالی کوروب بونک صاحبی ده
 البته قپوسی کی رفیع الشان، کثیر الاحساندر دیه قپویه یناشوب
 (شیئاً لله) دیدی . آکا رفعت باب ایله متناسب اولیه جق قدر
 آز برشی ویردیله . سائل ایرتسی کون النده بر قازمه ایله کلوب
 قپوی نخریه باشلادی . بوایشه سبب جرأتی صور دیله . دیمش که :
 یا قپو عطیه لائق بر حاله افراغ ایدملی ! یا خود عطیه ده قپویه
 کوره اولملی !!

الهمز ! سنک رحمت و رحمانیه که نسبتله، عموماً بحار رحمت،
 عظمت عرشه نسبتله ذره دن ده اقلدر . ایمدی کتاب کریمک اولنده
 صفت رحمتکی عبادکه نصل القا بیوردک ایسه، بزى ده رحمتکدن،
 فضلکدن محروم ایتمه !

نکته

۷

(الله) قهره، قدرته، علوه اشارتدر .
 لفظه الله، عقینده (الرحمن الرحیم) ی ذکر ایتسی ده رحمت
 رحمانیه سنک قهرندن اکثر واکمل اولدیغنه دلالت ایدر .

نکته

۸

طرف سلطانیدن مبايعه اولنان حیواناتی علی الا کثر تمغالر لکه
 آنلره اعدا طمع ایدوب ده ال اوزاتمسون . کویا الله تعالی دخی
 بیوررکه «سنکده شیطان دیرلر بردشمن طاعتک وار . آنکچون

بر عمله شروع ایتدیک وقت، او عملی بنم تمامه له تمغالا ملی، یعنی
ابتدا سنده «بسم الله الرحمن الرحيم» دیمایسین که او عمله دشمنک اولان
شیطان کوز دیکمسون !»

نکته

۹

نفسکی قرین ذکر الله ایت ! تا که دارین ده نزد خدادن دور
اولیه سین .

مرویدر که بنی اکرم وارحم صلی الله علیه وسلم افندمن اتحاد
بیوردقلری خاتم شریفی ابو بکر الصدیق رضی الله عنیه و یروب
اوزرینه (لا اله الا الله) عبارة منیفه سنی نقش ایتدیرمسنی امر
بیوردیلر . جناب صدیق اکبردخی امثال امر بیغمبر ایدوب
خاتمی حکا که ویردی . وخاتمہ (لا اله الا الله ، محمد رسول الله)
کلمه منجیه سنی تماماً نقش ایتسنی اخطار ایلدی . حکاک امر نقش
وحکی اتمام ایلہ خاتمی ابو بکر الصدیقه کتیردی . اوده عبارة
منقوشه یه عطف لحاظه دقت ایتمه رک خاتمی الدینی کبی حضور
فائض النور حضرت رسالتپناهی به تقدیم ایلدی . مکر خاتم
شریفده (لا اله الا الله محمد رسول الله ، ابو بکر الصدیق) عبارده سی
نقش ایدلمش ایمش ! بناءً علیه جناب رسالتآب افندمر « یو
زوائد ندر ؟ یا بابکر ! » بیوردیلر .

جناب صدیق معلا القاب، مستغرق عرق شرمساری و حجاب
اولدینی خالدہ « یارسول الله ! مبارک اسمکزی نام خدادن آیرمغه
وجدانم راضی اولمادی . باقیسنه کلنجه، آنک نقشنی حکا که بن

بن امر ایتدم . « جوانی ویردی . متعاقباً جبریل امین علیه السلام نازل اولوب « یارسول الله ! نام ابوبکری ختمه بن یازدیردم . زیرا ابوبکر سزك اسم شریفکزی نام پاك خدادن تفریقه راضی اولمادیغی کی ، حق تعالی حضرتلری دخی نام ابوبکری سزك اسم شریفکزدن آیرمغه راضی اولما مشدر .

ایشته بوندهده شونکته وارکه جناب صدیق ، رضی الله عنه ، حضرت محمد ، صلی الله علیه وسلم افندمزك اسم شریفی نام پاك خدادن آیرمغه راضی اولمادیغی چون بو کرامته نائل اولنجه ، یابر آدم دائماً ذکر الله ایله تر زبان اولوب نام خدایی لسان وجنانندن آیرمزسه ، نصل کراماته نائل اولمق لازم کله جکی ملاحظه یه محتاج قالیر .

نکته

۱۰

نوح نبی علیه السلام ، سفینه یه را کب اولدیغی وقت « بسم الله مجراها و مرساها » دیمش اولمغه ساحل رس نجات اولدی . بوا یسه بسماء شریفه نك نصفیدر . یا آخر عمرینه قدر بسماء شریفه نك تمامه مواظبت ایدن کیسه نك نجاتدن محرومیتی نصل تصور اولنه بیلیر .

کذلک سلیمان پیغمبر علیه السلام « انه من سلیمان وانه بسم الله الرحمن الرحيم » قولیه مملکت دنیا و آخرته نائل اولدی . آنکچون قویاً مرجو و مأمولدرکه بسماء شریفه ایله ترین زبان عبودیت ایدن عبد مؤمن دنیا و عقبی ملکنه ظفر یاب اولور .

نکته

۱۱

بری چیسه دیسه که، « انه من سلیمان » قولنده سلیمان علیه السلام نیچون کندی ناهنی اسم پاک خدایه تقدیم ایلدی ؟ آکا بر قاچ وجه ایله جواب ویرله بیلیر .

۱ — باقیس، کندی اقامنکاهنه خارجدن اذلسز کیمسه نك رهیاب دخول ووصول اولمق احتمالی اولمادیغنی بیلدیکی حالده اوطوردیغنی اوطه نك یصدیغنی اوزرنده کتاب سلیمانی بولنجه، هدهدی ده دیوار اوزرنده کورنجه، یقینا اکلا دی که بو کتاب، سلیماندر ، آنکچون کتابی اولا اله آدیغنده « انه من سلیمان » دیدی . صکره آچوب ایچنده « بسم الله الرحمن الرحيم » ی کورنجه ده « وانه بسم الله الرحمن الرحيم » دیدی . دیمک اولورکه « انه من سلیمان » سوزی کلام باقیسدر . کلام سلیمان دکلدر .

۲ — جائز که حضرت سلیمان عنوان کتابده « انه من سلیمان » درون کتابده ده « ابتدا بقوله بسم الله الرحمن الرحيم » یازمش اولسون؛ نصل که جمیع مکاتیبده معتاد اولان ده بودر .

آنکچون جائز که باقیس، کتاب سلیمانی آلنجه، ابتدا عنواننده کی عباردی اوقویوب (انه من سلیمان) بعده مکتوبی آچوب (بسم الله الرحمن الرحيم) ی کورنجه ده (وانه بسم الله الرحمن الرحيم) دیمش اولسون .

۳ — باقیس، کافره ایدی . آنکچون احتمال که مکتوبی کورز کورمز الله شتم ایدر ديه حضرت سلیمان احتراز ایتمش ده کندی ناهنی بوسبیدن ناشی اسم پاک خدایه تقدیم ایلدی . تا که شتم، الله اولسون ده کندینه اولسون .

نکته

۱۲

« بسم » ده کی حرف با، محسن معناسنی مفید اولان (بر)
 استندن مشتقدر . حق تعالی ایسه معلومدرکه دنیا وعقباده مؤمن
 قوللرینه انواع کراماتک واهب ومحسیدر . بروکرامت واحسان
 خدانک اجل واعلاسی دخی یوم قیامتده رؤیت دیدار پرانواریله
 قوللرینی مکرم قیلیدر .

حکایه

صلحادن برذات، خسته لنان یهودی بر قوموشوسنک عیادته
 کیدر ینلرنده شویله بر محاوره جریان ایدر :
 ذات — قومشو ! اسلامه کلسهک آ
 یهودی — بونک مقابلنده نه وار ؟
 ذ — آتشدن قورتلوق وار !
 ی — آتشی وظیفه ایتمام ! بشقه نه وار ؟
 ذ — جتته کیررسین .
 ی — آتی ده ایسته مم !
 ذ — یانه ایستیورسین ؟
 ی — ایسترمکه ربمز بکا وجه کریمنی کوسترسون !
 ذ — مسلمان اولورسهک، بوده حاصلدر .
 ی — بنی تأمین ایدرمیسین ؟
 ذ — ایدرم دیر و یهودی بی ایستدیکی کبی تأمین ایدر .
 بونک اوزرینه یهودی شرف اسلام ایله مشرف اولدی .

متعاقباً ده وفات ایتدی . جنازه نمازینی مسلمانلر قیاب اسلام
مزارلغنه دفن ایدلدی . صکره اودات محترم، بومسلمان اولان
یهودی بی عالم منامده کوردی که سونوب طورییور . آکادیمش که
« یاشمعون ! ربك سكا نه معامله بیوردی ؟ » دیدی که « بنی عفو
ومغفرت ایلدی . و — بكا اولان شوقکدن طولای مسلمان
اولدك — بیوردی . »

« بسم الله » ده کی حرف سین دخی جناب حقل « سمیع »
استندن مشیتقدر . حق تعالی حضر تتری تا عرش اعلا دن ماحت
الترایه وارنجه خلقل دعا وندالرینی ایشیدر .

مرویدر که صحابه کزیندن زید بن حارثه، منافق بریله ارقداش
اولوب طائفه متوجهاً مکة مکر مه دن یوله روان اولدیلر .

انهای راهده بر ویرانهیه مصادف اولملریله منافق، رفیق
جناب زیده « شورایه کیرسه کده، براز استراحت ایتسهك ! »
دیدی . ایکسی ده ویرانهیه کیردیلر، جناب زید، یورغونلق
حالیله اویقویه طالدی . منافق مکر جناب زیدی اولدورمه
فرصت کوزه دیرمش ! بناءً علیه در حال زیدی باغلادی، وهان
اولدورمهیه طاوراندی . زید او یانوب منافقه دیمش که، « بنی نیچون
اولدور یورسین ؟ »

منافق دخی « زیرا محمدی سوییورسین ! بن ایسه آکا بغض
ایدیورم . » جوابی ویردی .

زید، حریفك منافق اولدیغنی و آکا یالوارمهك فائده سی

اوله‌میه جغنی آکلادی . برطور مایوسانه ایله (یارحمن ! اغشی)
دیه‌رک جناب حقدن استغانه واستمداده باشلادی .

او آنده ایدی که «ویحک لاقتله» دیه‌برندای دهشت افزا کلدی
منافق، ویرانه‌دن طیشاری چیقوب اطرافه برکوز کردیردی
ایسه‌ده کیسه‌نی کوره‌مدی . ینه ویرانه‌یه دونوب امر قتله مباشرت
ایلدی .

بودفعه ده‌ها یاقیندن «اولدوزمه !» دیه ینه برصد اکلدی .
تکرار طیشاری چیقوب اطرافه باقندی . کیسه‌نی کوره‌مدی .
اتمام کار ایچون ویرانه‌یه عودت ایتدی . بودفعه بوسبتون یاقیندن
«اولدوزمه !» دیه برصدای لاهوتی ادا طویولدی . منافق تکرار
طیشاری چیقار چیقماز مصادف نکاهی اولان بر سواری
النده‌کی مزراغنی درحال کوکس‌نه صاپالایوب خیتی جانسز یره
سردی !

بعده اوسواری درون ویرانه‌یه دخول ایله جناب زیدک
وثاقتی چوزدی . و آکا «بنی طانیورمیسین؟ بن جبریلیم . سن
استغانه ایتدیکک زمان، سمای سابعده ایدم . طرف الهیدن
«ادریک عبدی» فرمان قضا جریانی صادر اولدی . ایکنجی صدایی
ایشتدیکک زمان، سمای دنیاده ایدم . اوچنجی ده منافقه ایریشوب
ایشنی بیتردم .» دیدی .

*
* *

«بسم» ده‌کی حرف میم، «ان من العرش الی ماتحت الثری
ملکه و ملکه» معناسنی مفیددر .

« بسم الله » ده کی لفظه الله کلنجہ : ایہا الناس ! معلوم کن
اولسون کہ، بن طول حیاتمدہ « الله » دیرم . اولدیکم وقتینہ « الله »
دیرم . قبرده صورلدیغ زمانده « الله » دیرم . یوم قیامتده محشرده
کلدیکمدده « الله » دیرم . کتاب اعمالی آلدیغمدده « الله » دیرم .
اعمالم وزن اولندقدده « الله » دیرم . صراطی کچدیکمدده « الله »
دیرم . جنتہ کیردیکم زمانددده « الله » دیرم . رؤیة الله ایله مشرف
اولدیغمدده « الله » دیرم .

نکته

۱۳

بسمه شریفده بواسعای ثلاثہ بی ذکرده کی حکمت شودرکہ :
قرآن کریمده افراد مخاطبین اوج صنفدر . فصلکہ (فہم
ظالم لنفسہ ، ومنہم مقتصد ، ومنہم سابق بالخیرات) قول کریمندہ
بواصناف ثلاثہ بیان وتصریح بیورلمشدر .
انکچون باری تعالی وتقدس حضر تلی بسمهده « بن سابقینک
اللہیم . مقتصدلرک رحمانیم . ظالملرک رحیمییم . » سرینہرمن
واشارت بیورمشدر .

کذلک (الله) ، معطی عطادز . (الرحمن) متجاوز ذلات
اولیادر . (الرحیم) متجاوز عن الجفادر .

جناب اللہک کمال رحمتندن اولہرق بسمه شریفہ ایله کائنہ
بیورلرکہ « بن سنک شول بطانۃ احوالکی بیلیرم کہ آنی آناک ،
باباک بیلہجک اولسہ ، سندن آریلیرلر ! زوجہک بیلسہ ، سکا
جفا ایلر ، جاریہک بیلسہ ، سندن قاجغہ صواشیر ! قومشوک بیلسہ ،

خانه کی بقیتمغه چالیشیر! بن ایسه بو حالنرک کافه سنی بیلدیکم خالده
کرمله انلری سترایلرم که بنم نصل اله کریم اولدیغمی طانیه سین!«
نکته

۱۴

(الله) اسم شریفی خدای متالک ولایتی ایجاب ایدر .
مولی (الله ولی الذین آمنوا) بیورمشدر .
(الرحمن) محبت خدایی ایجاب ایدر .
ذوالکبریا (ان الذین آمنوا وعملوا الصالحات سیجعل لهم
الرحمن وداً) بیورمشدر .

(الرحیم) رحمت مولایی ایجاب ایدر .
خدا (وکان بالمومنین رحیماً) بیورمشدر .

نکته

۱۵

علیه الصلاة والسلام افندمن بیورمشدر که (اوزرنده بسم الله
الرحمن الرحیم) عبارة شریفه سی یازیلی اولان برورقارده بی «اجلالاً له
تعالی» یردن آلوب قالدیران کیمسه، عندالله صدیقین زمره سنده قید
اولنور ومشرک اولسه لر بیله والدیندن عذاب، تخفیف قلنور .

اولیاء اللهدن بشر خافی حضر تلرینک بو بابده کی قصه سی ده
معلومدر .

مالی آتیده محرر حدیث شریف دخی ابوهریره دن مرویدر .
رسالت پناه افندمن بیورمشدر در که :

«يا اباهريره! آبدست آلدیغك وقت «بسم الله» دى .
 بويله اسم پاك خدا ايله وضويه شروع ايلرسهك ، اعمالكى قیده
 مأمور اولان ملكر وضودن فارغ اولنجیه قدر دفتر اعمالكه
 سنك ایچون تحریر حسنات ايله مشغول اولورلر . اهلك ايله
 جماع ایتدیك زمان دخی «بسم الله» دى . اوایشدهده بويله نام
 خدایي تقدیم ایلرسهك ، ینه رقیبك اولان ملكر سن غسل ایدنجیه
 قدر دفتر اعمالكه ترقیم ارقام حسنات ايله مشغول اولورلر . فضلہ
 اوله رق شاید او وقاعك نتیجه سنده برولد وجوده کلیرسه ، اولدك
 تنفس ایده چكى انفاك عدجه واو ولدك عقی اولورسه ، تابر
 دانه سی قالمیجه قدر اعقابك ده انفاى مقدارجه سنك ایچون
 کتب حسنات ایدرلر .

يا اباهريره! حیوانه بیزکن ده «بسم الله والحمد لله» دى . هر
 خطوه سنك ایچون حسنات یازیلیر . کهی یه بیزکن ده «بسم الله
 والحمد لله» دى . ساحرس سلامت اولوب کمیدن چیتنجیه قدر
 ینه سنك ایچون حسنات یازیلیر .

انس بن مالك (رضی الله عنه) دن مرویدر كه صلى الله علیه وسلم
 افندمن « بنی آدمك روبه لرینی چیتاروب صویونه جقلری وقت
 «بسم الله الرحمن الرحيم» دیمه لری کندیلرله جن طائفه سنك
 کوزلری آره سنده بر پرده اولور . «بیور مشلردر .

بونده شو اشارت واركه بسمه شریفه دنیاده سنكه سكا
 دشمن اولان جن یئنده حجاب حائل اولنجیه ، یا عقباده زبانیلرله
 آرا کره حائل اولمازمی ؟

نکته

۱۶

قیصر روم، حضرت عمر رضی الله عنه افسد مزه مکتوب
 مخصوص کوندروب « سکونتپذیر اولماز بر صداعه مبتلا اولدم .
 بکا شفا بخش اوله جق بردوا کوندرکز! » دیه رجالتش . حضرت
 عمر دخی آکا بر قلنسوه کوندرمش ! قیصر، قلنسودینی باشنه
 وضع ایتدیکه صداعی سکونت بولور . باشندن چیقاردیقه صداعی
 عودت ایلردی . بو حال، قیصرک مراقبی موجب اولوب برکون
 قلنسوه نك اوته سنی بریسنی یوقلادی . نهایت اوزرنده « بسم الله
 الرحمن الرحیم » یازیلی برور قیاره بوله بیلدی .

نکته

۱۷

جناب رسالتآب افسد مزه (من توضاً ولم یدکر اسم الله تعالی
 کان طهوراً لتلك الاعضاء ومن توضاً و ذکر اسم الله تعالی کان طهوراً
 لجميع بدنه) بیوز مشدر .

باقکرکه وضوده نام خدا ایله ابتدا اولنورسه، او وضوء
 مجموع بدن ایچون طهور، حکمنه کچنجه، یا عن صمیم القلب نام پاک
 خدا ذکر اولنورسه، بو ذکر، کفر و بدعتدن قلبک طهوری اولمق
 اولی بالطریق دکلیدر ؟

نکته

۱۸

محوسدن بعضیلری حضرت خالد بن ولیده دیمش لکه : سن

دعوی اسلام ایدیورسین! اویله ایسه بزدر آیت و علامت قناعت بخشا
کوسترکه بزده قانلمده مسلمان اولهلم . حضرت خالد دخی آنلره
دیش که : بکا بر مقدار سم قاتل کتیریکز ! در حال برطاس، سم
قاتل کتیردیلر . خالد، طاسی انه الوب « بسم الله الرحمن الرحيم »
دیدى . زهرى ایچدی ! و اللهك اذنیله سالما قالقوب وجود عالیلرینه
زهرک اصلا و قطعاً تأثیری اولمادی . بونک اوزرینه مجوسیلر
» بو حق دیندر « دیهرک شرف اسلام ایله مشرف اولدیلر .

نکته

۱۹

حضرت عیسی بن مریم علیهما السلام برکون برقبر اوزرندن
کچوردی . نور نبوتله کندیلرینه منکشف اولمش که ملائکه
عذاب اوراده بر میتی تعذیب ایدوب طوریمورلر ! حضرت عیسی
کچدی کندی . ایشی کوروب دوزکن ینه او قبرک یانندن کچدی
بودفعه الارنده نوردن طبقلرله ملائکه رحمت مصادف نظر
رسانتپناهیلری اولغله بوسرعت تحول وانتقالبه متخیر اولدی .
همان جناب حقمدن استکشاف حقیقت حال ایتمکه کندینه
بروجه آتی وحی الهی کلدی . « یاعیسی ! بو عبد مقبور عاصی
ایدی . آنکچون جزای عملی اولهرق وفاتندنبری بویله تعذیب
اولورودی . فقط وفاتنده خاتونی که ایدی . او خاتون صکرمدن
برچوجق طوغوردی . چوجخی تربیه ایتدی . بیوتدی، مکتبه
ویردی . معلمی اکا دمنجک « بسم الله الرحمن الرحيم » ی تلقینه
باشلادی آنکچون چوجق روی زمینده بنم اسم پاکمی ذکر

ایدوب طوررکن بن آنک باباسنی یر آلتده آتشمه تعذیب
ایتمه بی روا کورمدم . «

نکته

۲۰

کبار عارفان اولان (عمره الفرغانیه) یه صورمشلرکه :
جنب ایله حائضک قرائت قرآندن منهی اولوبده ذکر بسملهدن
منهی ومنوع اولمالارنده حکمت نهدر ؟

مشار ایها جوابنده بیورمشلرکه : زیرا (تسمیه) اسم حیبه
ذکردن عبارت اولوب حیبه ایسه ذکر حیبدن منع اولماز .

نکته

۲۱

(الرحیم) قولنده دیشمش که الله تعالی عباد مؤمنینه الی
موضعده رحیمدر . قبر ایله قَبْرک حشر اتنده (۱) قیامت ایله قیامتک
ظلماتنده (۲) میزان ایله میزانک درج اتنده (۳) کتاب اعمالک
قرائتیه آنک فزعاتنده (۴) صراط ایله صراطک مخافاتنده (۵)
نار ایله نارک درکاتنده (۶) .

نکته

۲۲

عارفک بری برکاغده « بسم الله الرحمن الرحیم » یازوب
بونى كَفَنَه قويملرینی وصیت ایتمش ! بونده سسکا نهفانده
وار ؟ ديه صورمشلر . اوده يوم قیامتده « آلهی ! سن بزه
برکتاب کوندردک . آنکده عنوانی « بسم الله الرحمن الرحیم »

قيلدك . ايمدى سن ده بكا كتاب كرىمك عنوانه كوره معامله ايت! «
ديرم جوابنى ويرمش .

نكته

۲۳

دينيلدى كه :

« بسم الله الرحمن الرحيم » اون طقوز حرفدر . وبونده ايكي
فائده واردر . فائده اولى — زبانيه لرك عددى ده اون طقوزدر .
بناء عليه الله تعالى زبانيه لرك باس وشهدتلىرى بو اون طقوز
حرف ايله دفع ايلر .

فائده ثانيه — الله تعالى كيجه وكوندرك مدتتى يكرمى درت
ساعت تقدير بيورمش . صكره بش ساعتده بش وقت نماز فرض
ايتمش . بناء عليه بسم الله شريفه نك حاوى اولدينى بو اون طقوز
حرف شو اون طقوز ساعت ظرفنده وقوعبولان كناهلره كفارت
اولور .

نكته

۲۴

سورة التوبه . قتال ايله امرى مشتمل اولديغى چون آنك
اولنده « بسم الله الرحمن الرحيم » يازيلدى .

كذلك عند الذبح (باسم الله والله اكبر) دينلك (بسم الله
الرحمن الرحيم) دينلامك سنت سنييه رسالت پناهيدر . زيرا كرك
قتال وكرك قتل وقتنده الرحمن الرحيم ذكرى لائق دكلدر .
مادامكه هركون صلوات مفروضه ده بوكمه طيبه يى يعنى بسم الله

شریفہ بی اونیدی کرہ ذکر ایتہیہ جناب حق سنی موفق ایلدی .
 بودلات ایدرکہ جناب حق سنی قتل ایچون، عذاب ایچون
 یاراتمدی ! سنی آنجق رحمت ایچون، فضل ایچون، احسان ایچون
 یاراتدی . « والله تعالى الهادی الى الصواب »

تم الجزء الثانی من سر القرآن بعون الله العزيز المنان

« الحمد لله الذي هدانا لهذا وما كنا لنهتدي لولا ان هدانا الله »
 وصلى الله على اشرف جميع الانبياء والمرسلين وعلى آله وصحبه اجمعين .

فی اوائل شهر صفر الخیر من شهور ۱۳۰۳

« انقره »

ترتیب سهولرینی مصحح جدولدر

صواب	خطا	سطر	صحیفه
اوله رق	اوله رق	۱۱	۱۴
بسم الله اعنى الرحمن الرحيم	بسم الله اعنى الرحم	۱۱	۱۸
اسم لفظك	اسم لفظك	۵	۲۵
كلمه سنك	كلمه سنك	۱۰	۲۷
مسمى	اسم	۱	۳۲
اجزاسى	اجزاسنك	۱۴	۹۵
على	عل	۳	۹۷
تصوردر	تصرفدر	۷	۱۶۴
قیاق	قیاتی	۱۹	۱۷۴
بوارواحدن	بوارواحدن	۱	۱۷۹
تعیین	تعیین	۱۸	۱۸۸
معبود	معبود	۱۲	۱۹۲
معبود	معبود	۱۷	۱۹۲
معبود	معبود	۲۰	۱۹۲
تقسیر	تقسیر	۶	۱۹۳
تقسیر	تقسیر	۸	۱۹۳
پنها	پنها	۱	۱۹۵
بیورمشدر . منع	منع	۱۹	۲۰۱



سر قرآنک ایک نئی جزء فہرستیدر

صحیفہ

- ۱ « بسم الله الرحمن الرحيم » ك مباحثی بیاننددر .
- باب اول — مجزای مقاماتده جاری اولان مسائل بیاننددر
- ۱۰ باب ثانی — قرائت و کتابتدن بو کله یه متعلق اولان مباحث بیاننددر .
- ۱۰ نوع اول — قرائت متعلق مباحث بیاننددر
- ۱۹ نوع ثانی — حظ و کتابت متعلق مباحث بیاننددر .
- ۲۴ باب ثالث — اسمك مباحثی بیاننددر .
- ۲۴ نوع اول — مسائل نقلیه بیاننددر .
- ۲۹ نوع ثانی — مسائل عقلیه بیاننددر
- ۵۳ باب رابع — صفات حقیقیه دال اولان اسما بحشددر .
- ۵۳ قسم اول — وجوده دلالت ایدن اسمار بیاننددر .
- ۹۰ قسم ثانی — کیفیت وجوده دلالت ایدن اسمار بیاننددر
- ۱۰۳ قسم ثالث وجود و کیفیات وجوده مغایر اولان صفات حقیقیه بیاننددر .
- ۱۱۱ باب خامس — صفات اضافیه دال اولان اسما بیاننددر
- ۱۲۵ باب سادس — صفات سلویه حسبیلہ واقع اولان اسما بیاننددر .
- ۱۳۱ باب سادس — صفات اضافیه ایله برابر صفات حقیقیه دال اولان اسما بیاننددر

صحیفه

۱۳۱. فصل اول - صفت قدرت سبیلہ حاصل اولان اسما بیانندہ در.

۱۳۴. فصل ثانی - صفات علم سبیلہ حاصل اولان اسما بیانندہ در.

۱۳۷. فصل ثالث - صفات کلام سبیلہ حاصل و مجرای کلامہ جاری اولان اسما بیانندہ در.

۱۴۰. فصل رابع - ارادہ و ارادہ یہ قریب اولان الفاظ بیانندہ در.

۱۴۲. فصل خامس - سمع و بصر بیانندہ در.

۱۴۳. فصل سادس - صفات سلیمہ ایلہ صفات اضافیہ بیانندہ در.

۱۴۵. فصل سابع - ہم ذاتہ ہمہ صفات حقیقیہ و اضافیہ و سلیمہ دال اولان اسما بیانندہ در :

۱۴۷. فصل تاسع - اسمای ذاتدنی اسمای صفاتدنی ندن اولدقلرینی تعینده عقلائک اختلاف ایتمش اولدقلری اسما بیانندہ در.


۱۵۲. فصل ثامن - الله تعالى ایچون اسملری مضمرہ باندن حاصل اولان اسما بیانندہ در.

۱۷۲. سکر تہجی باب - اسماء الله متعاقب مباحثک بقیہ سی بیانندہ در.

۱۸۴. طقوزجی باب - الله، قولزہ متعلق مباحث بیانندہ در.

۲۱۱. باب عاشیر - «الرحمن الرحيم» قولزہ متعلق بر بخشی حایدیر.

۲۲۰. اون بر بخشی باب = «بسم الله الرحمن الرحيم» قولزدن مستنبط بعض نکته لر بیانندہ در.



سِرْقَانَت

فخر الزمان فیض المیزان



مترجمی

سری کریدی

والی ولایت انقره

جزء ثالث


باشلیجه صاتیلان محل باب عالی جاده سنده آراکل افندیك ۴۶

نومرولی کتابخانه سیدر



معارف نظارت جلیله سنک رخصتیه طبع اولمشدر


رخصتنامه نومروسی ۴۶۱



استانبول

(۴۰۱) شرکت مرتبیه مطبعه سی — باب عالی جاده سنده نومرو ۵۲

۱۳۰۳



بِسْمِ اللَّهِ الرَّحْمَنِ الرَّحِيمِ

سُورَةُ الْاَنْبِیَاءِ

فاتحه

سورة فاتحه ایله سورة فاتحه نك اسملرینه دائر اولان
كلام بر قاج بابی مشتملدر

باب اول

شو سورة كريمه نك بر چوق اسملى واردر . كثر ت اسمائسه
معلومدر كه ، دليل شرف مسمادر

اسم اول

فاتحة الكتاب

مصاحف شریفه ده ، تعلیمه ، نمازده کی قراشته سورة فاتحه
ایله افتتاح اولندیغیچون بوسورة كريمه (فاتحة الكتاب) تسمیه
قلنش در .

بوابده ايکي قول ضعيف دها واردر .

١ — حمد، فاتحه هر کلامدر، آنکچون بوسوره کریمه
(فاتحه الکتاب) تسميه اولنش در.

٢ — سعادن منزل اولان سور قرآنيه نك اولی بودر،
آنکچون (فاتحه الکتاب) دینلمش اولور.

اسم ثانی

سورة الحمد

سورة کریمه نك ابتداسی اولان (الحمد) لفظی بو تسمیه سبب
اولنش در .

اسم ثالث

ام القرآن

بونام ایله تسمیه سنه برقاچ سبب واردر.

١ — هر شیئک اصلنه (ام) دینیر .

بتون قرآندن مقصود ایسه، شو امور اربعه یی تقریر و بیانندن
عبارتدر .

آلهیات ١ معاد ٢ نبوات ٣ قضا و قدر آلهی یی اثبات ٤
(الحمد لله رب العالمین الرحمن الرحیم) قولى آلهیاته، (مالک يوم
الدين) قولى معاده، (ایک نعبد وایک نستعین) قولى هم جبر و قدری
نفیه، هم ده هر شیئک قضا و قدر آلهی یه استنادینی اثباته، (اهدنا
الصراط المستقیم صراط الذین انعمت علیهم غیر المغضوب علیهم

ولا الضالین) قولى هم قضا وقدر آلهی بی اثباته، همده نبواته دلالت
ایدر. [ط]

مادام که قر آندن مقصد اعظم شو مطالب عالیہ در.

مادام که سورۃ فاتحه شو مطالب عالیہ بی مشتقد در.

بوسورۃ کریمہ (ام القرآن) نامنی بحق المشر در.

۲ — جمیع کتب آلهیہ نک حاصلی — الله تعالیہ یا لسان ایلہ

ثنا، یا خدمتله — طاعتله اشتغال، یا خود طلب مکاشفات و مشاهداتدن

عبارت اوج امره رجوع ایدر.

(الحمد لله رب العالمین الرحمن الرحیم مالک يوم الدين) قول کریمی

سراسر ثناء علی اللهدر.

(ایاک نعبد وایاک نستعین) قولى خدمت و عبودیتله اشتغالدر.

شوقدرکه ابتدای کلام (ایاک نعبد) قولیلہ واقع اولدیغندن

بوده عبودیتده جد واجتهاده دلالت ایدر.

آندن صکره (وایاک نستعین) بیورلمش در. بوقول شریف،

عبدک عجزینی، ذلتی، مسکنتی، جناب حقه رجوعنی اعترافه

رمز و اشارتدر.

(اهدنا الصراط المستقیم) جمله سی مکاشفات و مشاهدات،

وانواع هدیاتی طلبدن عبارتدر.

۳ — شو سورۃ جلیلہ نک (ام الکتاب) تسمیه سنه اوچنجی

سبب بودرکه جمیع علومدن مقصود، یا عزت ربوبیتی، یا ذلت

عبودیتی بیلکدر. (الحمد لله رب العالمین الرحمن الرحیم مالک يوم الدين)

[ط] شو معانی قریباً صورت کافیده شرح و بیان اولنه جقدر.

الدين) قولى ايسه خدای متعاليك كافه احوال دنيا و آخرته مستولى بر آله عوالم پناه قادر اولديغنه دلالت ايدر. (اياك نعبد و اياك نستعين) قولندن سورة شريفه نك آخريته قدر بقيه آيات عاليات دخي هم ذل عبوديته، هم ده عبدك اعانت و هدايت رب العزته مظهر اولمادجه كرك اعمال ظاهر ددن و كرك مكاشفات باطنه دن هيچ برشيئه موفق اوله ميه جفنه شهادت ايلر.

٤ — علوم بشريه اوچ نوعدر.

اولكيسي — جناب مولانك ذاته، صفاتنه، افعاليه متعلق اولان علمدر كه بو، علم اصولدر.

ايكنجيسي — الله تعالانك احكامنه، تكاليفنه متعلق اولان علمدر كه بوده علم فروعدر.

اوچنجيسي — تصفيه باطنه، و انوار روحانيه و مكاشفات الهيه نك ظهورينه متعلق اولان علمدر.

قرآن مين دن ده مقصود، شوانواع ثلاثه نك بياني در. سورة فاتحه ايسه بومطالب ثلاثه يي اكل وجود اوزرينه مين و موضحدر. شويلاه كه:

(الحمد لله رب العالمين الرحمن الرحيم مالك يوم الدين) قولى علم اصوله اشارتدر. زيرا وجود بارينك برهان باهرى، وجود مخلوقاتدر. بزه خدانك وارلغنى بيلديرن كندينك رب العالمين اولمه مينيدر. وجود آلهي اثبات ايچون بوندن كسديرمه يول يوقدر. بناء عليه (رب العالمين) تعبيرى بومعنايه، (الحمد لله) سوزى ده آنك حمد و تعظيمه استحقاقنه اشارتدر. هر ممكنه قدر قى تعلق

ایتمین، هر معلومی بیلین ذات ایسه حمد و ثنایه، تعظییه مستحق اولماز.

بعده جناب حق کندی کمال رحمتله وصف ایلدی.

(الرحمن الرحیم) بو وصف جمیلی متضمندر.

آندن صکره کمال قدرته ده وصف ایلدی.

(مالک يوم الدين) قول کریمی بو وصف جلیلی مبین در.

«رب العالمین، شول قدرت کامله صاحبی اولان خدای جهان

آفریندرکه امر مظلومینی ترک واهمال بیورماز. مظلومارک

حقوقنی ظالمار دن آیر» دیمکدر

لمترجه الحقیر

ظالماره مهل اولسه مطلوب آلهی !

بردنده ییقار عالمی مظلومارک آهی !

ایشته معرفت ذات وصفاته متعلق کلام بوراده تمام اولدی .

علم اصول بؤدر .

سورة شریفه نك بوندن آشایسی ده علم فروع و مکاشفاته

دائر در .

شویله که :

(اياك نعبد) تعلیم معبودانه منی علم فروعی مبین در .

بوده خدمت و عبودیتله اشتغالدر .

بعده علم اصول ایله علم فروعی بر کره ذهنا مزج ایدرک

(اياك نستعين) بیوردی . بو تعبیر مرشدانه ایله یزه شوراستنی

آکلاتمش درکه ادای وظائف عبودیت دخی آنجق اعانه ربوبیتله امکان پذیر حصول وکال اولور .

بوندن صکرده درجات مکاشفاتی بیانه شروع بیورمش در .
درجات مکاشفات، کثرتیه برابر شوامورثلاشده محصوردر .
اولکیسی — هدایت، نورینک قلب انسانده پرتو نشار حصول اوله سیدرکه (اهدنا الصراط المستقیم) نور تابانی بو راه یقینی کوسترر .

ایکنجیسی — مظهرانعام خدا اولان ابرارک درجاتی جواذب آلهیه ایله عبده تجلی ایتدکرکه (صراط الذین انعمت علیهم) شاهراهی بو مکاشفه نك جلوه کاهیدر . بو مجالای مجالده ارواح قدسیه، مرایای مجلوه کبی یکدیگرینه اشعه پاش انعکاس اولور .
اوچنجیسی — ارواح قدسیه نك اوساخ شهوات و اوزار شبهاتدن مظهر صون صمدانی اولماریدرکه (غیر المغضوب علیهم) شهواتدن، (ولا الضالین) شبهاتدن مصونیتلرینی تیسیر ایلر .

ایشته ایضاحات مبسوطه مزله تبیین ایتدی که بو سورة کریمه اشرف مطالب اولان شو اسرار عالییهی مشتملدر . آنک ایچون (ام الکتاب) تسمیه اولنمش در . نصل که جمیع حواس و منافعه اشتمالی جهتیله دماغهده (ام الرأس) نامی ویریلیر .

۵ — ثعالبی — ابو القاسم بن حیب دن، اوده ابو بکر القفال دن، اوده ابو بکر بن درید دن نقل ایدرک دیمش که، (ام) لفظی کلام عربده عسکرک نصب ایتدیکی رایتک اسمیدر . قیس بن الحطیم :

نصبنا امنا حتى ابذعروا
وصاروا بعد الفتهم سلالاً

بیتنی انشاد ایلش در . [ع]

عسکرک ملجأ وپناهلری رایت اولدینی کی التجاکاه اهل ایمان
دخی بوسورۃ قدیمه اولدینی ایچون (ام القران) تسمیه اولمش در .
عرب، زمینه دخی (ام) دیر . زیرا خلقتک حیاتلرندهده،
ماتلرندهده معادلری، ملجاء وپناهلری یردر .
(ام) قصد ایتمک معناسنهده کلیر .

[ع] ابذعروا، اقشعرار وزننده کی ابذعرار مصدرندن فعل ماضی جمع
صیغه سیدر . (ابذعرار) بوزغون عسکر کی قاجوب تارماراولق معناسنهدر
ویر بلوک سوارینک بردن آت سوروب مسابقت ایتلریندهه دینیر .
(سلال) غراب وزننده بر خسته لکک استمیر . کیرلی ستمه، ورم،
اسهال کی .

بیراغه یالکز (ام) دینلدیکی کی (امالرمخ) دخی دینیر .

(ام القری، ام البلاد) کعبه الله . (ام الطريق) بیوک جاده .

(ام الفضائل) علم . (ام نافع) طاق .

(ام الرذائل) جهل . (ام البیض) دیشی دوه قوشی .

(ام النجوم) کهکشان . (ام الطارق) دوه قوشی .

(ام الاموال) قیون . (ام حفصه) قاز .

(ام الدماغ) دماغ اوزرنده اولان اینجه زار . (ام ملدم - ام ملدم) ستمه .

(ام الطعام) بغدادی . (ام الندامه) عجله .

(ام غیلان) بریده حاصل اولور بر دیکن .

اسم رابع

سبع المثانی

قال الله تعالى

ولقد آتيناك سبعاً من المثانی

سورة فاتحه نك (مثنی) ایله نامور اولمسی بر قاچ سبیدن
ناشیدر.

۱ — سورة فاتحه، مشادر. نصفی عبدك ربه شناسنی —
نصف دیگرى ربك عبده عطاسنی مشتملدر.

۲ — نمازك هر ركعتده تثنیه اولندیغی ایچون (مثنی)
تسمیه اولمش در.

۳ — مثنی، نامنی آلمسی کتب سائردهن مستثنی اولدیغی
ایچوندر.

نبی اکرم واعلم صلی الله علیه وسلم حضرتلری «نقسم ید
قدرتنده مسخر اولان جناب اللهه قسم ایدرمکه نه توراتده، نه
انجیلده، نه زبورده ونه ده فرقانده بو سوردهنک مثلی بر سورده
نازل اولمش دکلدر. بوسورده (سبع المثانی والقرآن العظیم) در»
بیورمش در.

۴ — سورة فاتحه، یدی آیتدرکه بونلرک قرائتی یدی دنغه
قرائت قرآنه معادلدر. فاتحهنی اوقویانه جناب حق ختم قرآن،
ثوابی قدر اجر جزیل احسان ایدر. ایشته (مثنی) تسمیه سنک
بر سببی ده بودر.

۵ — فاتحه‌نك مشتمل اولديغى آيات بينات یدی در . ابواب
نیران دخی یدی در . بناءً علیه قرائت فاتحه ايله فتح زبان ایدن
مؤمنه جهنك ابواب سبعه سی قنایر . بوکاده شو حدیث شریف
دلالت ایدر .

مرودیرکه جبریل علیه السلام نبی اکرم و محترم صلی الله
علیه وسلم افندمره « امتك دوجار عذاب خدا اولور ديه
قورقاردم ! فاتحه نازل اولنجه خوف زائل ، خشیت امنیته متبدل
اولدی » دیمش .

رسالتناه افندمن « نیچون ؟ » ديه سؤال بیورنجه :

« زیرا خدای عزوجل (وان جهنم لموعدهم اجمعین لها
سبعة ابواب لكل باب منهم جزء مقسوم) بیورمش در . آیات
فاتحه دخی یدی در . بناءً علیه هر کیم بو سورة کریمه‌نك
قرائتیه ترین لسان عبودیت ایدرسه ، آیات سبعه‌نك هر بری
ابواب جهنم بررقویه پرده کش حیولت اولورده امتك عذاب
ناردن امین وسلم اوله رق مرور ایدرلر » یولنده اعطای جواب
ایتمش در .

- | | | |
|---------------------------------|---|--|
| ایچون مثانی
تسمیه اولنمشدر . | { | ۶ — فاتحه ، نمازده بر سورة دیگرله تثنیه ایدلدیکی |
| | | ۷ — اثنیه ومدائح آلهیه دن عبارت اولدیغی |
| | | ۸ — طرف آلهیدن ایکی دفعه انزال بیورلدیغی |

سورة الحجرده واقع (سبعاً من المثانی) آیت جلیله‌نك
تفسیرنده بوکا دائر ایضاحات کافیه ویرمشدر .

اسم خامس

وافیه

سفیان بن عیینہ، فاتحہنی (وافیہ) نامیلہ یاد ایدردی .

اعلی دیدی که :

وافیه نك تفسیری، فاتحه تنصیف قبول ایتز دیمکدر .
 کورمز میسین که هانکی سورۃ قرآن اولورسه اولسون آلك
 نصفنی بررکعتده، نصف دیگرینی ده او بررکعتده اوقومق جائز
 ایکن بوتنصیف، سورۃ فاتحه ده غیر جائزدر ؟

اسم سادس

کافیہ

فاتحه، سورۃ دیگرک یرینی طوتار، اما سورۃ دیگر فاتحه نك
 یرینی طوتماز . اشته کندیسندہ درکار اولان شوکفایت مطلقه دن
 ناشی فاتحه (کافیہ) نامنی ده آلمشدر .

محمود بن الربیع « عبادة بن الصامت » دن روایت ایدوب
 دیمشدرکه :

« رسول الله صلى الله عليه وسلم افندمن (ام القرآن عوض
 عن غيرها وایس غیرها عوضاً عنها) بیورمشدر . « ام القرآن که
 فاتحه الکتابدر، سور سائر ددن عوض اولور، دیگر سور دلرک
 ایسه هیچ بری آندن عوض اوله ماز دیمکدر .

اسم سابع

اساس

فاتحه‌یه (اساس) نامی ویرلمسی بر قاچ وجهدن ناشیدر .
 ۱ — فاتحه سور قرآنیه‌نك اولی اولدینی ایچون اساس
 قرآن مثابه‌سنده در .

۲ — فاتحه، اساس قرآن مثابه‌سنده اولان اشرف مطالبی
 مشتمل اولدینی ایچون (اساس) تسمیه اولنمش در .

۳ — ایماندن صکره اشرف عبادات، صلاتدر . سورة
 فاتحه ایسه هم ایمانده لابد ولان هر شیئ مشتملدر،
 همده نماز آنسر تمام اولماز . سبب بودر که (اساس) نامنی
 آلمش در .

اسم ثامن

شفا

ابو سعید الخدری دن مرویدر؛ دیمش که :
 « رسول الله صلی الله علیه وسلم اقدم من حضرتلری (فاتحه
 الکتاب شفاء من کل سم) بیورمش در »
 «فاتحه الکتاب، هر مستجمعی شفایاب ایدر» دیمکدر.
 روایت ایدرلرکه :

صحابه کز بندن بری، صرعیه طوتمش بر کیمسه نك یانندن
 کچدی . او بیچاره نك حاله آجیدی . قولاغنه بو سورۀ کریمه یی
 اوقوی ویردی . مصروع در حال افاقیت بولدی . وقعیه یی سمع
 ساعی حضرت رسالتیناهی به ایصال ایلدیار . علیه الصلاة والسلام
 افدمنز دخی (هی ام القرآن وهی شفاء من کل داء) بیوردیلرکه:
 « سورۀ فاتحه ام القرآندر، هر درده شفا رساندر » دیمک اولور .

*
* *

خسته لکتر، روحانی ده اولور، جسمانی ده اولور . جناب حق
 (فی قلوبهم مرض) آیت کریمه سنده کفری (مرض) تسمیه
 بیورمش در . ایشته بو آیت، مدعای تنویر ایدن دلائلند .
 بو سورۀ جلیله ایسه اصولی، فروعی، مکاشفاتی مشتمل اولدیغندن
 شو مقامات ثلاثه ده فی الحقیقه سبب حصول شفا در .

اسم تاسع

صلات

رسول الله صلی الله علیه وسلم افدمنز حضرتلرندن مروی
 اولان بر حدیث قدسیده (یقول الله تعالی قسمت الصلاة بیني
 وبين عبدی نصفین) بیورلمشدرکه : بونده عباد ايله رب العباد
 بیننده ایکی یه منقسم اولدیغی بیان بیوریلان (صلات) ايله مراد
 بو سورۀ جلیله در .

اسم غاشر

سؤال

سید الکائنات افدمن حضرتلرندن مروی اولان دیکر بر
حدیث قدسیدهده (من شغله ذکرى عن سؤالى اعطيته افضل ما
اعطى السائلین) بیورلمش در .

حضرت خلیل بویه ذکر اللهه حصر اشتغال ایدرک نص
قرآن، ناطق اولدینی اوزره (الذی خلقنى فهو یمهدین - الی
ان قال - رب هب لی حکماً والحقنى بالصالحین) دیمش در .
سوره فاتحهده دخی کذلک ثنای الهمی ايله بالافتتاح (الحمد لله
رب العالمین الرحمن الرحیم مالک يوم الدين) بیورلدقن صکره
(ایاک نعبد و ایاک نستعین) قوليله عبودیت ذکر اولنمش ، بعده
(اهدنا الصراط المستقیم) نیازيله طلب هدایت اوزرینه ختم کلام
ایدلمش در .

ایشته بو نظم جلیل، اکل مطالب، هدایت فی الدین اولدیغنه
دلیل در . بوندن بشقه جنت معرفت، جنت نعیمن خیرلی
اولدیغنهده دلالت ایدر . زیرا جناب حق بوراده کلامی (اهدنا)
قوليله بتیروب (ارزقنا الجنة) بیورمامشدر .

اسم حادی عشر

سورة الشکر

فاتحه، فضل ايله، کرم ايله، احسان ايله ثنای باریدن عبارت
اولدینی ایچون (سورة الشکر) تسمیه اولنمش در .

اسم ثانی عشر

سورة الدعاء

فاتحه (اهدنا الصراط المستقيم) قول نیازکارانه سنی مشتمل
 اولدینی ایچون (سورة الدعاء) تسمیه قلمش در .
 ایسته اسمای فاتحه شرحنده سویانه جک سوزک تمامی ونهایتی
 بودر . والله اعلم .

باب ثانی

سورة فاتحه‌نك فضائلی بیانده اولوب برقاج مسأله‌یی مشتملدر

برنجی مسأله

فاتحه سورده‌سنك کیفیت نزولنده اوچ قول واردر.

قول اول

فاتحه، سور مکیه‌دندر.

ثعلبی، کندی اسنادیله علی بن ابی طالب‌دن رضی الله عنه روایت ایتمش درکه، امام مشارالیه (نزلت فاتحه الکتاب بمکه من کنز تحت العرش) بیورمش در.

بوحدیث علوی، فاتحه سورده‌سنك مکه مکرمه‌ده نازل اولدیغنی مبین درکه، ینه ثعلبی نك بیاننه کوره اکثر علما دخی بونك اوزرینه متفق الکلامدر.

ینه ثعلبی، کندی اسنادیله «عمر بن شریخیل» دن روایت ایتمش درکه مشارالیه عمرو (آیات قرانیه دن اك اول نازل اولان — الحمد لله رب العالمین — آیت جلیله سیدر) دیمش در. شویله‌که: رسول الله افندمن مبادی نزول وحی الهیده نصلسه نحاشی ایدرك زوجه مطهره لری حضرت خدیجه کزلیجه (خشیت ان یكون خالطی شیء) یولنده کشف راز ایدنجه مشارالیه دخی (وماذاک؟) دهرک ایضاحات ایستدی.

اشرف الانبیا افندمزده (تنها قالدجقه - اقرأ - ديه بر ندا
ایشیدیورم) بیوردیلر.

بعده نبی ذیشان افندمز (ورقة بن نوفل) نام ذاتک نزدینه
کیدوب آکاده واقعه مذکور دینی بیان و حکایه بیورملریله (ورقه)
شاید بردها کندیلرینه اوپله بر ندا کلیرسه، ثبات بیورملرینی
توصیه و اخطار ایلدی.

متعاقباً جبریل علیه السلام کلوب حضرت پیغمبر افندمز
(قل بسم الله الرحمن الرحيم الحمد لله رب العالمين) دیدی.

ینه نعلی، کندی اسنادیله ابی صالحدن، اوده ابن عباسدن
روایه دیمش درکه بر کون رسول الله صلی الله علیه وسلم آیاهه قلوب
(بسم الله الرحمن الرحيم) بیوردیلر.

بونو ایشیدن کفره قریش دنخی (دق الله فاك) مقال
بی ادبانه سیله مقابله ایلدیلر.

قول ثانی

سوره فاتحه، مدینه منورده نازل اولمش در.

نعلی، فاتحه الكتاب مدینه منورده نازل اولدیغنی کندی
اسنادیله مجاهددن نقل و روایت ایتمش!

حسین بن الفضل دنخی (هر عالمک برهفودسی واردر. مجاهدکده
هفودسی بوسوزدر. زیرا علما آنک خلافتدر. یعنی فاتحه نک مکة
مکرمهده نازل اولدیغنی بالاتفاق بیان ایتمش) دیمش در.

بوسوره کریمه نك مكده نازل اولديغنه شو آتی الذکر ایکی
وجه دخی دلالت ایدر .

وجه اول - سورة الحجرك مكده نازل اولديغی متفق علیهدر .
بو سوردهه ایسه (ولقد آتینا سبعاً من المثانی) بیورمش در که
(سبع المثانی) دن ده مراد ، فاتحه الکتابدر .

ایشته شو آیت کریمه ، سورة فاتحه نك سورة الحجردن اول
مکه مکرمده نازل اولديغنه دلالت ایدر .

وجه ثانی - حضرت یغمبرك اون بوقدر سنه فاتحه الکتابسنز
مکه مکرمده اقامت بیورمش اولملری عقلدن بعیددر .

قول ثالث

علمادن بعضیلری دیمشلر که :

بوسوره کریمه بر کره مکه مکرمده ، بر کرده مدینه طاهرده
نازل اولمش اولديغندن هم مکی در ، همده مدنی در . حتی بونك
(مثانی) تسمیه سندهه سبب بودر . تکرر نزولی دخی مجرد قدر
وشرفنی اعلا واعلان ایچوندر .

ایکنجی مسأله

فضل فاتحه

ابو سعید الحدری ، نبی امجد صلی الله علیه وسلم افندمزدن
(فاتحه الکتاب شفاء من السم) حدیث عالسنی روایت ایتمش در .

حذیفه بن الیمان، رسول الله صلی الله علیه وسلم افسد مزك
(ان القوم لیبعث الله علیهم العذاب حتماً مقضیاً فیکراً صبی من
صبیانهم فی المکتب «الحمد لله رب العالمین» فیسمعه الله فیرفع عنهم
بسببه العذاب اربعین سنة) بیورمش اولدقلری نقل وروایت
ایتمش درکه، سوء عملارندن ناشی مستحق عذاب اولان بر قومک
صیانندن بری مکتبده (الحمد لله رب العالمین) او قودیفی الله تعالی
ایشیدنجه، بوسیلله آنلاردن قرق ییل عذابی رفع ایلر دیمکدر .
حسین دن مرویدره دیمش که :

خدای متعال سعادن یوز درت کتاب انزال بیورمش در .
بونلردن یوز کتابک محتوی اولدقلری علوم و معارفی تورات،
انجیل، زبور، فرقانده، بودردینک علومنی ده یالکز فرقانده،
علوم فرقانیه بی ده سور مفصلاتده، آنلرده کی علومی ده سور
فاحده ایداع ایلدی .

دیمک اولدی که، تفسیر فاتحه بی بیان، جمیع کتب منزله نک
تفسیرینی بلمش کی در .
سورده فاتحه بی او قویان توراتی، انجیلی، زبوری، فرقانی
اوقومش کی در .

حضرت مفسر دیر که :

بونک سببی شودر. محقق و معلومدر که جمیع کتب الیهی بدن
مقصود، علم اصول، علم فروع، علم مکاشفاتدر. سورده فاتحه ایسه

یوقاریدده بیان ایتدیگمز وجه ایله شو علوم ثلاثه نك تمامی جامع وشاملدر.

مادام که بومطالب عالیہ شریفه فاتحه الکتابده حاصلدر، شبهه یوقدرکه سورۀ مذکوره جمیع مطالب الہیہی مشتمل کی در.

اوچنجی مسأله

بوسورۀ شریفهده شویدی حرف یوقدر.

ئا، جیم، خا، زای، شین، ظا، فا.

بو حروف سبعة نك سورۀ فاتحهده بولخاملرینه سبب، عذابى مشعر اولملریدر.

شویلهکه:

حرف ئا، ویل وشوره (هلاکه) دلالت ایدر.

الله تعالی (لاتدعوا اليوم ثبوراً واحداً وادعوا ثبوراً كثيراً) بیورمش در.

جیم، حرف نخستین لفظ جهنم در.

جناب مولی (وان جهنم لموعدهم اجمعین - ولقد ذرانا لجهنم كثيراً من الجن والانس) بیورمش در.

خا، مشعر جزى ورسوای اولدیغندن اسقاط اولندی.

الله تعالی (يوم لا یخزی الله النبی والذین آمنوا معه) و (ان الحزى اليوم والسوء على الکافرین) بیورمش در.

زای - و - شین، زفیر وشهیتک ایلک حرفلری اولدقلری
ایچون اسقاط اولندیلر. [۱]

مولای متعال (الهم فیها زفیر وشهیق) بیورمش در .
کذلک (زای) حرفی زقومده دلالت ایدر. [۲]
الله ذوالجلال (ان شجرة الزقوم طعام الایم) بیورمش در .
شین، شقاوته دلالت ایدر .
جناب خدا (واما الذین شقوا فی النار) بیورمش در .
ظا - اسقاط اولندی .

چونکه جناب ذوالکبریا (انطلقوا الی ظل ذی ثلاث شعب
لاظلیل ولایغنی من الاله) بیورمش در .

کذلک ظا - نام جهنم اولان (الظی) یده دلالت ایدر .
الله تعالی (الظی نزاعة للشوی) بیورمش در .
فا - فراقه دلالت ایتدیکی ایچون اسقاط اولندی .

حق سبحانه و تعالی حضرتلری (یومئذ یتفرقون - و - لا
تقتروا علی الله کذبا فیسحکم بعذاب وقذاب من افتری)
بیورمش در .

دیرلر سه که :

هیچ بر حرف یوقدر که بر نوع عذابی ایجاب ایدر بر شیده

[۱] زفیر، آغلامغه - ایلکه مکه، برده آواز جارك ایلک پرده سنه
دینیر . بونک صوکنده (شهیق) دینیر . داهیة معناسنده کلیر .
[۲] زقوم، جهنمه بر شجره نك اسمیدر . بادیده بتر بر زهرلی
نباتکده اسمیدر .

مذکور اولسون . آنکچون سزك شو ذكر ايتديككز شيلرده
بر فائده قلماز .
ديرزكه :

جناب حق، صفت جهنمه (لها سبعة ابواب لكل باب منهم
جزء مقسوم) بيورمش در . بناءً عليه بوسوره شريفه نك قرائتيله
ترزين زبان ايقان وحقائقي آكلايه رق مدلولنه ايمان ايدن كيسه نك
جهنمه كي دركات سبعة دن امين اوله جغني كوسترمك ايچون عذابه
دلالت ايدن الفاظك اوائلنده كي شو حروف سبعة آندن اسقاط
بيورلمش در . ايسته بونده كي فائده بودر . (والله اعلم)



باب ثالث

سورة فاتحه دن مستنبط اسرار عقليه بياننده اولوب چند
مسأله بي مشتملدر [۱]

برنجي مسأله

جناب رب العالمين، اول فاتحه ده (الحمد لله) بيورنجه كويا
بريسي چيقوب ديدى كه :

بو جمله ايكي شئى ئى مشعردر . برى - آلهك وجودى،
ديكرى آلك حمده استحقاقيدر . بونلرك ايسه ايكي سى ده دليل ايستر .
آلهك اول - وجو دينه، ثانيا - حمده استحقاقه دليل نه در؟
وقتاكه بو ايكي سؤال توجه ايتدى، جناب بارى مجراى
جوابده جارى اولمق اوزره دها ايكي جمله ايراد بيوروب برنجي
سؤاله (رب العالمين) قوليايه، ايكنجى سؤاله ده (الرحمن الرحيم
مالك يوم الدين) قوليله جواب ويردى .
جواب اول بر قاچ وجه ايله ايضاح اولنور .

[۱] اديامزك اذكياف وفضلاسندن معلم ناجى افندى شو باب ثالئى بزدن
اول بالترجه نشر ايتمش اولديغندن، بزه مقبول فحول اولان تعبيرات
لطيفه سنك چوغنى عيناً قبوله مجبور اولدق . بوجهته ائرمزك ائك پارلاق
برى شو بابك اشغال ايده ككى صحائف اوله جقدر . بناء عليه معلم مومى اليه
بورجلو اولديغم وظيفه تشكرى علناً ايضا ايلرم . « مترجم كتاب سري »

وجه اول

بر شدتک وجودینی بیله من یا ضروری، یا خود نظری اولور.
 «وجود الہی بیله من ضروریدر» دینیله من، زیرا بالضروره
 بیلیرزکه وجود الہی بالضروره بیلیر.
 آلہ بالضروره بیلنه من. بالضروره بیلنه جک شی آنک بالضروره
 بیلنه میه جکیدر.

دیمک اولورکه الہی آنجق علم نظری ایله بیله جکز. علم نظری
 ایسه دلیلسز تحصیل اولنه ماز:

وجود آلہ دلیل ندر؟ شو عالم محسوس!
 کائناتی نظر دقته آدیغمز حالده آکارزکه سما، ارض، جبال،
 بحار، معادن، نبات، حیوان بونلرک کافه سی برمدبره، بر موجوده،
 بر مربی به، بر مبقی به محتاج در.
 ایسته (رب العالمین) قوی بو صورته قادر، حکیم، بر آلہک
 وجودینه اشارت اولور.

بو قول کریم دها بعض لطائفی مشتملدر.

لطیفه

۱

(عالمین) کافه ماسوی الله اشارتدر. بوجهتله (رب العالمین)
 تعبیری جمیع ماسوانک جناب حقہ افتقارینی، وجودجه ایجادینه،
 بقاجه ابقاسنه احتیاجنی کوسترر. شو صورته تعبیر مذکور، هر

جزء لا يتجزأك، هر جوهر فردك، هر عرضك حكيم، قادر،
 قديم اولان الهك وجودينه بربرهان باهر، بر دلائل قاطع اولديغنه
 اشارت اولمش اولور. نته كيم بو معنایي موضح اوله رق جناب
 رب العالمين (وان من شئ الا يستج بحمده ولكن لا تفقهون
 تسليحهم) بيورمش در.

لطيفه

۲

(الحمد لله خالق العالمين) بيورلما دی ده (الحمد لله رب العالمين)
 بيورلدى. بونده كي سبب و حكمت شودر كه حوادثك حال حدوئده
 برموجد ومحدثه مقتدر ومحتاج اوله جقارنده عالم متفقددر. ليكن
 حوادثك حال بقاده برمبقي يه محتاج قالوب قالميه جقارنده اقوال
 مختلفددر.

بر شيئك حال بقاده موجد و مربيدن مستغنى بولنه جغنى ادعا
 ايدنلرده واردر.

خلاصه اشيائك حال حدوئده برموجد و اقتفارى نزد عقلا ده
 متفق علميدر. ليكن حال بقاده برمبقي يه، بر مربى يه مقتدر بولنوب
 بولنميه جغنده اختلاف ايدلمش در.

مربى، بر شيئك حال بقاده ابقاسيه، اصلاح حاليله قائم
 اولاندر.

(خالق العالمين) بيوليوب ده (رب العالمين) بيورلمش اولمى
 ايسه، جميع عوالمك حال بقاده دخی جناب حقدن مستغنى بولنه.
 ميه جغنى بيلديره رك تردد و اختلافه محل بر اقامش در.

لطیفه

۳

سورة فاتحه نك بر اسمى ده (ام القرآن) اولمغه بو سورده نك
منبع معانى اولمسی، سور سائر نك دخی آندن متشعب جداول
حكمنده بولمسی لازم كلیر .

(رب العالمین) تعیری سوی الله هر موجودك اهمیت بارى یه
دلیل اولدیغنه اشارتدر .

جناب حق قرآن کریمده فاتحه دن بشقه درت سورده یی دها
بویله (الحمد لله) قولیه افتتاح بیورمشدر .

نونلردن اولکیسی - سورة انعامدرکه اولنده (الحمد لله الذى
خلق السموات و الارض و جعل الظلمات و النور) بیورلدى .
بوایسه فاتحه دهكى (رب العالمین) ده مندرج اولان اقسام كائناتك
یالنگز بر قسمنى كوسترر .

زیرا لفظ عالم، جمیع ماسوى الله شاملدر . سموات، ارض،
نور، ظلمت ایسه اقسام ماسوى الله دن بر قسمدر . ديمك اولدى كه
سورة انعامك ابتداسى سورة فاتحه نك اولندن بر شعبه در .

كذلك سورة انعامك اولنده جناب حَقك آسمان وزمینى
یارا تدیغی ذكر اولمیشدر . سورة فاتحه نك اولنده ایسه رب العالمین
اولدیغی مذکوردر . حال بوكه یوقاریده ده بیان ایتدیكمز وجه ايله
عالمك حال بقاده ابقاء الهى یه احتیاجی دركار ایكن حال حدوثه
بز محذته محتاج اولمسی اولی بالطریقدر .

اما حال حدو شده بر محدثه محتاج اولمسیله حال بقادهده بر
مبقیه محتاج بولنمسی لازم کلز.

ایشته شوایی وجه ایله تبین ایتدی که سورۀ انعامک اولنده
مذکور اولان شیر، سورۀ فاتحه نك اولنده ذکر اولنمش اولانلرک
اقسامندن بر قسم مجراسنده جاریدر.

ایکنجیسی - سورۀ کهفدر که اولنده (الحمد لله الذی انزل
علی عبده الکتاب) بیورلمش در.

بوندن مقصود، معارف آلهیه ایله تربیۀ ارواحدر. چونکه
جناب حقک عبدیه انزال بیوردینی کتاب مجید، مکاشفات
ومشاهداتک یکانه سبب حصولیدر.

بناءً علیه سورۀ کهفک اولی فقط تربیۀ روحانییه اشارت
اولمش اولور.

فاتحه نك اولنده کی (رب العالمین) تعیری ایسه کافۀ عوالم حقیقه
بر تربیۀ عامیه اشارتدرکه، بونده ملائکه کی، انسه، جنه، شیاطینه
شامل تربیۀ روحانییه کی آسمان وزمینده حاصل اولان تربیۀ
جسمانییه دخی داخلدر.

بوصورتده سورۀ کهفکده ابتداسی، فاتحه نك اولنده مذکور
اولان انواعدن بر نوع اولمش اولدی.

اوچنجیسی - سورۀ سبأ درکه، اولنده (الحمد لله الذی له مافی
السموات ومافی الارض) بیورلمش در.

سورۀ انعامک اولنده سماوات وارضک خالق جناب حق
اولدینی ذکر اولتیور. سورۀ سبأک اولندهده سماوات وارضک

حاوی بولندقلری اشیانک دخی مالکی ینه حق اولدیغی بیان
بیوریلور. ایسته سورء انعامک اولی کبی سورء سبآنک ابتداسی
دخی (الحمد لله رب العالمین) قولنده داخل اولان اقسام کائناتدن
بر قسمدر.

دردنجیسی - سورء ملائکه در که اولی (الحمد لله فاطر السموات
والارض) در. سورء انعامک اولنده جناب حقک خالق اولدیغی
ذکر اولیور. (خلق) ایسه تقدیر معناسه در. سورء ملائکه ده
(فاطر) اولدیغی بیان بیوریلور. (فطر) ایسه احداث و ایجاد
معناسه در. بوحاله نظراً سورء انعام ایله سورء ملائکه نک
اوللرنده کی آیتلر متحد المأل دکل، بشقه بشقه معنالی
شاملدر.

بونکه برابر سورء ملائکه نک اولی دخی دیکرلری کبی
(الحمد لله رب العالمین) قولنده داخل اولان اقسامدن بر قسمدر.
شوراسی ده شایان دقتدر که جناب حق سورء انعامده کندینک
آفرینده آسمان وزمین اولدیغی بیان بیوردقندن صکره ظلمات
و نورکده جاعلی [ج] یعنی خالق بولندیغی ذکر ایلدی.

[ج] جیمک فتحی و ضمیله (جعل) کلمه سی فی الاصل ایشله مک معناسی
متممندر. قرآن مبینده اون اوج وجه اوزره مستعملدر.

۱ - بر ایشی ایشله که یونولوب باشلامق.

۲ - خالق، یراتقی. کقوله تعالی (وجعل الظلمات والنور)

۳ - قول، ارسال، تبیین. کقوله تعالی (انا جعلناه قرآناً عربیاً)

« قلناه وارسلناه ویناه » معناسه در.

سورۃ ملائکہ دہ ایسہ سہاوت وارضک فاطری اولدیغنی ذکر
ایلدکن صکرہ رسل ملائکہ نک جاعلی - یعنی مرسلی بولندیغنی دہ
بیان بیوردی .

سورۃ انعام دہ کواک، یرک خلقنی بیساندن صکرہ انوار
وظلماتک جعلنی - یعنی یرادیلشنی ذکر ایلدی .

سورۃ ملائکہ دہ ایسہ سہاوت وارضک فاطری اولدیغنی

۴ - تہیئہ ونسویہ . کقوله تعالی (یجعل له من امره یسراً) بورادہ
» یجعل « تہیئہ ایدر معناسنددر .

۵ - تقدیر . کقوله تعالی (قد جعل الله لكل شیء قدراً) بورادہ دہ
(جعل) تقدیر ایلر معناسنددر .

۶ - تبدیل . کقوله تعالی (وتجعلون رزقکم) (وجعلنا علیہا سافلہا)

۷ - ادخال الشیء . کقوله تعالی (یجعلون اصابعهم فی آذانهم)

۸ - بر شیئی قلبہ الہام والقا ایتک . کقوله تعالی (وجعلنا فی قلوب
الذین اتبعوه)

۹ - اعتقاد . کقوله تعالی (الذین یجعلون مع الله انہا آخر)

۱۰ - تسمیہ وتشریف . کقوله تعالی (وجعلوا الملائکۃ الذین ہم
عباد الرحمن اناثاً) (وکذلک جعلناکم امۃ وسطاً) و (جعل الله الکعبۃ
البیت الحرام)

۱۱ - بر شیئی شی آخردن ایجاد وتکوین ایتک . کقوله تعالی (وجعل
لکم من انفسکم ازواجاً)

۱۲ - بر شیئی بر صفت و حالتدن آخر صفت و حالته دوندور مک
معناسنددر کہ تصییر مراد فیدر . بوکا ترکیبہ «قیلوق» دیرز . کقوله تعالی
(جعل لکم الارض فراشاً)

۱۳ - بر شی اوزرینہ حکم ایتک . کرک حق و کرک باطل اولسون .
کقوله تعالی (انارادوه الیک وجاعلوه من المرسلین) بونلردن بشقہ دہا بعض
معنارده مستعملدر .

ذکر کردن صکره روحانیاتک جعلی - یعنی بیانی بحثه منتقل اولدی.
 بونلر اسرار عجیبه و لطائف، عالیهدن اولقله برابر کاملاً
 (الحمد لله رب العالمین) قولنده مذکور اولان بحر اعظمک تحتده کی
 انواع مجراسنده جاریدر .

ایشته (رب العالمین) تعبیرینک وجودآله ذکر دلیل مجراسنده
 جاری اولدیغنه بو بر تنبیهدر .

وجه ثانی

رب العالمین تعبیری آلهک وجودینه دلالت ایتدیکی کبی، فی
 ذاته مکاندن، حیزدن، جهتدن متعالی اولدیغی معناسی ده مشتملدر.
 زیرا بالاده بیان ایتدی که هر وجه ایله (عالمین) لفظی الیهدن بشقه
 هر موجوده شاملدر .

مکان و زمان ایسه البته جملة ماسوی الیهدن معدوددر .
 چونکه (مکان) فضاءدن، حیزدن، فراغ ممتددن، (زمان) دخی
 قبلیت و بعدیتک [۱] سبب حصولی اولان مدتدن عبارتدر .
 بناءً علیه (رب العالمین) قولی مکان و زمانکده ربی، خالق،
 موجودی خدا اولدیغنه دلالت ایدر . بوا یسه امور معلومه دندر که
 وجود خالق، وجود مخلوقی سابق اولمق طبیعی در .
 دیمک اولور که ذات حق، فضاءک، فراغک، حیزک حصولندن
 اولده موجود ایدی .

[۱] بعدیت، بانک فتحیله .

اگر فضائک حصولندن صکره اجزاء فضادن بر جزءده
حاصل اولمش اولسیدی، حقیقت ذاتنه انقلاب، عارض اولمق
لازم کلیردی. بو ایسه حق باریده ممتنع و محالدر.

(رب العالمین) تعبیری ذات رب العالمینی ایشته بو صورته
مکان وجهندن تنزیه دلالت ایدر.

وجه ثالث

(رب العالمین) تعبیری ذات حق نصاری و حوالیه نک دیدکاری
یولده بر محله حاول ایتمک نقیصه سندن دخی تنزیه ایدر.

چونکه خدای متعال عوالمک ربی اولنجه، ماسواسنک خالق
اولمق لازم کلیر. خالق ایسه وجودده مخلوقی سابق اولمق طبیعی
ایدو کمندن هیچ بر محل یوق ایکن ذات حق موجود ایدی. بناءً
علیه جناب حقک هر محلدن مستغنی اولدینی آکلاشیلیر. محل
یوق ایکن وار اولان بر شینک وجود محلدن صکره آکا افتقاری
ایسه ممتنع در.

وجه رابع

(الحمد لله رب العالمین) آیت جلیله سی آله عالمک موجب بالذات
اولیوب فاعل مختار اولدیغنه ده دلالت ایدر. زیرا موجب بالذات
اولان شی هیچ بر فعلنده حمده، ثنایه، تعظیمه مستحق اولماز.

کورمز میسین که انسان مثلاً آتشك حرارتندن، بوزك
برودندن منتفع اولدینی وقت نه آتسه، نه ده بوزه حمد و تعظیم
ایتمز .

چونکه آتشك تسخینده، بوزك تبریدده مشاهده اولسان
تأثیری قدرت و اختیار ایله دکل، بالطبع در .

هر مستحق حمد و تعظیم فاعل مختاردر . مادام که خداده بو
استحقاقك وجودینه حکم ایدیور . فاعل مختار اولدیغنه ده حکم
ایدلك لازم کلیر .

خدای متعال اگر فاعل مختار اولیوبده موجب بالذات
اولسیدی، آثار و معلولات، موجب مؤثرك دوامیله دائم و ممتنع
التغیر اولمق لازم کلیردی .

حال بوکه بز آثار و معلولاتك تغیر اتدن خالی اولمادیغنی مشاهده
ایدیوروز: ایشته بوندن بیلدك که آله عالم کائناتده قادر بالاخیاردر .
موجب بالذات دکلدر . بوراسی ثبوت بولنجه حمد و تعظییه استحقاقی
دخی ثابت اولور .

وجه خامس

جناب حقك مصالح و منافع عبادده موافق اوله رق خلق
ایتمش اولدینی عالمك هر جهتهنده احکام و انتظام مشاهده اولنیور .
بویله محکم و منتظم بر فعل و اثرك فاعل و مؤثری ایسه علم ایله
متصف اولمق لازم کلیر .

شوافاده منزله تبیین استدی که (الحمد لله) قولى آلهك وجودينه،
حیز و مکاندن بر محله حاولدن منزهیته، کمال قدرتنه، کمال علمه،
کمال حکمته دلالت ایدر.

*
* *

اول فاتحه ده (الحمد لله) بیورلمسی اوزرینه توجه ایدن ایکی
سؤالدن برنجیسی اولان «آلهك وجودينه دلیل نه در؟» سؤالنه
ویریلن (رب العالمین) جواب صوابی حقنده ایضاحمز بوراده ختام
بولدی.

«حمده استحقاقه دلیل نه در؟» سؤال ثانیه سنه ویریلن
(الرحمن الرحیم مالک يوم الدين) جوابی دخی بر وجه آتی
ایضاح ایلرز.

دنیاده انسان ایکی درلو حالدن خالی اوله ماز . یا سلامت
وسعادته، یا خود زحمت و سفالته بولنور . احتمال اوله کوره
مظهر احسان الهی اولمش اوله جغندن آلهك رحمان ورحیم
اولدینی تبیین ایتمش اولور . چونکه اسباب سلامت وسعادتك
حصولی آتجق جناب حقك خالق و تکویننه وابسته در.
احتمال ثانیه کوره بوده شو ایکی صورتدن خالی دکدر. انسانك
چکدیکی آلام یا عباد و یارب العباد طرفدن تسایط ایدلمش بولنور.
صورت اولی متحقق ایسه خدا یوم دینده ظلمدن مظلوملرك
حقنی آله جغنی وعد بیورمش در. صورت ثانیه متحقق ایسه
ذوالکبریا روز پسینده، آلام دنیویه دوجار اولمش بولنانلری
ثواب جزیه، فضل بی عدیله نائل ایده جگنی تبشیر بیورمش در.

ایشته صور محتمله مذکورہ نك كافه سنه كوره آلهك رحمان
 ورحيم اولديني تين ايدنجه ثابت اولمش اولدى كه بويله برمولانك
 البته حمد بي نهايه، ثنائى بي غايه مستحق اولمسي لازم كليز .
 شو ايضاحاتمله تحقق ايدر كه (الحمد لله رب العالمين الرحمن
 الرحيم مالك يوم الدين) قول كريمندن اكل و افضل برسوز ترتيبي
 دائره امكانك خارجنده در .

*
* *

جناب حق صفات معتبره ربوبيته متعلق كلامى سورة فاتحه نك
 بورايه قدر كورد يكمز كلمات قدسيه سييله اتمام بيورد قدن صكره
 عبوديتده معتبر اولان كلام ايله تعقيب ايدرك (اياك نعبد)
 بيورمش در .

معلوم اولمليدركه انسان جسد ايله روحدن مركبدر . جسددن
 مقصود روحه نافع اولان شيلارك اكتسابي ايچون روحه آلت
 اولمليدركه .

بناءً عليه افضل احوال جسد، روحك سعادات باقيه
 روحانيه ي اكتساب ايتمنه معين اوله جق اعمال ايله اشتغاليدر .
 بو اعمال دخى معبود حقيقيه تعظيم افاده ايدم جك شيلاردن
 واورده عبادتن عبارتدر .

ديك اولوركه بودنياده انسان ايچون احسن احوال، عبادتله
 اشتغالدر .

ایشته شو عبادت، انسان ايچون اول درجات سعادتدر كه (اياك
 نعبد) تعليم معبودانه سييله ده مراد بودر .

شوافاده منزله ت
 بر مدت بودر جهده عبادتله مشغول اولدقدن صکره
 حیز و مکانده
 ایشته منور شاهراهی اوله جق انوار عالم غیب سایه سنده
 کاوررکه ایتمکده اولدینی عبادات یالکز کندی سعیله دکل، توفیق
 و عنایت حقله حصوله کلمکده در.

ایشته بو مقام، درجه وسطای کالدرکه (وایاک نستعین)
 قولیله مراد بودر.

بو مقامی دخی کچدکن صکره عبده منکشف اولورکه هدایت
 آنجق خدادندر. انوار مکاشفات ایسه آنجق هدایه الله ایله
 تجلی ایدر.

ایشته (اهدنا الصراط المستقیم) مشعل فیضی ده بو یولی
 کوستر.

*
 *

بو بحث ده بعض لطائفی متضمندر.

لطیفه

۱

اعتقاداتده منهج حق، صراط مستقیمدر.
 شویله که:

حق آهیده متوغل تنزیه اولانلر تعطیل و نفی صفات
 مخاطره سنه اوغرارلر. متوغل اثبات اولانلر دخی تشبیه و اثبات
 جسمیت دردینه دوشرلر. بو یوللرک ایکسی ده چیقماز.

صراط مستقیم ایسه تعطیل و تشبیهدن خالی اقراردن عبارتدر.

کذلک «عبد افعالنده اراده کلیه مالکدر» دینلر جبرییه التحاق ایش اوله جقلری جهته اهل ضلال صاییلرلر. صراط مستقیم ایسه هر شیک قضای الهی ایله وجود بولدیغنی اقرار ایله برابر عبده اثبات فعل الیکدر.

اعمالده دخی منهج حق صراط مستقیمدر.
شویله که:

اعمال شهوانیهیه منهک اولانلر اقتباده فحور اولورلر.
صراط مستقیم ایسه ایکینی اورتسیدرکه عفتدر.
کذلک اعمال غضبیهیه منهک اولانلر دوچار تهور اولورلر:
اعمال مذکوره نک ترکنده مبالغه ایدنلر دخی حال جباتده بولورلر. صراط مستقیم ایسه ایکینی اورتسیدرکه شجاعتدر.

لطیفه

۲

صراط مستقیم بری ایجابیه، دیکری سلیه اولمق اوزره ایکی صفتله وصف اولندی. صفت ایجابیه بویولک مظهر انعام خدا اولان انیا و صدیقین، شهدا و صالحینک مساککی اولسیدر.
صفت سلییه دخی بویولک ارتکاب شهوات ایله قوای عملیه لرینک فسادندن ناشی جالب غضب اله اولانلرله قوای

نظريه لر ينك فسادندن ناشی عقائد حقه و معارف يقينه دن بی بهره
قالا نلرك مسلكی اولسيدر.

لطيفه

۳

بعض علمانك بياننه كوره (اهدنا الصراط المستقيم) قوليله
اكتفا بيورليوبده (صراط الذين انعمت عليهم) دخی دینلینك
حكمتی شو اولمليدر كه برسالك كنديسني مواقع غلط و ضلاله
صاپتمدن وقايه ايله طريق مستقيمه سوق ايده جك بر مرشد كاملاك
فيض نظريته مظهر اولمادجه هدايت و مكاشفه مقاماتنه واصل
اوله ماز.

مرشدك ازومي آشكاردر. زيرا اكثر خلقتده نقص غالب اولمغه
عقول ناس، حق ادراكه، غلطی صوابدن تمیزه غير كافي در.
بناءً عليه بر ناقص هر حالده بر كامله اقتدا ايتمليدر كه آندن قوت
آله آله منزله سعادت و كماله طوغری يول آله بيلسون. بو افاداتمزدن
ظاهر اولور كه سورة فاتحه (اوفوا بعهدى اوف بعهدكم) آيتنده
مذكور و يلمنسى اهم امور اولان عهد ربوبيتله عهد عبوديتى
صورت كافيهده بيان ايتكدهدر.

ايكنجی مسأله

سورة فاتحه نك لطائفی بيان ايچون سوزده برده شوييله
كيريشه لم:

معلومدر که احوال عالم، خیر و شر ایل، محبوب و مکروه ایله ممزوجدر. بونی هر کس بیلیر. فقط بز دیرزکه، عالمده شر چوق ایسهده خیر آندن دها چوقدر. خستهک چوق ایسهده صحت آندن دها چوقدر. آجلق چوق ایسهده طوقاق آندن دها چوقدر. عاقل نفسنی نظر اعتباره آلدیغی وقت کندینی تغییرات دائمه ایچنده کورمکه برابر بوتغیراتک چوغنی سلامت، کرامت راحت، بهجت کی انواع خیردن اولمق اوزره بولور.

بو تغییرات بعدالعدم حصولی مقتضی بولغله بر آله قادرك وجودینه دلالت ایتدیگی کی شمعی اخطار ایلدیگمز وجه ایله احوالک اغلبی خیر اولدیغندن بو آلهک رحیم، محسن، کریم اولدیغنه دخی دلالت ایدر.

تغیراتک وجود آله دلالتی شو جهتهله ثابتدر که فطرت سلیمه بعدالعدم موجود اولان بر شئیک البته بر موجودی اولمق لازم که جکنه شهادت ایلر.

بو سبیدن ناشیدر که مثلاً بنادن خالی بولندیغنی بیلدیگمز بر عرصه اوزرینه صکرهدن بر خانه انشا اولندیغنی ایشتهک، عقلمز درحال اوخانهک بر بانیسی اولمق لازم که جکنه عرض کواهی ایدر. بالفرض بریسی چیقسهده بو مادهده بزى شبههیه دوشورمکه بیک چالشسه ذره قدر شک و شبههیه دوشمیز. مادام که حقیقت حال بودر. شو دارالتغیراتک بر موجود قادری اولدیغی محققدر.

زیرا موجب بالذات اولسه آنک دوامیله اثر دخی دائم اولوق
لازم کلیردی .

برائیک یوق ایکن وار اولسی بر مؤثر قادرك وجودینه دلالت
ایتدیکی کبی او مؤثر قادرك رحیم و محسن اولدینی دخی شو
جهتله ثابتدرکه یوقاریدهده بیان ایتدیکنمز وجه ایله تغیرات
محسوسه نك اغلی راحت و خیردن، سجت و سلامتدن عبارتدر.
اکثر افعالی راحت، خیر، سجت، سلامت اولان برذاتک ایسه
رحیم و محسن اولدیغنده شبهه می ایدیلیر .

بونده شبهه ایدیه میسه چکی کبی اوزاتک مستحق حمد و تعظیم
اولدیغنده دخی تردد اولنه ماز.

احوال مذکورده بیلمسی لازم کان هر عاقلک آماده حمد
خدا اوله جفی بدیهیاتدن بولغمنه مبنی تعلیم طرز حمد ایچون اول
فاتحه ده (الحمد لله) بیورلدی .

بوصورتله مقام حمده اشارت بیورلدقن صکره (رب العالمین)
قولیه آندن اغلی واعظم بر مقام دیگر کوسترلدی . کویا دینمش
اولدی که :

« ای ورد «الحمد لله»ی تعلمه موفق اولان حامد ! ظن ایتمه که
حمدیله مشغول اولدیغک الله یالکز سنک آلهمکدر .

بیل که او هم سنک، هم کافه عوالمک آلهدر . سن الله نه
ایچون محتاج ایسه ک. عوالم ده آنک ایچون محتاجدر . مادام که
علتمده اشتراک وار، معلولهده اشتراک اولوق طبیعی در . بناءً

عليه سكا اسلوب حمدى او كردن اله ، سن ده داخل اولديغك
حاله بتون عالمك ربى، الهى، مدبرى در.»

آلهك وجه مذكور اوزره رب العالمين اولديغى تقرر اينجه
شوراسى ده تسليم اولمق لازم بكيكه عظمتيله برابر بونجه عوالمى،
عرشى، كرسى يى، آسمان و اخترانى يراتمغه قادر اولان الله،
بونلرى اهلاكهده قادردر، بونلرك كافه سندن ده مستغنى در. بويله
قادر، بويله قاهر، بويله غنى بر آلهك درجه كبرياسنى، عظمت
وجلال حيرت افزاسنى دوشونمليدر.

بو عظمت خدائى، بو كبريائى خياله آلان عبدك اذكار قليبده -
سندن برى ده «بن شوكمال ذلتله رتبه رفعتى تصور دن بيله عاجز
بولنديغ ربمه تقربه نصل يول بوله بيله جكم؟» فكرى اولور.
ايشته (الرحمن الرحيم مالك يوم الدين) قولى عبدك آراديغى
چاره تقربى اشعار ايچون ايراد بيورلمش در.

بونكلهده دنلمش اولدى كه :

«اى عبد ضعيفم ! بنم قدرت و هيتم عظيم اولمق ايله برابر
رحتم ده عظيمدر. حاكم روز جزا ايسه بنم ! حيات دنوييه يى حائر
بولنديغك مدبجه رحمت و نعمتمدن مستفيد اولورسين. عالم ديكره
انتقال كده دخى اعمال كدن هيچ برينى اضاعه ايتام. برخيريكه بيك
خير ايله مقابله ايدرم. معصيتك وار ايسه آنى ده غفران
واحسان ايله قارشيلارم.»

ربوبيت بويولده تقرير و افهام اولندقدن صكره اوچ درلو
امر الهى تبليغ بيورلدى.

اولکیمی - اعمال ظاهریه مواظبتدرکه مقام شریعتدر .
 بونی (ایک نعبد) تبایغ ایدر .
 ایکنجیسی - عالم شهادتن عالم غیبه توجھله او عالمی بو عالمه
 مسخر کورمک و امداد غیبی اولمادقچه اعمال ظاهریه استقامت
 میسر اوله میه جغنی بیلکدرکه مقام طریققتدر . بونی (ایک نستعین)
 بیلدیرر .

او چنجیسی - عالم شهادتی بالکلیه معزول و کافه امور و اشیا
 منحصر آید الله مودوع کورمکدرکه مقام حقیقتدر . بونی دخی
 او مقامی مشاهده ایدن عبدک زیور زبان ایتان ایدرجکی (اهدنا
 الصراط المستقیم) کوسترر .

*
* *

بوراده بعض دقائق دها عرض ایتک ایسترز .
 مطلوب واحدک تحصیل ایچون همدست سعی اولمش ارواح
 کثیریده نسبتله یالکز برروحک ضعیف قاله جغنی مسلد . برروح
 ارواح مجتمعه نك ظفریاب اوله بیله جکی مقصوده منفرداً واصل
 اوله ماز .

انسان یالکزجه نائل آرزو اوله میه جغنی آکلانجه ، روحنی
 مکاشفات روحانیه ، انوار سبحانیه طابنده بولنان ارواح مقدسه
 مطهره زمره سنه الحاق ایلر . بعد الالتحاق آنلردن معاونت
 کوردجکی جهتله طلبی قوت ، استعدادی کمال بولور . بناءً علیه
 حال وحدتده نائل اوله میه جغنی مقاصده بوجهیتده نائل اوله بیلیر .

ایشته (اهدنا الصراط المستقیم) ی متعاقباً (صراط الذین انعمت علیهم) بیورلمسی بونکتہ جلیله یه مینی در.

برروحك ارواح مطهره ایله الحادی قوت واستعدادی تزیید واکمال ایده جکی بووجه ایله بیان اولندقدن صکره ارواح خیشیه مقارنت واتصالك موجب خیت و خسران اوله جنی دخی - فساقه اشارت ایدن (غیرالمغضوب علیهم) وکفاره دلالت ایدن (ولا الضالین) قوللریله تحذیرکارانه تفهیم بیورلمش در.

ایشته بالاده افاده قلندینی اوزره (ایک نعبه) ایله مقام شریعت (وایک نستعین) ایله مقام طریقت (اهدنا الصراط المستقیم) ایلده مقام حقیقت کوسترلکدن صکره ارباب صفایه مقارنت سایه سنده استسعاد، ارباب شقاوتدن مبعادتله دخی استکمال رشاد میسر اوله جنی بیلدیریلور که کافه معارج بشریه، کافه کمالات انسانیه بوراده تمام اولور.

اوچنجی مسأله

سورة فاتحه نك لطائفی بر آزده شویله تقریر ایدلم:
انسان، جلب خیرات و لذاته، دفع مکروهات و مخافات
محتاج برحاله یرادلش در. بو عالم ایسه عالم اسباب اولغله جلب
خیر، دفع شر آحقق وسائط معینه یه مراجعتله میسر اوله بیلیر.
انسان باقیور که اسبابه تشبث ایدلمدکجه نه جلب خیر، نه دفع
شر ممکن اوله میور. وسائط جلب و دفع اولان اسباب ظاهریه
برمیل شدید پیدا ایدیور. اسبابك حصول مطالبه خدمتی دمام
کوردکجه بونلره تعلق خاطری دوام و تزیاید ایدوب کیدیور.

برده حکمة ثابتدرکه برشیه کثرت اشتغالدن ملکات راسخه
حصوله کلیر. طبع بشر ایه تشبه میالدر.

امور معلومه دن دکلیدرکه برصنعتله مدت مدیده اوغراشان
آدم، اوصنعتده برملکه قویه پیدا ایدر. اشتغال ودوامی
نه قدر زیاده اولورسه حاصل ایتدیکی ملکهده او قدر قوتلی
اولور.

امور مجهوله دنمیدرکه انسان، فساق ایه مجالس اولدینی زمان
طبیعتده فسقه میل حس ایدر. بونک سبیده ارواحک حب
محاکات وائتلاف ایه مجبول بولنمیدر.

بوراسی معلومک اولنجه دیرزکه : افاده ایتدی کمز وجه ایه
اسبابمز جلب منفعت، دفع مضرت امکانه اولمادیغندن بو حال،
اسباب ظاهرده تعاق خاطری موجب اولوب انسانک ایهسه
اسباب ظاهرده مواظبتی زیاده شدکجه قلمبندکی بومیل وطلب دخی
قویلشیر. ایشته اکثر ناس بوصفتهله موصوف، بو حاله مواظب
ومداومدر.

نفوس بشریه ایهسه حب محاکات وائتلاف ایه مجبول اولمغله
بودوام ومواظبت، حالت مذکورده تقویت ویرر.

بناء علیه شوايضاحاتمله ظاهر اولورکه حب دنیایی ایجاب،
انسانی وسائط ظاهرده تشبه ترغیب ایدن سبیلر جداً چوقدر.
قویدر. شدیددر.

فقط انسانه هدايت حق مصادف اولنجه بواسبابک حقائقتی
شافی وافی برصورتده تأمله باشلار.

مثلا جبار دهن جهانی استیلا ایتش برینی کوررده کنندی
کندینه دیرکه:

«شوده بزم کی بر آدم اولدینی خالده بو کون عالمه حکم
ایدیور. بونه دن؟ عیجا کندی فرط قوتندن، کمال درایتندنی؟
خیر! حقیقت حال مطلقاً بویله دکل؛ بوندن قوتلی، بوندن
درایتلی آدم چوق!»

شوملا حظیهی درپیش ایلهرک حکم ایدرکه بوامارت وریاست
او آدمک قوت و درایتله دکل، اراده سی رد اولنمز بر کریم قسامک،
بر حکیم علامک قسمت و حکمتیه حصوله کلش در.

انسانک نظر اعتباری بو فکرینی تأیید ایده جک دهانجه
آثاره تصادفله بونلرده تجلی ایتمکده اولان حقیقتی کوردکجه،
مؤثر حقیقی کیم اولدیغنی دوشوندکجه، قلبی اسباب ظاهرده دن
بالانصراف مسبب الاسبابه توجه ایدر.

بو یولده کی اعتبارات و مکاشفات تسلسل ایده ایده بر حاله
کلیرکه هر کوردیکی خیری آنجق (نافع) استمنک، هر کوردیکی
شری دخی آنجق (ضار) استمنک تجلیات مخصوصه سنیدن اولمق
اوزره تلقی ایدوب اورته ده مؤثری بر بولور.

بوعرفان اعلایی حاصل ایتش اولان برقلب دراک، تمکیدرکه
وجه اللهدن غیری شایان توجه برجهت کوروبده معنی ارتکاب
اشراک ایده یلسون؟

بو حاله بومقامه واصل اولان انسان، شکر و شکایتی آنجق

بارکاد الہی یہ رفع ایدہ بیایر. ایدہ جکی حمد و تعظیم، خدایہ منحصر
اولور. ایستہ اوزمان معنای حقیقینی بیلدرک (الحمد لله) دیر.

عالم سفلیدہ تصرف آنجق جناب حَقْک اولدیغی نظرندہ
تعین ایدنجہ فکری بر درجہ دہا یوکسلدرک عالم علویدہ دخی
تصرف ینہ آنجق حَقْک اولدیغی کورر.

ایستہ نہ دیمک اولدیغی آکلایه رق او وقت (رب العالمین) دیر.

بر عالم سفلی یہ، بر عالم علوی یہ عطف نظر امعان ایدرک
حسن ترتیبہ، کمال انتظامنہ حیران قالہ جغی کائناتی صانع حکیمک
کمال رحمتی اعلان ایچون یکرزبان اقرار اولمش کورنجہ برلسان
عارفانہ ایله (الرحمن الرحیم) دیر.

بو مشاهدات ایله مصالح دنیویہ سنی تسویہ ایدن فضل حق
اولدیغی آکلایان انسان امور اخرویہ سی نصل اولہ جغی تأملہ
باشلار. چوق کچمز قلبنہ برانشراح کلیر. زیرا وردزبان تقدیس
ایلدیکی فاحصنک کندیسنه « مالک یوم الدین - ایله - الرحمن
الرحیم - بیننده فرق یوقدر. مالک یوم دین طانیسیدیک الہ ،
آثار بدیعہ رحمتی کورمکده اولدیغک الہدر. اوهر حالده رحمان
و رحیم در » دیمش قدر اولدیغی فہم ایله تیقن ایلر کہ دنیاسدہ
آخرتدہ اصلاح مهماتنہ متکفل آنجق رب العالمیندر . بونک
اوزرینہ آرتق ماسواہ التفات ایدہ مز، قلبندہ حقہ دن غیری
تعلق بولہ ماز اولور .

بر زمان اکابر اهل دنیاہ مائل، آنلرک خدمتیلہ مشغول

اولان وایفای خدمتدن صکره تحصیل مهماتنده آنلردن استعانه
ایدن انسان بوتعلقك زوالی متعاقباً بیایر که خدمت اکابرده
بولنقدن خدمت معبودده بولنحق البته اولادر . ایسته او وقت
مخلصانه (ایاک نعبد) دیر .

عبده کوره بونك معناسی شو اولیور : « یارب ! بن بوندن
اول سندن غیری طرفلره متوجه و متعبد ایدم . شمدی ایسه
عبادتمی سکا تخصیص ایلدم . »


بوندن صکره لسان عبودیتی ترین ایده جك اولان (ایاک
نستعین) ینه عبده کوره دیمك اولور که «آلهی ! بن بوندن اول
اوتدن بریدن مستعین ایدم . شمدی ایسه آنحق سندن استعانه
ایدیورم . »

عبده سریع الزوال اولان مال وجاهك استحصالی ایچون
خالقه مراجعتدن طوغری یولی بولمق ایچون خالقه مراجعت
البته اولی اوله جغنی تفکرله (اهدنا الصراط المستقیم) نیازنده
بولنور .

اهل دنیا ایکییه منقسم اولوب بر قسمی آنحق خالقه عبادت
آنحق خالقندن استعانه ایدنلردر . قسم دیگر ایسه خالقه
خدمت ، خالقندن استعانه ایاینلر اولدیغندن طبیعیدر که ،
عبد صادق کندیسینی فرقه ثانییه التحاقدن وقایه ایله فرقه اولایه
الحاق بیورمسنی جناب حقندن استدعا ایلر . بو استدعا
سلامتجویانه ده (صراط الذین انعمت علیهم غیر المغضوب

عليهم ولا الضالين) ديمسيه بارگاه آله عرض ايتمش اولور .
چونكه فرقه ثانيه به متابعت، خسار و هلاكدن غيرى شئى مفيد
اولماز .

(لم تعبد ما لا يسمع ولا يبصر ولا يغنى عنك شيئاً) قول كريمى
منطوقنجه حضرت ابراهيم عليه السلام بو معنايى نه كوزل افاده
ايتمشدر. (والله اعلم)



باب رابع

سورة فاتحه دن مستنبط مسائل فقهيه بيانده در

برنجی مسأله

نمازده قرائت واجب اولديغنه اكثر علما متفقدر .
 ياليز (اصم) و (حسن بن صالح) عدم وجوب قرائته
 ذاهب اولمشلردر .
 مذهب شافعي يه سالك اولانلر نمازده مطلق قرائتن بشقه
 قرائت فاتحه نكده وجوبنه قائل اولدقلرندن حضرت مفسر ديركه :
 فاتحه نك وجوب قرائتي حقهده ايراد ايتديكمز دلانلك
 كافه سي قرائت مطلقه نك وجوبنهده دليلدر .
 بز اولدائل ايله اكتفا ايتمز . بو بابده بعض وجوه مثبته
 ده درميان ايده جكر .
 شويلاه كه :

١ — جناب حق (اقم الصلاة لادوك الشمس الى غسق
 الليل وقرآن الفجر) بيورمشدر . بو آيت جليلهده مذكور اولان
 قرآن ايله مراد قرائندر . مضمون آيت دخي (اقم قراءة الفجر)
 تقديرندهدر . ظاهر امر ايسه وجوب ايجوندر . ديمك اولديكه
 نمازده مطلقا قرائت قرآن واجبدر .

٢ — ابو الدردادن مرويدر كه بر آدم امام الانبيا صلى الله

عليه وسلم افندمزه (افى الصلاة قراءة) ديه صورمش؛ رسالتجائب
افندمزه دخی (نعم !) بیورمش .

سائل، حضرت پیغمبردن بو « اوت ! » جوائی آنجه
« دیمک که نمازده قرائت واجب اولدی » دیمش .

اعلم الرسل افندمزه دخی آنک بوقولی رد ایتمیوب سکوتلریله
تصدیق بیورمش در .

۳ — ابن مسعوددن مرویدرکه نبی ذیشان صلی الله علیه
وسلم افندمزه « یقرأ فی الصلاة » ديه نمازده قرآن وقونوب
اوقوشیه جفنی صورمشله؛ حضرت پیغمبر افندمزه دخی (انکون
الصلاة بغیر قراءة) ديه رک « نماز قرائتمز اولور می ! » یولنده
اعطای جواب بیورمشلر در .

شو یکی خبر معتبری . شیخ ابو حامد الاسفرائینی نک تعلیقندن
اخذ ونقل ایلهدم .

•••

« نمازده قرائت، واجب دکلدر » ديهن اصم، (صلوا كما
رأیتمونی اصلى) حدیث عالیستی سند ایدرک دیرکه :

جناب خیر البشر بو حدیث عالیرنده صلاحی اشیای مرثیه
صره سنه قوشش ! قرائت یسه مرتی اولان شیلردن دکلدر . بناء علیه
قرائت، ارکان صلاتدن اولیبوب خارج از صلات اولقی لازم کثیر .
اصحک بو احتیاجنه شو وجه ایله جواب ویریلیر .

« لفظ رؤیت یکی مفعوله تعدیه یتدیکی وقت معنای عملی
مفید اولور . »

ایکنجی مسأله

امام شافعی « نمازده قرائت فاتحه واجبدر . مصلی فاتحه دن حرف واحد ترك ایدرسه نمازی صحیح اولماز » دیمش : اکثر علما دخی قول امامه اتباع ایتمشدر . یالکتر امام اعظم ابو حنیفه رضی الله عنه « قرائت فاتحه واجب دکلدر » دیمشدر .

للمترجم - حضرت مفسر، قول شافعی بی تأییداً بوراده بر چوق سوزلر سویله مش ایسهده او سوزلر حائر اهمیت اولمقلله برابر بزم سالک اولدیغمز مذهب حنفییه مخالف اولمقله نقل و ترجمه ایدلما مشدر . « صوك . »

اوچنجی مسأله

مسأله سابقهده بیان اولندیغی وجه ایله عند الحنفی نمازده مطلقاً قرائت قرآن واجب اولوب فقط بالخاصه قرائت فاتحه واجب اولمادیغی ایچون امام اعظم ابو حنیفه حضرت تریله امامین محترمین، مقدار قرآنده اختلاف ایتشلر .

حضرت امام هام « الم - حم - والطور - مدهامتان » مثللو آیت واحدهنك قرائتی ده کافیدر . « بیورمش اولدیغی خالد امام ابو یوسف ایله امام محمد، قیصه جق آیتلردن لا اقل اوچ آیت، ویاخود « آیه الدین » مثللو آیت واحده طویله او قومق لازم کله جکی رأینده بولنشلردر .

دردنجی مسأله

امام شافعی «رضی الله عنه» — بسم الله الرحمن الرحيم —
سورة فاتحه نك اولندن بر آيتدر . بونی فاتحه ايله برلكده اوقوق
واجبدر ديمش .

امام مالك ايله اوزاعی، دخی يالكر سورة التلده کی بسمله
شريفه یی قر آندن عد ايدوب آندن ماعدا اوائل سورده کی بسمله لر
قر آندن دكلدر . نمازده بسمله شريفه یی جهراً دكل، سرأ
اوقومليدر ديمشار .

امام اعظم ابو حنيفه بسمله، سورة فاتحه نك اولندن بر آيتی
دكلی؟ بو بابده قطعياً بر شی ديمیوب يالكر نمازده سرأ اوقونمق
لازم كله جكنی بيان بيورمش در .
يعلی، ديمش دركه :

بن امام محمد بن حسن دن — بسم الله الرحمن الرحيم —
حقنده کی رأيی صوردم . «ما بين الدنتین قرآن» جوابی ويردی .
اويله ايسه بسمله یی نيچون نمازده جهراً اوقوميورسكز؟ يولنده
ايتديكم استيضاحه هيچ بر جواب ويرميوب اختيار سكوت بيوردی .
فقهای حنيفه دن بعضيلری ديمشاركه :

امام اعظم حضرت تليله اصحاب فضائل انتسابی بو مسأله
حقنده بر رأيی قطعی بيان ايتكدن تورع بيورديلر . چونكه
بسمله نك قر آندن اولوب اولماديغنی بيانه قالقيشق بر امر عظيم
وخطير اولديغندن بو بابده اختيار سكوت اولادر .

المترجم - حضرت مفسر بالطبع مذهب شافعی بی التزام ایدرک
 «بو. مسأله ظواهر و آحاد ایلہ استدلال، جائز اولان بر مسأله
 اجتہادیہ میدر؟ یوقسه مسائل قطعیہ دئمیدر؟ مسائل اجتہادیہ دن
 اولدینی تقدیرده بسمله بی جہز آمی سر آمی اوقوملی؟ بونده حق
 نه در؟»

شو اوج سؤالی ایراد ایلدکن صکره مسأله مجوٹ عنهانک
 مسائل قطعیہ دن اولمادیغنی بیان ایلہ بو بابدهده اوزون اوزادیه
 بسط مقال ایلش در .
 ایسته بشنجی مسأله بو بحث طویل محتوی اولغله ترجمه سندن
 صرف نظر ایدلش در . صوك .

آلتنجی مسأله

بسمله شریفه قرآندنی دکلې؟ فاتحه دن بر آیتی دکلې؟
 مدینه منوره نك، بصره نك قراسی، کوفه نك فقهاسی «بسمله
 فاتحه دن دکلدر» دیدیلر .

مکه مکرمه نك، کوفه نك قراسی، حجازك اکثر فقهاسی
 بسمله نك آیات فاتحه دن بر آیت اولدینی رأینده بولندیلر . ابن
 مبارک ایلہ ثوری نك ده قوی بودر .

بو قول اخیری وجوه آتیہ دنخی تأیید ایلر .

۱ - امام شافعی «رضی الله عنه» مسلم بن جریر بدن،
 ابن ملیکه دن، ام سلمه دن روایت ایلش درکه :

مشار اليها ام سلمه، رسول الله صلى الله عليه وسلم افندمن بر
 كون فاتحة الكتابي اوقويوب - بسم الله الرحمن الرحيم - ي،
 - الحمد لله رب العالمين - ي، - الرحمن الرحيم - ي، - مالك
 يوم الدين - ي، - اياك نعبد واياك نستعين - ي، - اهدنا الصراط
 المستقيم - ي، - صراط الذين انعمت عليهم غير المغضوب عليهم
 ولا الضالين - ي برر آيت مستقلة عدو شمار بيورديلر ديمش در.
 ايشته بو روايت، بسمه نك فاتحه دن بر آيت اولديغنه نص
 صريح در.

۲ - سعيد المقبري، پدرندن، ابو هريردن روايت
 ايتمش دركه: رسول الله صلى الله عليه وسلم افندمن (فاتحة الكتاب
 سبع آيات اولاهن بسم الله الرحمن الرحيم) بيورمش دركه. سورة
 فاتحه نك يدي آيت اولديغني و بو آيات جليله نك اواكيسي بسمه
 بولنديغني مشعر در.

۳ - ثعلبي، كندی تفسيرنده ينه كندينك اسناديله
 ابو بريده دن، اوده پدرندن روايت ايتمش دركه: رسالتناه افندمنله
 پدر ابو بريده بيننده شويله بر محاوره جريان ايتلش در.
 نبي ذیشان افندمن - سليمان بن داود دن صكره سمادن هيچ
 بر كيسه يه نازل اولماش اولان بر آيتي سكا خبر ويرهيم مي؟
 پدر ابو بريده - احسان بيوررسكيز.

نبي - نمازه باشلا دقن صكره قرآني نه ايله افتتاح ايدرسين؟
 پدر ابو بريده - بسم الله الرحمن الرحيم ايله افتتاح ايدرم.
 نبي - ايشته او آيت بو آيتدر.

بو حدیث شریف نبوی دخی بسمله نك قر آندن اولدیغنه
دلالت ایدر .

۴ — ثعلبی، کندی اسنادیله جعفر بن محمد بن اوده
پدرندن، جابر بن عبد الله بن روایت ایدوب دیمش درکه : رسول
الله صلی الله علیه وسلم افندمزله جناب جابر یئتمده شویله بر
محاوره جریان ایتمش در .

نبی ذیشان — نمازه طور دینگ وقت نه دیر سین ؟

جابر — « الحمد لله رب العالمین » دیرم .

نبی ذیشان — « بسم الله الرحمن الرحیم » دیملین .

ینه ثعلبی، کندی اسنادیله ام سلمه دن روایت ایتمش درکه نبی
محترم صلی الله علیه وسلم افندمز حضرت لری « بسم الله الرحمن
الرحیم الحمد لله رب العالمین » دیر ایدی . یعنی فاتحه یی مع البسمله
اوقور ایدی .

ینه ثعلبی، کندی اسنادیله امام علی علیه السلام افندمز دن
روایت ایتمش درکه امام مشارالیه « سورة فاتحه یی » بسم الله الرحمن
الرحیم « ایله افتتاح ایدر و « قرائت بسمله یی ترك ایدن کیسه نك
نمازی ناقصدر » دیر ایدی .

ینه ثعلبی، کندی اسنادیله سعید بن جبیر دن روایت ایتمش درکه
ابن عباس (ولقد آتيناك سبعاً من المثانی) آیت کریمه سنده مذکور
اولان (سبع المثانی) دن مراد، فاتحه در دیو بیان بیورملریله
آکا « اولیه ایسه فاتحه نك آیت سابعه سی هانکیسیدر ؟ » دیه
صورانلر « بسم الله الرحمن الرحیم » در جوانی ویرمشلر در .

ینه ثعلبی کندی اسنادیله ابوهریرددن روایت ایتمش درکه
اعلم الانبیا صلی الله علیه وسلم افندمن حضرتلری «ام القرآن
او قویه جغکز وقت - بسم الله الرحمن الرحیم - ی ترک ایتمکز!
زیرا بسمله آیات ام القرآندن بریسیدر» بیوردیلر:

ینه ثعلبی کندی اسنادیله کذلک ابوهریرددن روایت ایتمش درکه
فخر رسالت افندمن «یقول الله قسمت الصلاة بینی و بین عبدی
نصفین فاذا قال العبد بسم الله الرحمن الرحیم قال الله سبحانه
مجدنی عبدی و اذا قال «الحمد لله رب العالمین» قال الله تبارک و تعالی
«حمدنی عبدی» و اذا قال «الرحمن الرحیم» قال الله عز و جل
«اثنی علی عبدی» و اذا قال «ما لک يوم الدين» قال الله «فوض
الی عبدی» و اذا قال «ایک نعبد و ایاک نستعین» قال الله تعالی
«هذا بینی و بین عبدی» و اذا قال «اهدنا الصراط المستقیم» قال
الله تعالی «هذا لعبدی و لعبدی ماسأل» بیورمشلردر.

ایشته شو حدیث شریف دخی بسمله نک آیات فاتحه دن
اولدیغنی معان در.

ینه ثعلبی کندی اسنادیله کذلک ابوهریرددن بوجه آتی
روایت ایتمش در.

ابوهریره دیمش درکه:

رسول الله صلی الله علیه وسلم افندمن اه مسجدده بولندم.
نبی ذیشان افندمن اوراده اصحاب کرامیله صحبت ایدرکن بریسی
کلوب نمازه طوردی. بعد التعوذ «الحمد لله رب العالمین» دیهرک
قرائت فاتحه به باشلادی.

رسول اکرم افندمن او کیسه نك بسمه سر قرائت فاتحه به
 شروع ایتدیکنی ایشیدنجه (یا رجل! قطعت علی نفسك الصلاة
 اما علمت ان بسم الله الرحمن الرحيم من الحمد من تركها فقد
 ترك آية منها ومن ترك آية منها فقد قطع صلاته فانه لاصلاة الا
 بفاتحة الكتاب فمن ترك آية منها فقد بطلت صلاته) بیورمشلردرکه
 بو حدیث شریف دخی هم بسمه نك فاتحه دن بر آیت اولدیغنی،
 همده نمازده قرائت فاتحه واجب بولندیغنی موضحدر.

ینه ثعلبی، کندی اسنادیله طلحة بن عبد الله بن روايت
 ایتمشدرکه رسول مجتبی صلی الله علیه وسلم افندمن حضر تبری
 (بسم الله الرحمن الرحيم - ی هر کیم ترك ایدرسه کتاب الله بن
 بر آیت ترك ایتمش اولور) بیوردیله.

بن شو احادیثک کافه سنی شیخ ابو اسحاق الثعلبی نك «رحمه
 الله» تفسیرندن نقل ایتشمدر.

۵ — مادامکه اول فاتحه ده — بسم الله الرحمن الرحيم —
 ک قرائتی واجبدر. بسمه آیات فاتحه دن بر آیت اولق لازم کلیر.
 اول فاتحه ده بسمه نك وجوب قرائتی شووجه ایله ایضاح اولنور.
 «اقرأ باسم ربك» آیتده کی با صله زانده در دینله من.
 زیرا اصل اولان کلام اللهم هر حرفی بر فائده ی مفید اولمقدردر.
 مادامکه بو بر حرف، مفیددر آیت جلیله «اقرأ مفتتحاً باسم ربك»
 تقدیرنده اولق لازم کلیر. ظاهر امر ایسه وجوب ایچوندر.
 بو وجوب دخی نمازده قرائتک غیر یسنده ثابت اولماش اولدیغندن
 نصی تعطیلدن صیانة نمازده کی قرائته بسمه نك اثباتی لازم کلدی.

۶ — بسماء شریفه خط قرآن ایله یازیلی در. حال بوکه
 قرآدن اولیان کلامی مصاحفده خط قرآن ایله یازمازلر.
 کورمز میسین که علمای کرام مخمفده اسماء سورک یازلمسین،
 اعشار و اخماس اوزرینه علامتار قونلمسین منع ایتمازلردر. بو
 منعدن غرض ایسه مجرد قرآن کریمک قرآدن اولیان کلام ایله
 قارشامسیدر. بناءً علیه بسماء شریفه قرآدن اولمسیدی، آئی
 خط قرآن ایله یازمازلرایدی. مادامکه بسماءینی خط قرآن ایله
 یازمقده اجماع علما واقع اولمش در. علم یقین حاصل ایتدک که
 بسماء قرآنددر.

۷ — « بین الدفتین — یعنی مصحفک ایکی جلدنی آرده سند
 نه وارسه، آنک هپسی قرآندر » دیه اجماع مسلمین واقع اولمش در.
 مادام که تسمیه دخی بین الدفتین موجوددر. آئی کلام الله دندر
 دیه اعتقاد ایتک لازم کایر. بو سببدن ناشیدر که یوقاریده حکایه
 ایتدیکنز وجهه ایله (یعنی) امام محمد بن حسنه بو یولده اراد
 ایتدیکی سؤاله امام مشارالیه جواب ویرمیوب اختیار سکوته
 مجبور اولمش در.

معلوم اولماید که « ابوبکر الرازی » نک مذهبنجه تسمیه کرچه
 قرآنددر. لکن سورۀ فاتحه دن بر آیت دکلددر. مشارالیه
 « بسماءنک تزیلندن مقصود الهی سور قرآینه نک آرده سنی فصل
 و تفریقدر » دیر ایدی. سالف الذکر ایکی دلیل ایسه مشارالیه
 ابوبکر الرازی نک قولنی ابطال ایدمز.

۸ — اکثر علما متفقدر که سورۀ فاتحه یدی آیتدر.

شو قدر که امام شافعی «رضی الله عنه» بسم الله الرحمن الرحيم،
بر آیت اولدینی کبی «صراط الذین انعمت علیهم غیر المغضوب
علیهم ولا الضالین» دخی بر آیتدر دیدی .

امام اعظم ابو حنیفه «رضی الله عنه» دخی «بسم الله» آیات
فاتحه دن دکلدر . لیکن «صراط الذین انعمت علیهم» بر آیتدر .
«غیر المغضوب علیهم ولا الضالین» ده آیت دیگر در رأینده
بولندی .

للمترجم - حضرت مفسر بورادده مذهب شافعی به نصرت
ایدرک دیرکد: «قريباً برمسأله مفردده بیان وایضاح ایده جکمز
وجه ایله حضرت امام اعظمک رأی مرجوحدر . بناءً علیه
- بسم الله الرحمن الرحيم - ی آیت تامه اعتقاد ایتمدیکمز وقت
آیات فاتحه یدی به بالغ اولماز» . صوک .

۹ - دیه بیلیرسین که فاتحه دن اول، بسمله نک قرائتی
واجبدر . بناءً علیه آیات فاتحه دن بر آیت اولسی لازم کلیر .

فاتحه دن اول، بسمله نک وجوب قرائتی شو وجه ایله ایضاح اولنور .
امام اعظم ابو حنیفه «رضی الله عنه» قرائت فاتحه نک
افضالیتی تسلیم اییدیور . مادام که بو مسلددر . مادام که نبی اکرم
صلی الله علیه وسلم افندمنک دخی بونک قرائتنه مواظبت
بیوردقلری ظاهر در . (واتبعوه) فرمان الهم یسنه امثالاً بزم
اوزرمزده قرائتی واجب اولور . بسمله نک وجوب قرائتی ثبوت
بولنجه سورة فاتحه دن اولدینی دخی تبین ایتمش اولور . زیرا
فرقه قائل اولان یوقدر .

۱۰ - خواجه کائنات صلی الله علیه وسلم افندمن (کل امر ذی بال لا یبدأ فیہ باسم الله فهو ابتر او اجذم) بیورمش در بعد الایمان اعظم اعمال ایسه صلات در . اوجہتہ فایضہ شریفہ فی نمازہ - بسم الله - سز اوقومق نمازک ابتر قالمسنی ایجاب ایتممی؟ حال بوکہ حق سبحانہ و تعالیٰ حضر تلری جناب رسالتاب افندمنک دشتنی اولان برکافری ذم معرضندہ (ان شانک هو الابتر) بیورمش اولمنی دلیلہدہ ثابتدر کہ (ابتر) لفظی کمال نقصان و خللہ دلالت ایدر . آنکچون قرائت بسملہدن خالی اولان نماز . غایت ناقصدر؛ غایت خللپذیردر دینک لازم گلزمی؟ شو خلل و نقصانی اقرار واعترافی ایدن کیسه بسملہسز قیلان نمازکده فسادینہ حکم ایلر . ایشتہ بوده دلالت ایدر کہ بسملہ فایضہ دندر؛ اوقومقده واجبدر .

۱۱ - مرویدر کہ نبی اعلم و اکرم افندمن (ما اعظم آية فی کتاب الله تعالیٰ) کلامیلہ آیات قرآنیہک الکیوکی هانکیسی اولدیغنه دائر کندینسنہ توجیه بیوردینی سؤالہ جواباً ابی بن کعب "بسم الله الرحمن الرحيم" در دیمش: رسالتپناه افندمن دخی آنک بو سوزینی تصدیق بیورمش در .

بو روایت . بسملہ شریفہک آیت تامہ اولدیغنه دلالت ایدر . حال بوکہ "انه من سليمان و انه بسم الله الرحمن الرحيم" - قول کریمندہ بسملہک آیت تامہ دکل، آیتک بعضی ایدوکی معلومدر . بناءً علیہ شوندن غیری مواضعده بسملہک آیت تامہ اولمنی لازم کلهجکی روایت مذکوردهدن استدلال اولنور . ایشتہ بوکا قائل اولانلر بسملہ، سورہ فایضہک اولنده آیت تامہدر دیدیلر .

۱۲ — معاویه، زمان سلطنتده مدینه منوره یه کلوب ناس ایله ادای ضلالت ایدرک ام القرآنی بسمله سنز اوقوی ویردی ؛ نمازی بیترنجه مهاجرین وانصار « رضوان الله تعالی علیهم اجمعین » مسجدک هر طرفدن « یا معاویه ! اونوتدکی نه یایدک ؟ هانی بسم الله الرحمن الرحیم » دیه ندا ایتدیله. بونک اوزرینه معاویه نمازی اعاده ایدرک — بسم الله الرحمن الرحیم — ی جهراً اوقومغه مجبور اولدی . ایشته بوخبر، بسمله نک قرآن وفاتحه دن اولدیغنه ده، قرائتده جهرک اولی بولندیغنه ده صحابه کزین افندیارمزک اجماع واتفاقه دلالت ایدر.

۱۳ — سائر انبیای عظام علیهم السلام اعمال خیره شروعلرنده بسم اللهک ذکريله ابتدا بیوررلردی . او جهته بزم پیغمبر دیشانز افدمز حضرتلرینه ده بو، واجب اولق لازم کلیر. حضرت رسول الله افدمز حقنده بو وجوب ثابت اولنجه، بزم حقمزده ده ثبوت بولمش اولور . وجوب مذکور، بزم حقمزده ثابت اولدقن صکرده بسمله نک آیات فاتحه دن برآیت اولدینی تیین ایدر .

مقدمه اولانک اثباتنه کلنجه :

بونک دلیلی شودرکه : نوح نبی علیه السلام کمی یه بینه جکی صروده (ارکبوا فیها بسم الله مجراها ومرتاسها) دیدی . سلیمان نبی علیه السلام بلقیسه کوندردیکی نامه نک عنواننده — بسم الله الرحمن الرحیم — یازدی .
دیرلر سه که :

« انه من سليمان وانه بسم الله الرحمن الرحيم » قول كرمی
حضرت سلیمانك كندی ناهنی نام پاك خدايه تقدیم ایتمش اولدیغنه
دلالت ایتزمی ؟
دیرزكه :

معاذالله ! هیچ اوینه شی اولورمی ؟

یا نصلدر ؟

هدهد نامه بر، مکتوب جناب سلیمانی کتیروب صدر ضفۀ
صفای بلقیس اوزرینه قودی. حال بوکه قصر دلارای بلقیس
از هر جهت عساکر مستحفظه ایله محروس اولوب خارجدن
درون قصره رخصتسز فرجه یاب دخول اولمق ممکن دکل ایدی.
نام وصیت سلیمان ایسه اولجه واصل سامعۀ بلقیس اولمشدی.
بناءً علیه هدهدنامه بری دیوارده، نامه یی ده صدر عزت ووقارده
کورنجه، « محقق بونامه سلیماندر. » مآلنده اوله رق کنیدیلکندن
(انه من سلیمان) - نامه یی آچوبده عنواننده کی بسمله یی کوردیکی
آنده دخی (وانه بسم الله الرحمن الرحيم) دیدی .

ایشته شوایضاحات ایله تبیین ایتدی که، انبیای عظام علیهم السلام
هر نه زمان برعمل خیره شروع ایتمشلر ایسه « ذکر بسم الله
الرحمن الرحيم » ایله ابتدا بیورمشلدر.
مقدمۀ ثانیه نك صورت ثبوتنه کلنجه :

مادام که سائر انبیای عظامك اعمال خیریهیه شروعلرنده
بسمله کش ابتدا اولدقلری تبیین ایتمش در . مادام که جناب حق
قرآن کریمده بیغمبر ذیشانمز افندمز (اولئك الذین هداهم الله

فبهدهام اقتده) بیورمش در. هر عمل خیرده بسمله شریفه ایله
ابتدا ایتمک هم نبی محترمز افسندمزه، هم ده (واتبعوه) فرمان
آلهیسنه مبنی بزه واجب اولمق و بسمله نک بووجه ایله وجوب
قرائتی ثابت اولنجه بسمله آیات فاتحه دن بر آیت صائلق لازم کلیر.
چونکه خرقی وار دین یوقدر.

۱۴ — الله تعالانک وارلغی سائر موجوداتک وارلغنه
مقدمدر. چونکه جناب الله، قدیمدر؛ خالقدر. ماسوی الله
محدثدر؛ مخلوقدر. قدیم اولان خالق ایسه، محدث اولان مخلوق
سابق اولسی طبیعی در. مادام که خالق تعالی حضرتلرینک سائر
موجوداتی سابق اولدینی ثابتدر. مناسبت عقلیه ایله حکم اولنور که
آنک ذکریده غیرینک ذکرینی سابق اولمق لازم کلیر. ذکرده کی
شو سبق ایسه، آحق — بسم الله الرحمن الرحیم — ک سائر
اذکار وقرآت اوزرینه سابق اولسیله حاصل اولور. مادام که بو
سبق و تقدیمی عقول ناس، استخسان ایدیور. مادام که حضرت
پیغمبر (مارأه المؤمنون حسناً فهو عند الله حسن) بیوریور.
عندالشرع دخی معتبر اولمق لازم کلیر. بسمله نک وجوب قرائتی
ثابت اولنجه فاتحه دن بر آیت اولدینی دخی ثبوت بولور. چونکه
فرقی وار دین یوقدر.

۱۵ — مادام که «سورة النمل» ده — بسم الله الرحمن
الرحیم — ک قرآندن اولدینی شکسزدر. مادام که بسمله نک مصاحفده
خط قرآن ایله مکرراً کتوب اولدیغنی کوریور. بسمله نک
قرآندن اولسی لازم کلیر.

نصل که - فبأی آلاء ربکما تکذبان - ویل المکذبین -
 قولارینک قرآنده خط واحد ایله، صورت واحده مکتوب
 اولدقلرینی کوردیکمزدن بونلرک کافه سی قرآندندر دیه حکم ایدرز.
 ۱۶ - مرویدرکه رسول اکرم صلی الله علیه وسلم افندمن
 اوائل نبوتلرنده رسم قریش اوزره - باسمک اللهم - یازدیرلردی.
 صکره (ارکبوا فیها بسم الله مجراها ومرساها) آیت جلیله سی
 نازل اولنج - بسم الله - یازمغه باشلادیلر . متعاقباً (قل ادعوا
 الله اودعوا الرحمن) نازل اولمغه - بسم الله الرحمن - یازدیلر.
 (انه من سلیمان وانه بسم الله الرحمن الرحیم) آیت جلیله سی نازل
 اولدقدن صکره دخی - بسم الله الرحمن الرحیم - یازمغه مداومت
 بیوردیلر .

وجه استدلال - مادام که شو کلمه نک - یعنی بسمله نک بشقه
 بشقه هر جزئی ده، هیئت مجموعه سی ده قرآندندر . مادام که بو کلمه
 قرآنده ثابت اولمش در . بونک قرآندن اولدیغنه جزم و یقین حاصل
 اولمق لازم کلیر . چونکه شو موجبات کثیره نک، شو شهرتک
 وجودیله برابر بسمله نک قرآندن اخراجی جائز اولسیدی، بونک
 کبی سائر آیتلرکده اخراجی جواز داده عقلا اولمق لازم کلیردی.
 بو ایسه حق قرآنده طعنی موجیدر .

الترجم - حضرت مفسر مذهب شافعی بی تأییداً بروجه بالا
 ایراد ایلدیکی دلائلک اون یدنجیسنده ده «تواترله ثابت اولمشدرکه
 جناب حق بو کلمه بی - یعنی بسمله بی حضرت محمد علیه السلام
 افندمنه مکرراً انزال و بونک خط مصحف ایله یازلمسنی امر

بیورمش در «دیدکن و بو بایده ده» بعض سوزلر سویلدکن صکره مخالف مذهبی اولان ائمه حنفیه نك وجه احتجاجلرینی ده بروجه آتی بیان ایتمش در .

دلائل حنفیه

اولکیسی — ابوهریره نك روایت ایتدیکی خبر صحیح در .
 نبی الرحمة افندمن (يقول الله قسمت الصلاة بيني وبين عبدی نصفین فاذا قال — الحمد لله رب العالمین — يقول الله تعالى «حمدنی عبدی» و اذا قال — الرحمن الرحیم — يقول الله تعالى «مجدنی عبدی» و اذا قال — اياك نعبد و اياك نستعین — يقول الله تعالى هذا بيني وبين عبدی نصفین) بیورمش در .
 ایسته بسمله، فاتحه دن بر آیت اولمادیغنه شو خبر صحیح ایله ایکی وجه ایله استدلال اولنور .

۱ — حضرت پیغمبر بو حدیث شریفده بسمله یی ذکر ایتدی . اگر بسمله دخی فاتحه دن بر آیت اولسیدی، آتی ده ذکر ایدردی .

۲ — رسالتاب افندمن (جعلت الصلاة بيني وبين عبدی نصفین) بیوردی . صلاتدن ده مراد، فاتحه در . شو تنصیف ایسه آنجق بسمله، فاتحه دن بر آیت دکلدر دیدیکمز وقت حاصل اولور . زیرا فاتحه یدی آتدر . بناءً علیه آیات مذکوره نك — الحمد لله — دن — اياك نعبد — یه قدر اوچ بوچنی خدانك و — اياك نستعین — قولندن آخر سوریه دکن دیگر اوچ بوچنی عبدك در .

حال بود که بسمله آیات فاتحه‌دن عد ایدیلنجه تنصیف مذکور باطل اولور .

ایکنجیمی - عایشه صدیقه « رضی الله عنها » روایت ایتمشدرکه « نبی اکرم افندمن حضرتلری نمازی تکبیر ایله - و - الحمد لله رب العالمین - ی قرائله افتتاح بیوررلردی » ایشته بوروایت صحیحه دخی دلالت ایدرکه بسمله فاتحه‌دن بر آیت دکلدر .

۳ - اگر - بسم الله الرحمن الرحيم - بو سورده‌دن بر آیت اولسیدی، فاتحه‌ده واقع اولان - الرحمن الرحيم - مکرر اولوق لازم کلیردی . بو ایسه دلیل ایله ثابت اولانک خلافی در . ایشته حضرت مفسر دلائل حنفیه‌ی بویله‌جه بیان ایلدکن صکره بروجه آتی جوابه تصدی ایدیور . دییورکه :

حجت اولایه بر قاق وجه ایله جواب ویریلیر .
وجه اول - بالاده نقل و بیان ایتمشدرکه، شیخ ابو اسحاق نعابی، کندی اسنادیله حدیث مذکوری شویله روایت ایتمشدر . دیمشکه :

« حضرت فخر کائنات افندمن سوزه باشلاینجه - بسم الله الرحمن الرحيم - ی فاتحه‌دن بر آیت تامه عدوشمار بیورمشاردر . »
مادامکه شو ایکی روایت، تعارض ایتمشدر . بزمکی [*]
مر جحدر . زیرا روایت اثبات، روایت نص اوزرینه مقدمدر .
وجه ثانی - ابو داود السخیتانی، نخعی دن، مالکدن، علاء [*] شافعیلرک روایتی .

بن عبد الرحماندن، اوده پدرندن، پدری ده ابوهریر بدن روایت
ایتمش در که حضرت نبی محترم صلی الله علیه وسلم افندمن (واذا
قال العبد - مالك يوم الدين - يقول الله تعالى «مجدّنی عبدی
وهو بینی و بین عبدی» بیورمش در .

بوراسی نکاشته صحیفه ایقانک اولنجه دیرز که :

«مالك يوم الدين» قول شریفنده - هذا بینی و بین عبدی
- بیورمادی؟ ایشته «مالك يوم الدين» قول شریفی قسمته
مشترکدر دیمک اولوب بو آیتک بینهماده تقسیی ده آنجق ماقبلنده
اوج، مابعدنده اوج آیت حاصل اولدینی وقت قابل اوله بیلیر.
«مالك يوم الدين» آیتدن اول، اوج آیت جلیله نک حصولی ایسه
آنجق بسمله ی فاحه دن بر آیت صایمقله ممکن اوله بیلیر. بو حالده
خبر مذکور شو وجهدن طولای بزم [*] لهمزه حجت اولور.
وجه ثالث - نصف، لفظی عدد آیاتده نصفه محتمل اولدینی
کبی، بونک معناده ده نصفه احتمالی واردر. اعلم الانبیاء افندمن
(الفرائض نصف العلم) بیورمش در . چونکه موت ایله حیات
ایکی قسمدر . فن فرائض دخی احوال امواتدن باخندر . ایشته
شوسبیدن ناشی فرائض، نصف ایله تسمیه بیورلمش در .

شریح، (اصحیح و نصف الناس علی غضبان) دیمش در .
کندیسندن ناسک بعضیلری خشنود، بعضیلری ناخشنود اولدقلری
جهتله کندیسندن ناخشنود اولانلری نصف تسمیه ایتمش در .

[*] شافعیلرک .

وجه رابع - بسم الله الرحمن الرحيم - ك فاتحه دن بر آیت اولدینی حقنهدکی دلائلنر بک صریحدر .

ائمه حنفیه نك متمسك اولدقلری شو خبردن مقصود ایسه - بسم الله الرحمن الرحيم - فاتحه دنمی دکلمی ؟ بونك بیانی دکلدر . شی آخردر . بناء علیه بزم [*] دلائلنر آنلرک دلائلنه نسبتله دها قوی دها ظاهردر .

وجه خامس - بزم قولنر احتیاطه دها قریبدر .

* *

ائمه حنفیه نك حجت ثانیه سنه دنخی امام شافعیك ویردیکی شو جواب کافیدر .

امام مشارالیه دیمشکه :

« حضرت عایشه جائزکه - الحمد لله رب العالمین - ی بوسوره شریفه نك اسمی عد ایش اوله ! نصل که (فلان کیمسه - الحمد لله الذی خلق السموات - ی او قودی) دینرده مراد ، شو قول کریم ایله مفتوح اولان سورده ی او قودی دیمک اولور . ایشته حضرت عایشه نك قولندن ده مراد بو اولسه کرکدر . »

جوابك تمامی جناب انسدن مروی اولمق اوزره آتی ده نقل ایده جکمز خبردن مستبان اولور .

حنفیه نك حجت ثالثه سنه ده شو وجه ایله جواب ویرایلر . دینیلیرکه :

الرحمن الرحيم - ك تکراری تأکید ایچوندر . لاجل التأکید

[*] شافعیلرک .

تکرار ایسه قرآنده پک چوقدر . الله تعالانک رحمان ورحیم
اولدیغنی تأکید دخی اعظم امور مهمه دندر . «والله اعلم»

یدنجی مسأله

سورة فاتحه نك عدد آياتی بیانندهدر

بعض روایات شاذهده کوردم که: حسن بصری «رحمه الله»
سورة فاتحه سکر آیتدر دیر ایش!

فاما اکثر علمانک همزبان وفاق اولدیغی روایت مشهورهیه
کورده سورة فاتحه یدی آیتدر . (ولقد آتيناك سبعاً من المثاني)
آیت جلیله سنی ده بو وجه ایله تفسیر ایتمشلردر .

بسم الله الرحمن الرحيم — ك فاتحه دن بر آیت اولدیغنه قائل
اولانلر — صراط الذين انعمت عليهم غیر المغضوب علیهم ولا
الضالین — تام بر آیتدر دیدیلر .

اما امام اعظم ابوحنیفه «رضی الله عنه» بسمایه سورة
فاتحه دن اسقاط ایتدیکی ایچون — صراط الذين انعمت عليهم —
بر آیتدر . (غیرالمغضوب علیهم ولاالضالین) دخی آیت دیکردر
یدی .

بز [*] دیرزکه :

امام شافعی نك قولى اولی اولدیغنه وجوه آتیه دلالت ایدر .
۱ — صراط الذين انعمت عليهم — قول کریم نك مقطعی

[*] شافعیلر .

آیات متقدمه نك مقطعلارینه مشابه دكلدر . مقطعلارده تشابه رعایت ایه لازمدر . زیرا بز مقاطع وفواصل قرآنی ایکی قسمه منحصر کوریورز . بر قسمی یکدیگرینه متقاربدر . او بر قسمی متشاکل ومتشابهدر . (ق) سورهنده کی آیات بیناتک مقطعلاری متقارب ، (ص) سورهنده کیلرده متشاکل قسمنددرلر .

« انعمت علیهم » قول کریمی ایه هر ایکی قسمندن ده دكلدر . بناءً علیه بو قول کریمی مقاطع آیادن عد ایتک متمتعدر .

۲ — غیر المغضوب علیهم — قولنی آیتک ابتداسی فرض وتقدير ایتدی کمز حالده (غیر) لفظنی اول آیت ، اعتبار ایتش اوله جغز . بولفظ ایه یاماقبانتک (صفقی) یاخود ماقبلندن (استثنا) اولمق لازم کلوب حال بوکه صفت ایه موصوف ، استثنا ایه مستثنی منه ، شیء واحد کی درلر . بینهمایه فصلک ایقاعی ایه دلیلک خلافه در . اما — صراط الذین انعمت علیهم — ی الی آخر السوره آیت واحده اعتبار ایلرایسه ک ، اول حالده موصوف ایه صفقی ، استثنا ایه مستثنی منه کلام واحد و آیت واحده حکمنه قویمش اولورز که دایله اقرب اولان صورت دخی بودر .

۳ — مبدل ، محذوف حکمنده در . آیت کریمه دخی —

اهدنا صراط الذین انعمت علیهم — تقدیر نده در . لیکن مظهر انعام خدا اولانارک یولنه اهدائی طلب آنحق مظهر انعام اوله جق کیسه ، نه مغضوب علیه ، ونه ده ضال و کمره اولماق شرط لیه جائز اوله بیلیر . اگر بو شرطی اسقاط ایدرسه ک ، او یوله طلب اهدا جائز اولماز . بو عدم جوازده — الم ترالی الذین بدلوا

نعمة الله كفوراً — آیت جلیله سی برهان باهر در . زیرا شو آیت کریمه اول کیمسه لک مظهر انعام خدا اولدقلربنه کرچه دلالت ایدر . آجق آنلر سوء صنیع لرندن ناشی غضب الهی یه اوغرامش کمراد اولمش اولدقلری جهته شبهه یوقدرکه آنلره اقتدا ایله طلب اهتدا جائز اولماز .

ایشته تبین ایتدی که — صراط الذین انعمت علیهم غیر المغضوب علیهم ولا الضالین — ک مجموعی کلام واحد اولغله — صراط الذین انعمت علیهم — قولی — غیر المغضوب علیهم — قولندن فصل ایتک جائز اوله ماز . بناءً علیه بونک مجموعی آیت واحده در دیمک لازم کلیر .

اگر « الحمد لله رب العالمین — آیت واحده — الرحمن الرحیم — دخی آیت ثانیه دکلیدر ؟ حال بوکه بو آیت بنفسها مستقل بر آیت دکل ، ماقبلنه متعلق و مربوطدر » دیر لرسه ، شو وجه ایله مقابله ایدر زکه : بونده فرق واردر . شویله که : — الحمد لله رب العالمین — قولی — الرحمن الرحیم — سز دخی کلام تامدر . دیمک اولدی که مجرد — الحمد لله رب العالمین — ک آیت تامه اولمسی ممتنع دکلدر . حال بوکه یوقاریده بیان ایتدیکمز وجه ایله مجرد — اهدنا الصراط المستقیم صراط الذین انعمت علیهم — قولی کلام تام دکلدر . زیرا — غیر المغضوب علیهم ولا الضالین — قولی آکا منضم اولمادقجه — اهدنا الصراط المستقیم صراط الذین انعمت علیهم — قول کریمک معناسی صحیح اولماز . ایشه بینهماده کی فرق ظاهر اولدی .

سکرنجی مسأله

بسم الله الرحمن الرحيم — سور سائرہ نك ده اوائلندن برر
آیتدر دکلیدر؟

اصحاب شافعیدن بعضیلری امام شافعی نك بو بابده مختلف ایکی
قوانی ذکر ایتشلر ایسه ده آنلرک محققلری بسم اللهک سور
سائرہ نك ده قرآن اولدیغنه بالاتفاق حضرت امام شافعیدن منقول
اولان قولینی شو وجه ایله توجیه و تقدیره همزبان وفاق اولشلر
دیمشلرکه :

« فاتحه دن ماعدا هر سورہ نك اولندکی بسمله ده آیت تامه میدر؟
یوقسه او بسمله مابعد لریله می برابر آیت تامه اولیورلر؟ ایشته
حضرت امامک قولینی بونلردر. »

ائمة حنفیه دن بعضیلری دیدیلرکه : امام شافعی بو مسأله ده
اجماعه مخالفت ایتمش در. زیرا آدن اول — بسم الله — سور
سائرہ نك اوائلندن بر آیتدر دیین اولماش در. »

شافعیلرک بو بابده سرد ایتدکلری دلیل شودرکه :
« بسم الله — اوائل سورده خط قرآن ایله مکتوب اولدیغندن
قرآدن معدود اولمق لازم کلیر. »

حنفیلر، ابو هریره نك روایت ایتدیکی حدیث شریف ایله
احتجاج ایدوب دیمشلرکه :

نبی اکرم صلی الله علیه وسلم افندمن حضرتلری سورہ

المائڪ اوتوز، سورة الكوثر ك اوج آيت كريمه يي مشتمل اولديغنى بيان بيوردقلىرى كې علمائى كرام دىخى عدد مذكور ك تسميه سز حاصل اولديغنه اتفاق ايتمشلردر. بناء عليه تسميه نك بوسور دلردن بر آيت اولماسى لازم كلير .

شافغيلر، بو احتجاجه شو وجه ايله جواب ويرمشلردر .
ديمشلر كه :

— بسم الله الرحمن الرحيم — مابعديله برابر بر آيتدر ديرهك، شو اشكال زائل اولور .

اكر حفيلىر، « ماذام كه بسمكه نك اول فاتحه دن بر آيت تامه اولديغنى معترف اولديكر ! سور سائر ددن آيتك بعضى ايدوكنى نصل ادعا ايدوبيليرسكز ؟ » يولنده اعتراض ايدرلر سه، جواباً ديرهكه :

بسمكه نك اول فاتحه ده آيت تامه، اوائل سور سائر دده بعض آيت اولسى امر بعيد دكلدر . كورمز ميسين كه سورة فاتحه ده — الحمد لله رب العالمين — قول كريمى آيت تامه ايكن صكره ديكر سورده — و آخر دعواهم ان الحمد لله رب العالمين — قول كريمك مجموعى بر آيت اولق اوزره وارد اولمشدر .
ايسته اول فاتحه ده كى بسمكه ايله اوائل سور سائر دده كى بسمكه لر دىخى بويله اوله بيلير .

سورة الكوثر ك اوج آيت اولديغنى نياندن ده مقصود، « ماهو خاصية هذه السورة ثلاث آيات » ديمكدر .
تسميه كلنجه : بو، جميع سورده مشترك فيه بر شى كېدر .

ایشته ایضاحات مبسوطه ایله شو سوال دخی حکمدن ساقط
اولور .

طقوزنجی مسأله

مرئیدرکه، امام احمد بن حنبل (رضی الله عنه) «تسمیه، فاتحه دن بر آیتدر . شوقدرکه هر رکعتده سرأ او قونمایددر .»
دیمشدر . امام شافعی، رضی الله عنه «تسمیه، فاتحه دن بر آیتدر . جهراً او قونمایددر .» رأینده بولنمشدر . امام اعظم ابوحنیفه، رضی الله عنه «تسمیه، فاتحه دن بر آیت دکلددر . شوقدرکه هر رکعتده سرأ او قونمایددر .» بیورمشدر .

المترجم - حضرت مفسر، «بسملة نك هر رکعتده جهراً او قونمشی سنتدر .» دیهرک بورادده بر چوق حجج و براهین ایرادیه مدعاسی تنویر ایتمشدر . حجج و براهین مذکوره ایسه بزم اصول مذهبيه مزك خلافتی اثبات ایچون سرد و ایراد ایدلمش اولدیغندن ترجمه سندن صرف نظر اولنمشدر . یالکز حضرت مفسرک بو بابه جالب نظاردقت اولان براییکی سوزی بروجه آتی نقل اولنور .

عليه الصلاة والسلام افندمن (طوبی لمن مات ولسانه رطب من ذکر الله) بیورمشدر . نه . و طأو او کیمیه که ذکر الله ایله ترزبان اولدینی حالدده آخرته منتقل اوله، دیمکدر .

علی بن ابی طالب علیه السلام (یا من ذکره شرف للذاکریں)
 بیورلردی. بوسیدن ناشی منقولدرکه حضرت علی رضی الله
 عنه انهم ذموا جميع صلواته - بسم الله الرحمن الرحيم - ی
 جهرأ او قومق مذهب پاکری اقتضاسندن ایدی.
 حضرت مفسر بوراده شو وجه ايله اداره کلام ایدیور.
 دیورکه:

« بنجه بوحجت يك قوی در. عتمده اویله اساسکیر رسوخ
 واستقرار اولمش درکه مخالف مذهب اولانلرک سوزلریله اصلا
 زائل اولماز. »

بعدازین امام شافعی حضر تلرندن ده شونی روایت ایتمش در.
 دیمش درکه:

امام شافعی کندی اسنادیله روایت ایتدی که: معاویه، زمان
 سلطنتده مدینه منورهیه قدمنه مواصلت اوله رق جماعت مسلمین
 ايله نماز قیلدی. بسم الله الرحمن الرحيم - ی او قومدی. رکوع
 و سجوده واردیفندهده تکبیر کتیرمدی. بناءً علیه نمازی بیتروب
 سلام ویرنجه، مسجد شریفده حاضر بولنان مهاجرین و انصار
 « یا معاویه سرق من الصلاة این بسم الله الرحمن الرحيم این
 التكبير عند الركوع والسجود » ندالریله ولوله انداز مسامع صغار
 وکبار اولدیلر. بونک اوزرینه معاویه، تسمیه و تکبیر ايله اعاده
 صلاته مجبور اولدی.

امام شافعی دیمشدرکه:

معاویه، عظیم القوه شدید الشوکه بر سلطان قاهر ایدی.

اگر تسبیحه، مهاجرین و انصار درن بالجمله انتخاب اختیار عندند بر امر مقرر کبی اولمسیدی، ترك تسبیحه سببیه مشارالیه معاوییه قارشی بویه اظهار انکاره مقتدر اوله مازلردی.

*
* *

بوندن ضکرده حضرت مفسر «احتج المخالف بوجوه و حجج» دیهرك مخالف مذهبی اولانلرك دیگر بعض دلالتی بوجه آتی بیان و ایراد ایتمش در.

حجت اولی

امام بخاری کندی اسنادیه روایت ایتمشدرکه «حضرت انس بن رسول الله صلی الله علیه و سلم افندمرك، ابو بكر، عمر، عثمانك خلف سعادتلرنده نماز قیلدم. جمله سی قرائتی - الحمد لله رب العالمین - ایله استفتاح بیوررلردی» دیمشدر. امام مسلم دخی بو خبری، صحیحند روایت ایتمش و آنده فضله اوله رق «انهم لا یذکرون بسم الله الرحمن الرحیم» قولی مندرج بولنمشدر. دیگر روایتده «لم اسمع احداً منهم قال بسم الله الرحمن الرحیم» دیمشدر. رابعه نك روایتده «فلم یجهر احد منهم بسم الله الرحمن الرحیم» دیه نقل اولنمشدر.

حجت ثانیه

عبدالله بن مغفلك روایت ایتدیکی خبردر. مشارالیه دیمشدرکه پدرم نمازده - بسم الله الرحمن الرحیم - ی

او قود یغمی ایشتمدی . بکا دیدی که «ایاک و الحذر فی الاسلام
فقد صلیت خلف رسول الله صلی الله علیه وسلم وخلف ابی بکر
وخلف عمر وعثمان فابتدؤا القراءة بالحمد لله رب العالمین فاذا
صلیت فقل الحمد لله رب العالمین»

ایشته شو عبارة عربیه ناطق اولدینی اوزره پدر عبد الله
پسر حقایق پرورینی امر دین ده بدعتدن تحذیر ایدرک «بن
رسول الله افندمک، ابوبکرک، عمرک، عثمانک خلف سعادت لرنده
نماز قیلحق شرفنه نائل اولانلردنم . مشار الیهکم کافه سی ایسه
نمازده قرائته — الحمد لله رب العالمین — ایله بدأ بیوررلردی .
بناءً علیه سن ده نماز قیلدیغک وقت — الحمد لله رب العالمین — ایله
استفتاح ایتلیسین» مآئنده ایفای نصح وپند ایتمش در .

للمترجم — حضرت مفسر بونده ده مذهب شافعی بی التزاماً
بروجه آتی اداره مقال ایتمش در .

«کوریورسکیز که کرک حضرت انس، وکرک ابن مغفل —
بسم الله الرحمن الرحیم — ک عدم ذکرینی خلفای ثلاثیه تخصیص
ایدوب جناب علی المرتضایی قاله آلامش لدر . ایشته بوده دلالت
ایدرکه حضرت علی — بسم الله الرحمن الرحیم — ی جهرأ
او قوم مقده اولدقلرنده راوی باریک جمله سی متحد القول اتفاق ایمش ل»

حجت ثانیه

خفیه نک او چنجی حجت لری ده «ادعوا ربکم تضرعاً وخیفهً
— واذکر ربک فی نفسک تضرعاً وخیفهً» آیت لری اولوب دیرلر که:

بسم الله الرحمن الرحيم - دخی ذکر اللهدر . بناءً عليه بونك ده
اخفاسی لازم کلیر .

*
* *

لمترجم - حضرت مفسر استدالات حنفیه ایلیشهرك دیركه:
حضرت انسدن مروی اولان خبره برقاچ وجه ایله جواب
ویريله بیلیر:

۱ - الشيخ ابو حامد الاسفرائینی دیمش دركه:

حضرت انسدن بو بابده آتی روایت، مروی اولدینی حالده
ائمه حنفیه مشار الیهدن یالکز اوچ روایت نقل ایتمشلردر .
بو روایات ثلاثه نك اولکیسی - « رسول الله افندمرك، ابو
بكر، عمر، عثمانك خلف سعادتلر نده نماز قیلدم . مشار الیهكم
كافه سی نمازی - الحمد لله رب العالمین - ایله افتتاح بیوررلردی »
قولیدر . ایکنجیسی - « مشار الیهم - بسم الله الرحمن الرحيم - ی
ذكر ایتزلردی » قولیدر . اوچینجیسی - « بسم الله الرحمن الرحيم
- دیدیکنی مشار الیهكم برندن ایستمدم » قولیدر .

ایشته قول حنفیه یی بو اوچ روایت کرچه تقویه ایدیورسه ده
دیگر اوچ روایت دخی نقض ایلر .

ناقض اولان روایات ثلاثه نك اولکیسی - حضرت انسدن
مروی اولدیغنی بیان ایتدیكمز شو خبردركه معاویه، نمازده -
بسم الله الرحمن الرحيم - ی ترك ایدنجه مهاجرین و انصار
طرفندن کوردیکی معامله رد وانکاردر . بو خبری بیان ایتدیكمز
صرده شوراسنی ده علاوه کفتار ایتشدك که مهاجرین و انصار

حضراتنك بو انكارلری نمازده بسمله شریفه نك جهراً قرائتی
بینارنده امر متواتر کی اولدیغنه دلالت ایدر .

۲ — ابو قلابه، حضرت انسدن روایت ایتشدرکه کرک
رسول الله صلی الله علیه وسلم افندمز و کرک ابوبکر و عمر رضی
الله عنهما — بسم الله الرحمن الرحیم — ی جهراً او قورلردی .

۳ — بسم الله الرحمن الرحیم — ك جهراً و اسرارندن
استفسار ایدنلره جناب انس « بو مسأله بی بیلیورم » جوابی
ویرمش اولدیغی ده منقولدر . بناءً علیه بو مسأله ده جناب انسدن
ایدیلن روایتلر مضطرب و متعارض بر حالده اولوب همه حال
دلایل سائرده مراجعت لازم کلیر .

شو تعارضدن بشقه، روایت واقعه ده بر تهمت دیکرده
وارددر . شویله که : امام علی افندمز، جهر بسم الله ده مبالغه
بیورلردی . وقتا که دولت و سلطنت بنی امیه و اصل اولدی .
آمار مقدسه حضرت امامی ابطال، قصدیه رجال بنی امیه جهردن
منعده مبالغه ایلدیلر . بو جهته جائز که، جناب انس، امویلردن
قورقدیغی ایچون مسأله مجوٹ عنهاده اقوالی بویله مضطرب اولمش در .
بز ایسه — هر نه قدر بعض شیده شك ایده بیلیر ایسه که
— شونده اصلاً شك و اشتباه ایده میرکه، انس بن مالک، ابن
مغفلک سوزلریله، طول عمر نده بسمله یی جهراً قرائت بیوردقلری
مثبت اولان حضرت امام علینك قول شریفی بیننده تعارض واقع
اولنج، قول صادق حضرت امام ایله عمل ایتک البته اولادر .
ایشته مسأله مجوٹ عنهاده بو بر جواب قاطع التزاعدر .

لیترجم۔ حضرت مفسر، یوقدرلده قناعت ایتیموب سوزی
تا راویلرک حال و شانلرینه وارنجه ایلری کوتوردک دیمشدرکه:
«سزک راویلرک انس ایله ابن مغفلدر. بزم قولمزک راویلری ده
علی بن ابی طالب علیه السلام ایله ابن عباس، ابن عمر، ابو
هریره کبی اجله اصحابدر. اجله مشارالیه مک ایسه کرک علم
وفضیلتلری و کرک حضرت رسول الله «صلی الله علیه وسلم»
مقارنتلری انس ایله ابن مغفلدن زیاده ایدی. همده بالضروره
معلوم اولان اموردندرکه حضرت نبی اکرم صلی الله علیه وسلم
افندمن دایما اکبری اصغرده، علمایی غیر علمایه، اشرافی اعرابه،
تقدیم بیوردرلردی. امام علینک، ابن عباسک، ابن عمرک ایسه
شبهه یوقدرکه علمده، شرفده، علو درجدهد حاللری انسدن، ابن
مغفلدن چوق عالی ایدی. ظنه غالب اولان دخی بودرکه مسجد
شریفده حضرت علی، ابن عباس، ابن عمر رسول الله افندمنده
دهاقرب، انس ایله ابن مغفل بالنسبه دهاوزاق یرده طوردرلردی.
آنک ایچون احتمال که بونار حضرت پیغمبر افندمنک بسلمهینی جهراً
قرائت بیوردقلرینی ایشتماش اولسونلر! شوراسی ده وارکه۔
ولا تجهر بصلاتک ولا تخافت بها۔ امر الهمیسنه امثالاً رسالتاب
افندمن حضر تلری جائزکه جهرده مبالغه بیورمازلردی. کذلک
انسان، قرائت قرآنه شروع ایدنجه ابتدا صوت ضعیف ایله باشلار.
آدن صکره آناً فاناً سنی یوکسلدیر. ایشته رسول الله افندمنک
بسلمهینی جهراً قرائت بیوردقلرینی حضرت علینک، ابن عباسک،
ابن عمرک، ابوهریردنک ایشیده بیلمسنه؛ انسک، ابن مغفلک

ایشیده ما، سنه شو احوال معروضه بر سبب ظاهری اوله بیلیر.
امام شافعی دیمشدرکه:

« رسول الله افندمن نمازی - الحمد لله رب العالمین - ايله
استفتاح بیورلردی » دیمسندن جناب انسک مرادی، جائزکه
قرائتده بو سورة شریفه یی، سورة دیگره تقدیم ایدرلردی دیمک
اولسون. بوضورتده جائزکه - الحمد لله رب العالمین - ايله مرادی،
سورده نك تمامیدرده راویء مشارالیه بولفظه یی اسم سورة مقامنده
استعمال بیورمش اولسون.

برده حدیث ابن مغفله عدم جهردن مراد، رفع صوتده
عدم مبالغه اولمق محتملدر. تهکیم (ولا تجهر بصلاتک ولا تخافت
بها) آیت جلیله سنده رفع صوتدن منع بیورلمشدر.

برده جهر - کیفیت ثبوتیه، اخفا - کیفیت عدمیه در.
روایت مثبته ایسه، روایت نافیهدن اولادر. باخصوص دلائل
عقلیه دخی بزم [۰] قولزده موافق، و عمل امام علی بزم عملزده
مطابق اولوب حضرت علی یی ایسه هر کیم دیننده امام اتخاذ
ایلرسه، دیننده ده، نفسندده عروء وثقایه تمسک ایتمش اولور.
(واذکر ربک فی نفسک تضرعاً وخیفَةً) آیت کریمه سیله
ایدیان تمسکه کلنجه: بوکاده شو جوابمز واردر.

بز بو آیت جلیله یی مجرد ذکره حمل ایلرز. - بسم الله
الرحمن الرحیم - ایسه، مجرد ذکر اولیوب بوندن مراد علی سبیل
العباده کلام الهی قرائتدر. بناء علیه بونده جهر، اخفادن اولادر.

[۰] شافعیلر.

اوننجی مسأله

تفاریع تسمیه

بونده بر قاچ فرع واردر.

فرع اول - شیعه دیمشدرکه: کرک صلات جهریهده، وکرک صلات سریهده اسملهی جهراً او قومق سنتدر. جمهور فقها ایسه بو باده شیعهیه مخالفدر.

فرع ثانی - تسمیه اوائل سوردن بر آیت دکدر دینلر تسمیه نک مصحفده هر سورده نک اولنده سبب اتیاننده اختلاف ایتشلدر. بو بحثدهده ایکی قول واردر.
قول اول - تسمیه، قرآندن دکدر.

بو قولی التزام ایدنلر دخی ایکی فرقه اولوب بر فرقه سی « تسمیه، مصحفده مجرد بین السور فصل ایچون یازلمش در. بو فصل ایسه شمعی معلوم اولدیغندن تسمیه یی اثباته بیله حاجت یوقدر. بناء علیه تسمیه نک مصاحف شریفهده یازلماسی ده جائزدر » دیدیلر. دیگر فرقه سی ده « تسمیه نک مصاحف شریفهده اثباتی، واجب ولازمدر. ترکی ابدأ جائز دکدر » دیدیلر.

قول ثانی - تسمیه قرآنددر. آتی جناب حق انزال بیورمش در. کرچه آیت مستقله در. لکن سورده دن بر آیت دکدر. بو قولی التزام ایدنلرده كذلك ایکی فرقه اولوب بر فرقه سی « جناب حق تسمیه یی هر سورده نک اولنده علی حیده انزال

بیورردی « دیدی . دیگر فرقه سی » خیر! هر سورده نك اولنده
 على حدة ازال بیورلماش در . يالکز بر کره نازل اولمش؛ فقط
 هر سورده نك اولنده اثبات اولنمسی ده ینه طرف آلهمیدن امر
 بیورلماش در « دیدی .

بسمله نك طرف آلهمیدن منزل اولدیغنه وقرآندن ایدوکنه
 دلالت ایدن خبر، ام سلمه دن مروی اولان خبردرکه نبی اکرم
 صلی الله علیه وسلم اقدمز — بسم الله الرحمن الرحيم — ی
 آیت فاصله عد بیورلردی .

ابراهیم بن یزیددن مرویدر؛ دیمش که:

« فضل رقاشی — بسم الله الرحمن الرحيم — ك قرآندن
 اولمادیغنی عمرو بن دیناره سویلدم . دیدی که — سبحان الله بو آدم
 نه ده جری کیسه ایمش؟ ! بن سعید بن جبیری ایشتم، دیورددی که
 ابن عباسی ایشتم « نبی محترم صلی الله علیه وسلم اقدمز — بسم
 الله الرحمن الرحيم — نازل اولدقچه سورده نك ختام بولوب سورده
 دیگره باشلاندیغنی آندن بیلیردی « دیر ایدی .

عبد الله بن مبارکدن مرویدر که — بسم الله الرحمن الرحيم
 — ی ترك ایدن کیسه، محقق اوله رق یوز اون اوچ آیت ترك
 ایش اولور .

ابن عمر ایله ابوهریره دن ده بو خبرك مثلی مرویدر .
 فرع ثالث — تسمیه نك فالحه دن بر آیت اولدیغنه، فالحه نك ده
 نمازده قرائتی واجب بولندیغنه قائل اولانلر شبهه یوقدر که تسمیه نك
 قرائتی ایجاب ایدرلر . یعنی قرائت بسمله لازمدر دیرلر .

بوکا قائل اولیانلرک اقوالی ایسه مختلفدر.

امام اعظم ابو حنیفه ایله آنک اتباعی، حسن بن صالح بن جنی، سفیان ثوری، ابن ابی لیلی «تسمیه، سرأ او قونور» دیدیلر. امام مالک، تسمیه نک صلات مکتوبده نه سرأ ونه ده جهراً او قونمسی لائق دکلدر. اما نافله نمازده مصلی بسمله یی دیلرسه او قور؛ دیلرسه ترک ایلر» دیدی.

فرع رابع — مذهب شافعی تسمیه نک هر رکعتده قبل الفاتحه وجوب قرائتی مقتضیدر.

امام اعظم ابو حنیفه دن ده ایکی روایت منقولدر. یعلی، ابو یوسف دن، اوده ابو حنیفه دن روایت ایتشدرکه «قبل الفاتحه هر رکعتده بسمله یی او قوملیدر.» ینه ابو یوسف ایله امام محمد وحسن بن زیاد بونلرک اوچیده امام اعظم حضرتلرندن روایت ایتشاردرکه «مصلی تسمیه یی اولکی رکعتده قرائته باشلامزدن او قورسه، او رکعتله باشلادیغی نمازدن فارغ اولنجیه قدر او نمازده بردها او قومق کرچه اوزرینه واجب ولایم دکاسه ده او قومق کوزلدر.» فریع خامس — ابو حنیفه نک ظاهر قوی بودرکه مصلی تسمیه یی اول فاتحه ده او قودقدن صکره اوائل سور سائرده آرتق اعاده ایله مکلف دکلدر.

عند الشافعی ایسه (کل امر ذی بال لا یبدأ فیه بسم الله فهو ابتر) حدیث عالسنه بناءً هر سورده نک اولنده اعاده بسمله افضلدر.

فرع سادس — حائضک، جنبک «بسم الله الرحمن الرحیم» ی

او قومی جائزیدر؟ بونده اقوال مختلفدر. بزم [۱] عندمزده صحیح اولان عدم جوازیدر.

فرع سابع - وضوءده ذکر بسمله مندوب ایدوکنه اجماع علما واقع اولمشدر. عامه علما ایسه غیر واجب اولدیغنه قائل اولمش و بوبابده (توضاً كما امرک الله) حدیث نبویسنی سند انخاز ایشلردر. چونکه آیت وضوءده تسمیه مذکور دکلدر.

اهل ظاهر دیمشدرکه: وضوءده تسمیه واجبدر. متوضیء کرک عمدأ و کرک سهواً تسمیه بی ترک ایدرده آبدست آیرکن «بسم الله» دیمزسه، آنک نمازی صحیح اولماز.

اسحاق، دیمشدرکه: عمدأ ترک ایدرسه جائز دکلدر. ساهیاً ترک ایلرسه جائزدر.

فرع ثامن - عندالتذکیه [۲] متروک التسمیه اولان ذبیحه ناک اکی جائز می دکی؟ بومسأله یک مشهوردر. جناب حق (فاذکروا اسم الله علیها صواف -- ولاتأکلوا مما لم یذکر اسم الله علیه) بیورمشدر.

فرع تاسع - اجماع علما واقع اولمشدرکه: انسان - بسم الله الرحمن الرحیم - دیمکسزین هیچ برعمله شروع ایتمامک مستحیدر. اوطوردیفی یردن قالقبارکن - بسم الله - دیملی، عبادته قصد و نیت ایتدیکی وقت - بسم الله - دیملی، اوه کیررکن - بسم الله - دیملی، اودن چیقارکن - بسم الله - دیملی، بر شی

[۱] شافعیه .

[۲] تذکیه، ذبح معناسنهدر .

بیه جکی، ایچہ جکی، آله جفی، ویره جکی وقت - بسم الله - دیملی،
 قابله دخی چو جفی آناسنک قرندن آیرکن - بسم الله - دیمک
 مستحیدر. ایشته مولودک دنیا احوالندن برنجی حالی بو اولوب
 بعد الوفات قبره ادخال اولنورکن ده - بسم الله - دینیلی درکه
 دنیا احوالندن صوک حالی دخی اودر.

عبد مقبور، روز جزاده قبردن قالقه جفی زمان دخی کذلک
 - بسم الله - دیملی، موقفه وار دیغننده - بسم الله - دیملی که
 - بسم الله - قولنک برکتیه کن دیسندن نارجهنم تباعد ایتسون.

اون برنجی مسأله

امام شافعی «قراءت قرآنی محسن اولان واولیان کیمسلر
 حقنده ترجمه قرآن، صحت صلاتده کافی دکلدیر.» دیدی.
 امام اعظم ابوحنیفه «ترجمه قرآن، قادر و عاجز حقنده
 جائزدر.» دیه اجتهاد ایتدی.

امام ابو یوسف ایله امام محمد «حق عاجزده کافی در؛ حق
 قادرده غیر کافی در.» دیدیلر.

المترجم - حضرت مفسر دیرکه: «ابوحنیفه نك بومسأله ده کی
 مذهبی جداً بعیددر. بو سبیدن ناشی فقیه ابو الیث السمرقندی
 وقاضی ابوزید الدبوسی ترجمه قرآنک صلاتده لزوم ترکیفی تصریح
 ایتشلردر.»

حضرت مفسر ترجمه قرآنک صلاتده عدم کفایتی اصول

شافعیه اوزره بر چوق دلائل سردیله اثباته قالقیسه رق سوزی
خیلی اوزاتمش در. مشار'یهک تطویلات و تعریضاتندن صرف
نظاره یالکز دلائل مسروده سندن بعضیلمری بروجه آتی نقل اولنور.
۱ — رسول الله صلی الله علیه وسلم افندمن آنجق قرآن
منزل عربی ایله نماز قیلشدر.

۲ — خلفای راشدین دخی قرآن عربی ایله ادای صلات
بیورمشلدر.

۳ — کړك رسول الله افندمن وكرك آنك اصحابی نمازلرنده
آنجق بو قرآن عربی قرائت بیورلردی.

۴ — سراسر دیار اسلام، صلاتده قرآن کریمی طرف
آلیمدن منزل اولدینی کبی اوقومقدمه مطبق و متفقدر.

۵ — نمازده قرائت قرآن ایله مأمورز. قرآنك فارسی
ترجمه سی اوقویان کیسه ایسه قرآن منزلی اوقومش اولماز.
(فاقروا ما تیسر من القرآن) فرمان آلهمسی ایله حضرت پیغمبر
افندمنك اعرابییه (ثم اقرأ بما تیسر معك من القرآن) امر
رسالتپناهیلمری نمازده قرائت قرآن ایله مأمور بولندیغمزه برر
برهان باهردر. الفاظ فارسیه ایله مرتب اولان كلامك قرآندن
معدود اولمادیغمده (وانه لتزیل رب العالمین — الی قوله —
بلسان عربی مبین) و (وما ارسلنا من رسول الا بلسان قومه)
و (قل انن اجتمع الانس والجن علی ان یأتوا بمثل هذا القرآن
لایأتون بمثله ولو كان بعضهم لبعض ظهیراً) آیات بیناتی برر دلیل
ظاهردر.

۶ — ابن المنذر، ابو هريره دن روايت ايتديكي حديث شريفده نبي اکرم صلى الله عليه وسلم افندمن (لاجزى صلاة لا يقرأ فيها بفتح الكتاب) بيورمش در .

۷ — فابعثوا بورككم هذه الى المدينة فلينظر ايها ازكى طعاماً فليأتكم برزق منه — قول كريمك فارسجه ترجمه سي شواوايور .
 « بفرستيد يكي از شما بانقره بشهر پس بنكرده كدام طعام بهترست ياره ازان بياورد . »

بو كلامك ايسه لفظاً و معنى كلام ناس جنسندن اولديني معلومدر . حال بوكه رسول الله صلى الله عليه وسلم افندمن — ان صلاتنا هذه لا يصلح فيها شيء من كلام الناس — بيورمش در . بناء عليه شو كلام مترجمك قرائتيله نماز صحيح اولماق لازم كلير .

۸ — عليه الصلاة والسلام افندمن — انزل القرآن على سبعة احرف كلها شاف كاف — بيورمش در .

اگر قرآنك ترجمه سي دنخي قرآن ديمك اولسيدي، يالكز يدي حرف اوزرينه منزل اولماسي — يعنى السنه عديده اوزره نازل اولمش بولمسي لازم كليردى .

۹ — اگر نمازده ترجمه قرآنك قرائتي جائز اولسيدي، رسالتپناه افندمن قرآنى فارسجه او قومسي ايچون سلمان فارسى به، روميجه او قومسي ايچون صهيب رومى به، حبشيه او قومسي ايچون بلال حبشى به اذن ويرلردى . باخصوص بو بر امر مشروع اولسيدي، بين الخلق جوازي شايع و مشتير اولمق لازم كليردى .
 ۱۰ — قرآنك قرائتي يالكز معناسى ايچون مطلوب دكل،

لفظی ایچون ده مطلوبدر . زیرا اعجاز قرآن قرآنک فصاحتدهدر .
 نصاحتی ده لفظندهدر . علی الخصوص صحت صلاتک لفظ قرآنی
 قرآنه موقوف اولمسی الفاظ قرآنیهک حفظی و بویله ملیونارجه
 مسلمانلرک حفظ قرآنه اعتناسی دخی قرآنک علی وجه الدهر
 تحریفدن مصونیتی موجبدر . بو کثرت حفظ دخی جناب حقک
 قرآنی تحریفدن محافظه بیوره جفته دائر . انا نحن نزلنا الذکر
 و اناله لحافظون . قول کریمیه ایتدیکی وعدک تحقیقی مقتضیدر .
 اما « صحت صلات ، بو نظم لطیف عربی نک قرآننه متوقف
 دکدر . » دیدیکمز وقت شو مقصود اهم مختل اولور .

المترجم — حضرت مفسر بوندن صکردهده مخالف مذهبی
 اولانلرک — یعنی حنفیه نک دلائلی بیانه آغاز ایدورک دیمشدرکه :

مخالفلر من مذهبایرینک صحتته شووجهایله احتجاج ایتشلردر .
 دیمشدرکه : بز نمازده قرائت قرآن ایله مأمورز . ترجمه قرائت ،
 قرآنی قرائت دیمکدر . قرآننده عین قرآن ایله ترجمه قرآن
 مساوی اولدیغندهده وجوه آیه دلالت ایدر .

۱ — مرویدرکه ، عبد الله بن مسعود بر مرد اعجمی یه
 تعلیم قرآن ایدیوردی . (ان شجرة الزقوم طعام الایم) آیت
 جلیله سندهکی — اییم — لفظی تلفظه اعجمی نک دلی دوئمیوردی .
 — طعام الایم — دیه جک یرده — طعام الیتیم — دییوردی .
 بناءً علیه ابن مسعود آکا . « — طعام الایم — یرینه — طعام
 الفاجر — دی ویر » دیدی . و بونکله برابر حضرت ابن مسعود ،

« قرآنده - علیم - کیرینه - حکیم - او قومق خطا دکدر .
خطا آیت رحمتی آیت عذاب یرینه وضع ایتمکدر » دیدی .

۲ - جناب حق (انه لفی زبر الاولین) بیوردی .

ایشته بو آیت کریمه قرآنک - زبر اولین - دوده حصولی
مخبردر . ینه جناب باری (ان هذی فی الصحف الاولی صحف
ابراهیم وموسی) بیوردی . مع هذی قرآن کریمک زبر اولین ده
بو الفاظ عربیه قرآینهک عینی اوله رق موجود اولیوب عبرانیجه ،
سریانجه ایدوکنده جمله من متفقز .

۳ - حق سبحانه و تعالی (واوحی الی هذا القرآن لانذرکم به)
بیورمشدر . عرب اولیانلر ایسه بدیهیدر که لفظ عربی بی
آکلامدقلری جهتله الفاظ قرآینهک مدلولاتی تفهم ایچون آنلره
کندی لسانلریله آکلامغه توقف ایدر . کلام اللهی ده جناب حق
(قرآن) اسمیه بیورمشدر . ایشته تبیین ایتدی که لسان فارسی ایله
منظوم اولان کلام مترجم دخی قرآندر .

* *

حضرت مفسر شو احتجاجات حنفیه ده دخی جواب ویردرک
معتادی وجه ایله سالکی اولدینی مذهب شافعی ده نصرته قصور
ایتمامشدر .

اون ایکنجی مسأله

امام شافعی قول جدیدده « امام اینستر سرأ ، ایستر جهراً
او قوسون مقتدییه قرائت واجبدر » دیدی .

قول قدیم دده « امام سرّاً او قودینی وقت مقتدی به قرائت واجبدر . جهرّاً او قودینی وقت واجب دکلدر » دیدی .

امام مالکک، ابن مبارکک، احمد بن حنبلک دخی قولی بودر .
امام اعظم ابوحنیفه « هر حالده خلف امامده قرائت مکروهدر »

دیدی .

المترجم - حضرت مفسر بو مسألهده دخی مذهب شافعی بی
مؤید بر چوق دلیلر ایراد ایشدر .

اون اوچنچی مسأله

امام شافعی « رضی الله عنه » هر رکعتده قرائت فاتحه واجبدر .
فاتحه بی بر رکعتده ترك ایدن مصلی نك صلاتی باطل اولور » دیدی .
شیخ ابو حامد اسفراینی « بین الصحابه مجمع علیه اولان قول
بودر . حضرت ابو بکر، عمر، علی، ابن مسعود رضی الله عنهم
دخی بویله دیمشدردر » دیو امام شافعی نك رأی و اجتهدینی
تصدیق ایلدی .

معلوم اولسون که بو مسألهده آلتی مذهب واردر .
اولکیسی - اصمک، ابن علیه نك مذهبی در . بونلر « نمازده
قرائت قرآن اعلا واجب دکلدر ! » دیمشدر .

ایکنجیسی - حسن بصری نك، حسن بن صالح بن جنی نك
مذهبی در . بونلر دیمشدر که : « قرائت قرآن یالکزر رکعت واحدهده
واجبدر ! چونکه علیه الصلاة والسلام افندمز (لاصلاة الا بفاتحة

الكتاب) بیورمشدر. نفی دن استئسا ایسه اثباتدر. بناءً غایه نمازده یالکز بر کره فاتحه شریفه اوقونه جق اولورسه بحکم الاستئنا صحت صلاته حکم ایدمک لازم کلیر.

اوجنحیسی — امام اعظم ابوحنیفه نك مذهبی در.

مشارالیه «اولکی ایکی رکعتده قرائت واجبدر. صکرده کی ایکی رکعتده مصلی مختاردر. دیارسه اوقور؛ دیارسه تسبیح ایدر؛ ایسترسه سکوت ایلر.» دیمش. «کتاب استحباب» دده من غیر تعیین یالکز رکعتین ده قرائتک واجب اولدینی ذکر اولغشدر.

دردنحیسی — ابن الصباغ — کتاب شامل — ده نقل ایتمشدرکه: سفیان «ایکی اولکی رکعتده قرائت واجبدر. ایکی صکرده کی رکعتده قرائت مکروهدر» دیدی.

بشنحیسی — امام مالکک مذهبی در. مشارالیه «اکثر رکعاتده قرائت واجبدر. جمیع رکعاتده واجب دکلدر. اگر نماز دوت رکعت ایسه یالکز اوچ رکعتده قرائت، کفایت ایدر. اگر صلات مغرب اولورسه ایکی رکعتده قرائت کافی در. صلات صبح اولورسه رکعتلرک ایکیسندده قرائت واجبدر» دیدی.

آلتنجیسی — مذهب امام شافعی در. «مشارالیه هر رکعتده قرائت واجبدر» دیدی.

للمترجم — حضرت مفسر بورادهده مذهب شافعی نك صحتی مؤید بعض دلیللر ایراد ایلشدر.

اون دردنجی مسأله

مادام که، قرائت فاتحه، شرائط صلاتدن بر شرط اولدینی
تین ایتمش در. بونک بر طاقم فروعی ده بولنق طبیعی در.

فروع

فرع اول — بالاده ده بیان ایتمشد که مصلی قرائت فاتحه یی،
یا خود حروف فاتحه دن بر حرفی عمداً ترك ایلرسه، صلاتی باطل
اولور.

سهواً ترك ایلرسه امام شافعی نك قول قدینجه، صلاتی فاسد
اولماز، قول جدیدنجه فاسد اولور.

امام مشارالیه (قدیم) ده سهواً تارك قرائت اولانك صلاتی
فاسد اولمیه جغه ابوسلمه بن عبدالرحمانك روایت ایتدیکی خبرله
احتجاج ایتمشدی. ابوسلمه دیمشدرکه :

عمر بن الخطاب رضی الله عنه بر کره بزمله برابر صلات
مغربی قیلوب قرائتی ترك ایلدی. نمازی بتیرنجه قرائتی ترك
بیوردقلری کندینه اخطار اولنمغله — رکوع وسجود نصل ایدی؟
یعنی بونلرده بر اکسـکـلک وقوع بولدیمی؟ — دیه صـورـدی.
«خیز! رکوع وسجود یولنده ایدی» دیدیلر. «اوله ایهه بأس
یوق» جوابی ویردی.

امام شافعی مقدا بو خبرایله استدلالنده — مادام که بو واقعه

محضر احتجاجده وقوع بولمش در . اجماع امت حکمنی آلمش در . —
دیمشدی .

صکره (جدید) ده بورآیندن رجوع ایدوب «ولوکه سهواً
اولسون، تارك قرائتك صلاحتی فاسد اولور. زیرا دلائل مذکوره
عمدهده، سهودهده عام و شاملدر» دیدی . و جناب عمرک قصه
مذکورهسندن ایکی وجه ایله جواب ویردی .
وجه اول — شعبی دن مرویدرکه حضرت عمر او نمازی
اعاده ایلدی .

وجه ثانی — جائرکه حضرت عمر جهراً او قومنی ترك ایتش
اولسونده، نفس قرائتی ترك ایتامش اولسون . امام شافعی، حق
عمرده ظن اولنان بودر دیدی .

فرع ثانی

قرائتده ترتیبه رعایت، واجبدر . مصلی اگر ابتدا نصف
اخیری، صکردهده نصف اولی اوقورسه، نصف اول محسوب
اولور . نصف اخیر محسوب اولماز .

فرع ثالث

فاتحہنک تمامنی محسن اولیان [۰] کیسه، اگر یالاکز بعضیسنی
ازبرلیه بیلش ایسه ازبرلهمش اولدینی مقدارایله برابر وجه اقرب
اوزره دها آلتی آیت اوقوملی؛ اگر فاتحهدن هیچ برشی ازبرلیه مامش
ایسه (فاقرؤا ما تیسر من القرآن) فرمان آلهیسنه امثالاً سائر

[۰] شیوه عرب اوزره درست اوقویه بیان .

سور قرآنهدن از برله مش بولنديغی شیلری اوقویوب بوش
طور ماملی؛ شاید قرآندن حفظنده هیچ بر شی یوق ایسه ذکر،
تکیر، تحمید ایتلی در.

امام اعظم ابوحنیفه «قرآندن هیچ بر شی محفوظی اولیان
کیسه یه نمازده بشقه بر شیک اثباتی لازم کلز» دیدی.
امام شافعی نک بو بابده کی حجتی، رفاعه بن المالک روایت
ایتدی کی خبردر.

رفاعه دن مرویدرکه: امام الانبیا صلی الله علیه وسلم افندمن
(اذا قام احدکم الى الصلاة فلیتوضأ کما امره الله ثم یکبر فان کان
معه شیء من القرآن فلیقرأ وان لم یکن معه شیء من القرآن
فلیحمد الله ولیکبر) بیورمش در.

ایشته بو حدیث شریف نبوی صراحة مشعردرکه: نمازه
طوران کیسه قرآندن محفوظی اولان شیئی اوقومق و هیچ بر
محفوظی یوق ایسه جناب حق تحمید و تکیر ایتک لازم کایر.
شوراسی قالدی که بر کیسه اگر فاحیه یی از برلیه مامش، قرآندن
اذکار عربیه دن ده هیچ بر شی حفظ ایده مامش ایسه نه یاملی؟
بکا قالیرسه علیه الصلاة والسلام افندمنک (اذا امرتکم بامر
فأتوا منه ما استطعتم) امر رسالتیناهیلریله عمل ایدهرک او کیسه
هر هانکی لسان ایله ذکر الله مقتدر اوله بیلیرسه اولسان ایله
مشغول اولمی در.

المترجم

حضرت مفسر سورة فاتحه ایله معوذتین حقنده ابن مسعوددن

منقول اولان بر روایت غیر معقولایی اونی بشنخی مسأله ده ایراد
ایلدکن صکره « ظنه اغاب اولان بو بر نقل کاذب اولمایدر »
دیدى . بعده « سورة فاتحه به متفرع اولان مسائل فقهیه حتمنده کی
کلامزکده صوکی بو اولسون » والله الهادی للصواب « سوزیه
باب ثالثی مسکی الحتام ایلدی .

بشنجی باب

سورة فاتحه تفسیری بیانده اولوب چند فصلی مشتملدر

فصل اول

الحمد لله — قول شریفنک تفسیرینی مبیندر

فائده

۱

بونده متقارب المعنی اوچ لفظ وارددر . حمد، مدح، شکر .
حمد ایله مدح لفظلری بیننده کی فرق برقاچ وجه ایله ایضاح
اولنور .

۱ — ارباب حیات ده، ارباب حیاتک غیریمی ده سزاوار
مدح و ستایش اولور . کورمز میسین که بریسی برؤلوی لالا،
بریا قوت همرا کورسه آتی مدح ایدر . فقط حمید و تعظیم ایتمی
مستحیلدر . ایشته تین ایتدی که مدح، حمددن اعمدر .

۲ — مدح، احساندن اولده، احساندن صکرده اولور .
حمد ایسه آنجق احساندن صکره اولور .

۳ — مدح بعضاً منهی عنه اولور . علیه الصلاة والسلام
افندمن (احشوا التراب فی وجوه المدا حین) بیورمشدر . حمد

ایسه مطلقاً مأمور به در . صلی الله علیه وسلم افندمن (من لم یحمد
الناس لم یحمد الله) بیورمش در .

۴ — مدح، انواع فضائلدن بر نوعه مختص اولدیغنه دال
اولان قولدن عبارتدر . حمد ایسه بر فضیلت معینه به مختص اولدیغنه
دلالت ایدن قولدرکه او فضیلت دخی فضیلت انعام و احساندر .
ایشته شوايضاً حمزه ده تبیین ایتدی که مدح، حمددن اعمدر .
حمد ایله شکر یکننده کی فرق دخی شودرکه حمد سکا ده،
سندن غیر یسنده واصل اولان انعامه عام و شامل اولوب شکر
ایسه یالکز سکا واصل اولان انعامه مختصدر .

مدحک ارباب حیاته ده، ارباب حیاتک غیر یسنده ده، فاعل
مختاره ده، فاعل مختارک غیر یسنده شمولی اولدیغنی یوقاریده بیان
ایتمشدک . بناءً علیه عبد — المدح لله — دیمش اولسه، آنک بو
قولی جناب حقک فاعل مختار اولدیغنه دلالت ایتمز . — الحمد لله —
قولی ایسه جناب حقک فاعل مختار اولدیغنه دلالت ایدر .

کذلک — الحمد لله — قولی « آله عالمک — فلاسه — فنهک زعم
ایتدکری کبی — موجب بالذات دکل، فاعل مختار اولدیغنی
حامدک مقرو معترف بولندیغنه دلالت ایدر . او جهته — الحمد لله —
— قولی جناب حقدن صادر و آندن غیر ییه واصل اولان هر
انعام سببیه الله تعالیه شادر . — الشکر لله — قولی ایسه یالکز
شاکره واصل اولان انعام الهی سببیه بر شادر . بو حالده
اولکینک افضل اولدیغنی بی اشتباهدر . زیرا حامد کویا « الهی !
بن حصه مند انعامک اولسه مده، اولسه مده سنک انعام بی پایانک

كافه عوالمه واصلدر . سن حمد و تعظيم عظيمه مستحقين » ديمش اولور .
دينلدى كه :

جناب حقك دفع ايتديكى بلايه حمد — احسان و اعطا
بيوردينى نعم و آلايه — شكر اولور . اكر دينليرسه كه :
اعطاده كي نعمت ، دفع بلاده كي نعمتدن اكثر اولديغى حالده
حكمت نه در كه جناب حق اكثرى ترك ايتدى ده اقلي ذكر ايلدى ؟
يعنى نچون — الشكر لله — ديمدى ده — الحمد لله — ديدى ؟
بو سؤاله بر قاچ وجه ايله جواب ويريلير .

۱ — كويا حامد » بن كه نعمتينك ادناسنده شاكرم ! يا
اعلاسنه شاكر اولماز ميم ؟ » ديمش اولور .

۲ — منع غير متناهي در : اعطا ايسه متناهي در . بناءً عليه
نامتناهي اولان بلانك دفعى شكريله كلامه آغاز ايتك اولادر .
۳ — دفع مضرت ، جلب منفعتدن اهمدر . بوسيدن ناشي
حمدى شكره تقديم ايلدى .

فائده

۲

جناب حق اول فاتحه ده — احمد الله — ديمدى . — الحمد لله
— بيوردى .

بو عبارة ثانيه نك اولكي سندن اولى اولديغى وجوه آيه دن
آكلار سين !

۱ — اگر «احمد الله» دیمش اولسیدی، بو تعبیر قائلک حمد خدایه قادر اولدیغنی افاده ایدردی. «الحمد لله» ایسه جناب حقک حامدین وشاکرین آکا حمدوشکر ایتسونلر ایتسونلر آنلرک حمدلرندن شکرلرندن اولده حمد قدیمیه، کلام قدیمیه ازلدن ابدهدک محمود اولدیغنی مفیددر.

۲ — الحمد لله — حمدوشنا جناب حقک حتی، ملکی اولدیغنی معناسنی مشعردر. زیرا قوللرینه مبذول وریکان اولان انواع نعم و آلائی الهیه سی سببیه کرچکدن حمد و تعظیبه مستحق اولانده اودر. بو جهتله درکه — الحمد لله — قولمز «حمدوشنا حق خدا اولوب آکا لذاته مستحقدر» معناسنی تضمن ایدر. «احمد الله» دیمش اولسه بو تعبیر جناب حقک لذاته حمده مستحق اولدیغنه دلالت ایتمز. خدانک حمده استحقاقنه دال اولان لفظ ایسه معلومدرکه یالکز شخص واحدک کندینه حمدایتدیکنه دال اولان لفظدن اولادر.

۳ — عبد اگر «احمد الله» دیمش اولسه کرچه خدایه حمد ایتش اولور. لکن آکا لائق حمد ایتش اولماز. اما «الحمد لله» دینجه کویا «بن کیم که حتی آکا لائق حمدوشنا ایده بیاییم؟ لکن کندی جمیع حامدینک حمدیه محموددر.» دیمش اولور.
بر مثال عرض ایدم:

بر کیمسه سزه صورسه که: «فلانک اوزرکرده حق نعمتی وارمیدر؟» سزده یالکز «اوت!» دیسه کرچه او ولی النعمه حمد ایتش اولورسیکر. لکن بو حمدکر پک ضعیف بر حمددر.

اگر جواب بگزده « آنک مظهر نعمت و عاطفتی اولان یالکز بن دکم !
جهان مستغرق احسانیدر ! » دیهجک اولورسه کز ولی نعمتکزی
اکمل محامد ایله حمد ایتمش اولورسیکز .

۴ — حمد، صفت قلبدن عبارتدر . بو صفت دخی ذات
محمودک متفضل، تعظیم واجلاله مستحق اولدیغنی اعتقاد ایله کدر .
بناءً علیه انسان، جلال الله لائق اولان تعظیم معناسندن قلباً
غافل اولدیغنی حالده — احمدالله — دیسه قولنده کاذب اولور .
زیرا حقیقتده حامد دکل ایکن « بن حامدم » دیور . اما —
الحمدلله — دینجه معنای تعظیمی مستحضر اولسون اولسون، بو قولنده
صادقدر . زیرا معنای قوی حمدو ثنا جناب خدانک حق، ملکی
اولدیغنی مشعردر که عبد معنای تعظیم واجلال ایله مشغول اولسون
اولسون، بو معنی حاصلدر . ایشته تبیین ایتدی که — الحمدلله —
قوی — احمدالله — قولندن اولادر . بونک نظیری (لا اله الا الله)
قولمزددر . زیرا بو قولمزه کذب صیغماز . (اشهد ان لا اله الا الله)
قولمز ایسه آنک خلافتدر . زیرا بو قولک قائلی بعضاً — اشهد
— سوزنده کاذب اوله ییلیر . مثلاً اللهم برلکنه معتقد اولمادیغنی
حالده ده « بن اللهم برلکنه شهادت ایدرم » دیه ییلیر . بو سببدن
ناشیدر که عالم السر و الحقیقات اولان مولای متعال حاضر تلمری
نبوت و رسالت جناب پیغمبری بی قلباً انکار، لساناً اقرار ایدن
منافقلری تکذیبده (والله یشهد ان المنافقین لکاذبون) بیوردیلر .
ایشته بو سر و حکمته منی درکه اذان شریفده « اشهد »
قولیه امر بیوریلوب « لا اله الا الله » قولیه ختام واقع اولمشدر .

فائده

۳

« الحمد لله » قولنده کی لامك وجوه كثره به احتمالی وارد.

۱ — اختصاص لائق.

« الجبل للفرس » قولك كبی.

۲ — ملك.

« الدار لزيد » قولك كبی.

۳ — قدرت واستیلا.

« البلد للسلطان » قولك كبی.

ایشته — الحمد لله — قولنده کی لامك شو وجوه ثلاثیه

احتمالی وارد. اگر اختصاص لائق معناسه حمل ایدرسهك، بو بدیدیركه غایت جلال شانی و كثر فضل و احسانی جهتیله حمد آنجق جناب حقه لائقدر.

اگر معنای ملكه حمل ایدرسهك، بوده معلومدركه حق سبحانه و تعالی حضر تبری هر شیئك مالکی در. او جهته قوللرینك کندی حمد و تعظییه مشغل اولمیرینه ده مالك اولمسی لازم کلیر. اگر قدرت واستیلا معناسه حمل ایلرسهك. كذلك خفی دكادركه جناب حق قادر و مستولی در. زیرا خدای متعال واجب لذاته در. آنك ماسواسی ده ممكن لذاته در. وجوب ذاتی ایله واجب الوجود اولان ذات اقدس و اعلى ایسه ممکناته مستولی اولمق طبعی در.

بو صورتده « الحمد لله » ، معانی ثلاثه مذکور دینی متضمن و ناطق
و بو اوچ معناجهده حق باریده صادق اولمش اولور .

فائده

۴

« الحمد لله » قولى سكر حرفدر . ابواب جنتده سكردر .
بناءً عليه بو سكر حرفى صفوت جنان ايله زيور زبان ايدن مرد
خدا پرست ، جنتك ابواب ثمانية سنه مستحق اولور .

فائده

۵

الحمد ، برلفظ مفرد اولدینی خالده آکا حرف تعریف داخل
اولمش در . بونده ایکی قول وارد در .

قول اول — اگر معهود سابق ايله مسبوق اولور سه آکا
منصرف اولور . مسبوق دكسه كلامی اجمالدن صیانه استغراقه
حمل اولنور .

قول ثانی — حرف تعریف عموم افاده ایتمز . فقط ماهیت
و حقیقت افاده ایدر .

بوراسی معلومك اولنجه دیر زكه :

الحمد لله ، تعبینك قول اوله كوره معناسی — « حمد و ثنا
نامنه اوله رق هر نه وارسه كافه سی اللهه مخصوصدر ؛ اللهم
ما كيدر . » ديمك اولور .

بو تقدیرجه ماسوی الله البتہ حمد وثانیہ مستحق اولماز .
 قول ثانیہ کوردہ معناسی - « ماهیت حمد الله تعالیٰ انک
 حقیدر؛ مایکدر . » دیمک اولوزکه اشبو معنی دخی ماهیت حمد،
 افرادندن بعضیسنک غیراللهه ثبوتی نفی ایلر .
 ایشته تبیین ایتدی که هرایکی قوله کوردده « الحمد لله » تعبیری
 غیر اللهه حصول حمدی نفی ایلر .

سؤال - منعمک منع علیهدن، استاذک تلیذدن، سلطان عادلک
 رعیتدن حمد و تعظیبه استحقاقی یوقیدر؟ علیه الصلاة والسلام
 افندمن (من لم یحمد الناس لم یحمد الله) بیورمدیمی؟
 جواب - افراد انساندن صدور ایدہ بیلن انعامک حقیقتده
 منعمی جناب حقدر . زیرا اگر جناب حق انسانک قلینده داعیه
 انعامی خلق ایتسه، اوانسان انعام واحسانه اقدام ایتزدی .
 كذلك هم نعمتی خلق، همده منعمی او نعمته مبالط ایتسه،
 منع علیهدده اونهمتدن انتفاعه تمکین واقدار بیورمسه، اونهمتله
 انتفاع ممکن اولمازدی .

ایشته تبیین ایتدی که منع حقیق جناب حقدر .

فائده

۶

محمود آنجق جناب معبود اولایغنه « الحمد لله » قولی دلالت
 ایتدیکی کبی عقلده دلالت ایدر .

دلالت عقليه يي موضع اولان وجوه شونلردر :

۱ — خالق تعالى حضرتلری قلب منعمده داعیه انعامی یاراتمسه انساندن انعامك صدورى ممکن اولماز . ديمك اولورکه منعم حقیقی اوداعیه يي خلق ایدندر . اوده جناب حقدر .

۲ — آخره انعام ایدن کیمسه، ایتدیکی انعام ايله یا ثواب، یا ثنا، یا تحصیل حق، یا خالق بخلدن تخلص نفس کي بر عوض ایستر. طالب عوض اولان ذات ایسه منعم دکلدر. بناءً علیه حمده مستحق اولماز. الله تبارك وتعالى حضرتلری ایسه بر کمال ايله متصفدرکه اوکمال، مقتضای ذاتی در. بویله کامل اولان ذات اقدس واعلی ایسه طلب کمال ایتمز. چونکه حاصلی تحصیل محالدر. بو جهته آنک عطایای سبحانیه سی جود محض، احسان محض اولمش اولور. بناءً علیه حمده مستحق اولدیغندده اشتباه یوقدر. ایشته تبیین ایتدی که حمد و تعظیبه مستحق اولان آنجق جناب حقدر.

۳ — هر نعمت ممکن الوجود اولان موجوداتدندر.

مادام که هر ممکن الوجود اولانی یا ابتداءً ویا بالواسطه وار ایدن جناب حقدر. هر نعمتك مصدری جناب حقدر.

بو قضیه يي (وما بکم من نعمه فن الله) قول کریمی دخی تأکید ایلر.

حمدك معنایی انعامه ثنادر. مادام که انعام آنجق اللهدن صدور ایدر. اللهدن بشقه سی حمده مستحق دکلدر.

۴ — کمال نعمت شو امور ثلاثه نك اجتماعنه متوقفدر. اولیکینسی — نعمت، محض منفعت اولمیدر. برشی ايله انتفاع

ايدہ بيلک دخی منتفعک حی و مدرك اولسيه مشروطدر . آنک
 حیات و ادراك ايله اتصافی ايسه ايجاد حقہ حصولپذیر اولور .
 ايکنجیسی - منفعتك نعمت کامله اولسی شوائب ضرردن ،
 غمدن خالی بولمسنه وابستهدر . منافی شوائب ضرردن تخلیه
 ايسه آنجق الله مخصوصدر .

اوچنجیسی - منفعت ، خوف انقطاعدن ده امین اولمادجقه
 نعمت کامله اوله ماز . بو تأمین ايسه آنجق الله مخصوصدر .
 مادام که بو امورك کافه سی الله مخصوص اولدیغی ثابتدر .
 نعمت کامله نك مصدری آنجق جناب حقدر . بناءً عليه حمد
 کامله ده مستحق اولان اودر .
 ايشته شو براهین ايله - الحمد لله - قول کریمک صحتی ثابت
 اولدی .

فائدہ

۷

معلومک اولمشدر که حمد ، مجرد منع و متفضل اولسندن
 ناشی غیري مدحدن عبارتدر . انسان ايسه بر نعمتك کندينه
 واصل اولدیغنی بيلدکجه حمد وشکر ايله مکلف طوتيله من .
 بو صورتده انسانک جناب حقہ حمد وشکر ايدہ بيلکدن
 عاجز اولسی لازم کلیر . بو بيلدکی عجز انسانه وجود آتیه دلالت
 ايدر :

وجه اول - جناب منعم حقیقینک انسان احسان بیوردینی
 نعم جلیلہ اول قدر چوقدرکہ (وان تعدوا نعمۃ اللہ لا تحصوها)
 آیت کریمہ سی منطوقیجہ عقل انسان آنلری احاطہ و ادراکہ مقتدر
 اولہ ماز. مادامکہ انسانک مظهر اولدینی نعم جلیلہ الہیہنک
 کافہ سنہ وقوفی ممتنع در. او نعمتہ لائق حمد و شکر و ثنایہ
 اقتداری دہ ممتنع در.

وجه ثانی - انسانک حمد خدایہ، شکر مولایہ قیامی آنجق
 حق تعالیانک کندینی آکا اقدار بیورمسنہ و قلبندہ فعل حمد
 و شکرہ بر داعیہ یاراتمسنہ و بوفعلہ مانع و حائل اولان شیلرک
 کیدرلمسنہ متوقف اولوب بو اقدار وداعیہ وازالہ عوائق کبی
 شیلرک ایسہ کافہ سی کذلک شکری واجب برانعام دیگر آلہی در.
 دیمک اولدی کہ انسان عاجزک شکر و سپاس خدایہ قیامی برچوق
 نعم عظیمہ الہیہنک و ساطتہ محتاج در. حال بوکہ او نعمتہ دخی
 بشقہ جہ شکری موجب در. بو تقدیرہ کورہ عبدک نہایتسنر حمد
 و شکر ایلہ اشتغالی لازم کلیرکہ جناب حقہ لائق حمد و شکری
 ادایہ مقتدر اولہ بیلسون. بودہ محالدر. محالہ موقوف اولان
 شی دہ محالدر. بناءً علیہ انساندن جناب حقہ لائق حمد و شکرک
 اتیانی ممتنع در.

وجه ثالث - حمد و شکرک معناسی، قائلک لسانیاہ مجرد
 - الحمد لله - دیمسی دکلدر. بلسکہ منعم حقیقی اولان مولای
 متعالک صفات کمال و جلال ایلہ موصوف اولدینی منعم علیہک
 بیلسی در. حال بوکہ صفات کمال و جلالدن انسانک خاطرینہ ہر نہ

خطور ایلر سه مولای متعالک کمال و جلالی اومتخیل ومتصور
اولان صورتدن اعلی و اعظم اولدینی بدیهیدر. مادام که انسان
صفات کمال و جلال مولایی کاهی بیله من. حمد و شکر و ثنای
مولایی ادا ایدہ یلکده تمتع در.

وجه رابع — حمد و شکر ایله اشتغال کویا منع علیه، منعمدن
صادر اولان انعامه کندی شکریله کندی حمدیله مقابله ایدیوموش
کبی بر معنایی مشعردر. بو ایسه وجوه آتیہ دلالتیله ده ثابت
اولدینی اوزره جداً بعیددر.

۱ — نعم جزیه الہیہ اول قدر چوقدر که آنلره حدوغایت
یوقدر. بناءً علیه اول نعمتاره بو اعتقاد واحد ایله بو لفظه واحده
ایله مقابله ایدہ یلک نه قدر اوزا قدر.

۲ — کندی حمد و سپاسی خدانک نعم بی قیاسنه مساوی
کلیر اعتقادنده بولان کیمسه خدانکرده چرک شرکه دوشمش اولور.
ایشته وسطی حضرت لرینک «الشکر شرک» قولی بو معنایی
مشعردر.

۳ — انسان کرک ذاتنده، کرک صفاتنده و کرک احوالنده
انعام عام خدایه محتاجدر. خدای متعال ایسه شکر شاکرین،
حمد حامدین دن مستغنی در. بو صورتده شو حمد ایله. شو شکر
ایله نعم غیر متناهیة الہیہیه مقابله نصل ممکن اوله یلیر؟
ایشته شو وجوه ثلاثه ایله ثابت اولدی که عبد، حمد خدا
شکر مولایی اتیاندن عاجزدر.

بو دقیقه دن ناشیدر که — احمدا الله — بیورمدی ده —

الحمد لله - بیوردی. زیرا - احمدا الله - بیورمش اولسیدی،
عبادنی مالا یطاق ایله مکلف قیلش اوله جقدی.
اما - الحمد لله - دینجه، چونکه بو تعبیر شریفک معناسی
«کمال حمد، جناب حقک حق و ملکیدر. کمال حمد، حق خدا،
ملک مولادر» دیمک اولغله عبدی تکلیف مالا یطاقده بولندیر مامش
اولدی.

داود نبی علیه السلام حضر تلرندن منقولدرکه «یارب! سکا
نصل شکر ایده بیلیم که بنم سکا شکریم آنجق نبی اوشکره موفق
بیورمتاغک کبی بر انعام دیکرکله تمام اوله بیلیر؟» دیمش، طرف
آهیدنده «مادام که ادای حق شکردن عجزکی بیلدک؛ ایشته شمدی
قدرتک، طاقتک مقدارنجه بکا شکر ایتمش اولدک» خطاب عزتیه
حجاب اولمش در.

فائده

۸

مرویدرکه نبی اعلم و اکرم صلی الله علیه و سلم افندمن (اذا
انعم الله علی عبده نعمة فيقول العبد - الحمد لله - فيقول الله
تعالی - انظروا الى عبدی اعطيته مالا قدرله فاعطاني مالا قيمته -)
بیورمش در.

مال حديث - عبد بر نعمت آهیهیه مظهر اولوبده
«الحمد لله» دیدیکی وقت جناب حق «باقکر قولمه بن آکا دکر سز

بر شی ویردم! اوایسه بکا بالاتر تقادیر قدر و قیمت بر شی تقدیم
ایلدی بیورر» دیمکدر.

شو حدیث شریفک تفسیری بودرکه: جناب حقک عبده
اولان انعامی - مثلاً عبدی آج ایکن طویورمق، صوسز ایکن
سیراب ایتک، چپلاق ایکن کیدرمک کبی اشیای معتاده دن بر
شیدر. عبدک ایسه زیور زبان شکران ایلدیکی - الحمد لله - ک
معناسی باقکزه قدر چوقدر! «کرك حامدين طرفلرندن اتیان
ایدیلن وکرك هیچ برحامد جانبدن اتیان ایدلماش اولدینی حالده
سلسله وجوده دخوانی عقل قبول ایدن هر حمد و ثنا سزاوار
بارکاه اقدس واعلادر» معناسی متضمندرکه، بونده کرك عرش
وکرسی ملکترینک، سکنة سماواتک، جناب آدمدن حضرت محمد
علیهما السلامه کلنجیه قدر روی زمین ده تبایغ احکام رب العالمین
ایدن جمیع انبیاء ومرسلینک، بالجملة اولیا وعلماک. سائر جمیع
خلقک ذکر ایتش اولدقاری. وکرك (دعواهم فیها سبحانک اللهم
وتحیتهم فیها سلام و آخر دعواهم ان الحمد لله رب العالمین) کلام
بشارت الحجامیه تزیین لسان شکر ومحمدت ایده جککری وقت
معلومه دکن ذکر و اتیان ایلیه جککری محامدک مجموعی داخل
اولور. شو محامدک ایسه کثرتیه برابرینه مقداری متشاهیدر.
نامتساهی اولان محامد دخی بوندن صکره ابد الآباد اتیان
ایده جککاری محامددرکه نهایتی اولمیان شو محامدک کافه اقسامی
عبدک - الحمد لله رب العالمین - قولى تحتده داخلدر.
ایشته بو سبیدن ناشیدرکه جناب حق «انظروا الى عبدی

قد اعطيته نعمة واحدة لا قدر لها فاعطاني من الشكر ما لا حد له
والانهاية « بيورمشدر که باقکز ! قوله بن آکا قدری، دگری
اولمیان بر نعمت ویردم. اوده بکا حدوپایانی اولمیان شکر وسپاسی
تقدیم ایلدی دیمکدر.

بن دیرم که: بونده بر دقیقه دها واردر.

شویله که:

جناب حقك دنياده قولنه احسان بيورديني نعمتير متناهيدير.
— الحمد لله — قولى ايسه غير متناهيدير. غير متناهيدين مقدار
متناهي ساقط اولدقدن صكرده غير متناهي نك باقيسي ينه غير
متناهي اولقى اوزره قالير.

آنك ايچون جناب حق كويا «قولم ! نائل اولديغك نعمته
مقابل — الحمد لله — ديديكك وقت او — الحمد لله — كله مباركه سندن
سكا قالان حصه بر طاقم طاعات غير متناهيدير. بناءً عليه اوطاعات
غير متناهييه نعمت غير متناهييه مقابله لابدولازمدر « ديمش اولور.
ايشته بو سببدن ناشيدرکه عبد حامد ثواب ابدیيه، خير
سرمدیيه کسب استحقاق ايدر.

شوافادامتزله ثابت اولدی که عبدك — الحمد لله — ديمسي صوکی
اولمیان سعادتلی، نهایتی بولغیان خیرلری ایجاب ايدر.

فائده

۹

شك واشتباهدن بریدرکه وجود، عدمدن خیرلیدر. دلیلز

— هر موجود حی در . صاغ اولان کنديک يوقلغنی کریه کورد .
اگر وجود ، عدمدن خیرلی اولمسیدی ، صاغر یوقلقلرینی بویله
کریه کورماک لازم کلیردی .

بو قاعده کایه ثابت اولنجه دیرزکه :

سوی الله هر بر شیئک وجودی الله ذوالجلالک ایجادیله ،
فضلیله ، احسانیه حصوله کلش در .

وجودک بر نعمت عظیمه اولدیغی ده ثابتدر . ایشته شوقفصیلدن
مستبان اولدیغی اوزره ارواح ، اجسام ، علویات ، سفایات عوالمده
هیچ بر موجود یوقدرکه آنده جناب حقک بر نعمتی ، بر رحمتی ،
بر احسانی بولنسون . نعمت ، رحمت ، احسان ایسه موجب حمد
وشکر اندر . بناء علیه عبد حامدک — الحمد لله — دیمکدن مرادی
« الحمد لله على النعم الواصلة الى » دیمک دکل ، بلکه « الحمد لله على
النعم الصادرة منه » دیمک اولور .

انعام خدا ایسه جمیع ماسوی المولایه واصل اولدیغی بیان ایتمشدک .
آنک ایچون عبد حامدک زیور زبان شکران ایتدیکی — الحمد لله
— تعبیر لطیفی « الحمد لله على انعامه على كل مخلوق خلقه وعلى كل
محدث احدبه من نور وظلمة وسكون وحركة وعرش وكرسى
وجنى وانس وذات وضفة وجسم وعرض الى ابد الآباد ودهر
الداهرين وانا اشهد انها بأسرها حقك وماكك وليس لاحد معك
فيها شركة ومنازعة » معنای شریفی تضمن ایتمش اولور .

فائده

۱۰

بررسی چاقوب ديه بيليركه :

تسبيح، تحميددن مقدمدر. زيرا جناب حق « سبحان الله والحمد لله » بيور مشدر. اويله ايسه سبب نهدر كه فالحده بدايت، تحميد ايله واقع اولمش در؟

الجواب - محققدر كه تحميد، دلالت تضمن ايله تسبيحه دلالت ايدر. زيرا تسبيح، جناب حقك ذاتنده، صفاتنده، نقائص و آفاتدن مبرا اولديغنه، تحميد ايسه بو صفت برائتك حصوليله برابر خلقه محسن، منعم، رحيم بولنديغنه دلالت ايدويور. خلاصه تسبيح، خدای متعالك تام اولديغنه اشارتدر. تحميد ايسه فوق التمام بولنديغنه دلالت ايدر. ايشته بوسيدن ناشی تحميد ايله ابتدا اولادر.

شو وجه وجيه، قوانين حكميه دن مستفاد اولوب، قوانين اصوليه لائق اولان وجه دخی بروجہ آتی بيان اولنور. شويله كه :

الله تعالى وتقديس حضرتلری - عبادك هر درلو حاجتلرینی بیلوب آكا كوره چاره ساز دفع احتیاج اوله یئلك ایچون جمیع معلوماتی عالم، عبادك محتاج الیه اولدقلری شیئی تحصیل قدرتیاب اولمق ایچون جمیع مقدوراته قادر، حاجت نفسنی دفع ايله اشتعالی حاجت عبادی دفعدن کندينی منع ایده چکی جهته دفع حاجات

عبادده بویله بر مانعیه تصادف ایتماک ایچون کافه حاجاتدن
مستغنی اولمق لازم کلیرکه، اک شامل معناسیله محسن اوله بیاسون.
بو افاده مزدن آکلاشیلیرکه جناب حقتک محسن اولسی آنجق
نقائص و آفادن منزه ومبرا بولنسیله تمام اولور. ایشته تین
ایتدی که، « الحمد لله » قولیله ابتدا - سبحان الله - قولیله ابتدا
اولادر.

فائده

۱۱

« الحمد لله » ک ماضی یه ده، مستقبله ده تعلقی واردر. ماضی یه
تعلقی شودرکه: نعم متقدمه به شکر، واقع اولور. مستقبله تعلقی
شودرکه: « ان شکرتم لازیدنکم » قول کریمی ناطق اولدینی اوزره
زمان مستقبله تجدد نعمی موجب اولور.
بو تعلقه عقل دخی دلالت ایدر.
شویله که:

نعم سابقه، خدمتده اقدامی، طاعته قیامی ایجاب ایلر. عبد،
شکر ایله مشغول اولنجه، عقل و قلبنده نعم الهیه نک قبولری
آچیلیر. ابواب معرفت و محبت خدا مفتوح اولور. بو انفتاح ایسه
اعظم نعم سنیه دندر. ایشته بومعاندن ناشیدرکه « الحمد » ک ماضی یه
درکار اولان تعلق سببیله ابواب نیرانی سکا قپار: مستقبله درکار
اولان تعلق سببیله ده، ابواب جنائی سکا آچار. دیمک اولدی که

زمان ماضیده کی تأثیری - جناب حق‌دن ابواب حج - ابی سد،
 مستقبله کی تأثیری ده - ابواب معرفة اللهی فتح ایتمکدر. مادام که
 درجات جلال خدایه نهایت متصور دکدر، فکذلک عبدی چون ده
 معارج معرفة اللهه نهایت یوقدر. ابواب معرفة اللهی آچه بیله جک
 مفتاح دخی آنجق - الحمد لله - قولمزدردر. ایشته بوسیدن ناشیدر که
 - سورة الحمد - (سورة الفاتحه) اسم سامیسیله نامور اولمش در.

فائده

۱۲

الحمد لله، بر کلمه شریفه جلیله در. لکن موضعنده ذکر اولنق
 لازمدر. یوقسه آندن مقصود اولان فائده حاصل اولماز. کبار
 اولیاء اللهدن سرئی سقطی حضرتلری کنندینه «طاعت نه وجه
 ایله اتیان ایدلمک لازم کلیر؟» دیه سؤال ایدنلره شوجوابی ویردی:
 «بن بر کره جک - الحمد لله - دیمش بولندیغمدن طولایی
 اوتوز ییلدر که جناب حق‌دن طلب مغفرت ایدیورم!»

سائل «اونصل سوز؟» دیدی.

ولی مشارالیه دخی ایضاحات آتیهی ویردی:

«بغدادده بیوک بر یانغین اولدی. نیجه اولر، دکانلر یاندی.
 او یانغین یرنده بنده بر دکانم وارایدی. فصلسه اودکان یانمادی.
 بکا بو خبری کتیر دکاننده سبویته رک - الحمد لله - دیدم. بو
 حمدمک معناسی ایسه ناسک بونجه دکانلری محترق اولدینی حالد

بنمکی نك نار حریقدن قور تولدیغنه فر حالانديغمی مشعر ایدی .
 حال بوکه حق دین، حق مروءت بو دکل ایدی . خلق کثیرک
 مصیبتزده اولدیغی اویله بر زمانده بن فر حناک اولمالی ایدم .
 آنک ایچون اول وقت دیمش بولندیغم شو — الحمدلله — سوزندن
 طولای تام اوتوز ییلدرکه استغفار ایدیورم ! »

ولی مشار الیهک شو کلامیله ثابت اولدی که — الحمدلله —
 بر کله جلیله اولدیغدن موضعنه رعایت ایتک لازم کلیر .

جناب حق عبده رایکان بیوردیغی نعم جلیله واقعا حدسز
 حسابسزدر . مع مافیه قسمت اولی حسبیله ایکی نوعه منحصردر .
 نعم دنیا، نعم دین .

نعم دین ایسه نعم دنیادن بالوجوه افضلدر .
 الحمدلله — بر کله جلیلهدر . بناءً علیه عاقل اولان کیمسه بوکله
 شریفی نعم خسیسه دنیا مقابلنده ذکر ایتمکدن چکنلی ، بالکده
 نعم دین دن بشقه هیچ بر نعمت مقابلنده ذکر ایتمالی در .
 نعم دین دخی ایکی قسمدر . اعمال جوارح ، اعمال قلوب ،
 بونکده قسم ثانسی اشرفدر .

نعم دنیا دخی ایکی قسمدر . نعمت دنیا بعضاً نعمت اولدیغی
 حیثیته نعمت ، بعضاً اده عطیه منع اولدیغی حیثیته عطیه منع
 اعتبار اولنور .

بونکده قسم ثانسی اشرفدر .
 ایشته حامد ، بو مقاماته رعایت و اعتبار ایتک لازم کلیر . تاکه
 — الحمدلله — قولمز موضعنه موافق ، سبینه لائق اولسون .

فائدہ

۱۳

بابامن حضرت آدم علیہ السلامک اے اول زیور زبان تقدیس
ایتدیک کی کلمہ طیبہ — الحمد للہ — در .
شویله کہ :

جناب ابوالبشر نفخ روح عقینده آفسیر مغله « الحمد للہ » دیدی .
اهل جنتک ده صوک کلامی « الحمد للہ » اوله جقدر . « و آخر
دعواهم ان الحمد للہ رب العالمین » قول کریمی بونی ناطقدر .
دیمک که عالمک فالحه سی ده ، خاتمه سی ده حمد اوزرینه مبنی در .
اوله ایسه سن ده چالیش که ، اعمالکک اولی ده ، آخری ده بو کلمه
شریفه به مقرون اولسون .
زیرا انسان ، عالم صغیر در . بناءً علیه آنک احوالی ده عالم کبیرک
احوالنه موافق اولمق لازم کلیر .

فائدہ

۱۴

ناسدن بعضیسی « کلام — قولوا الحمد للہ — تقدیرنده در »
دیدی .

بکا قالیرسه بو قول ، ضعیفدر . زیرا اضممار ، مجرد صحت کلام

ایچون اختیار اولنور . شو اضمار ایسه وجوه آتیه دلاتیله ثابت اولدیفی اوزره بالعکس فساد کلامی ایجاب ایدر .

وجه اول - الحمد لله، قولى حمدك حق خدا، ملك مولى اولديغندن بر اخباردرکه بو، فى نفسه کلام تامدر . اضمارده محتاج دکلدرد .

وجه ثانی - الحمد لله، قولى کندينه حمد ايتسونلر ايتسونلر جناب حقك بحسب ذاته و بحسب افعاله حمده مستحق اولديغنه دلات ایدر . زیر امور بدیهیه دندرکه « مابالذات اولی واجل مابالغیر » وجه ثالث - « واقعات » ده برمسأله ذکر ایتشار؛ دیمشارکه: بر پدر مشفق کوره لائق دکلدرد که ولدینه امر قطعی صورتند، « شونی یاپ! بونی یاپ! » دیسون . زیرا جائز که ولد، امر والده امثال ایتیهی ویررده آثم اولور . والد مشفق لدی الحاجه ولدینه « شویله بویله یایمق لازم کلیر » دیملیدر که ولدی اگر کریم الشیم ایسه پدرینه اجابت و اطاعت ایدر . اگر عاق وعاصی ایسه پدرینه شفاهاً رد ایله جواب ویرمزرده هیچ دکلسه کناهی دها آزاولور .

فائده

۱۵

کرك جبریه، و كرك قدریه كندی مذهب ناحق قرینك صحتی اثباتده « الحمد لله » قولیله تمسك ایتشاردر .

جبریه نك تمسكى

بر قاج وجه ايله در

وجه اول - محققدرکه هر کیمك فعلی اشرف واکمل اولورده
آندن صدور ایدن نعمت دخی سائرلرک نعمندن اعلى و افضل
بولورسه، آنک حمده استحقاقی ده اکثر اولور. اشرف مخلوقات
ایسه (ایمان) اولدیغنده شبهه یوقدر. آنکچون اگر (ایمان)
عبدك فعلی اولسیدی، عبدك حمده استحقاقی، الله تعالانك حمده
استحقاقندن اولی و اجل اولق لازم کلیردی.

مادامکه امر بالعکس در، بیلدککه (ایمان) آنجق خلق خدا
ایله حاصل اولمش در. خلق عبد ایله حاصل اولمامش در.

وجه ثانی - « الحمد لله على نعمة الايمان » دیمکده اجماع امت
واقع اولمش در. اگر (ایمان) فعل الله اولیوبده فعل عبد
اولسیدی، « الحمد لله على نعمة الايمان » دیدکری باطل اولق
لازم کلیردی. زیرا « ويحبون ان يحمداوا بما لم يفعلوا » قول کریمی
دلاتیله ثابت اولدیغی اوزره کندی فعلی اولمیان بر شیدن طولانی
فاعله حمد و ثنا ایتک باطلدر.

وجه ثالث - بز « الحمد لله، قولنك ظاهرى هر حمدك جناب
حقه مخصوص و منحصر اولدیغنه دلالت ایدر. غیر اللهین کیمسه نك
اصلا حمده استحقاقی یوقدر » دیه دلیل کتیرمشدک. اگر هر نعمتك
مصدری جناب الله ایسه، نعمت ایمان دخی جناب حقندن صادر
اولق لازم کلیر. زیرا (ایمان) افضل نعمدر.

وجه رابع - الحمد لله، قول کریمی جناب حق طرفندن
 کندی ذات پاکنه مخصوص برمدحدر. مدح نفس ایسه بین الخلق
 بر امر مستقیجدر. مادام که جناب باری کتاب کریمی مدح نفس
 اینه بدأ ایتدی، آنک حالی خاتمک حائنه مخالف اولدیغنه و خلقجه
 چرکین کورینان شیمک حقجه مستحسن بولدیغنه بو بر دلیلدر
 و بوده جناب بارینک افعالی افعال عبادہ قیاس اولنه بیلکدن مقدس
 و متعالی ایدوکنه دلالت ایدر. زیرا بعض شیر وارکه او شیرک
 طرف عیددن صدوری قبیح اولدیغی حالده جانب حقدن صدوری
 قبیح دکلددر. ایسته بو استدلال بالکلیه هادم اصول اعترالدر.
 المترجم - حضرت مفسر جبریدنک دها بر قاج وجه استدلالی
 بیان ایتمش ایسه ده ترجمه سندن صرف نظر ایدلشدر. صوک.

فائده

۱۶

شکرک و جوئی عقلاً می سمعاً می ثابتدر؟ بوراسی تحت اختلاف فدهدر.
 ناسدن بعضیسی - «وما کننا معذین حتی نبعث رسولاً»
 و «رسلاً مبشرین و منذرین لئلا یکون للناس علی الله حجة بعد
 الرسل» آیت جايله لر یاه بالاستدلال، وجوب شکر سمعاً ثابتدر دیدی.
 کیمی دیدی که: شرع شریفک مجتهدن اولده، صکرده ده
 علی الاطلاق ثابتدر و بونک دایلی ده «الحمد لله» قولیدر که صورت
 ثبوتی بر قاج وجه ایله ایضاح اولنور.

۱ — الحمد لله، قولى شو حمد، على الاطلاق جناب حقاك
حقى وملكى اولديغنه دلالت ايدر. بوده شو استحقاقلق قبل محيى
الشرع ثبوتنه دلالت ايلر.

۲ — حق تعالى حضرتلرى — الحمد لله رب العالمين —
بيوردى. اصول فقهده ايسه ثابت اولمشدر كه وصف مناسب اوزرينه
حكماك ترتبى، او حكماك وصف مذكور ايله معلل اولسنه دلالت
ايدر. ايشته بورادده جناب حق حمدى نفسنه اثبات ايدرك
كندىنى هم رب العالمين، همده عوالمه رحمان ورحيم اولمقاه وروز
رستخيزده عوالمك عاقبت امرلرينه مالك بولمقاه وصف ايلديكى
جهتله بو وصفلر دلالت ايدركه حمد و تعظيمه استحقاق آنجق
عوالمك مرييسى، رحمانى، رحيمى اولمقاه حاصل اولور. مادام كه
امر بويله در، حضرت پيغمبرك ايستر مجيئندن اول ايستر صكره
اولسون؛ جميع اوقاتده حمد و تعظيم، جناب خداوند عليه خاص
اولديغى درجه ثبوته وارر.

فائده

۱۷

حمدك حقيقت و ماهيتندن ده بحث اتمه من لازم كليز.
تحميد خدا — الحمد لله — قولمزدن عبارت دكلدر. زيرا
— الحمد لله — قولمزدن حصولندن اخباردر. بر شيدين اخبار
ايسه مخبر عنهلك عينى دكل، مغايرى در. بناء عليه تحميد خدا

— الحمد لله — قولزه مغاير اولمق لازم کليز. يا منعم حقيقيه مجبور
ايفاسي اولديغيمز حمد نهدن عبارتدر؟ هر هانكي فعل که منعمک
منعم اولمسي سبيله تعظيمي مشعر اوله، حمد ايشته اوفعلدن عبارتدر.
اوفعل دخي يا فعل قلب، يا فعل لسان، يا خود فعل جوارح
اولور.

تعظيم منعمي مشعر اولان فعل قالب نهدر؟
مولای متعالک کمال و اجلال صفتلريه موصوف اولديغني
اعتقاد ايتکدر.

فعل لسان نهدر؟
الله ذو الجلالک صفات کمال ايله موصوف اولديغنه دلالت
ايدر لفظلر ذکر ايتکدر.

فعل جوارح نهدر؟
منعم عميم النوالک کمال و اجلال صفتلريه اتصافنه دلالت ايدر
افعالی اتياندر.

ايشته حمددن مراد بونلردر.
معاومک اولسون که اهل علم بومقامده ايکي فرقه يه آيرلمشالردر.

اولکي فرقه

«جناب حَقِّک کندينه حمد ايتلريني قوللرينه امر بيورمسي
جائز دکلدر» دينلردر که بونک اوزرينه بر قاچ وجه ايله احتياج
ايتشاردر.

۱ — عباداللهک اتيانيله مأمور اولمش اوله جملري تحميد،

یا کندیلرینه واصل اولان ویاخود کندیلرینه واصل اولمیان بر انعام اوزرینه اوله جقدر .

احتمال اول ایسه باطلدر . زیرا بوا احتمال جناب حَقْ قوللرینه اولان انعامه مقابل کندیلرندن بر نوع، جزا و مکافات طاب ایتمش اولسنی اقتضا ایدر .

انعام و احسانی مقابلنده طاب مکافات ایسه کمال کر مه منافی در . زیرا کریم، کرم و انعامی مقابلنده طاب مکافات ایتمز .

احتمال ثانی که کندینه هنوز واصل اولمیان بر نعمته مقابل عبدی مجبور حمد ایتمکدر، ابتداءً غیرى. اتعاب دیمکدر که بوده ظلمی ایجاب ایدر .

۲ — دیمش لکه : بو حمد ایله اشتغال، حامد ایچون تعب و مشقتی موجب، محمود ایچون غیر نافع در . زیرا محمود، کامل لذاته اولوب بویله کمال ذاتی ایله کامل اولان جناب بارینک ایسه غیر یله مستکمل اولسی مستحیلدر . ایشته تبیین ایتدی که، بو حمید ایله اشتغال عبثدر . ضرر در : بناءً علیه حمیدک مشروع اولماسی لازم کلیر .

۳ — معنای ایجاب، فعل واجبی ترک ایدن مستحق عقاب اولور دیمکدر . حمد خدانک ایجابی معناسی ده « شو حمد ایله مشغول اولما زسه ک، سنی معاقبه ایدرم ! » دیمک اولوب حال بوکه شو حمدک حق باریده هیچ بر نفعی یوقدر . بو صورتده ایجاب حمدک معناسی « کیسه یه برفائده سی اولمیان شو فعلی ترک ایدر سه ک، ابدالآ باد سنی معاقبه ایدرم ! » دیمک اولور که بویله بر معامله حکیم و کریم اولانه سزاوار دکلدر .


ایکنجی فرقه

دیشلرکه: حمد خدا ایله اشتغال بر قاج وجهدن طولای
سوء ادبدر.

۱ — احسان الہیہ حامدک حمد وشکریہ مقابلہ ایدلمش
صایایلر!

۲ — شکر ایله اشتغال، موجب شکر اولان نعمتاری قلبده
استحضاره متوقفدر. قلبک نعم ایله اشتغالی ایسه معرفت منع ایله
استغراقی مانعدر.

۳ — نعمتک وجدانی حالنده جناب حقہ ایدیله جک شکر
و ثنا آنجق او نعمته نائلیمدن ناشی اولدیغنه دلالت ایدرکه بوده
عبدک عبادتدن، شکر و ثنادن مقصودی نعم مذکورده فوز و ظفر
اولدیغنه شهادت ایلر. بو حال و اعتقادده اولان شخصک ایسه
حقیقته معبودی، مطلوبی جناب حق دکل، آنجق او نعمتدن،
حظ نفسدن عبارت اولمش اولورکه بو بر مقام نازلدر.



فصل ثانی

رب العالمین

قول کریمک تفسیری بیانده اولوب بر قاچ فائده بی مشترکدر

فائده

۱

موجودات ایکی قسمدر . واجب، ممکن .
واجب لذاته که، ذاتی وجودنی مقتضی اولان دیمکدر، آنحق
جناب حقدر .

ممکن لذاته، دخی ماسوی الله هر شیئه اطلاق اولنور که بونک
عنوان دیکری ده (عالم) در .
زیرا متکلمین، (عالم) سوی الله هر موجوده اطلاق اولنور
دیدیلر .

موجوداتک شو قسم ممکنه (عالم) تسمیه اولنمسنه سبب
بودر که سوی الله هر شیئک وجودی وجود الیه دلالت ایدر .
ایشته بوسبیدن ناشی سوی الله هر موجوده (عالم) نامی ویرلشدر .
بوراسی معلومک اولنجه دیرز که :

ماسوی الله هر موجود یا متحیزدر؛ یا بر متحیزک صفتیدر؛
ویا خود نه متحیزدر؛ نه ده بر متحیزک صفتیدر . بو حسابجه ماسوی
الله اوچه منقسم اولور .

قسم اول

متخیز

متخیز، یا قابل قسمتدر؛ یا دکلدر .

قابل قسمت ایسه جسمدر . دکلسه جوهر فرددر .

جسم، یا علوی یا سفلی اولور .

اجسام علویه، افلاك و کواکبدر .

شرع شریف ایسه بزه بو شیلردن بشقه عرش، کرسی،
 سدرۃ المنتهی، لوح، قلم، جنت کبی دها بعض شیلرک وجودینی ده
 خبر ویرمشدر .

اجسام سفلیه، یا بسیط یا مرکب اولور .

اجسام بسیطه، عناصر اربعه درکه بونلردن بریسی — کرۂ

ارض ایله اوزرندکی مفاوز، جبال، و بلاد معموره در .

ایکنجیسی — کرۂ مادر .

بوده بحر محیط ایله ربع معموره موجود اولان بحار کیره

و آنلردکی اودیۂ عظیمة درکه عددلرینی اللهدن بشقه بیان یوقدر .

اوچنجیسی — کرۂ هوادر .

دردنجیسی — کرۂ نارددر .

اجسام مرکبه دخی کثیر الاقسام و متباین الانواع اولان

نبات، معادن، حیواندر .

قسم ثانی

متخیراتک صفتی اولان ممکن

بوده ارواح در .

ارواح، یاسفلی یا علوی اولور .

ارواح سفلیه، یا ارواح خیره اولور که بونلر طائفة جنک

صالحلریدر . یا ارواح شریره اولور که بونلرده مرده شیاطیندر .

ارواح علویه، یا اجسامه متعلق اولورلر که بونلر ارواح فلکیه در .

یا خود اجسامه متعلق اولمالر که بونلرده ارواح مطهره مقدسه در .

ایشته شو ایضاحات، موجودات عالمک تقسینه اشارتدر .

انسان، اگر بو اقسام موجوداتک شرحنده بر ملیون کتاب

تألیف ایتسه، ینه اقسام مذکوره مراتبتک اک قلیانی بیله بیان

و ایضاحه مقتدر اوله ماز .

یالکزر شوراسی ثابت و متین در که، جناب حق، واجب

الوجوددر . بر در . شریکی، نظیری یوقدر . آنک جمیع ماسواسی

ممکن الوجوددر . بونلر وار اولمده ایجاد واجبه محتاجدر .

ایجاددن صکرده ممکن، حال بقاده بر مبقدن مستغنی اوله ماز .

واجب تعالی و تقدس حضرتلری کافه عوالمی یوقدن و هیچدن

صحرای وجوده اخراج ایتش اولمق حیثیتیه « آله العالمین » در .

عوالمی، حال دوام واستقرارده ابقا ایدن اودر . بوجهتلهده

« رب العالمین » در .

بورالری معلومك اولنجیه « الحمد لله رب العالمین » قولنك
تفسیرندن سکا آز بر شی منکشف و ظاهر اولور .
شو اقسام ثلاثه نك احوالنه احاطه می اکثر اولان کیمسه نك
« رب العالمین » قولنك تفسیرینه ده وقوف واطلاعی اکثر اولور .

فائده

۲

مربی، ایکی به منقسمدر .
بر قسمی - کندیه سودمند اولق ایچون بر شیئی تربیه
ایدندر .

دیگر قسمی - مجرد مربایی سودمند ایتک ایچون تربیه
ایدندر .

جميع خلقك تربیه می ایسه قسم اوله مقصوددر .
زیرا آنلر، بشقه لرینی یا ثواب، یا خود شناکی بر مقصد
استفاده تحتده تربیه ایدرلر .

قسم ثانی ده مذکور اولان مربی دخی آنجق جناب حقدر که
بومعنائی (خلقتکم لترجوا علی لا لاریج علیکم) قول شریفی موضحدر .
جناب باری مخلوقاتنی هم تربیه، همده مظهر احسان بی نهاییه
ایدر . سائر مربیلر، سائر محسنلر ایسه بونك خلافتدر .
شوراسی ده معلوم اولمیدر که تربیه خدا، بشقه سنك تربیه سنه
بالوجوه مخالفدر .

۱ — خدای متعال قوللرینی کندی غرضی ایچون دکل،
آنلرک غرضی ایچون تربیه ایدر. بشقه لری ایسه بالعکس تربیه
ایتدکارینی مریبالرینک غرضی ایچون دکل، مجرد کندی غرضلری
ایچون تربیه ایدر لر.

۲ — غیرالله، برینی تربیه ایدر سه، تربیه سی نسبتده مالی
اکسیایر. الله ذو الجلال ایسه (وان من شیء الا عندنا خزائنه
وما ننزله الا بقدر معلوم) قول کریمی ناطق اولدیغی اوزره نقصان
و ضرردن متعالیدر.

۳ — اللهم ینبشقه محسنین دن کیم اولور سه اولسون برفقیر
کندینه الجاح و ابرام ایدنجه آکا بغض ایدر. ایلک ایده جک
اولسه بیله ایتیمه ی ویرر. حق تعالی و تقدس حضر تلی ایسه بونک
خلافتدهر. نته کیم نبی ارجم افندمن (ان الله یحب المحبین فی الدعاء)
بیور مشدر.

۴ — اللهم ینبشقه محسنین دن کیم اولور سه اولسون کندیدن
ایستلمدکجه بر شی احسان ایتمز. حق تعالی حضر تلی ایسه قبل
السؤال ده احسان و اعطا ایدر.

کورمز میسین که جناب حق سنی جنین ایکن ده آنا رحمنده
تربیه ایلدی. جاهل و غیر عاقل ایکن ده آندن هیچ بر شی طلب
ایتمکسزین هر در لو آفادن و قایه و نیجه انعام و احسانیه تربیه ایلدی.

۵ — اللهم ینبشقه محسنین دن کیم اولور سه اولسون، یافقر،
یاغیت، یا موت سبیلده آنک احسانی منقطع اولور. جناب حقک
احسانی ایسه هیچ بر وجه ایله منقطع اولماز.

۶ — اللهم دن بشقه محسنين دن كيم اولورسه اولسون، آنك احسانى كافه اقوامه شامل اوله ماز. اولسه اولسه يالكر بر قومه مخصوص ومنحصر اوله بياير. حق تعالى وتقدس حضر تارينك تربيه سى، احسانى ايسه جمله يه واصل وشاملدر. نصل كه (رحمتى وسعت كل شىء) بيورمش در.

ايسته شو دلائل ايله ثابت اولدى كه «رب العالمين ومحسن الى الخلائق اجمعين» جناب حقدر.

بوسيله مبنى در كه كندى حقنده (الحمد لله رب العالمين) بيوردى.

فائده

۳

دنياه بر ذات شو درت وجهك بريسى ايچون حمد ومدح وتعظيم اولنور.

سكا بر احسانى اولسه بيله مجرد يا داتنده، صفاتنده كامل، جميع نقائص و آفادن منز اولدينى ايچون،

ياخود، سكا محسن ومنعم اولدينى ايچون،

ياخود، زمان مستقبليه بر احسانى اومديغك ايچون،

ياخود، قهرندن، قدرندن، كال سـطوتندن قورقديغك ايچون آكا حمد وتعظيم ايدرسين.

ايسته تعظيمك جهات موجهه سى اولان حالات بونلردر.

بناءً عليه حق سبحانه وتعالى حضر تارى كويا «اكر كال ذاتى بي

تعظیم ایدنلردن ایسه کز، بکاحمدو تعظیم ایدکز! زیرا بن آله العالمینم.
[الحمد لله، قولندن مراد بودر.]

اگر احسانی تعظیم ایدنلردن ایسه کز، «رب العالمین» بنم.
اگر مستقبلده نائل احسان اولمق طمعی ایچون تعظیم ایدیورسه کز،
رحمان ورحیم بنم. اگر قورقو ایچون تعظیم ایدیورسه کز مالک
یوم الدین، بنم «دیش اولور».

فائده

۴

جناب حق قوللرینی قاچ وجه ایله تربیه ایدیور؟ بو قابل
بیان و تعداد دکدر. وجوه تربیه غیر متناهی در. بناءً علیه یالکز
بر قاچ مثال ایرادیله آکثا ایدرز.

۱ — مثال، وقتاکه برقطره نطفه صلب پدردن رحم مادره
دوشدی؛ باق که فصل اولا — علقه، ثانیاً — مضغه یه متحول،
سکرده آندن عظام، غضاریف، رباطات، اوتار، آورده،
شراین [ط] مثللو اعضای مختلفه متولد اولوب بعده اعضای

[ط] علقه، اویشمش قان. (مضغه) کوشته پاره. (عظام) کیک معناسنه
اولان عظمک جعی. (غضاریف) اسلوب وزنده اولان (غضروف) نک
جعیدرکه قولاق کیکنه و دیگر یومشاق کیکلره دینیر. (رباطات) رباطک
جعیدرکه مفصللارده کیکلری یکدیگرینه ربط ایلیان سکره دیرلر.
(اوتار) وترک جعیدرکه اوزون سکرلره دینیر.

(آورده) وریدک جعیدرکه پیونده اولان شاخ طمرک استمیدر.
(شراین) شریانک جعیدرکه نبض طمرلرینک نامیدر.

مذکور ددن بعضیسی بعضیسنه اتصال ایله هر برنده انواع قوادن
بر نوع خاص حاصل اوله رق قوه باصره کوزده، قوه سامعه
قولاقده، قوه ناطقه لسانده حصوله کلدی .

« فسبحان من استمع بعظم وبصر بشحم وانطق بلحم »

بدن انسانك کیفیت خلقتی یلدرن کتاب تشریح اوقونسه
نیجه عجائب حکم الهییه تصادف اولنور . بو احوالك هر بری
حکیم متعالك عبدی نه یولده تربیه بیوردیغنه برر دلیل باهردر .
۲ — مثال، یاش طوپراغه دوشن حبه شیشوب قبارر .

بو انتفاخ ایسه حبه نك هر جانبنده حاصل ایکن یالکز اوست
و آلت طرفلری یاریلر . اوست یاریغندن شجره نك جزء صاعدی،
آلت یاریغندنده شجره نك کوکلی دیمك اولان جزء غائی
خروج ایدر . جزء صاعدك صعودندن (ساق) حاصل، او،
ساقندنده اغصان کثیره منفصل اولور . صکره بو دالدرده
رنکارنك چیچکار، او چیچکلرک آردنجه کوناکون میودلر رونمون
اولور .

میودلرکده ابتدا لطافت و کشفده مختلف اولان قشرلری،
صکره لباری، دها صکره دهنلری حصوله کلیر .

شجره نك جزء غائضندن تحت الارض اطراف شجرهیه منتشر
اولان کوکرایسه، ماء منعقدکی غایت لطیف ایکن، اك صلابتلی،
اك خشونتلی یرلری بیله یاردق هم طوپراغه طالار کیدر؛ همده
جناب حقك آنره ایداع بیورمش اولدیغی قوای جاذبه واسطه سیله
یاش طوپراغك اجزای لطیفه سنی کندیارینه جذب ایدرلر .

شو تدبیراتك كافه سنده کی حکمت بالغه الهیه ایه، مجرد غذا، قاتق، فواکه، اشربه، ادویه دن عبدك محتاج الیه اولدینی شیلرك تحصیلدر. نته کیم بو معنایی مشعر اوله رق حضرت قرآنده (انا صبينا الماء صبا ثم شققنا الارض شقاً - الآيات) بیورلش در.

۳ — مثال، خدای متعال افلاك و کواکبی مصالح عبادك حصولنه سبب و خادم اوله بیله جك بروضعیته قودی. سبب سکون و راحت اولق ایچون کیجه یی، مدار معاش و حرکت اولق ایچون کوندزی خلق ایلدی. آفتابی منیر، ماهتابی مستنیر «عدد سنینی، حسابی بیله سیکزدیه» قره بر طاقم منازل تقدیر ایدن او ذات اقدس و اعلا در. بدایع آثار حکمت و رحمتنه واله و حیران اولدیغمنز او، خداوند علیم ایه بو نلری ناحق یراتمامشدر. ظلمات بر و یجرده سزه دلیل راه صواب اولان یلدزلری ده یرادان اودر. «الم نجعل الارض مهاداً والحيال اوتاداً»

قول کریمنی آخر آیه دک دقتله اوقوکه تحصیل و تسهیل احتیاجات عباد ایچون جناب رب العبادك ده نلر خلق و ایجاد بیوردیغنه بر علم اجمالی حاصل ایده سین.

اگر عجائب احوال معادن و نبات و حیوانی، آفرینش انسانده کی آثار رحمت زحماتی پیش نظر تأمل و امعانه آیرسهك، آثار تربیت خدانك اسبابی نه قدر متکثر، دلائل رحمت مولانك نه درجه لائح و ظاهر اولدیغنه عقلك بالبداهه حکم ایدر. ایشته اوحالده بحار اسرار - الحمد لله رب العالمین - دن سکا برقطره بدیدار اولور.

فائدہ

۵

جناب حق حمدی نفسہ اضافہ ایدرک — الحمد لله — بیوردی۔
 آدن صکرده نفسی عوالمہ اضافہ ایلدی۔ آنک ایچون معنای
 آیت (انی احب الحمد فنسبته الی نفسی بکونه ملکاً لی ثم لما ذکرک
 نفسی عرفت نفسی بکونی رباً للعالمین) تقدیرنده در۔
 بدیهیدرکہ هرکیم بر ذاتی بر صفتله تعریف ایلرسه صفاتک
 احسن واکملنی ذکر ایتک ایستر۔ ایسته بو دلالت ایدرکہ جناب
 بارینک — رب العالمین — اولقلنی اکل صفاتدر۔ نفس الامرده
 اویله در۔ زیرا اکل مراتب۔ تام وفوق التمام اولقدر۔ بو جهتله
 (لله) قولمز جناب حقک — فی ذاته وبذاته — واجب الوجود
 لذاته اولدیغنه دلالت ایدرکہ (تمام) ایله مرادبودر۔ (رب العالمین)
 قول شریفنکده معناسی «ماسوی اللهک وجودی تربیت واحسان
 وجود خدادن فائضدر» دیمک اولوب (فوق التمام) قولمزدنده
 مراد بودر۔

فائدہ

۶

«وما یعلم جنود ربک الا هو» قول کریمی ناطق اولدینی اوزره

جناب حق سندن بشقه عبادده مالکدر . سنک ایسه آندن بشقه ربک یوقدر . حال بویله ایکن او کویا سندن بشقه قولی یوغیش کبی سنی او صورتده تربیه ایدیور ! سندن ده بالعکس کویا ده بشقه ربک واریایش کبی آکا اویله خدمت ایدیورسین ! ایدی انصاف ایسترم ! بوندن کوزل تربیه می اولور ؟ سنی کوندزین آفادن، کیجه لین مخافاتدن حفظ ایتیورمی ؟ معلومدرکه مستحفظلر امرایی هر کیجه حفظ و حراست ایدرلر . فقط عجیبا حشراتک صوقسندن، بلیاتک چوکسندن ده محافظه ایده بیلورلرمی ؟ نه ممکن ! ؟ حق تعالی حضرتلری ایسه آنلری آفادن حراست، مخافاتدن صیانت ایلر . انصاف ایسترم ! بوندن بیوک بوندن کوزل تربیه می اولور ؟

رسول الله صلی الله علیه وسلم افندمن « آدم، بناء اللهدر . بناء اللهی ییقان ملعوندر » مألنده اوله رق (الادی بنیان الرب، ملعون من هدم بنیان الرب) بیورمشدر .

بو نه تربیهدر ! ایشته (قل من یکلؤکم باللیل والنهار من الرحمن) قول کریمی بو معنایی مشعردر . بو حافظ حقیقی ملک جبار، واحد قهار، مقلب القلوب والابصار، واقف ضمائر واسرار اولان جناب پروردکاردن بشقه کیم اوله بیلیر ؟

فائده

۷

قدریه دیمشدرکه :

الله تعالی اگر عواله احسان ایدر، کندیلرندن مضراتی دفع

ایلرسه، آنجق او وقت عوالمک ربی و مریسی اولمغه سزاوار اولور. اما کفری، کفری خلق ایدر، صکرده کفری تعذیب ایلرسه، کفرده ایمان ایله امر بیوروبده صکره آتی ایماندن منع ایدرسه اول حالده نه رب اوله بیلیر ! نه مری ! بلکه ضار، مؤذی اولمش اولور.

جبریہ دیمش درکه :

اگر (نعمت) کندیدن صادر، (الطاف) رحمت الهمیه سندن فائض اولورسه جناب حق آنجق اول وقت عوالمک ربی و مریسی اولمغه مستحق اولور. مادام که (ایمان) نعمتک اعظم واجلی در، جناب حق عوالمک ربی، و کندیلرنده ایمانی یراتمق سببیه محسنی اوله بیلک ایچون ایمان آنک طرف الهمیه سندن حاصل اولمش اولمق لازم کایر.

فائده

۸

اسماء الاهی نفسیر ایتدی کمز صردهه بیان ایتمش اولدی عزمز وجه ایله الله، قولمز (رب) قولمزدن اشرفدر .
حال بویله ایکن دعا ایدنلر اکثر اوقاتده « یارب ! یارب ! » دیرلر . بونده کی سبب، تفسیر اسماده مذکور اولان نکت ووجهدر .
بناءً علیه آنلری بوراده تکرار ذکر ایتیه جکمز .

فصل ثالث

الرحمن الرحيم

بو آيت جليله نك تفسيرى ده بعض فوائدى مشتملدر

فائده

۱

رحمن، شول منع بى امتساندر كه جنس انعامك عباددن
صدورى متصور دكلدر .
رحيم، شول منع مدر كه جنس انعامك عباددن صدورى
متصور در .

ابراهيم بن ادهمدن محكيدر؛ ديمش كه:
برينه مسافر اولمشدم . بكاييه جك حاضر لادى . متعاقباً
بر قارغه كلوب سفره اوزرندن بر پارچه اتمك آلوب كوتوردى .
بن ده تجب ايدرك قارغه نك آرقه سمنه دوشدم، قارغه بر تپه يه
قوندى . اوراده الى آياغى باغلى بر كيمسه وارايدى . قارغه اتمكى
او كيمسه نك يوزينه آتى ويردى .

ذى النون مصریدن مرويدر؛ ديمش كه:
خانه مده اوطوروب طور ركن قلمده بر اضطراب حس
ايتدم . او اضطراب درونم كند كجه چوغالدى . بر درجه ده كه

كندىمى ضبط ايدەمىھەرك اودن طيشەنارى فرلادم . كيدە كيدە
 شط نيلە واردم . اورادە قوجامان بر عقرب كوردەم كە قوشوب
 كيديور . بئە آنك آرقەسنە دوشەدم . عقرب نيلك كئارينە
 واصل اولدى . اورادەدە بر قوربغە طورىيور ، كوياعقربك ورودبە
 منتظر اوليوردى . عقرب ، قوربغەنك آرقەسنە سچرادى .
 قوربغەدە يوزوب كىمكە باشلادى . بئە بر قايقە بنوب بونارى
 تعقيب ايتەم . قوربغە نيلك اوبر ساحلنە واصل اولنجە عقرب
 آرقەسەندىن اينەرك قوشغە باشلادى . بئە آرقەسەنى بر اقدم . برە
 كوردەم كە بر شجەرنك سايەسەندە كىچ بر دليقانى ياتمش اويويور .
 بر حىە ھالاھل فشان دخى اوتەدن باش كوستردىكنى كوردەم كە
 شاب نائەك اوزرينە طوغرى كليوردى . حىە ، اويتقودەكى
 دليقانىلە ياقلاشير ياقلاشماز عقرب دخى حىە يە يتشدى . عقرب ،
 حىەنك اوزرينە سچرادى . حىەنى صوقدى . حىەدە عقربى
 صوقدى . ايكيىسى بردن ھلاك اولديار . شاب نائەم دخى ايكيىسەنك دە
 مضر تەندن سالم اولدى .

محكىدەركە : قارغەنك ياوروسى يمورطەدن تويىسز قىپ قىزمى
 بر ات پارچەسى كې چىقار ايمش ! قارغە آنى كورنجە قاچاردە
 ياوروسەنك تربىەسنە باقماز ايمش ! سكرە اوت پارچەسى كې
 ياورو اوزرينە سيورى سەنكلەر قونار ، ياورودە آنلرى برر برر
 يوتار ايمش دە بو صورتە غەدالنيرمش ! ايشەتە تا تويارى كلنجەيە
 قدر قارغە ياوروسى بويلەككە كچنەرك وجودينك ھر طرفنى
 توى قاپلانچە آنامى كلير بسيلەككە باشلارمش ! بوسبە مېنى درە

ادعیه عربده «یا رازق النعاب» [*] فی عشه» وارد اولمش در .
ایشته شو مثاللردن ظاهر اولدی که فضل خدا جمله یه عام،
احسان مولی هر کسه شامل، رحمت ذوالکبریا واسع در .

*
**

معلوم اولسون که، حوادث کونیه ایکی یه منقسمدر .
بعض حوادث وارکه ظاهرده رحمت ظن اولنور؛ مع هذا
حقیقته رحمت دکل، عذاب و تقمتمدر .
بعض حوادثده وارکه ظاهرده عذاب و تقمت ظن اولنور؛
مع هذا حقیقته فضل واحسان ورحمتمدر .
قسم اوله مثال — بر پدر چوجغنی تعله سوق ایتزده هر
ایستدیکنی یا یاق اوزره کندی حالنه بر اقرسه، چوجغه کوره
کرچه بو، ظاهرده بر نعمت کبی کورینور؛ اما باطنده بر تقمتمدر .
قسم ثانی یه مثال — بر پدر معارفرو چوجغنی مکته ویرر،
تعله مجبور ایدرسه، بوده چوجغه کوره کرچه ظاهرده بر تقمت
کبی کورینور؛ اما باطنده راحت ورحمتمدر .
انظار بلها ظواهره، انظار عقلا سرائره منعطفدر .
دنیا ده قدر محنت و مشقت و ارایسه کرچه ظاهرده عذاب
والم کبی کورینور؛ اما حقیقته حکمت ورحمتمدر .
بونک محقیقنی ایسترمیسین ؟ دیکله !

[*] نعاب، غراب و زننده فارغه نك اومه سنه ده، قارغه یه دینیر .
(عش) عینک ضمی شینک تشدیدیه آخاجده اولان قوش یووه سنه دینیر .

حکمةً ثابتدرکه شر قليل ایچون خیر کثیرک ترکی مستلزم
شر کثیردر .

تکالیف شرعیهدن مقصود، ارواحی علائق جسدانیهدن
آطهیردر . (ان احسنتم احسنتم لانفسکم) قول کریمی بو معنایی
مصدقدر .

خلق ناردن مقصود، اشراری اعمال ابراره چویرمک،
دارالفراردن دارالقراره چکمکدر . (ففرؤا الی الله) قول کریمی
بو معنایی ناطقدر .

موسی و خضر علیهما السلامک قصه مشهوره لری بو بابک
مثال اقریدر .

حضرت موسی، حکمی ظواهر اموره بنا ایدردی ده او
جهتله سفینه نک تخریقنی، غلامک قتلنی، جدار مائلک عمارتی
استنکار ایلدی .

حضرت حضرایسه سکملرینی حقائق واسراره بنا ایدردی ده
آنک ایچون (اما السفینه فکانت لمساکین یعملون فی البحر فاردت
ان اعیسها وکان ورائهم ملک یاخذکل سفینه غضباً . واما الغلام
فکان ابواه مؤمنین فحشینا ان یرهقهما طغیاناً وکفراً . فاردنا
ان یبدلهما ربهما خیراً منه زکاةً واقرب رحماً . واما الجدار
فکان لغلامین یتیمین فی المدینة وکان تحته کنز لهما وکان ابوهما
صالحاً فاراد ربک ان یبلغا اشدھما ویستخرجا کنزھما رحمة من
ربک) دیدی .

ایشته شو قصه دن ظاهر اولدی که حکیم محقق، امورینی

ظاهره دکل، حقائقه بنا ایدندر. آنکچون شاید افعال خدادن
طبعاً کریه، عقلاً غیر وجیه بر شی کوره جک اولورسهک، محقق
بیلایسین که آنک تحتنده مطلقاً بر طاقم اسرار خفیه و حکم بالغه
الهییه وارددر. آئی جناب حکیم ورحیم حکمت ورحمتی اقتضا
ایتمش در.

شو دقیقه‌نی پیش نظر دقت و تأمله آلیورسهک، بحار اسرار
« الرحمن الرحیم » دن سکا بر اثر ظاهر و بیدار اولور.

فائده

۲

الرحمن، نام خاص یزداندر.
الرحیم، جناب اللههده، غیر اللههده منطلق اولور.

سؤال

بوصورتده (رحمان) زحیمدن اعظم اولمق لازم کلیر. اوایله
ایسه نیچون ادنادن اول، اعلائی ذکر ایتدی؟

جواب

زیرا کبیر و عظیمدن شیء حقیر و یسیر طلب اولغاز.
محکیدرکه:

بر یسی اکابردن بر ذات کریم الشیمک نزدینه کیده رک « بر
مهم یسیر ایچون سزه کلدیم! » دیمش.
اودات دخی « اوایله ایسه اواهمیتسنز ایشک ایچون براهمیتسنز
آدم آراملیسین! » جوابی ویرمش در.

بو حکمتہ مبنی در کہ جناب حق کویا « یالکز - الرحمن -
 دیسہ یدمده بو وصفی - الرحیم - ایله تعقیب ایتسہ یدم، سن
 بندن چکینیردکده امور یسیردی طلب ایتماک متعذر اولوردی .
 لکن سن بنم رحمان اولدیغمی بیلدیگک ایچون نصل بندن امور
 عظیمه طلب ایدیورسہک - چونکہ بن رحیمده آنک ایچون
 آیانگده کی نعلک قایشنه، قینایدیگک چومالکک طوزینه وارنجیه
 قدر محتاج الیه اولدیگک شیلری کاملاً بندن ایستیه بیایرسین» دیش
 اولور.

نصل کہ حضرت موسایهده (سانی عن ملح قدربک و علف
 شاتک) بیورمش در .

فائدہ

۳

جناب حق ذات اقدسنی رحمان و رحیم اولمقله وصف
 بیورمش در . حضرت مریم علیها السلامه ایسه « ورحمة مناوکان
 امرأ مقضیاً » آیت جلیله سی منطوقنجه یالکز بر رحمت اعطا
 ایشیکن او رحمت واحده کفار و فجارک توبیخندن حضرت
 مشارالیهانک نجات و خلاصنه سبب اولمش در . یا بزکہ هر کون
 اوتوزدر در کره ذات پاکنی رحمان و رحیم اولمقله وصف ایدوب
 طوررکن، عجبا بو ذکر من عذاب ناردن، عار و دماردن خلاصنزه
 سبب اولیه جقمی در ؟

[صلوات مکتوبه اون یدی رکعتدر . - الرحمن الرحیم -

هر رکعتده ايکي کره اوقونور . بر کره — بسم الله الرحمن الرحيم
 — ده، بر کرده — الحمد لله رب العالمين الرحمن الرحيم — ده،
 بو حسابجه اوتوز درت عدده وارر .]

فائدہ

۴

جناب رب العالمين، رحماندر .
 چونکه عبدك قدرتي تعلق ايتمين شيلري يرادر .
 رحيمدر .

چونکه جنسني ياممغه عبدك قادر اولماديغي ايشلري ياپار .
 آنکچون جناب رب العالمين (وصورکم فاحسن صورکم) قول
 کریمی ناطق اولديغي اوزره کويا « بن رحمانم ! زيرا سن بکا بر
 نطفه تسليم ايديورسين ؛ بن ايسه آني بر صورت حسنه يه افراغ
 ايله سکا اويله جه تسليم ايديورم . بن رحيم ! زيرا سن بکا ناقص
 بر طاعت تسليم ايديورسين ؛ بن ايسه مقابلهده بر جنت خالصه
 ويريورم . » ديمش اولور .

فائدہ

۵

مرویدرکه :
 بر دليقائيلنك اوله جكنه ياقين ديلي طوتلدي ده كلمه منجيّه
 شهادتي سويليه من اولدي .

حضرت رسول اکرم وارحم افندمن کیفیتدن خبردار اولنجه
بالذات نزد مریض محتضره واروب کلمه شهادتی سویلتمکه خیلی
اقدام بیورمشار ایهده مفید اولمادی!

حضرت پیغمبر «بودلیقانی نماز قیلاز، اورج طومتاز، زکات
ویرمزمی ایدی؟» دیه صور دیلر.

حاضر اولانلر «بلی!» دیدیلر.

«والدیننه عصیان ایتدیکی وارمی ایدی؟» سؤال عالیهنه
دخی «نعم!» جوابی ویردیلر.

بونک اوزرینه نبی الرحمه افندمن دلیقانلینک اختیار والدهسنی
چاغروب اوغلنک صوچنی عفوایتمسنی اخطار بیورمشار ایهده
خاتون «خیر! عفو ایتما؛ زیرا او بکا بر یومشوق اورمشده
کوزمی چیقارمشدر» دیدی.

حضرت پیغمبر افندمزد «اوله ایهسه بر آز اودون، آتش
کتیریکز!» دیه امر بیوردیلر.

عجوز عورا «آتشی، اودونی نه یاپه جقسیکز؟» دیه صور دی.
«سنک حقهده روا کوردیکی شو معامله غیر لائقه نك جزاسنی
ویرمک ایچون اوغایکی حضور کده احراق بالنار ایده جکم!» بیوردیلر.
خاتون، بو سوزی ایشیدنجه درحال «عفو ایتدم! یاقیک!
بن آتی طقوز آی قارنمه طاشیدم؛ ایکی سنه امزیردم؛
امان یاقیک! یاقیک! صکره مرحمت مادرانه نرده قالیر؟» دیدی.
متعاقباً دلیقانلینک دلی آچیلهرق «اشهد ان لا اله الا الله» کلمه
منجیه سیله زینتساز نفس واپسین اولدی.

نکته - ايشته شو خاتون رحمانه دکل، رحيمه ایدی. آنک
 ایچون کندیسینده کی مرحمت قلیله سببیه عاصی اوغلانک احراق
 بالنار ایدلسنی تجویز اتمدی. یا، رحمان ورحیم اولان جناب رب
 العالمین که قوللرینک جنایات واقعه سیله اصلاً متضرر اولماقله برابر
 حقارنده بونجه عنایات جزیه آنهیه سی مبذول وریکاندر، یتیم
 ییل « لا اله الا الله » کله منجیه سنه مواظبتله وحدانیت آنهیه سنه
 شهادت ایدن مؤمن قوانی آتشد یاقنی هیچ تجویز بیوررمی؟

فائده

۶

مشتهر اولمش درکه، رحمة للعالمین « صلی الله علیه وسلم »
 افندمزک غزاده اوک دیشیله آزو دیشنک آره سنده کی دیشاری
 اصابت سهم ایله منکسر اولنجه « اللهم اهد قومی فانهم لا یعلمون »
 بیورمشلر .

ظاهر اولمش درکه، یوم قیامتده هر کس کندی دردیه
 اوغراشیرکن جناب رسالتا بلزی « امتی ! امتی ! » بیوره جقلر .
 ایشه حضرت پیغمبرک دنیا و آخرتده حقیقه پک بیوک
 اولان بو کرم و احسان بی امتانی آحق ذات قدسیت سماتلری
 « رحمة للعالمین » اولدقلر ایچون جلوهرک ساحه حصول اولمش در .
 نته کیم جناب ارحم الراحمین حق احق رسالتپناهیلرنده « وما
 ارسلناک الا رحمة للعالمین » بیورمش در .

آرتق دوشونکرکه، رحمت واحدنک اثری بو مبالغه بالغ

اولیورکن، یارحمان و رحیم اولان جناب ارحم الراحمینک کرم
واحسان بی پایانی نه مرتبه ده اولمق لازم کلیر؟
مرویدرکه:

نبی ارحم صلی الله علیه وسلم افندمن (اللهم اجعل حساب
امتی علی یدی) بیورمشلر ایکن، صکردهه یالکر ایکی درهم
بورجلو اولدرق وفات ایدن بر کیمسه نک جنازه نمازینه حاضر
اولمقدن امتناع بیوردیلر.

زوجه مطهره لری حضرت عایشه بی ده افک معهود سبیله
خانه سعادتلرندن چیقاردیلر.

«وما ارسلناک الا رحمة للعالمین» آیت جلیله سی منطوقجه
جناب باری کویا رسالتناه افندمنه «سن بر رحمته مالکسین؛
رحمت واحده ایسه عالم مخلوقاتی اصلاحه کفایت ایتمز! بناء علیه
قوللر مه ایدیله جک معاملدی سن بکا براق! امتکی بکا ترک ایت!
زیرا بن رحمان ورحیم: بنم رحتم بی نه ایسه در. آنارک معصیتلری
ایسه متناهی در. متناهی نزد غیر متناهیده هیچدر. اوجهتله شبهه یوق که
جیع خلقک معاصیسی بحار رحتمده فنا پذیر اولور. زیرا بن
رحمان ورحیم.» بیورمش اولور.

فائده

V

قدریه دیدی که:

نار جهنمی، عذاب ابدی خلق ایدن ذات، نصل رحمان
و رحیم اوله بیلیر؟

کفری، کافری یرادوب صکرده نیچون کافر اولمش دیه آئی
 تعذیب ایلین ذات، نصل رحمان ورحیم اوله بیلیر؟
 عبادینه ایمان ایله امر بیوروبده صکره کافرلری ایماندن
 منع ایلین ذات، نصل رحمان ورحیم اوله بیلیر؟
 جبریه دیدی که :

انواع نعمت ورحمتک اعظمی ایماندر. بناءً علیه اگر ایمان،
 طرف حقدن عبد مؤمنه براحسان اولمسه ده عبدک محصول کسبی
 اولسیدی؛ رحمان ورحیم، عنوانی ده اللهدن زیاده عبد مؤمنه
 یاقیشق آلق لازم کلیردی. والله اعلم

فصل رابع

مالك يوم الدين

قول كريمك تفسيرى مبین دركه بوده فوائد عديده بي مشتملدر

فائده

۱

مالك يوم الدين - قولى مالك روز بعث و جزا ديمكدركه
 يونكده معناسى بوجه آتى ايضاح اولنور . شويلاه كه :
 محسن ايله مسئ ، مطيع ايله عاصى ، موافق ايله مخالف مساوى
 طو تلامق ، البته فرقى اولمق لازم كلير . بو فرق ايسه (ليخزى
 الذين اساءوا بما عملوا ويجزى الذين احسنوا بالحسنى - و - ام
 نجعل الذين آمنوا وعملوا الصالحات كالمفسدين فى الارض ام نجعل
 المتقين كالفجار - و - ان الساعة آتية اكاد اخفيها لتجزى كل
 نفس بما تسعى) آيات جليلهسى ناطق اولديغى اوزره آنجق روز
 جزاده ظاهر اولور .

شوراسى ده معلوم اولميدركه بر ظالمى بر مظلومه تسليط
 ايدن ذات صكره او ظالمن انتقام المازسه ، آنك انتقام المامسى
 يا عجزدن ، يا جهلدن و يا خود او ظمه رغبتدن ايلرى كلير . جناب
 حقك بوصفات ثلاث ايله اتصافى ايسه محالدر . بناء عليه مظلوملرك

انتقامی ظالمردن آلمی لازم کلیر. مادام که بو انتقام دار دنیا ده
حاصل اولمور، دار دنیا دن صکره دار اخرا ده حاصل اولمق
لازم کلیر. ایشته — مالک یوم الدین — قول کریمیلده ده، — ومن
يعمل مثقال ذرة خيراً ایره — قول شریفیلده ده مراد
بودر.

قصه — مرویدر که یوم قیامتده بر کیمسه موقع سؤال و حساب
کتیریلیر. بر کره کندی کندینه دوشونور. حسنا تندن بالکلیه
صفرالید اولدیغنی کورمکله مأیوس اولور. متعاقباً «یا فلان! ادخل
الجنة بعملك» دیه بر ندای مسرتبخشا کوشزدی اولور. اوده
جواباً «الهی! بن بر عمل خیرده بولندیغمی بیله میورم!» دیر.
بونک اوزرینه خطاب عزت کلیر که «سن هانی فلان کیجه او یوم دکمی
ایدی؟ صکره او یانوب بر طرفدن او بر طرفه دوزکن (الله)
دیدک. فقط سن او آنده او یقویه طالدکده (الله) دیدیککی
اونودی ویردک. بن ایسه غفلتدن، اونو تمقندن منز و مبرایم.
آنک ایچون سنک او کیجه بر کره (الله) دیدیککی اونو تئادم.»
قصه — مرویدر که یوم قیامتده بر کیمسه نک حسنا ت و سیئاتی
موازنه ایدیلیر؛ نصابه حسنا ت خفیف کلیر؛ متعاقباً بر ورقپاره
کتیرلر؛ میزانک حسنا ت کفه سنه قورلر؛ در حال او طرف، آغیر
باسار؛ برده باقارلر که او ورقپارده ده (اشهد ان لا اله الا الله)
یازیلی ایمش! ذکر الله ایله غیریسی هیچ بروقت متوازن اوله ماز.
معلوم اولسون که واجبات ایکیه منقسمدر. حقوق الله،
حقوق عباد.

حقوق اللهك مناسبی مسامحه اوزرینه در . زیرا الله تعالی
غنی عن العالمین در . حقوق عباددن ایسه احتراز، واجب و لازم در .
مرویدر که :

امام اعظم ابو حنیفه حضرت تلرینک «رضی الله عنه» بر
مجوسی ده آله جفی وارایش : بر کون آله جفی ایسته مک اوزره
مجوسینک اوینه کتیش : مجوسینک قپوسنه وارر وارماز : آیاغندکی
نعلینه نجاست بولا شغله نعلینی چیقاروب تمیزلرکن نجاست مجوسینک
دیوارینه صچرادی . بونک اوزرینه حضرت امام متحیر اوله رق
کندی کندینه دیدی که :

«نجاستی دیوارده براقسه م، دیواره بر لکه اولور . اورادن
قازیوب چیقارسه م، دیوارک طوپراغی ده برابر آقار !»
ایشته شو ملاحظات حیرت افزا ایله قپویی چالیدی . برجاریه
چیقیدی . جاریه دیدی که :

«افدیکه سویاه ! ابو حنیفه سنی قپوده بکلور
قز کتدی سویلیدی . در حال مجوسی قپویه کلدی .
حضرت امام کندیسندن آله جفی ایسته جک ظنیله حریف
اعتذاره باشلادی . حضرت امام رضی الله عنه «آله جقدن کچدم !
بونده دهامهم برایش وار !» دیهرک دیواره صچرایان نجاست کیفیتنی
آکلاتدی . و «شودیواری تمیزله منه نک یولی نه در ؟» دیه صورتدی .
مجوسی حضرت امامک بو اتقاسنه حیران اوله رق «اوله
ایسه اول باول بن نشمی تطهیر ایدیم !» دیوب او آنده شرف
اسلام ایله مشرف اولدی .

بو قصه ده کی نکته شودر که : حضرت امام اعظم، مجوسی یه
ولو که پک آز اولسون، ظلم ایتیم دیه زیاده سیله احتراز، و بوباید
آله جغنی ده فدا ایدرک کمال عفتی ابراز بیورمسی، مجوسینک
کفردن ایمانه انتقاله سبب اولمش در.

یا ظلم صریحدن احتراز ایدنک عند الله حالی نیجه اولمق
لازم کلیر ؟ دوشون !

فائده

۲

« مالک يوم الدين » ده کی (مالک) کله سنک قرائنده قرای
گرام اختلاف ایتشلر در.
کیکی لامک کسریله (مالک يوم الدين) کیکی ده (مالک يوم الدين)
اوقودی .

للمترجم - حضرت مفسر، هر ایکی طرفک ده بوباید ایراد
ایلدکاری دلایلی هر ایکی صورتده تفرع ایدن احکامی تفصیلاً
بیان بیورمش ایسه ده بعض ملاحظه یه منی نقل و ترجمه سندن
صرف نظر اولندی . صوک .

فائده

۳

مالک - کسر لام ایله - قدریدن عبارتدر .

بو صورته جناب رب العالمينك مالکيت و ملکيتي قدرتن
عبارت اولمق لازم کليز. بو ايسه جاي بحث و نظاردر.
شويلاه که:

جناب حق يا موجوداتک، يا معدوماتک ملکي در. صورت
اولی ايسه باطلدر. زيرا ايجاد موجودات، محالدر. ديمک اولورکه.
الله تعالانک موجودات اوزرينه اعدامدن بشقه قدرتي يوقدر.
بو تقرير و بيانه کوره جناب حق آنجق عدمک ملکي اولمق
لازم کليز. حال بوکه بو صورت ثانيه دخی باطلدر. زيرا بو صورت
جناب حقت قدرتي، ملکي عدمه منحصر اولمهي اقتضا ايدرکه
او حالده «موجوداتده مالکيت و ملکيتي يوقدر» دينيله بيلک
لازم کليز. بو ايسه عقلدن نه قدر اوزا قدر!

الجواب — الله تعالى «موجوداتي وجوددن عدمه، يا خود
برصفندن ديکرسفته نقل و تحويله قادردر» معنا سنجه موجوداتک
هم مالکي، هم ملکي در. بو قدرت نقل و تحويل ايسه، آنجق
جناب حقه مخصوصدر. اوجهتله مالک حق، آنجق جناب حقددر.
ايشته خدای متعالي مالک حق اولديغي معلومکز اولنجه ديرزکه:
جناب حق يوم دينک مالکي در. چونکه خلقي اولدکدن صکره
ديرلتمک، ابدان ناسدن آريلوب طاغيانلن اجزاي بيلک آنجق
خدانک قدرتنه. علمه مخصوص بر کيفيتدر. مادام که حشرک،
نشرک، بعثک، قيامتک حصولي جميع معلوماته متعلق اولان بر علم
کامله، جميع ممکناته متعلق اولان بر قدرت کامله يه محتاجدر: تبين
ايتدي که، مالک يوم دين آنجق جناب رب العالميندر.

بو بچنده سويلنه جك شوزك تمامى حشر و نشر مسأله سته
متعقدر .

اكر « مملوك، موجود اولمىجه مالك بر شينه مالك اوله ماز .
قيامت ايسه حال حاضرده موجود دكلدر . او جهتله جناب حقك
مالك يوم دين اولماسى لازم كلير » دينليرسه جواب ويريلير كه :
واقعا ديديكى كز طوغر يدر . شو قدر كه قيامت بر امر حقدر .
قاعدۀ حكمت بوامرك خللپذير اولمق احتمالى اولماديغنى ده مثبتدر .
بناء عليه وجود قيامت، حال حاضرده بر امر قائم مثابه سنده در .
برده « من مات فقد قامت قيامته » مصداقجه هر كسك
وفاتيله برابر باشنه قيامت قوپار . ديمك اولدى كه، قيامت حال
حاضرده ده حاصلدر . بناء عليه شو سؤال بر طرف اولور .

فائده

۴

جناب حق بوسوره شريفه ده كندى استاى حسنا سندن بش
اسم ذكر ايلدى . الله، رب، رحمان، رحيم، مالك .
بونك سببى شو اولسه كر كدر . جناب حق كويا « اى قولم !
سنى اولاي رانديغم ايچون، ثانيا كوناكون نعمتبلره تربيه ايتديكم
ايچون ريم ! صكره سن بكا عصيان ايتدك، بن ايسه سنك عصيانكى
ستر ايلدم . آنك ايچون رحانم ! بعد العصيان تائب و مستغفر
اولدك، بن ده سنى غم و مغفرت ايلدم . آنك ايچون رحيم !

بعد ازین سکا ایصال جزا و مکافات لابد و لازم اولغسله بونک
ایچونده مالک یوم دینم! « دیمش اولور .

سؤال

جناب حق — الرحمن الرحیم — ی هم تسمیه ده، هم ده سوره
کریمه ده ذکر ایدوب بو تکریرک ایسه دیکر اوچ اسمده واقع
اولماسنه سبب و حکمت نه در؟

جواب

تقدیر کلام شو وجه ایله در:

کویا « بنم آله و رب اولدیغمی بر کره ذکر ایت! رحمان
و رحیم اولدیغمی ایسه ایکی کره ذکر ایت که رحمته اعتنا سائر
اموردن اکثر اولدیغنی بیله سین » بیوریلیور .

ایشته جناب حق بو وجه ایله رحمت مضاعفه بی بیان بیوردقدن
صکرده کویاکه « وسعت رحمته آداتمیک! زیرا بن مالک یوم دینم . »
دیمش اولور .

(غافر الذنب و قابل التوب شدید العقاب ذی الطول) قول
کریمی بونک نظیریدر .

فائده

۵


قدریه دیدی که :

اگر اعمال عبادک خالق الله ذوالجلال ایسه ثواب، عقاب،

جزا اعتقادی باطل اولور . زیرا کشتی ایشله مدیکی بر ایشدن
 طولانی مثاب، و یا خود دوچار عقاب اولورسه، برنجیسی عبث،
 ایکنجیسی ظلمدر . ثواب و عقابك وقوعی تقدیرنده جناب حقك
 مالك يوم دين اولدیغی باطل اولمق لازم کلیر .

جبرییه دیدی که:

اگر اعمال عباد، جناب حقك تقدیر وترجیحیه حصوله کلامش
 اولسیدی، اعمال عبادده مالك اولماق لازم کلیردی . مادام که
 جناب حقك عبادده، اعمال عبادده مالك اولدیغنه اجماع امت
 واقع اولمش در، بیلدک که اعمال عبادك خالق ده، مالکی ده اودر .



فصل خامس

ایاک نعبد و ایاک نستعین

قول کریمک تفسیری بیانده اولوب فوائد شتایی مشتملدر

فائده

۱

عبادت، غیرى تعظیم قصدیله اتیان ایدیلن فعلدن عبارتدر .
 لفظ عبادت (طریق معبد — ای مذلل) قولندن مأخوذدر .
 معلوم اولسون که؛ « ایاک نعبد » نك معناسی « سندن بشقه سنه
 عبادت ایتمام، عبادتم سکا منحصردر. » دیمکدر.

بو حصره دلالت ایدن وجهلر دخی شونلردر :

۱ — عبادت، نهایت تعظیمدن عبارتدر . نهایت تعظیم ایسه
 آنحق غایت انعام کننیدن صادر اولان و منتفع بهی یرادان ذاته لایقدر .
 وجود انعامک اعظمی ایسه انتفاعه قدرت بخش اولان حیاتدر .
 مرتبه اولی که، انتفاعه قدرت بخش اولان حیاتدر . (وقد
 خلقک من قبل ولم تک شیئاً — و — کیف تکفرون بالله وکنتم
 امواتاً فاحیاکم) آیتلریله آکا اشارت بیورلمشدر .
 مرتبه ثانیه که منتفع بهک خلقیدر . بوکاده (هو الذی خلق
 لکم مافی الارض جمیعاً) قولیه اشارت بیورلمشدر .

وچونکه بو عالم سفلیده انتظام امور، علی سبیل العاده حرکات فلکیهیه وابسته اولغله شوقول کریمک عقینده (ثم استوی الی السماء فسواهن سبع سموات وهو بكل شیء علیم) بیوردی. ایشته شو ایضاحاً منزله ثابت اولدی که نعمتک کافه سی ایجاد حقله حاصلدر. بناءً علیه عبادت، دخی جناب حقدن بشقه سنه بجا دکلدر. بو معنایه مبنی در که قولارینه تعلیم طرز عبادت ایچون سورۃ کریمه فاتحه ده (ایاک نعبد) بیوردی. زیرا بو قول شریف، حصر افاده ایدر.

۲ — وجه ثانی شو حصر وتعیینک دلالتانی مبیندر.
شویله که :

جناب حق بو سورۃ کریمه ده نفسی بش اسم ایله تسمیه بیوردی. الله، رب، رحمان، رحیم، مالک يوم الدين.
عبدک دخی اوچ حالی وارددر. ماضی، حاضر، مستقبل.
عبدک حال ماضیسی معدوم محضدر.
نته کیم جناب باری (وقد خلقتک من قبل ولم تک شیئاً) بیورمشدر.

چونکه عبد، اولو ایکن جناب حق آتی دیرلندی. نصل که (کیف تکفرون بالله وکنتم امواتاً فاحیاکم) بیورلشدر.
جاهل ایکن آتی تعلیم بیوردی.

بو معنایه ده (والله اخرجکم من بطون امهاتکم لاتعلمون شیئاً وجعل لکم السمع والابصار والافئدة) قول کریمی ایضاح ایتمشدر.
عبدک یوقدن وهیچدن وارلغه، موتدن حیاته، عجزدن قدرته،

جهان علم انتقالی آنجق جناب حق قدیم وازلی اولدینی ایچون
آنی قدرت ازلیه سیله، علم ازلی سیله ایجاد واحداث ایدرک عدمدن
وجوده نقل بیورمندن ایلری ککش در . ایشه جناب حق بو
معناجه آلهدر .

حال حاضره کلنجه : عبدك بو حالنده ایسه جناب حقه احتیاجی
دها شدید و مزیددر . زیرا عبد، معدوم ایکن ده رب رحمان
ورحمیه محتاج ایدی . وقتاکه سلسله وجوده داخل اولدی . آکا
ابواب حاجات بسبتون آچیلی ویردی . اسباب ضرورات یوز
کوستردی . بناءً علیه جناب حق دیش اولدی که :

« قول ! سنی عدمدن وجوده اخراج ایتدیکم ایچون بن آهم ؛
سلسله وجوده دخولکدن صکره سنک بکا اولان حاجاتک ایسه
چو غالدی ؛ آنک ایچون ده بن رحمان ور حیم . »

عبدك حال مستقبلده اولومدن صکره کی حالدر . او حالت
مستقبلده متعلق اولان صفت دخی (مالک يوم الدین) قول کریمیدر .
ایشته شو بش صفت، عبدك ذکر اولنان احوال ثلاثه سنه
متعلق اوله رق عبدك ماضی ده، حال حاضرده، مستقبلده کی امور
و مصالحی آنجق الله ذوالجلالک فضل واحسانیه تمام اولور ،
مادامکه هر حالده امور عباد، فضل حقله تسویه پذیر اولور .
عبد بشقه هیچ بر شیئه پرستشکار اولیوب آنجق عبادت خدا ایله
مشغل اولمق لازم کلیر .

بو سببه مبنی درکه عبد، علی سبیل الحصر (ایاک نعبد و ایاک
نستعین) دیور .

۳ — وجه ثالث دخی شو حصرك دليلنى كوسترر. دليل قاطع ايله ثابتدر كه آله عالمك قادر، علم، محسن، جواد، كريم، حليم اولمى لازمدر. آندن بشقه سنك ايسه بو صفتلرله متصف اولدينى مشكوك فيهدر. زيرا طبيعته، فلكه، كواكبه، عقله، نفسه مضاف ومنتسب اوله بيله جك هيچ بر اثر يوقدر كه، اواترك قدرة اللهده اضافى محتمل اولسون. حال بوكه شو احتمال ايله برابر انتساب مذكور دخى مشكوك فيهدر. بناءً عليه تبين ايدركه خلقك معبودى آله متعال اولديغنه علم بر امر يقينى در. آندن بشقه سنك معبود خلق اوله بيلسى ايسه مشكوك فيهدر. حال بوكه يقين طور ركن شك اعتبار اولغا ز. آنك ايچون مشكوكى آتوب، معلومى آلق لازم كلدى. بوتقديره كوره خلقك معبود حقى، آحق جناب حقدر. ايشته بو معنايه مبنى در كه جناب حق قوللرينه تعليم طرز عبوديت ايچون (اياك نعبد و اياك نستعين) بيوردى.

۴ — عبوديت، ذلت و خواريدن عبارتدر. شوقدر كه مولى اشرف و اعلى اولنجه آكا عرض ايديله جك عبوديت دخى كندينك علويتنه كوره اولور.

مادام كه الله تعالى، موجوداتك اشرف و اعلا سيدر، آكا عبوديت، آخره پرستشدن اولادر.

كذلك جناب حقك قدرتى — آخرك قدرتندن اعلى، علمى — آخرك علمندن اكمل، جودى — آخرك جودندن افضلدر. بناءً عليه آكا عرض عبوديت البته آخره پرستشدن اولى اولوق لازم كله چكى بديهيدر. ايشته بو سببدن ناشيدركه قوللرينه تعليم

طرز عبودیت ایچون حصر افاده ایدن صیغه ایله (ایک نعبد وایاک نستعین) بیوردی .

۶ — باقکیزکه قدرت باری نصل آسمانی ایلشکسز، زمینی طیاقسز طوتیور ! مهر و ماهی یورودر ! بلوطدن کاه آتش [۱] کاه هوا [۲] کاه صو [۳] چیقارر ! طاشدن صو آقیدر ! صودن طاش پیدا ایتدیرر [۴] کرء ارض اوزرنده بعض اجسام مقیمه [۵] خلق ایتدیکی کبی، بعض اجسام سیاره [۶] دخی یراندی ! قارونی یره باتیروب زمینی اوزرینه رفع ایلدی . حضرت محمد علیه السلام افندمزی یوکسلدوب قاب قوسینی تحتیده قودی . قوم فرعونی تفریق ایله آنلر ایچون صوی عذاب ناره تحویل، حضرت ابراهیم حقننده آتشی برد و سلامه تبدیل ایتدی . حضرت موسایی فوق الطور رفع ایدوب (فاخلع نعلیک) خطایله تانیس و تالطیف، قوم موسانکده فوقه جبل طوری رفع ایدوب آنلری (ورفعنا فوقکم الطور) عتایله تفریع و تحویف بیوردی . (وفار التور) منطوقجه بر قوری پیکاردن فیشقرتدیغی صو ایله

[۱] شمشک .

[۲] روزگار .

[۳] یغور .

[۴] بوز . بوزدن بشقه بعض میاه چاربه وارکه آقنجه نجبر ایدیور .

مترجم فقیر بونی طریزون ولایتده اردو قضاانده رأی انین مشاهده ایشدر . محال سائرده دخی واردر .

[۵] جبال .

[۶] انار .

جهانی طوفانه غرق ایتدی! مرور موسی ایچون دریایی قوروتدی!
ایشته استحقاق عبادت، جناب حقه بویله بر قدرت کامله نك
وجودینی مستدعیدر.

انصاف ایدلم! بویله بر قدرت قاهره صاحبی اولان جناب
واجب الوجود ایله جمادات، نبات، حیوان، انسان، فلک، ملک
انواعنیدن دیگر بر شی امر عبادتده نصل مساوی اوله یلیر؟
ناقص ایله کاملی، خسیس ایله نفیسی مساوی عدا یتمک دلیل سفه
ونادانی دکلیدر؟

فائده

۴

(ایک نعبد) قولی دلالت ایدر که معبود بالحق آنجق جناب
حقدر. مادام که استحقاق عبادت، اللهه منحصردر. اللهدن بشقه
آله اولمادیفی تبیین ایدر. بو صورتده «ایک نعبد وایک نستعین»
قولی توحید محضه دلالت ایلر.

معلوم اولسون که، مشرکین طوائف عدیدهیه منقسمدر.

شویله که:

مشرک لک جناب حقه اثبات ایتدک لری شریک یا جسمدر.

یا دکلدر.

جسم ایسه اوجسم یا اجسام سفلیه دن، یا اجسام علویه دندر.

اجسام سفلیه دن ایسه، او جسم یا مرکبدر. یا بسطدر. مرکب ایسه، یا معادن، یا نباتدن، یا حیواندن، یا انساندن.

اجسام معدنیه دن شرکا اثبات ایدنلر یا طاشدن، یا آلتوندن، یا کوشدن، اصنام اتخاذ ایدوب آنلره عبادت ایلینلردر.

اجسام نباتیه دن اصنام، اتخاذ ایدنلر کندیلر یچون بر شجر معنی معبود اتخاذ ایلینلردر.

انساندن اثبات شرکا ایدنلر — عزیز ابن الله و المسيح ابن الله — دینلردر.

اجسام بسیطه دن شرکا اتخاذ ایدنلر آتشفشانلردر که بونلر طائفه مجوسدر.

اجسام علویه دن شرکا اتخاذ ایدنلر شمس و قمره و سائر کواکبه پرستش ایدوب سعادت و نحوستی آنلره اسناد ایلینلردر که صابئه ايله اکثر منجمین بونلردندر.

اجسام غیری اوله رق جناب حقه اثبات شرکا ایدنلر دخی طوائف عدیده منقسمدر.

طائفه اولی — مدبر عالم، نور و ظلمتدر دینلردر که، (مانویه) و (ثنویه) آنلردندر.

طائفه ثانیه — «ملائکه، ارواح فلکیه دن عبارتدر هر اقلیم ارواح فلکیه دن بر روح معنی وارددر که اوقلیک امور و مصالحی تسویه و تدبیر ایلر. و بوعالمک انواعدن هر نوعه مخصوص بر روح فلکی واردر که اونوعک امورینی تدبیر ایدر» دینلردر که، بو ارواح فلکیه ایچون بر طاقم صور و تماثل اتخاذ ايله آنلره پرستش ایدنلر. بونلر عبده ملائکهدر.

طائفة ثالثه - بری خیر، دیکری شریر اولق اوزره عالمک
ایکی آلهی واردر دینلردر.

بونلر دیرلرکه :

«مدبر عالم، الله تعالی ايله ابلیسدر. الله و ابلیس ایکی برادردر.
دنیاده خیره متعلق نه و ارسه اللهدن، شره متعلق نه و ارسه
ابلیسدندر.»

بو تفصیل معلومک اولنجه دیرزکه :

جناب حقه هرکیم شریک اثبات ایدرسه، یانفعی ایسته مک،
یا ضررندن قاجق کبی بر وجهدن طولایی او شریکک عبادتنه
اقدام واعتنا ایتک لازم کلیر.

وحدانیت خدایی اقرار ايله توحیدده اصرار، شرکا و اضداد،
اعتقادی ابطال ایدوب اللهدن بشقه سنه عبادت، غیر اللهه التفات
ایتملرک ایسه یم و امیدلری ده، رغبتلری ده، رهبتلری ده حضرت
اللهه منحصردر. آنک ایچونده شبهه یوق که آجق حضرت اللهه
عبادت، آجق حضرت اللهدن طلب معاونت ایدرلر. ایسته
سبب بودرکه معنای حصری مفید اولان ترکیب بلیغ ايله (ایک
نعبد وایک نستعین) دیدیلر. بوضورتده (ایک نعبد وایک نستعین)
قولی (لا اله الا الله) قولنک مقامنه قائم اولمش اولور.

شو (سبحان الله والحمد لله ولا اله الا الله والله اکبر ولاحول
و لا قوة الا بالله العلی العظیم) ذکر مشهوری معلوم کردر.
یوقاریدده بالاستدلال بیان ایتشدک که - سبحان الله - ک معنایی
«الحمد لله» قولنده داخلدر، زیرا - سبحان الله - قولی جناب

حَقِّكَ ذَاتِنْدَه كَامِل وَتَام اُولْدِيغَه. «الْحَمْدُ لِلَّهِ» قُولُ دُخِي غَيْرِيسِنِي
مَكْمَل وَمَتَّم بُولْنْدِيغَه دِلَالَت اِيدِر. بِرَشِيئِكَ اَيْسَه غَيْرِيسِنِي مَكْمَل
وَمَتَّم اُولْسِي تَكْمِيل وَتَمِيم فَعْلَانْدَن مَقْدَم كَنْدِي ذَاتِنْدَه كَامِل وَتَام
اُولْسِنَه مَتَوْقْفَدِر.

اَيْشْتَه ثَابِت اُولْدِي كِه «سُبْحَانَ اللَّهِ» قَوْلْمُزْكَ مَعْنَايِ «الْحَمْدُ لِلَّهِ»
قَوْلْمُزْدَه دَاخِلْدِر.

جَنَاب حَقِّ «الْحَمْدُ لِلَّهِ» قَوْلِيلَه حَمْدُكَ جَمِيع اَنْوَاعِنِي اَثْبَات
اَيْلِدَكْن صَكْرَه جَمِيع اَنْوَاع حَمْدُكَ كَنْدِيْسِنَه اَثْبَاتِي مُوجِب اَوْلَان
سَبَب وَعَاتِي دُخِي بِيَان اِيدِرْكَ يَوْقَارِيدَه بِيَان اَيْتْدِيكْمَز وَجِه اَيْلَه
عَبْدُكَ اَوْقَات ثَلَاثَه دَهْدَه اُمُور وَمَصَالِحِي تَسْوِيْدِيَه مِدَار اَوْلَان بِش
صَفْتَلَه ذَات اَجَل وَاَعْلَاْسِنِي وَصَف اَيْلْدِي.

ذِكْر اَوْلَان صِفَات خَمْسَدَن صَكْرَه دَه «اِيَاكَ نَعْبِد» بِيُورْدِي.
ز اَيْسَه يِنَه بِالَادَه بِيَان وَاِيَضَاح اَيْتْمَشْدُكَ كِه «اِيَاكَ نَعْبِد» قَوْل
شَرِيفِي «لَا اِلَهَ اِلَّا اللَّهُ» مَقَامْنَه قَائِمْدِر. مَتَعَاقِباً «اِيَاكَ نَسْتَعِين»
بِيُورْدِي كِه بُونُكَ دَه مَعْنَايِ «اللَّهُ تَعَالَانُكَ عَوْن وَتَوْفِيق وَاحْسَانِي
اَوْلَقْسَزِين هِيچ بِرْغَرُض وَمَقْصُود مُمْكِن دَكْل تَمْشِيْت پَذِير حَصُول
اَوْلَه مَاز.» دِيْمَكْدِرْكَ «وَلَا حَوْلَ وَلَا قُوَّةَ اِلَّا بِاللَّهِ الْعَلِيِّ الْعَظِيمِ»
قَوْلْمُزْدَن مِرَاد بُودِر.

اَيْشْتَه شُو اِيَضَاح اَيْلَه تَيْن اَيْتْدِي كِه سُورَةُ فَاتِحَه اَوْلَنْدَن
آخِرِيْنَه دَكْ ذِكْر مَذْكُورَه مُنْطَبِق اَوْلُوب بُو سُورَةُ كَرِيمَه نَك اَيَات
بِيَنَاتِي اَوْ ذِكْر شَرِيفْدَه مَذْكُور اَوْلَان بِش مَرْتَبَه جَلِيلَه نَك شَرْح
وَتَفْصِيلِي مَجْرَاسِنْدَه جَارِيدِر.

فائده

۳

«ایاک نعبد» بیوریه‌رق «ایاک» تعیری «نعبد» قولنه تقدیم
اولندی ده «نعبدک» بیورلمادی .

بونده بر قاج وجه واردر :

وجه اول — ایاک، تعیرینک — نعبد — اوزرینه تقدیم
بیورلمسی مجرد عابدک وهاء اولاده معبود بالحق جناب حق
اولدیغنی پیش نظر دقت وتأمله آلوب ده تعظیمده تکاسل ایاه
صاغه صوله التفات ایتماسی ایچوندر .

محکیدرکه : مشهور اوسته پهوانلردن بریمی برعادی کویلو
ایاه کولشدی . کویلو پهوانی بر قاج کره آلت ایتدی . بالاخره
کویلو یه دیمشارکه بوسنک ییقدیغک پهوان کیمدر بیلیر میسین ؟
بو، مشهور فلان پهواندر . آدن صکره بر کره دها کولشیدیلر .
بودفعه کویلو پهوانه مغلوب اولوب ایلک حماده ییقیلی ویردی .
کویلونک بو دفعه کی مغلوبیتته سبب ایسه مجرد اومشهور اوسته
پهوانک شهرت شایعه سندن چکنه سیدر .

ایشته شو مقامده «ایاک» تعیرینک تقدیمی ده بویله بر معنایه
مبنی در . جناب حق، ابتدا نفسی تعریف بیوردی که عابد، کیمک
قارشوسنده مشغول عبادت اولدیغندن غافل اولمسون ده آکا کوره
بر صایغیسزلقده بولمیه‌رق عبادت ایلسون .

وجه ثانی - طاعات سکا آفر کلیورده قیام، رکوع، سجود
کبی عبادتده کوجلاک چکیورسهک، اک اول (ایاک نعبد) قولنی
زیور زبان تقدیس ایتکه بن خاطرکه کلیمده کوکاکده باب معرفتم
آچاسون. بنم جلال وعظمت وعزمتی برکره خاطرکه کتیروبده
بنم سنک مولاک اولدیغمی. سن بنم قیلم بولن-دیغکی برکره
بیلدگی؟ سکا کوچ کلن او عباداتی درحال تسهیل ایدرم.

بونک خار-جده مثالی شودرکه: اجسام ثقیلهنی یوکلنوب
قالدیرمغه آلیشقی ایستین کیسه نه یاپار؟ ابتدا برطاقم اغدیة مقویه
استعمالیه وجودنی بسیلدیه رک قوتی آر تیرمغه چالیشمی؟
ایشته عبد دخی تکالیف شاقه یوکنک آلتنه کیرمک ایستینجه
حمل بار عبودیت-ه قدرتیاب اولق ایچ-ون اولا معرفت ربویت
مجوتی (ایاک) قولی حقه سندن تناول ایدر.

مثال دیگر - برعاشقکه معشوقندن طولایی حضور معشوقده
طیاق یر! او طیاغه قولای تحمل ایدر. [۱]

ایشته بومقامدده اویله در. عابد، جمال (ایاک) ی مشاهده
ایدنجه تحمل بار عبودیت کندیته غایت آسان کلیر.

وجه ثالث - الله تعالی (ان الذین اتقوا اذا مسهم طیف [۲]
من الشیطان تذکروا فاذا هم مبصرون) بیورمش در. بناء علیه
نفس انسانه تسویالات شیطانیه ایله کسل، غفلت، بطالت عارض

[۱] «ضرب الحبيب زیب» سوزی مشهوردر. للمترجم

[۲] «طائف. طیف» ایکسیده قراآت سبعة مشهوره دندر.

اولکیسی حفصک روایتیدرکه مصاحفم زده بویه یازبایددر. للمترجم

اولنجه (اياك نعبد) مشرقندن حضرت جلال اللهی تذكر ایدرده
ادای عبادات و طاعاتده مبصر و مستعد اولور.

وجه رابع - سن «نعبدك» دیسه كده كندی عبادتك
ذكريله كلامه آغاز ایلسهك، او عبادتك كيمك ایچون اولدیغنی
تصریح ایتسهك، محتملدرکه ابلیس «بونك عبادتی اللهه دكل،
اصنامه، یا اجسامه، یا شمسه، یا قمره در.» دی ویرر. اما بوترتیبی
تغییر ایدوبده اولا (اياك) ثانیاً (نعبد) دیدیکك وقت ایلک
سوزك اولان (اياك) صریحاً افاده ایدرکه مقصود و معبودك جناب
واجب الوجوددر. بناء علیه بوترتیب، توحیدده ابلغ، احتمال
شرکدن ابعداولمش اولور.

وجه خامس - واجب لذاته اولان (قدیم) محدث اولان
ممکن لذاته دن وارلقده مقدمدر. بناء علیه جناب واجب الوجودك
ذكری ده كافه اذکاره متقدم اولمق لازم کیر. ایشته بوسیدن ناشی
مجرد ذكر حق، ذكر خلقدن متقدم اولسون دیه (اياك) تعبییر
شریفی (نعبد) قولی اوزرینه تقدیم اولتمشدر.

وجه سادس - محققینك بعضیسی دیمشدرکه وقت نعمته
نظری منعمه منعطف اولان کیمسه نك وقت بلادده نظری بالایه
دكل، مبتلی به معطوف اوله جنی جهتله او کیمسه كافه احوالده بحر
معرفت خداده مستغرق بولنور. ایشته بو حالده اولان کیمسه الی الابد
اعلائی مراتب سعاداتده اولور. اما وقت نعمته نظری منعمه
دكل، نعمته منعطف اولان کیمسه نك وقت بلادده نظری مبتلی به
دكل، بالایه معطوف اوله جنی جهتله او کیمسه جمیع اوقاتده غیرالله ایلله

اشتعاله مستغرق اوله رق الى الابد شقـ او تده قالير . چونكه نائل
نعمت اولدينى وقت اول نعمتك زوالندن خائف وهراسان اولديغندن
ممتنع ايكن ده عذابده بولنور . زوال نعمت حالنده ايسه بالطبع
مبتلاى خزى وخذلان اوله جغندن اول وقت دخی دوچار سلاسل
واغلال اضطراب اولور .

ایشته بو حقیقه مبنی درکه جناب رب العالمین امت موسایه
(اذکروا نعمتی) امت محمد مصطفاییده (اذکرونی اذکرکم)
بیورمش در .

بوراسی معلومك اولنجه دیرزکه : (ایاك) تعبيرينك (نعبد)
قولنه تقدیم بیورلمسی مجرد عابدك نورجلال (ایاك) ی مشاهدده
مستغرق اولمسی ایچوندور . بو حال استغراقك حصولنده عابد،
وقت ادای عبادتده عین فردوسده مستقر اولمش اولور . نته کیم
بر حدیث قدسیده « لايزال العبد يتقرب الى بالنوافل حتى احبه
فاذا احبته كنت له سمعاً وبصراً » بیورلمش درکه عبد کندینی
سودیرنجیه قدر نوافل عبادت ايله بکایا قلاشتمدن خالی قالماز . کندینی
بر کره بکا سودیردیمی ؟ آرتق بنده آکا کوز قولاق اولورم
دیمکدر .

وجه سابع — يالکزر « نعبدك » بیورلمش اولسیدی، بو تعبير،
عبادك عبادتلى الله مختصر اولدیغی مفید اولمازدی . زیرا هم
حضرت الله، همده — دأب مشرکین اوزره — غیراللهه عبادت
ممتنع دکلدر . مؤمنار جناب حقه عبادت ایتدکری کبی مشرک کرده
بر طاقم آله باطله پستش ایدرلر . « ایاك نعبد » تعبير شریفی

ایسه عبادك منحصرأ جناب حقہ عبادت ایدر اولدقلرینی مشعردر.
وجه ثامن -- «نعبد» قولنده کی نون، نون عظمتدر. کویا
عابده شویله امریورلمش اولدی که: «ملیونلرجه قوللره، نهایتسر
مال و مناله مالک اولسهك دخی خارج صلاتده بولندیغك وقت
(نحن) دیمه! -- یعنی عظمتی مشعراولان صیغه متکلم مع الغیری
استعمال ایتمه! اما نمازه طوروبده بکا عرض و اظهار عبودیت
ایتدیكك وقت (نعبد) دیمیسین که بزه قوللق ایدنلرك سلطنت
دنیا و عقبایه سزاوار اولدقلرینی هر کس ییلسون.»

و جیه تاسع -- عابد (ایاك نعبد) یرینه (ایاك اعبد) دیمش
اولسه «انا العابد» دیمش قدر اولور. بوايسه معنأ تکبری مشعردر.
اما «ایاك نعبد» دیدیکی وقت «انی واحد من عبيدك» دیمش کی
اولور که بو معنی تواضعی مفیددر. «ن تواضع رفعه الله و من
تکبر وضعه الله»

برسی چیقوب دیسه که:

«بو افاداتکرك کافه سی -- الحمد لله -- قولنده واردر.
مع هذا آندہ -- الحمد -- ك ذکرى -- الله -- ك ذکرینه تقدیم
ارلنمش در.»

شویله جواب و یریلر که:

حمد -- اللههده، غیر اللههده شامل اولدیغندن حمد -- جناب
حقه اختصاص ایله تقید ایتمش ازلحق ایچون «الحمد» دن صکره
«لله» دیمک لازمدر. «نعبد» کلمه سی ایسه «ایاك» اوزرینه تقدیم
اولندیغی حا -- چونکه عبادتك اللههده، غیر اللههده شمولی

تحت احتمالده بولنديغندن؛ غير اللهه عبادت ايسه كفر اولديغندن
 - «اياك» تعبيرينك تقديمي همه حال لازمدر.

ايشته بونده شو نكته واردركه: هم اللهه، هم ظاهرده غير
 اللهه حمد، جائز اولديغي ايجون حمدك ذكرده تقديمي بجا در.
 «اياك نعبد» قولنده ايسه اويله دكلدر. چونكه عبادت جناب حقّه
 مخصوص اولوب غير اللهه عبادت غير جائزدر. بناءً عليه «اياك»
 صيغه حصري (نعبد) اوزرينه تقديم اولنديكه عبادت آنحق
 جناب رب عزته مخصوص اولديغي تعين ايلسون. بو صورتده
 كلامده عبادتك غير اللهه وقوعنى اياما ايده جك هيچ بر احتمال قالماز.

فائده

۴

بريسى ديه بيليركه:

«نعبد، كله سندهكى نون يانون جمعدر؛ يانون تعظيمدر. احتمال
 اول ايسه باطلدر. زيرا شخص واحد، جمع اولماز. احتمال ثانى
 دخی باطلدر. زيرا عبادتله مشغول ايكن انسانه لائق اولان
 كندىنى عظمت و رفعتله دكل، عجز و ذلتله ذكر ايلكدن.
 شو سؤاله، هر برى بر حكمت بالغهيه دلالت ايدن بر قاچ
 وجه ايله جواب و يريله بيلير:

وجه اول - بو نوندن مراد، نون جمعدر. جماعتله اداى
 صلات، منفرداً نماز قيلمكدن اولى اولديغنى عابده تنبيه و اخطار ايلر.
 جماعتله نماز قيله نك فائدهسى ايسه معلومدر.

جماعتله اداى صلاتك اولويتنه عليه الصلاة والسلام افندمرك
(التكبير الاولى فى صلاة الجماعة خير من الدنيا وما فيها) حديث
عائسى دلالت ايدر.

بز شوراسنى ده علاوة كفتار ايدرزكه :

صوغان، صارمساق ييهن كيمسه بالطبع آغزنده حاصل اوله حق
رائحه كريهه دن ياننده كيلر متأذى اولسون ديه جماعته حاضر
اولمقدن شرعاً ممنوعدر. آنكچون كويا جناب حق «جماعتله نماز
قيلمه نك نه قدر اجر جزيل مستوجب اولدنى معلومدر. مع مافيه
او اجر عظيم بيله مسلميندن فرد واحدك رائحه ثوم وبصلدن
متأذى اولمسنه دكمز» ديمش اولور. آرتق سن وار قياس ايتكه
نمازك ثواب عظيمى برمسلك يالكز رائحه ثوم وبصلدن بيله متأذى
اولمسنه دكمز ايكن آچيقدن آچيغه ايداء مسلمله، نيميه، غيبتله، سعائته
عجبا دكرمى ؟

وجه ثانى - جماعتله نماز قيلانك زيور زبان تضرع ايتديكى
(نعبد) كله سندهكى نون جمع ايله مرادى بديهيدركه حاضر اولان
جماعتدر. منفرداً قيلان كيمسه دخى (نعبد) دينجه «عابدك يالكز
بن دكلم ! ملائكه ده بنمله برابر سكا عبادت ايدرلر.» ديمش اولور.
ديك اولدى كه (نعبد) قوليله مراد، هم بوقولاك قائلى اولان عابد،
همده جناب حقه عبادت ايدن ملائكه كرامدر.

وجه ثالث - مؤمنلر قرداشدرلر. بناء عليه عابد (اياك اعبد)
ديمش اولمسه يالكز كندى عبادتى ذكر ايتمش اولورده ديكر
اخوان دينك عبادتارنى مسكوت عنه براقش بولور. اما (اياك

نعبد) دینجه هم کندی عبادتی، هم ده شرقاً و غرباً جمیع مؤمنینک عبادتیرنی ذکر ایتیش و کویا سائر مؤمنلرکده مهماتی اصلاحه چالیشمش اولور. عابد بویاه سائر اخوان دینکده اصلاح مهمانه سعی ایدنبجه (من قضی لمسلم حاجةً قضی الله له جمیع حاجاته) حدیث عالسی منطوقنجه جناب حق دخی آنک مهماتی قضا ایدر.

وجه رابع - کویا جناب حق قولنه دیش اولورکه «سن (الحمد لله رب العالمین الرحمن الرحیم مالک يوم الدين) دهرک جمیع محامد دنیا و آخرتی بزه تقویض ایتدیکک ایچون عند الهمیزده قدر ومنزلتک بیودی. بناءً علیه یالکرز کندی مهماتیکی اصلاحه حصر مساعی ایتیه! (ایاک نعبد وایاک نستعین) دهرک جمیع مسلمینک مهماتیده اصلاحه چالیش!»

وجه خامس - عابد «آمین! بنم عبادتم هنوز اودرجهیه وارما مشدیرکه آنی یالکرزجه ذکر ایتمهکه استحقاقم اوله یاسون. زیرا جهات تقصیرات ایله ممزوجسدر. آنکچون عبادتمی جمیع عابدینک عبادتیرینه قارشیدیره رق کافه سنی عبارةً واحده ایله ذکر ایدرمده (ایاک نعبد) دیرم.» سوبلش کبی اولور.

بو بایده بر مسأله شرعیه واردر:

«بر کیسه اون نفر کوله یی صفتقه واحده ایله صاتسه؛ صکره مشتری بونلردن بعضیسنک معیوب ایدوکنه مطلع اولسه ده یالکرز او معیوب اولانلری ترک ایتمک ایسته سه ترکه قادر اوله ماز. یا هپسینی آلق ویا خود هپسینی ترک ایتمک لازم کلیر.»

ایشته صددیجمنده اولدیغمنز مسأله عبادت دخی بونک نظیریدر.

شویله که:

عبد، صیغه مع الغیر ایله (ایاک نعبد) دیدیکی وقت، جمیع عبادات عابدینی بارگاه اقدس خدایه عرض ایتمش اولور. بناءً علیه کرم مولایه لائق دکلدرکه بو عباداتک بعضیسنیدن بعضیسنی تمیز ایله کینی قبول، کینی رد بیورسون. یا هپسینی رد ایدرکه بوده جائز دکلدر. زیرا (ایاک نعبد) قولنده ملائکهک ده، انبیا واولیانک ده عبادتتری داخلدر. یا هپسینی قبول ایدرکه عبادت دیگرانک قبولی برکاتیه (ایاک نعبد) سوزینی زیور زبان عبودیت ایدن کیمسهک ده عبادتی حائز عز قبول اولور.

(ایاک نعبد) قولیه مرطوب اللسان اولان عابد، شویله دیمش قدر اولورکه «آلهی! بنم عبادتم درگاه الوهیت و بارگاه ربوبیتکه سزاوار شرف قبول اولمه دخی ینه سن آتی لطفاً رد ایتمه! زیرا شو عبادتده بن منفرد دکم. بنمله برابر پرستشکار بارگاه اقدسک اولان قوللرک چوقدر. آنکچون بن شرف اجابت نائلتله کامیاب اولمه مستحق دکل ایسهم سائر مظهر اجابت اولان متعبدلرک عبادتترینی سکا شفیع اخاذ ایله بنم عبادت قاصره و ناقصه مک ده قبولنی نیاز و رجا ایدرم.»

فائده



فوائد عبادتی بیلن کیمسهیه عبادتله اشتغال خوش، عبادتک غیریه اشتغال آغیر کلیر.

ایضاح

۱ — کمال، محبوب بالذاتدر. محض سعادت اولمقدمه اکمل
 احوال انسان ایسه عبادت خدا ایله اشتغالدر. زیرا انسانک قای
 نور آلهی ایله مستتیر، لسانی شرف ذکر وقرائتله متشرف،
 اعضایی جمال خدمت خدا ایله متجمل اولور. شو احوال شریفه
 ایسه مراتب انسانیه ودرجات بشریه نك اشرف واعلا سیدر .
 مادام که شو احوالك حصولی حال حاضرده اعظم سعادت
 انسانیه در، زمان مستقبلدهه موجب حصول اکمل سعادتدر.
 بناء علیه شو احواله واقف اولان کیمسه اوزرندن بارکران
 طاعات زائل، قلبنده حالات عبادات حاصل اولور .
 وجه ثانی — عبادت، امانتدر .

« انا عرضنا الامانة على السموات » قول کریمی
 بوکا دلالت ایدر .

رد امانت ایسه عقلاً وشرعاً واجیدر .
 « ان الله يأمرکم ان تؤدوا الامانات الى اهلها » قول کریمی ده
 بوکا شهادت ایدر .

ادای امانت ، صفات کمالدن بر صفتدر که محبوبه بالذاتدر .
 زیرا امانتی احد جانین دن ادا، جانب ثابتدن ده ادایه سیدر .
 صحابه کرامدن بر ذات خجسته صفات روایت ایدوب دیمشدر که:
 « بر کون عربی نك بریسی باب مسجدده کلوب ناقه سندن
 نزول و مسجد شریفه دخول ایدرک جمله مژک انظار تعجب و تحسینی
 جلب ایده جک صورتده کمال سکینت و وقار ایله نماز قیلدقدن

صکره طیشاری چیقدی . باقدی که دوه میدانده یوق ! دیدی که :
 «آلهی ! بن سنک امانتکی ادا ایتدم . یا بنم امانتم زرده
 قالدی ؟»

اعرابی نک شو حال و قالی تعجیزی آرتدیروب طوررکن
 اوتهدن مقطوع الید بریسی ناقه مفقوده ایله چیقه کلوب دوه یی
 اعرابی یه تسلیم ایلدی .

بونده کی نکته شودرکه ، اعرابی امانه اللهی محافظه ایتدیکی
 ایچون الله تعالی و تقدس حضرتلری دخی آنک امانتی صاقلادی .
 ابن عباسنه خطاباً شرفریز صحیفه سنوح و صدور اولان
 (یا غلام احفظ الله فی الخلوات ، یحفظک فی الفلوات) حدیث
 عالینسندن ده مراد بودر .

وجه ثالث — عبادتله اشتغال ، عالم غروردن عالم سرورده ،
 خلق ایله اشتغالدن عز حضور رب غفورہ انتقالدر . بو حالت
 ایسه موجب کمال لذت و بهجتدر .

محکیدرکه :

بر کون سقف مسجیدن یره برحیه عظیمه دوشوب موجود
 بولنان جماعت طاغلدی . اوراده ادای صلات ایله مشغول اولان
 حضرت ابو حنیفه ایسه نه حیه نک سقوطدن خبردار اولدی !
 نه خالقک طاغلبسندن !

عروة بن الزبیر حضرتلرینک بعض اعضاسنده پیدا اولان
 بر درد دوانا پذیردن طولانی اطبا اوعضوی کسمکه قرار ویردیلر .
 فقط قطع عضو آجیسنه طیانق مشکل ایدی .

وقتکه حضرت عروه نمازه طور دی، عضو مذوری کسی
ویردیلرده عروه نك آندن خبری یله اولمادی !
حضرت رسول الله افندمن حقدهده مرویدرکه، جناب
رسالتباری نمازه شروع بیوردقاری وقت صدر سعادتلرندن
قاینار قازانك خیشیردییسی کبی بر آواز ایشیدرلردی .
بو احوالی استبعاد ایدنار (فلما رأیته اکبرنه وقطعن ایدین)
قول کریمنی او قوسونار !

شوآیت جلیله ناطق اولدینی اوزره مصرلی خانلارک قلیبرینه
جال یوسف علیه السلام غلبه چالنجی، او غلبه معنویه برغایته واصل
اولمش که خانلار الارینی کسمشارده آندن خبرلری یله اولماش !!
مادام که بو، حق بشرده جائز الوقوعدر، عظمت خدا
قابه استیلا ایدنجی او یله بر حال استغراقك جواز وقوعی اولی
بالطریقدر .

اهل تحقیق دیمشدرکه : عبادتک اوچ درجه سی واردر:
درجه اولی — یا امید ثواب و یا یم عقاب ایچون الله
پرستش ایتمکدرکه (عبادت) ایله مسمی اولان بودر. زیرا بو فکر
و نیتله جناب حقه عبادت ایدن کیمسه نك حقیقهده معبودی او
عبادت مقابانده امیدوار اولدینی ثوابدرکه خدای متعالی او مطلوبنه
نیل و وصوله وسیله اتخاذ ایتش اولور. احوال خلقدن برشیئی
مطلوب بالذات اتخاذ ایدوبده جناب حتی آکا وسیله حصول
ایدن جزا خسیسدر.

درجه ثانیه — یا عبادت خدا، یا قبول تکالیف ذوالکبریا

وياخودا نساب بارگاه اقدس مولى ايله تشرف ايجون اللهه پرستش ايتمكدور.
ايشته بو درجه، گرچه درجه اولادن اعلا در. شوقدر كه
بو دخى بر درجه كامله دكلدر. زيرا بونده ده مقصود بالذات،
حضرت الله دكل، غير اللهدر.

درجه نالته — جناب واجب الوجودك آله العالمين، آفرينده
زمان وزمين اولدينى وكندى آنك پرستار صدقشعارى بولنديغى
ايجون درگاه عزتته عرض پرستش ايتمكدور. چونكه الهيت —
هيت وعزتى، عبوديت — خضوع وذلتى ايجاب ايدر.

ايشته بودرجه مقاماتك الباسى، درجاتك اشرف واعلا سيدر كه
(عبوديت) دخى بوكا ديرلر. مصلى نمازه باشلاركن (اصلى لله)
ديميورمى؟ ايشته آنكله ده مراد بودر. زيرا مصلى (اصلى لثواب الله)
ياخود (اصلى لله رب من عقاب الله) ديمش اولسه نمازى فاسد اولور.
معلوم اولسون كه عبادت و عبوديت مقامى بر مقام عاليدر.
بو مقامك علويتته بروجه آتى ذكر ايده حكمنر آيات جليله دخى
دلال ايدر.

اولكيسى شودر:

جناب منزل قرآن، سورة الحجرك آخرنده (ولقد علم انك
يضيق صدرك بما يقولون، فسبح بحمد ربك وكن من الساجدين،
فاعبد ربك حتى يأتيك اليقين) قول كريميله علويت مقام عبوديتى
بيان واعلان بيورديلر.

بو آيت جليله ايله عبوديت مقامك علويتته ايكي وجه ايله
استدلال اولنور.

۱ — جناب رب عزت (واعبد ربك حتى يأتيك اليقين)
فرمان آلهيه حضرت محمد عليه السلام افندمزی رحلتسرای
علیینی تشریف اید بحجه دك عبادته مواظبتله مأمور بیوردیلر.
بو امرک معناسی شو ديمك اولیورکه، «اوقاتدن هیچ بر وقت،
عبادت خدایه خلل ایراث ایتمك جائز دکادر.» ایشته امر عبادتک
کمال جلالت شاننه بو بر دلیل باهردر.

۲ — جناب حق شو آیت جلیله برده (ولقد نعلم انک
يضيق صدرك بما يقولون) بیوردقندن صکره حضرت پیغمبر
افندمزی درت شیلله مأمور بیوردی.
برنجیسی — تسلیحدر. (فسح) قول کریمی بونی آمردر.
ایکنجیسی — تحمیددر. (بحمدربك) قول شریفی بوامری
مشعردر.

اوچنجیسی — سجوددر. (وکن من الساجدين) قول کریمی
بونی امر ایلر.

دردنجیسی — عبادتدر. (واعبد ربك حتى يأتیک اليقين)
اوفرمان نافذ الجریانی ناطقدر.

ایشته شو اوامر جلیله آلهیه دلالت ایدرکه عبادت، ضیق
قلبی ازاله، انشراح صدری افاده ایدر. بو انشراح ایسه مجرد،
عبادتک خلقتدن حقه رجوعی موجب اولمسندن حصوله کلیر.
شرف عبودیتی مشعر اولان ایکنجی آیت جلیله دخی شودر:
جناب حق (سبحان الذی اسری بعبده لیلاً) بیوردی. اگر
عبودیت مقامی مقاماتک اشرفی اولمسیدی، جناب حق حبیب

اگر منی مقامات معراجك اعلاسنده بو صفتله وصف ایتزدی .
علمای گرامدن بعضیسی دیمشدرکه :

« عبودیت، رسالتدن اشرفدر . زیرا انسان، عبودیت ایله
خلقندن حقه، رسالتلهده حقندن خلقه منصرف اولور . كذلك
عبودیت سببيله تصرفاتندن منعزل اولور . رسالت سببيلهده تصرفاته
اقبال ایدر . عبده لائق اولان حال ایسه تصرفاتندن انزالدر .
كذلك عبدك مهماتی اصلاحه مولاسی متكفل اولور . رسول
ایسه امتك مهماتی اصلاحه متكفل اولیور . »

*
* *

شرف عبودیتی مبشر اولان آیت ثالته دخی شودر :
قرآن، ناطقدرکه حضرت عیسی علیه السلامك الاول نطق
ایتدیكى كلام (انی عبد الله) قولیدر . نبی محترم مشارالیهك ایسه
بویله دیمسی والدۀ محترمه سی حضرت مریمك طهارتنه، طعنندن
برائتنه سبب اولمقله برابر كافۀ خیراتك مفتاحی، جمیع آفاتك
دافعی اولدی .

كذلك نبی مشارالیهك ایلک سوزی ذكر عبودیت اولدیغی
ایچون (ورافعلك الی) قول کریمی ناطق اولدیغی اوزره آنكده
عاقبت امری رفعت اولدی .

نکته — بافکیزکه قولاً ادعای عبودیت ایدن ذات، نصل جنت
عالیه یه رفع ایله قدر و منزلتی اعلا بیورلدی . یاعملأ وفعلاً یتمش
بیل قدر آنی ادعایله مفتخر اولان کیسه هیچ جنتندن محروم قالیرمی؟
شرف عبودیتیه دال اولان آیت رابعه دخی شودر :

حق تعالی حضرت موسایه (انی انا الله لا آله الا انا فاعبدنی)
 دیرك ابتدا - توحید، ثانیاً - عبودیت ایله امر بیوردی. زیرا
 توحید، اصلدر. عبودیت، فرعدر. توحید، شجره در. عبودیت،
 ثمره در. احدى انك قوامی همه حال دیگره محتاجدر.
 ایسته شو آیات بیناتك هر بری شرف عبودیته برر دلیل
 باهردر.

معتوله كنجه: مقام عبودیتك علویتنه عقلك دلالتی ظاهردر.
 زیرا معلومدر كه عبد، محدثدر. ممكن الوجود لذاته در. بناء علیه
 جناب حقك عبده تأثیر قدرتی اولمسیدی، عبد، ظلمت عدمده،
 فنای فئاده قاله جقدی ده کالات وجودك حصولی شویله طورسون،
 اویچاره حتی وار بیله اوله میه جقدی. وقتا كه آكا حقك قدرت
 ازلیسه سی تعلق ایدوب آثار جود و ایجادى فائض اولی ویردی،
 هم وجود، هم کالات وجودك حصولیله مظهر تکریم اولدی.
 «عبد، قدرت خدانك مقدوریدر. ایجاد مولانك متعلقیدر.»
 دیمه مزایسه آنجق معنای عبودیتی مشعردر. بناء علیه عبده قدر
 شرف و کمال و بهجت. نه درجه فضیلت و مسرت و منقبت نائل
 اوله بیلیش ایسه کافه سی محض عبودیت سببیه تیسر نمای حصول
 اولمش در. شو ایضاح ایله تبیین ایتدی كه (عبودیت) خیراتك
 مفتاحی، سعادتك عنوانی، درجات عالپاتك مطامعی، کراماتك
 ینوعی در. ایسته بو سبیدن ناشی عبد (ایلك نعبد وایك نستعین)
 قول کریمنی ورد زبان افتخار ایدر.

حضرت علی «کرّم الله وجهه» - کفی بی فخراً ان اکون لك

عبدآ، وكفى بى شرفاً ان تكون لى رباً، اللهم انى وجدتك آلهاً
كما اردت فاجعلنى عبدآ كما اردت - بيوررلردى .

فائده

۶

معلوم اولسون كه مقامات ايكيه محصوردر :
معرفت ربويت، معرفت عبوديت .
بوايكي مقامك اجتماعى حالنده (واوفوا بعهدى اوف بعهدكم)
قول كريمنده مذكور اولان عهد حاصل اولور .
معرفت ربويتك ده كالى (الحمد لله رب العالمين الرحمن الرحيم
مالك يوم الدين) نظم جليبنده مذكوردر .
چونكه عبدك عدم سابقدن وجوده منتقل اولمى جناب
حقك آله اولديغنه، عبدايچون حال وجودده خيرات وسعاداتك
حاصل اولمى ده رب ورحمان ورحيم اولديغنه دلالت ايدر . عبدك
احوال معادى ده كذلك جناب حقك مالك يوم دين اولديغنه
دلالت ايدر .

ايسته شوصفتلرى احاطه حالنده اقصى الغايات اوزره معرفت
ربويت حاصل اولور .

بوندن صكرده معرفت عبوديت صره سى كلير .
معرفت عبوديتك مبدئى، كالى، اولى، آخرى واردر .
مبدأواولى - عبوديتاه اشتغالدر كه (اياك نعبد) قوليله مرادبودر .

کالی - معصیت خدادان رجوع ایتمک آنجق عصمت مولی
ایله، طاعت مولایه قدرتیاب اولمق آنجق توفیق خدا ایله امکان
پذیر حصول اوله بیله جکئی عبدک بیله سیدر. بورالری معلومی
اولنجه عبد استحصال مطالبده جناب حقدن استعانهیه باشلارکه
(ایاک نستعین) قولیلده مراد بودر.

عهد ربوبیتله عهدعبودیتله وفای عهدین تمام اولدقدن صکره
عیده بونک فائده و نمرهسی ترتیب ایدرکه بوده (اهدنا الصراط
المستقیم) قول کریمیدر.

ایشته بو بر ترتیب شریف و رفیع وعالیدرکه بتون عقلا
بریره کلسه بوندن اشرفی ترتیب ایتمکه مقتدر اوله ماز.

فائده

۷

بررسی دیه بیلیرکه :

« الحمد لله رب العالمین الرحمن الرحیم مالک يوم الدين » نظم
جلیلی سراسر لفظ غیبت اوزرینه مذکور ایکن « ایاک نعبد و ایاک
نستعین » قولنده لفظ غیبتدن لفظ خطابه انتقالک فائدهسی نه در؟
بو سؤاله جواباً دیرزکه بونده بر قاج وجه واردر.

۱ - مصلی نمازه باشلارکن اجنبی صایلیر. اوجهته نمازک
اولنده جناب حق الفاظ مغایه ایله ثنا ایدر. « مالک يوم الدين »
قوانه قدر کلدکدن صکره کویا جناب حق دیمش اولورکه « بکا

حمد و تعظیم ایلدک. آله، رب، رحمان، رحیم اولدیغیم، یوم دینک مالکی بولندیغیم مقرر و معترف اولدک. سن نه کوزل عبد سین! آرتق حجابی آرهدن قالدیردق؛ بعدی قربه تبدیل ایلدک. بوندن صکره خطاب صورتنده تکلم ایتده — ایاک نعبد — دینی ویر!

۲ — سؤالک احسنی علی وجه المشافهه و توع بولاندر. کورمز میسین که انبیای عظام علیهم السلام رب لری تعالی و تقدس حضرتلرندن هر نه که طاب و سؤال بیورمشلر ایسه علی وجه المشافهه طاب و سؤال ایدرک (ربنا ظلمنا انفسنا — ربنا اغفر لنا — رب هب لی — رب ارنی) دیمشلر. بونک سببی شودر که مشافهه و مخاطبه یولنده کریمدن وقوع رد پک بعیددر.

برده عبادت، خدمتدر. خدمت ایسه حضورده اولادر. ۳ — سورهنک اولندن — ایاک نعبد — قولنه دک ثنادر. ثنا ایسه غیبتده اولادر. — ایاک نعبد و ایاک نستعین — دن آخر سوریه دک دخی دعادر. دعا ایسه حضورده اولادر.

۴ — عبد وقتاکه نمازه باشلار، (نویت ان اهلی تقرّباً الی الله) دیهرک حصول قربته نیت ایدر. بو نیتدن صکرده انواع ثنای الهی بی ذکر ایلر. بناءً علیه جناب للهک کرمی قربت مذکورده بی تحصیله دائر اولان. دعاسنی قرین اجابت ایتمه بی اقتضا ایدرک آتی مقام غیبتدن مقام حضوره نقل ایلدی ده — ایاک نعبد و ایاک نستعین — بیوردی.

فصل سادس

اياك نستعين

دلائل عقلیه ایله مشیدرکه عبدی معصیته اقدامدن منع ایدن
عون خدادر. طاعته سوق ایلینده توفیق مولادر.

دلائل عقلیه

۱ — قادرک فعل و ترکه اقتداری مساوی در. بناءً علیه
احد هائی آخره ترجیح ایده جک بر مرجحک حصولی لازمدرکه
رجحان حاصل اوله بیاسون. او مرجح دخی آنجق جناب حقدور.
ایشته تبیین ایتدی که عبدک بر فعله اقدامی مجرد اعانه باری ایله
امکان پذیر حصول اولور.

۲ — محققدرکه بو عالمده هر کس بر حق دین، بر طوغری
اعتقاد جستجو ایدر. کیچی مقصودینه ظفریاب اولیور. کیچی اولیور.
جال بوکه جمله سی قدرته، غقلده، جدوسعی ده، طایده مساوی در.
دیمک اولدی که بعضیسنک حق دینه، طوغری اعتقاده ظفریاب
اوله نیلسی آنجق بر معینک اعانه سیله حاصلدر. او معین دخی جناب
حقدن بشقه سی دکادر.

۳ — انسان، بعضاً بر شی یامق ایستزده فصلسه یامغه
موفق اوله ماز. صکره بر آرائق قلبنده حاصل اولان بر اعیه

جازمه نك سوقيله او ايشى ياپى ويردى . ديمك كه قلبنده اويله
بردايه جازمه حاصل اولمىدى، انسان او ايشى ياپه ميه جقدى .
ايشته اودا عيه يي قلب انسانه القاء و آ كا معارض اولان
دوا عي ي ازاله ايلين آ بحق عون و توفيق الهى در كه اعانه نك ده
معناسى بودر .

دلائل تقليه

دلائل تقليه نك اولكي سى « اياك نعبد » ايكنجيسى « استعينوا
بالله » در .

بو استعانه آيتنه جبريه ايله قدريه نك اقوالى مضطربدر .
جبريه ديمش در كه :

عبد اكر فعلنده مستقل اولمىدى، اوفعل اوزرينه استعانه سى
فائده سز اولمق لازم كليردى .
قدريه ديمش در كه :

عبدك اصل فعلده تمكّن و اقتدارى حالنده استعانه بجادور .
يوقسه فعله كندى قدرنى تعلق ايتيموب ده تحت قدرت خداده
مضطرب اولورسه او حالده استعانه نك كندينه نه فائده سى اولور؟
حضرت مفسر دير كه :

بكا قاليرسه قدرت آ بحق داعيه جازمه نك حصولى حالنده
فعله تأثير ايدر . ايشته اعانه مطلوبه او داعيه جازمه يي يراقمق،
داعيه صارفه يي كيدر مكدن عبارتدر .

برده شو کله نك [*] متضمن اولدينى لطائف و فوائدى بيان
ايدلم.

فائده

۱

بريسى چيقوب ديه بيلير كه :

» بر عمل اوزرينه استعانه، آنجق او عمله شروعدن اول
كر كدر. حال بوكه سورة فاتحه ده ابتدا (اياك نعبد) صكرده
(اياك نستعين) بيورلدى. بوتقديم و تأخيرده عجباً حكمت نه در؟
بوسؤاله بر قاچ وجه ايله جواب ويريلير.

۱ — كويا مصلی ديمش اولور كه » ايشته عبادته باشلام.
آنى اتمام ايجون سندن استعانه ايدرم. اولومله، خسته لكه،
دوعائى عبادتى قلب و تغيير ايله بنى اتمامندن منع ايمه ياربى!

۲ — كويا انسان ديمش اولور كه : » الهى ! بيليرسين كه
بنم بر نفسم، برده قلم وار. ايشته نفسم عرض و جيبه عبوديت
ايجون حضور كه كليور. قلم ايسه سندن قاچيور! بناء عليه حصول
حضور قلب ايجون سندن استعانه ايدرم.

حضور قلب ايجون عباد، نصل طلبكار عون و مدد خدا
اولسون كه، فخر كائنات افندمن (قلب المؤمن بين اصبعين من
اصابع الرحمن) بيورمش در؟

[۵] اياك نستعين

ایسته شو حدیث صحیح نبوی دلالت ایدر که، حضور قلب، آنجق اعانه رب قدیر ایله امکان پذیر اولور.

۳ — سندن بشقه نه جبریلک اعانه سنی ایسترم! نه میکائیلک! بن یالکز سنک عون و عنایت ربانیه کی ایسترم و بومذهبه حضرت خلیل علیه السلامه اقتدا ایدرم. زیرا معلومدر که نمرود، بنی مشارالیهک مبارک اللرینی، آیاقلرینی قید و بند ایدره رک کن دینی ناره آتارکن جبریل امین نزد عالیرینه کلوب «بر حاجتک وارمی؟» دیه ایتدیکی سؤال اوزرینه «سندن دیله یه جک بر حاجتم یوقدر!» جوابی المغله «اوله ایسه جناب حقن دیله!» دیدی ایسه ده بوکاده حضرت خلیل الله (حسی من سؤالی علمه بحالی) مقال تسلیمکارانه سیله مقابله بیوردی که «بنم سؤالنه نه حاجت؟ او حالمی بیلیورمی؟ آنک بیاشی بکا کافیدر!» مؤداسنی مشعردر. بن ایسه بوبابده کلام خلیله شوراسنی ده علاوه ایدرک دیرم که:

نمرود، حضرت خلیلک یالکز مبارک اللرینی، آیاقلرینی باغلامشدی. حال بو که بنم آیاقلرم ده باغلیدر؛ رویه میورم! اللرم ده باغلیدر؛ قیلداده میورم! کوزلرم ده باغلیدر؛ کوره میورم! قولاقلرم ده طیقالدیر؛ ایشیده میورم! دیلم طوتوقدر؛ سوبلیه میورم! برده حضرت خلیل، مشرف نار نمرود ایدی؛ بن ایسه مشرف نار جهنم! بناءً علیه حضرت خلیل سندن بشقه معینک اعانه سنه راضی اولمادیغی کی بن ده سندن بشقه معین ایسته مام! آنکچون (ایاک نعبد وایاک نستعین) دیهرک آنجق سکا عبادت، آنجق سندن طلب معاونت ایدرم.

عبدك بومناجاتی اوزرینه کویا شو یولده خطاب عزت کلیرکه
 «قولم! سن اثر پاك خلیله اقتدایله برابر بعض علاوه لرده ایتدك؛
 بوصورته بزه سكا آندن زیاده مكافات ایده جکز! زیرا بز فعل
 خایل اوزرینه یالکز (یانار کونی برداً وسلاماً علی ابراهیم)
 دیوب نار نمرودی کلزار برد وسلامه تحویل ایتشدك. سنی ایسه
 هم آتشدن قور تاردق! هم جتته ایتدك! فضله اوله رق کلام قدیمك
 سماعیله ده، موجود قدیمك رؤیتیه ده مشرف ایلدك. نصل که بز
 نار نمروده (یانار کونی برداً وسلاماً علی ابراهیم) دیدك ایسه نار
 جهنم دخی سكا (جز یا مؤمن قداطفاً نورك لهی) دیور.»

۴ — ایاك نستعین — سندن بشقه کیسه دن استعانه ایتمام.
 زیرا سندن بشقه سی ینه سنك مظهر اعانتك اولمادقچه اعانهیه مقتدر
 اوله ماز. مادام که بشقه سنك اعانه سی ده ینه سنك اعانه که محتاجدر،
 بزه آرهدن واسطه یی قالدیر رزده سنك اعانه الهیه که حصر
 مطلب ایدرز دیمکدر.

۵ — «ایاك نعبد» قولی عبادت خدا سببیه نفس ایچون
 بر رتبه عظیمه نك حصولی مقتضیدر.

بو ایسه انسانه عجب ایراث ایدر. بناءً علیه عبادت سببیه
 حاصل اولان او رتبه عبدك قوتیه دکل، مجرد حقل اعانتیه
 حصولپذیر اولدیغنه دلالت ایتدك ایچون (ایاك نعبد) قولنه
 (ایاك نستعین) قولی تردیف بیورلمشدر. دیمك اولدی که (وایاك
 نستعین) قولنی ذکر دن مقصود، عجبی ازاله، او نخوت و تکبری
 افنادن عبارتدر.

فصل سابع

اهدنا الصراط المستقیم

بو قول کریم دخی فوائد شتایی مشتملدر

فائده

۱

بررسی دیه بیایرکه :

« مصلی البته مؤمندر . مادام که هر مؤمن ، مهتدیدر ، مصلی ده مهتدیدر . بناءً علیه مصلینک (اهدنا) دیمه سی ذاتاً نائل نعمت هدایت اولان بر کیمسه نک تکرار طلب هدایتہ قالقیشمه سنه بکزرکه حاصلی تحصیل قیلندندر . بوده محالدر . »

علمای کرام ، بو سؤاله بر قاچ وجه ایله جواب ویر مشلدردر .

۱ — صراط مستقیمدن مراد ، صراط اولیندر . انیسای

مقدمین حضراتی مجرد مرضات خدا ایچون مشاق عظیمیه تحمل بیوررلردی . عابد دخی بو قول کریم ایله او یله بر تحمله مظهریتی طلب ورجا ایتمش اولور .

۲ — علمای کرام بیان ایتشلردرکه اخلاق انسانیه دن هر

هانکی خلق اولورسه اولسون آنک افراط و تقریط ، طرفلری مذمومدر . مستحسن اولانی ایکسی اورتہ سیدرکه اوده عدلدر .

بو قولك محتى (وكذلك جعلناكم امةً وسطاً) نظم جايلی ده تأييد ايدر. مؤمن ايسه كچه جناب حق دليل ايله بيلدكن صكره مؤمن مهتدى اولمش اولور، فقط ايمان واهتداناك حصولندن صكره افراط و تفریط بينندهكى خط متوسطدن عبارت اولان عدلى ده همه حال بيمك لازم كاير.

بناءً عليه مؤمن كانه اخلاقده، كافه اعمالده، افراط و تفریطك وسطى اولان صراط مستقيمه اهتداسنى جناب حقندن طالب ورجا ايدر. ايشته بو تفسيره كوره سؤال مذكور بر طرف اولور.

۳ — مؤمن، اوله بيليركه جناب حق يالكر دليل واحده بيلش اولسون. اقسام ممكناتدن ايسه هيچ بر موجود يوقدركه الله تعالىناك وارلغنه، علمنه، قدرتنه، جودينه، رحمتنه، حكمتنه دالالتدن خالى بولنسون. بناءً عليه «اهدنا الصراط المستقيم» قولنك معناسى شو ديمك اولوركه:

«الهمز! هر شیده سنك ذاتكه، صفاتكه، قدرتكه، علمكه دلالت ايدن كيفياتى بزه بيلدر!»

ايشته بو تفسيره كوردهده سؤال بر طرف اولور.

۴ — جناب حق (وانك لتهدى الى صراط مستقيم، صراط الله الذى له مافى السموات ومافى الارض) برده حضرت محمد عليه السلام اقدمزه (وان هذا صراطى مستقيماً فاتبعوه) بيورمش در. بو آيتارده مذكور اولان صراط مستقيم انسانك ماسوى اللهدن معرض، قلبنك فكرينك ذكرينك كليتيه جناب الله مقبل اولمه سيدر. ايشته (اهدنا الصراط المستقيم) قوايلهده

مراد، صفت مذکورہ ایلہ موصوف اولان صراط مستقیمہ اہتدائی
جناب حقہن طلب ورجادر .

بویابده بر مثال عرض ایدہلم :

عبد بر حالہ کلمی کہ بالفرض ولدینی ذبح ایتکہ مأمور اولسہ
او امرده اطاعت ایتلی !

حضرت ابراہیم علیہ السلامک یاپدینی کبی .

بشقہسی کندینی ذبحہ منقاد اولمغه امر اولنسہ آکادہ اطاعت

ایتلی !

حضرت اسماعیل علیہ السلامک یاپدینی کبی .

کندینی دکرہ آتغه مأمور اولسہ بوامرده اطاعت ایتلی !

حضرت یونس علیہ السلامک یاپدینی کبی .

کندی بر منصب عالی یہ نائل اولمش واعلم ناس بولنش ایکن
علمجہ کندی درجہ سندن دون اولان بر ذاتدن تلذہ مأمور اولسہ
آکادہ روی مطاوعت کو سترملی !

حضرت موسانک حضرت خضر دن تلذی کبی .

عاقبہ الامر قتل واعدام اولنہ جغنی، یحقی ایلہ ایکی یہ بولونہ جکی
محقق بیلدیکی حالہ امر بالمعروف ونہی عن المنکرہ مأمور
اولسہ ینہ اطاعت ایتلی !

یحیی وزکریا علیہما السلامک یاپدقاری کبی .

ایشته (اهدنا الصراط المستقیم) قولیلہ مراد، شدائدہ صبر
وتحمل، نزول بلا حالندہ ثبات خصوصاً صرندہ انبیاء اللہہ اقتدادر .
بو مقامک بر مقام شدید وهائل اولدیغندہ ایسہ اشتباه یوقدر .

زیرا هر کس بو مثل او شد آئده تاب آور اوله ماز. مکر دیلم که :
 « ایها الناس ! قورقیکز ! محزون و مکدر اولمیکز ! دین حق خداده
 هیچ بر امر ضیق یوقدر که بالآ خرد متسع اولسون. زیرا شو آیت
 جلیله یسر و سهولته دلالت ایدر بر نکته واردر. باقکز ! جناب
 حق (اهدنا صراط الذین ضربوا و قتلوا) بیورمدی . (صراط
 الذین انعمت علیهم) بیورمدی . بناءً علیه بو آیت جلیله یی اوقورکن
 نیتک شو اولسون ! دیمش اول که : الهم ! بنم ایتدیکم کبی ،
 بابامک ده ارتکاب کبائر ایتمش اولدیغنی کوردم . بنم ایتدیکم کبی .
 بابامک ده معاصی یه اقدام ایتدیکنی کوردم . صکره ینه بابامی
 کوردم که اوله جکنه یاقین تائب و مستغفر اولدی . او جهتمله
 ناردن نجات بولوب داخل جنت اوله جغنه حکم ایلدم . ایشته
 ابتدا آنی توبه یه موفق ، ثابا : توبه سنی قبول بیورمقله مظهر
 انعام ایتمشین ! بناءً علیه بن دخی بویله تائب و مستغفر اولانلرک
 مرتبه سنی طلب ایدرک (اهدنا مثل ذلک الصراط المستقیم) دیرم .
 اودرجه یه نائل اولدقدن صکره ده درجات انبیایه ایتدانی طلب
 ایدرم . »

ایشته (اهدنا الصراط المستقیم) قولنک تفسیری بودر .

۵ — کویا انسان دیر ایتش که : یولارده احبا چوق !
 آنلر بنی بر یوله چکیور . دشمنلرده ایکنجی بر یوله ، شیطانده
 اوچنجی بر یوله چکوب طورییور . شهوت ، غضب ، حقد ،
 حسدده بنی بر کتمکش اضطراب ایچنده بولندریور . جبر ، قدر ،
 ارجا ، رفض مسائلی ده ذهننی ترده دوشوریور . طوبی بر عقل

وار! اوده ضعیف؛ عمرایسه پک قیصه؛ صناعت اوزون! تجربه،
مخاطره لی؛ قضا کوچ؛ ایسته بن بوامورک کافه سنده ولهزده عقل
وشعور اولوب قالدیم. بناء علیه جنه چیقار بر یوله اهتدای
میسر ایت!

مشاهیر ابراردن ابراهیم بن ادهم حقنده محکیده که: مشارالیه
بر وقت زیارت بیت خدا قصدیه یوله چیمشدی؛ اثنای راهده
ناقه سوار بر اعرابی یه راست کلدی. ایکسی بیننده شویله بر
محاوره جریان ایلدی:

اعرابی — یاشیخ! نریده کیدیورسین؟

ابراهیم — بیت اللهه!

اعرابی — چیلیدر دمی؟ هانی مرکبک؟ هانی زادک؟ بویله
اوزون سفره زاد ورا حله سز کیدیلیر می؟

ابراهیم — بنم مراکم چوق اما سن کوره میورسین!

اعرابی — هانی باقهلم؟

ابراهیم — بکا بر بلا نازل اولدینی وقت مرکب صبره بنرم!
بر نعمتک نزولنده مرکب شکره بنرم! بر قضا نازل اولنجهده
مرکب رضایه بنرم!

نقسم بنی بر شیئه دعوت ایتدیکی وقت بیلیرم که عمرمک
کچمشندن قالانی دهآ آذرر!

اعرابی — او یله ایسه هایدی کیت اللهک اذنیله! مکرراکب
سن ایمشسین! راجل بن ایمشم!

فائده

۲

بریسی چیقوب دیه بیایرکه :

نیچون (اهدنا) بیورلدی ده (اهدنی) بیورلادی ؟

بو سؤاله ایکی وجه ایله جواب ویریلیر .

۱ — دعا اعم اولورسه اجابته دهاقرب اولور .

حکایه — معلومدرکه طلبة علوم حضور استاذده درسه

باشلادقاری وقت « رضی الله عنک وعن جماعة المسلمين » جمله

دعائیه سنی تقدیم ایدرلز .

علمای کرامدن بعضیسی تلامیذینه دیر ایمشکه : « رضی الله

عنک » دیدیکک وقت اگر بنی نیت ایدرسه که نه کوزل ! شاید

نیت ایتمزسه که بآس یوق؛ فقط « وعن جماعة المسلمين » دیرکن

زهار بنی اونوتمه !

چونکه « رضی الله عنک » قولنده دعامخاطبه مخصص اولدیغندن

بودعانک قرین اجابت اولماسی ده جائزدر . « وعن جماعة المسلمين »

قولنده ایسه عموم اهل اسلام داخل اولوب بوقدر مسلمان ایچنده

البته مستحق اجابت برکیمسه ده بولنه بیلیر . جناب حقه کرمی ایسه

آکا قائل دکلکه دعای واقعی یالکیز بعضیسی حقنده قرین قبول

بیوروبده باقیدنی رد ایلسون .

دعای صلات و سلام ایله باشلا یوب ینه صلات و سلام ایله

بتیرمه نك سنت مأثوره اولمسی ایشته بو سبیدن ناشیدر . زیرا صلوات شریفه ده داعییه اجابت بیوره جغنی جناب حق وعده بیوروش در . بر دعانك ابتداسنی انتهایسنی قرین قبول واجابت بیوروبده اورته سنی رد ایتمك ایسه شان الوهیته لائق دكلدر .

۲ — فخر کائنات واشرف موجودات صلی الله علیه وسلم افندمن « جناب حقه شول السنه ایله دعا ایدکرکه آنلرله کندینه عصیان ایتمامش اوله سیکز . » مألنده اولدوق (ادعوا الله بالسنة ماعصیتوه بها) بیوروش در . اصحاب کرام دخی — یارسول الله ! او نصل السنه در ؟ — دیه استیضاح ایتملریله جناب رسالتاً بلری ده « یکدیگرکره دعا ایدکر ! زیرا سن عصیان ایتمش ایسه نك بیله آرقداشكك لسانیله ایتمامشین . اوده سنك لسانككه عصیان ایتمامش در . » جوابنی ویردیلر .

۳ — کویا جناب حق دیمش اولورکه « ایها العبد ! سورهنك اولنده — احمد الله — دیموب — الحمد لله — دیدكده اولا : جمیع حامدینك حمدلرینی ذکر ایتدك دكلی ؟ فکذلك وقت دعاده ده حامدلك عمومنی تشریك ایدهرك (اهدنا) دیملیسین . »

۴ — کویا عبد دیر ایش که « یارب ! رسول اکرمکی ایشتمد ؛ بیورلردی که (الجماعة رحمة والفرقة عذاب) — جماعت ، رحمتدر ؛ فرقت عذابدر — او جهتهله تحمیدکی ذکر ایتمه بی مراد ایدنجبه جمله نك حمدینی ذکر ایدوب — الحمد لله — دیدم . عبادتی ده ذکر ایدنجبه هر کسك عبادتی ذکر ایلدم ده — ایاك نعبد — دیدم . استعانه بی ده ذکر ایدنجبه جمله مستعینارك استعانه سنی ذکر ایدوب

— وایک نستعین — دیدم . بناءً علیه طلب هدایتدهده آنلری
 تشریک ایددرک — اهدنا الصراط المستقیم — دیدم . صالحینه
 اقتدای طلب ایدنجهدهده کافه صالحینه اقتدای طلب ایددرک —
 صراط الذین انعمت علیهم — دیدم . وقتاکه مردودلردن فراری
 طلب ایددم، هپسندن قاچوب — غیرالمغضوب علیهم ولا الضالین —
 دیدم . کرچه دنیاده انیسا وصالیندن آیرلق ضروریدر، فقط
 اومارمکه آخرتده کندیلرندن مفارقت ایتام . زیرا حق تعالی (فأولئك
 مع الذین انعم الله علیهم من النبیین — الآیه) بیورمشدر .

فائده

۳


معلوم اولمیدرکه: اهل هندسه «ایکی نقطه بیننده الکیسه
 بول خط مستقیمدر.» دیدیلر .

حاصلی دیمک اولدی که خط مستقیم، جمیع خطوط معوجهدن
 قیصهدر . او جهتمله عید کویا وجوه آتی الذکردن ناشی «ایک
 نستعین» دیر ایمش .

۱ — خط مستقیم، خطوطک اقرب واقصیریدر . بنایسه
 عاجزم! بناءً علیه بنم ضعفه آنجق طریق مستقیم یراشیر .

۲ — خط مستقیم بردر . خطوط سائر ایه معوجدر .
 اعوجاجده یکدیگرینه بکزدیور . آنکچون یولی شاشیره بیایرم .
 خط مستقیم ایه خطوط سائردهدن هیچ بری بکزمز . بناءً علیه
 خط مستقیم خوف و آفتدن اوزاق، امانه یاقیندر .

- ۳ — طریق مستقیم، سالکینی منزل مقصوده ایصال ایدر .
 اگر یول ایسه سالکینی منزل مقصوده ایصال ایلز .
- ۴ — خط مستقیم دیکشمز . خط معوج ایسه دیکشیر .
- ایشته بواسیابدن ناشی عبد « اهدنا الصراط المستقیم » دیزرک
 صراط مستقیمه اهتداسنی جناب حقندن طالب ایلدی . « واللہ اعلم »



فصل ثامن

صراط الذين انعمت عليهم

قول كريمك تفسيرى پيائنده اولوب فوائد شتايي مشتلدن

فائده

۱

نعمتك تعريفى

نعمتى تعريفده علما اختلاف ايتمشدر .

كىي «انها عبارة عن المنفعة المفعولة على جهة الاحسان الى الغير» يولنده تعريف ايتدى .

كىي «المنفعة الحسنة المفعولة على جهة الاحسان الى الغير» يولنده تعريف ايدوب «الحسنة» قيدنى علاوه ايلدى .

تعريف ثانى بي التزام ايدنلر :

«نعمت سزاوار شكر و محمدتدر . فقط (نعمت) نعمت حسنه

اوليوبده نعمت قبيحه اولورسه سزاوار شكر اوله ماز . بوجهته

تعريفده (الحسنة) قيدنى علاوه مجبورز .» ديديلر .

طوغريسي آرانيرسه، بوقيد معتبر دكلدر .

زيرا محسنك فعلى هر نه قدر محظور و ممنوع اولسه دخی

احسانى مقابلنده شكره مستحق اولق جاؤدر . چونكه شكر ك
جهت استحقاقى بشقه، ذنب وعقابك جهت استحقاقى ده بشقه در .
جهتين مذكور تينك اجتماعنده ايسه نه امتناع وارددر؟ كورمز ميسين كه
فاسق، انعامى سبيله شكره، معصيتى سبيله ده ذمه سزاوار اوليور؟
بونده ده امر اويله اولق نه دن جاؤ اولسون؟
حد نعمتى تفسيره كهلم :

نعمت، منفعتدن عبارتدر ديله يور. طوغريدر. زيرا مضرت
محضه نعمت اوله ماز .

او منفعت ده « المفعولة على جهة الاحسان » قيديله تقييد
ايديله يور . بوده طوغريدر . زيرا منع انعاميله منع عليهك انتفاعى
قصد ايتيوب ده كندى نفعى قصد و اراده ايده جك اولور سه
آنك انعامى نعمت صايلاز .

بو مجرد كنديله سودمند اولق اچون جاريه سنه احسان ايدن
كىسه نك احسانه بكور .

فروع نعمت

فرع اول - جناب حق (وما بكم من نعمة فمن الله) بيور مشدر .
ديك اولدى كه كرك منفعته، و كرك دفع مضرت ده دائر خلقه و اصل
اولان نعمك كافه سى الله دندر .
نعمت اوچ قسيدر .

اولكىسى - ايجادنده جناب حقك متفرد اولديغى نعمتدر .
بر شى ئى يراتمق، برينى مرزوق ايتك كى .

ایکنجیسی - ظاهر حالده جهت غیراللہدن بزہ واصل اولان نعمتدرکہ حقیقتده بودہ جناب حققدر . زیرا او نعمتکده، منعمتکده، او منعمک قلبندہکی داعیہ انعامکده خالق جناب حقدر . شوقدرکہ جناب حق او نعمتی اعطادہ کیمی توسیط بیورمش ایسہ او کیمسده وساطتندن طولایی مشکور اولیور . یوقسہ حقیقتده مشکور اولان ینہ جناب حقدر . بو سببہ مبنی درکہ جناب حق (ان اشکری ولوالدیک الی المصیر) آیت جلیلہ سندہ خالقک انعامی آنجق انعام الہی ایلہ تمام اولدیغی کوسترمک ایچون نفسیلہ بدأ بیورمش در .

او چنجیسی - طاعتز سبیلہ اللہدن بزہ واصل اولان نعمتدرکہ بودہ جناب حقک بر لطف واحسانیدر . زیرا اگر جناب حق بزى طاعته موفق بیورمسه، او طاعتک اداسنده بزہ مددرس اولمسه، بزى مظهر ہدایت ایتمسه، ادای طاعته مانع اولان کوناگون عذرلرمزى کیدرمسه ایدی؛ ابتدا او طاعته موفق اولہ مزدق کہ آنک سبیلہ بو نعمتہ نائل اولہ بیلہلم . ایشته شو ایضاحزلہ مستبان اولدی کہ نعمک کافہسى حقیقتده اللہ ذوالجلال و منعم عیم النوال بی زوالنددر .

فرع ثانی - خالق تعالی و تقدس حضر تلرینک قوللری حقندہ مبذول اولان نعم الہیہ سنک برنجیسی نعمت کران قیمت حیاتدر .

عقلاً دلیلز

کندیلہ انتفاع ممکن اولمیان شی نعمت صابناز . منتفعہ اولان

شيله منتفع اوله ايلك دخی حصول حياه متوققدر . زیرا جهاد
وميتك بر شيله منتفع اوله ايلسی امکان خارچنده در . ايشته تین
ایتدی که جمیع نعمتک اصل و اساسی نعمت حیاتدر :

نقلاً دلیلز

جناب حق قرآن مجیده (کیف تکفرون بالله وکنتم امواتاً
فاحیاءکم) بیوردقن صکره (هو الذی خلق لکم مافی الارض
جمیعاً) بیوروب حیاتک ذکرینی سائر منتفع بها اولان شیلرک
ذکرینه تقدیم ایلدی .

ایشته بو تقدیم دلالت ایدرکه جمیع نعمتک اصلی حیاتدر .
فرع ثالث — کافرک اوزرندهده جناب حقک بر نعمتی وارمی
یوقی بوراسی تحت اختلافدهدر .

بزم اصحابمزدن بعضیلری یوقدر دیدیلر .
معتزله، جناب حقک کافر اوزرندهده هم دینی، هم دنیوی
نعمتلری واردر دیدیلر .
بزمکیلر قولارینک صحتنه قرآن ايله، معقول ايله احتیاج ایلدیلر .

قرآن ايله احتیاجلری

۱ — «صراط الذین انعمت علیهم» بیورلدی . اگر جناب
حقک کافر اوزرندهده نعمتی اولسیدی؛ کفار دخی «انعمت علیهم»
قولنک حکمی آتیده بولغق و او حالده «اهدنا الصراط المستقیم»
صراط الذین انعمت علیهم» قوليله مطلوب اولان صراط مستقیم،
صراط کفار اولمق لازم کایردی . بو ایسه باطلدر .

ایشته شو آیت جلیله ایله تبیین ایتدی که الله تعالانک کفار اوزرنده بر نعمتی یوقدر .
مخالفلمنز دیرلر سه که :
« الصراط، قولى شو مخذورى دفع ايدر . »
جوابنده دیرز که :

« صراط الذين انعمت عليهم - قولى - الصراط المستقيم - قولندن بدلدن . بناءً عليه آیت جلیله (اهدنا الصراط الذين انعمت عليهم) تقدیرنده در . بوتقدیرده مخذور مذکور عودت ايدر .
۲ - جناب حق (ولا تحسبن الذين كفروا انما نملى لهم خير لانفسهم انما نملى لهم ليزدادوا اثماً) بیوردی .

عقل ایله احتجاجباری

نعم دنیا عذاب دائم آخرته نسبتله هیچدر . بویله برشی قلیل ایسه نعمت صایلار .

معترله نك احتجاجی

جناب حقتك كافر اوزرندهده نعم کثیره سی واردر دینلردخی بعض آیات قرآنیه ایله احتجاج ایتشاردر .

۱ - جناب حق (يا ايها الناس اعبدوا ربكم الذى خلقكم والذين من قبلكم لعلكم تتقون. الذى جعل لكم الارض فراشاً والسماء بناءً) قول کریمنده مذکور اولان نعم عظیمیه مقابل هر کسه طاعت مولی واجب اولدیغنی کوسرتمشدر .

۲ - « كيف تكفرون بالله وكنتم امواتاً فاحيىاكم » قول

کرمیندده احيای انسانی امتنان، و شرح نعم بی پایان معرضنده ذکر و بیان بیورمش در.

۳ — «یا بنی اسرائیل اذکروا نعمتی الی انعمت علیکم»
قول کرمینکده بوکا دلالتی ظاهر در.

۴ — «و قلیل من عبادی الشکور» قول کرمیله لسان ابلیسدن حکایه (و لا تجدد اکثرهم شاكرین) نظم جلیلی برر شاهد در که اگر نعم الهیه حاصل اولمسیدی؛ عباد اوزرینه شکر واجب اولمازدی. عبادك شکره عدم اقدام لرندن ده بر محذور لازم گلزدی. زیرا شکرک وجوبی حصول نعمتله مقید در.

فائده

۲

«اهدنا الصراط المستقیم صراط الذین انعمت علیهم» قول کریمی ابو بکر الصدیق رضی الله عنه حضرت لرینک امامتله دلالت ایدر. زیرا اولجده بیان اتمش اولدیغمز وجه ایلله بو آیت جلیله «اهدنا صراط الذین انعمت علیهم» تقدیرنده در. الله تعالی ایسه دیگر بر آیت جلیله ده مظهر انعام الهیسی اولانلرک کیملر اولدقلرینی بیان بیوروب «اولئک انعم الله علیهم من النبین والصدیقین ...» دیمش در. حضرت ابو بکرک رأس و رئیس صدیقین اولدیغنده ده اشتباه یوقدر. دیمک اولدی که شو «اهدنا الصراط» آیت جلیله سی ابو بکر الصدیق ایلله سائر صدیقینک مظهر اولدقلری

هدایتی طایفه جناب حق بزی‌ده مأمور بیورمش اولدینی معناسنی
متخنددر. حضرت ابوبکر ایسه اگر ظلمدن اولسیدی؛ آکا اقتدا
جائز اولماق لازم کلیردی.
ایشته شو ایضا حمزله ابوبکر رضی الله عنه افندمرك امامته
آیت مشارالیهانك دلالتی ثابت اولدی.

فائده

۳

(انعمت علیهم) قولی مظهر انعام خدا اولان هر کسه
شاملدر. بو نعمتدن ده مراد یا نعمت دنیا، یا نعمت دین در.
مادام که اولکیسی باطلدر، ثابت اولدی که اول نعمتدن مراد، نعمت
دین در. ایماندن بشقه هر بر نعمت دینه ایسه حصول ایمان ایله
مشروطدر. ایماندن عبارت اولان نعمتك سائر نعم دینه دن خالی
اولدینی حالده ده حصولی ممکندر. ایشته شونك امکان حصولی
دلالت ایدر که «انعمت علیهم» قولندن مراد، نعمت ایماندر.
بناءً علیه «اهدنا الصراط المستقیم صراط الذین انعمت علیهم»
قول کریمك حاصلی نعمت ایمانی طلبدر. شو اصل ثابت اولنج
دیرزکه: بو اصل اوزرینه بعض احکام تقرب ایدر.

حکم اول - مادام که شو نعمتدن مراد، نعمت ایمان اولدینی
ثابتدر، مادام که آیت جالبهك لفظی بو نعمتك منعمی جناب حق
اولدیغنه صراحة دلالت ایدیور، ایمانك خالق ده، معطیس ده
جناب حق اولدینی تبیین ایدر. بو ایسه معتزلهك فساد قولنه بر

دلیل قویدر. زیرا ایمان، اعظم نعمدر. بناءً علیه ایمانك فاعلی
اگر عبد اولسیدی؛ انعام عبد، انعام خدادن اشرف واعلی اولمق
و اول حالدہ اللہ تعالانك کندی انعامنی معرض تعظیمده ذکر
وبیان بیورمسی نابجا بولنمق لازم کلیردی.

حکم ثانی - مؤمن، ناردہ مخلد قالماق لازم کلیر. - زیرا
« انعمت علیهم » قولى نعمت ایمانی تعظیم معرضنده مذکور در.
اگر نعمت ایمان، عذاب مؤبدی دفعده بی اثر اولسیدی؛ قلیل
الفائده اولمق، بناءً علیه جناب حقمق بو انعامی معرض تعظیمده
ذکر ایتسی بجا اولماق لازم کلیردی.

حکم ثالث - بو آیت جلیله دلالت ایدرکه امر دینده اصلحه،
صلاحه رعایت جناب حق اوزرینه واجب دکلدر. زیرا ارشاد
عباد جناب رب العباد اوزرینه واجب اولسیدی؛ اوارشاد، انعام
اولماق لازم کلیردی. زیرا واجبی ادا انعام دکلدر. حال بوکه
اللہ تعالی آتی انعام تسمیه بیورمش در. ایشته بوندن بیلدک که ارشاد
عباد جناب رب العباد اوزرینه واجب دکلدر.

حکم رابع - انعام ایله مراد، « عبد مکلفنی نعمته اقدار وارشاد
ایتمش، کندینک اولبابده کی اعدار و علانی کیدرمش » دیمک اولمق
جائز دکلدر. زیرا بو احوالک کافه سی حق کفاردهده حاصلدر.
مادام که جناب حق بعض مکلفینی شو انعامه تخصیص بیوردی،
مادام که بو اقدار وازاحه علی مؤمن و کافره عام وشاملدر، بیلدک که
انعامدن مراد، انعامه اقدار، انعامدن موانعی ازاحه دکلدر.

فصل تاسع

غير المغضوب عليهم ولا الضالين

قول كريمك تفسيرى بيانده اولوب بعض فوائدى مشتملدر

فائده

۱

مشهور اولان بودر كه «مغضوب عليهم» ايله مراد يهوددر.
 «ضالين» ايله ده مراد، نصارادر.

اولاكي «من لعنه الله وغضب عليه» قول كريمى، ايكنجى يى
 «قد ضلوا من قبل و اضلوا كثيراً — و ضلوا عن سواء السبيل»
 نظم جليلى مؤيددر.
 دينلدى كه:

بوبر قول ضعيفدر. زيرا صانع تعالايى انكار، صانع تعالايه
 شريك اثبات ايدنلر البته يهود و نصارادن دين و مذهبجه اخبشدرلر.
 بناءً عليه منكر صانع و مشرك اولانلرك دين و مذهببلرندن احتراز
 اولادر. اويله ايسه اولى اولان «مغضوب عليهم» ى اعمال
 ظاهرده خطا ايدن قسقلره (ضالين) ى دخی اعتقادده خطا
 اياينلره حمل ايتمكدرك. زيرالفظ، عامدر. تقيد ايسه خلاف الاصلدر.

شویله ده دیه بیلیرز:

احتمال که «مغضوب علیهم» کفار، «ضالون» دخی منافقین اولسون.

چونکه الله تعالی سوره بقره نك اولندن بش آیت کریمه ده مؤمنلرک ذکر یله کلامه باشلایوب آنلری ثنا بیوردی. صکره مؤمنلرک ذکرینی ذکر کفار ایله تعقیب بیورمشدرکه بوده «ان الذین کفروا» قولیدر. کفارک ذکرینی ده ذکر منافقین ایله تعقیب بیورمشدرکه بوده «ومن الناس من يقول آمنا» قولیدر.

ایشته سوره فاتحه ده ده ابتدا — «العمت علیهم» قولیله مؤمنلر، ثانیاً — «غیر المغضوب علیهم» قولیله کفار، ثالثاً — «ولا الضالین» قولیله منافقین ذکر اوغوش در.

فائده

۲

مادام که جناب حق «ضالین» قولیله آنلرک کمره اولدقلرینه حکم ایلدی، آرتق بونلرک ایمان ایله اتصافلری ممتنع در. یوقسه خبر صدق الهمینک کذبہ انقلابی لازم کلیر. بوده محالدر. محاله مؤدی اولان ده محالدر.

فائده

۳

«غیر المغضوب علیهم ولا الضالین» قولى دلالت ایدر که

ملائکة و انبیا علیهم السلامدن هیچ بری « انعم الله علیهم » قولنه مخالف بر عمله، مظهر انعام خدا اولانلرک اعتقادینه مخالف بر اعتقاده اصلا اقدام ایتمامش در. زیرا ملائکة و انبیا علیهم السلام حضراتی اویله بر عملده بولنمش اولسهلردی؛ «فماذا بعد الحق الا الضلال» قول کریمی منطوقجه طریق حقدن چیقشمش اوله جقلردی. و اگر «ضالین» اولسهلردی؛ آنلره اقتدا ایله یوللرینه اهتدا جائز اولماق لازم کلیردی که اول حالده «انعمت علیهم» قولیله مشارالیه اولان زمره ابراردن خارج اولماری لازم کلیردی. مادام که بوباطلدر، شوایت کریمه دن بیلدک که انبیای عظام و ملائکة کرام علیهم السلام حضراتی معصومدرلر.

فائده

۴

غضب، شهوت انتقامدن ناشی خون دلك غلیانی حالنده حاصل اولور برتغیردر. بوا یسه معلومدر که حق باریده محالدر. لکن بوراده برقاعده کلیه وارددر. شویله که: رحمت، فرح، سرور، غضب، حیا، غیرت، مکر، خداع، تکبر، استهزا مثللو اعراض نفسانیته نك اوائلی ده، غایاتی ده وارددر.

بر مثالی عرض ایدلم:

غضبک اولی، خون دلك غلیانی در. غایتی، مغضوب علیه ایصال ضرر ایتمه مکرر.

بناءً عليه لفظ غضب، حق باریده خون دلك غلیاننه دكل،
اراده اضراره حمل اولنور.

بر مثال دها:

حيانك اولی نفسده حاصل اولان انكساردرد.
حيانك عرضی ده وازدرکه بوده فعلی تركدر.
بناءً عليه لفظ حيا - حق باریده انكسار نفسه دكل، ترك
فعله حمل اولنور.
ایشته بو حفظه شایان بر قاعده در.

فائده

۵

معترزه دیمشدرکه:

اهل معصیتك مغضوبیتلری قبائیخی اختیارلریله فاعل اولدقارینه
دلالت ایدر. یوقسه جناب حقل آنلره غضب ایتسی حقلرنده
ظلم اولمش اولور.

بزم احجابمزده دیمشدرکه:

اهل معصیتك مغضوبیتلرینی ضالین اولدقارینك ذکر یله تعقیب
بیورمسی دلالت ایدرکه مغضوبیتلری ضالالتلرینه علت وسببدر.
بوصورتده صفت خدا صفت عبسده مؤثر اولمش اولور.
ضالالتلری مغضوبیتلرینی ایجاب ایدر دینه جك اولسه، اول حالده
صفت عبده، صفت خداده مؤثر اولمق لازم کلیر. بو ایسه محالدر.

فائده

۶

سورة شريفه نك اولی - جناب حقك حمد و ثناسنی، مدحنی،
 آخری ده جناب حقہ ایمانیدن، طاعت خدایی اقراردن معرض
 اولانلرك ذم و قدحنی مشتملدر . ایشته بو دلالت ایدرکه مطلع
 خیرات، عنوان سعادات، اقبال علی اللهدر . مطلع آفات، رأس
 مخافات دخی خدادن اعراض ایله طاعت مولادن ایراق طور مق،
 خدمت حقندن اجتناب ایتمکدر .

فائده

۷

شو آیت جلیله دلالت ایدرکه مکلفین اوج فرقه در . بری -
 « انعمت علیهم » قولیله مشارالیه اولان اهل طاعتدر . دیگرى -
 « غیر المغضوب علیهم » قولیله مشارالیه اولان اهل معصیتدر .
 او چنجیسی ده - « ولا الضالین » قولیله مشارالیه اولان اهل جهل
 و کفر در .

دینیر سه که :

نیچون ذکر عصات کفره نك ذکرینه تقدیم بیورلدی ؟

دیر زکه :

زیرا هر کس کفرزدن محترزد. فقط انسان بعضاً فسقند
 احتراز اتمه‌نی ویرر. بناءً علیه اهمیتیه جهتیه عصاتک ذکره
 تقدیم بیورلدی.

فائده

۸

آیت جلیله ده بر سؤال واردر.
 شویله که:

جناب حق عیددن فعل فعیج و جنایت، صادر اوله جعنی
 بیلیدی که اوسیددن ناشی آکا غضب ایلدی. جناب حَقْ بو عملی
 ایسه یا قدیمدر؛ یا محدثدر.

احتمال اوله کوره دیمک که عبدک سلسله وجوده دخولی
 حالنده عذاب دآمدن بشقه برشی استفاده ایدمه جکنی ذات اقدسی
 بیلوردی. اوله ایسه نیچون آئی یرادوب یوقدن وار ایلدی؟
 برده غضبتک اولان ذاتک حال غضبندده عبدی ایجاد و تکوینه
 اقدامی نصل معقول اوله بیلیر؟

احتمال ثانی یه کورده جناب باری محل حوادث اولمش
 اولماز می؟

برده جناب حَقْ بو عملی علم حادث اولسه آنک احدائی
 علم دیکرک سبقنه مقتدر اوله جفندن ایش محال اولان تسلسله
 وازماز می؟

الجواب — «یفعل الله ما یشاء ویحکم ما یرید.»

فائدہ

۹

آیت جلیلہ دہ بر سؤال دہا واردہ .
شویلہ کہ :

مظہر انعام الہی اولان کیسہ نک مغضوب علیہ . ضال اولسی
ممتنع در . اولیہ ایسہ « النعمت علیہم » دیدکن صکرہ بونک عقیندہ
« غیر المغضوب علیہم ولا الضالین » ی ذکر ایتسندہ نہ فائدہ واردہ ؟
الجواب — ایمان ، آنجق یم و امید ایلہ کسب کمال ایدر . نتہ کیم
حضرت فخر کائنات افندمن (لو وزن خوف المؤمن ورجاؤدہ
لاعتدلا) بیورمش درکہ مؤمنک یم و امید ی طاریلہ جق اولسہ
ایکیسی دہ مساوی کلیر دیمکدر .

« صراط الذین النعمت علیہم » قسولی رجای کاملی ، « غیر
المغضوب علیہم ولا الضالین » قسولی دہ خوف کاملی ایجاب ایدر .
بوصورتہ ایمان ، خوف و رجادن عبارت اولان ایکی رکنک دہ
قویلشمسیلہ حد کمالہ منتهی اولور .

فائدہ

۱۰

آیت جلیلہ دہ بر سؤال دہا واردہ .
شویلہ کہ :

جناب حق مظہر انعام الہیسی اولان مقبول قوللرینی


بر طائفه - مغضوب وصال اولانلری ایکی طائفه عد و شمار
بیورمسنده حکمت نه در ؟

الجواب - علی وجه الکمال نائل نعم خدای متعال اولان
کسان، حق حق طانیوب خیری ده آنکه عمل ایچون بیلک کبی
معرفتی جمع ایدنلر درکه « انعمت علیهم » قولیه مراد بونلر در .
اگر شو تعریفده کی قید عمل مختل اولورسه - یعنی حق ده، خیری ده
طانیور ، فقط عامل خیر اولیورسه بوقیل کیسه لر « مغضوب
علیهم » اولان فاسقلر در .

« ومن یقتل مؤمناً متعمداً فجزاؤه جهنم خالداً فیها وغضب
الله علیهم ولعنه » قول کریمی بومعنائی موضحدر .

و اگر حق حق طانیق قیدی مختل اولورسه - یعنی حق
حق طانیوب ده باطله حق دیور ، یا خود بالکیسه حق انکار
ایدیورسه بوقیل کیسه لر دخی « ضالین » دینیان کمر اهلر در .

« فإذا بعد الحق الا الضلال » نظم جلیلی بومفادی معلن در .
ایشته سورة فاتحه نك آیت آیت تفصیلاً تفسیرینه دائر
کلامز بوراده نهایت بولدی . والله اعلم .



قسم ثانی

سورة فاتحه نك مجموعی تفسیر

بو باده سویله جگم سوز بر قاچ فصله منقسمدر

فصل اول

سورة فاتحه دن مستنبط اسرار عقلیه

معلوم اولماید که عالم دنیا، عالم کدورتدر. عالم آخرت، عالم صفادر. دنیایه نسبتله آخرت — فرعه نسبتله اصل، ظله نسبتله جسم کی در. بناءً علیه دنیاده هر نه وارسه لابد آنک آخرتده بر اصلی وارددر.

یوقسه دنیا و مافیها سراب باطله، خیال عاطله بکزه مک لازم کلیدی.

کذلک آخرتده نه وارسه لابد آنک دنیاده ده بر مثالی بولنور. یوقسه آخرت — ثمره سز شجره، دلیس سز مدلوله بکزه مک لازم کلیدی.

عالم روحانیات، عالم انوار ولذت و سروردر. روحانیاتک نقصان و کالده مختلف اولد قاری ده شکس زدر. اوجه تله جمله سنک اشرف و اعلاسی، اکمل و ایهاسی اولق اوزره ایچارنده بریسی

بولنق لازم کایرکه دیکرلری آنک طاعتی، امری، نهی آلتیده
بولنسون . (ذی قوۃ عند ذی العرش مکیں مطاع ثم امین) قول
کریمی بو معنای موضحدر .

کذلک دنیادهده اشخاص عالمک اشرف واعلاسی، اکمل وابهاسی
اولق اوزره بر شخصک وجودی لابد ولازمدرکه بو علمدهکی
ماسواسی آنک تحت طاعت وامرنده بولنسون .

بونلرک اولکیسی - عالم روحانیاتده، ایکنجیسی - عالم
جسمانیاتده مطاعدرکه او، عالم اعلانک، بو، عالم اسفلک مطاعی
دیمک اولور .

مادامکه عالم جسمانیات - عالم روحانیاتک ظلی، اثری کبی در،
شوایکی مطاع آره سنده ملاقات، مقارنت، محابست بولنق لازم کایر.
عالم ارواحدهکی مطاع، مصدر در، عالم اجسامدهکی مطاع، مظهر در.
مصدر، رسول ماسکی در . مظهر، رسول بشری در .

ایشته دنیا و آخرتده امر سعادات، بو ایکی مطاع امین ایله
تمام اولور .

بوراسی معلوم اولنجه دیرزکه :

رسول بشرینک کمال حالی آنجق دعوت الی اللهده ظاهر
اولور . بو دعوت سنیه دخی سورة بقره نک آخرنده واقع
(والمؤمنون کل آمن بالله - الآیة) نظم جلیانده الله تعالانک
ذکر و بیان بیوردیغی امور سبعة ایله تمام اولور .

(لا تفرق بین احد من رساله) قول کریمی احکام رسالده
مندرج اولور .

ایشته شو امور اربعه معرفت ربوبیتدن عبارت اولان معرفت
مبداء متعلقدر .

بوندن صکره معرفت عبودیته متعلق اولانی ذکر ایلدی که
اوده ایکی امر اوزرینه مبنی در .
اولکیسی - مبداء، ایکنجیسی کمال .

مبداء (وقالوا سمعنا واطعنا) قولیدر . زیرا «ذهاب الی الله» مراد
ایدن کیسه ایچون بومعناک - یعنی سمع و طاعتک - لزومی بدیهیدر .
کمال - جناب حقّه توکل ایله آکا بالکلیه التجادن عبارتدر که
(غفرانک ربنا) قولیله مراد اودر . بو، اعمال بشریه و طاعات
انسانیه دن قطع نظرایه بالکلیه اللهه التجاء، اللهدن رحمت و مغفرتی
طلب ورجا دیمکدر .

اصول اربعه مذکورده نیک بیلنسیله معرفت ربوبیت، وشوایکی
اصلک بیلنسیله ده معرفت عبودیت تمام اولور . آن صکره آرتق
حضرت ملک وهابیه ذهابدن بشقه برشی قالمازکه (والیک المصیر)
قولیله ده مراد بودر .

ایشته شو ایضاحات اینه ظاهر اولور که مراتب اوچدر :
مبداء، وسط، معاد .

معرفت مبداء - شو امور اربعه بی بیلکله کمال بولور :
معرفه الله (۱) معرفت ملائکه (۲) کتب (۳) رسل (۴)
معرفت وسط - شو ایکی امری بیلکله کمال بولور .
«سمعنا واطعنا» عالم اجسادک، «غفرانک ربنا» عالم ارواحک
نصیبی در .

معرفت نہایت - یالکز امر واحدله تمام اولورکه بوده
(والیک المصیر) قول کریمدر .

مراتبک ابتداسی درت، وسطی ایکی ایدی . نہایتی برده قرار بولدی .
ایشته معرفتده ثابت اولان شویدی مرتبه دن دعا وتضرعده
دیگر یدی مرتبه تفرع ایلدی که بو مراتبکده اولکیسی (ربنا
لا تؤاخذنا ان نسينا او اخطانا) قولیدر . نسیانک ضدی ذکردر .
(یا ایها الذین آمنوا اذکروا الله ذکرأ کثیراً - واذکر ربک اذا
نسیت - تذکروا فاذا هم مبصرون - واذکر اسم ربک) قول
کریمی بو معنای موضحدر . بو ذکر ایسه آنجق «بسم الله الرحمن
الرحیم» قولیله حاصل اولور .

ایکنجیسی (ربنا ولا تحمل علینا اصراً کما حملته علی الذین
من قبلنا) قولیدر . «بارکران» معناسی مشعر اولان اصراری
دفع ایسه حمدی موجبدر . حمد وتعظیم دخی آنجق «الحمد لله
رب العالمین» قولیله حاصل اولور .

اوچنجیسی - (ربنا ولا تحملنا مالا طاقة لنا به) قولیدر . بو
قول کریم جناب حقک کمال رحمتیه اشارتدر . کمال رحمت باری
دخی (الرحمن الرحیم) قولندن مستفاددر .

دردنجیسی - (واعف عنا) قولیدرکه «یوم دینده قضا
و حکومته مالک اولان سنسین ؛ آنکچون بزی عفوایت !»
دیمکدر . ایشته (مالک یوم الدین) قولیلهده مراد بودر .

بشنجیسی - (واغفر لنا) قولیدرکه «بز دنیاده سکا عبادت
ایلدک . کافه مهماتده طلبکار عون وعنایتک اولدق.» دیمکدر .

(اياك نعبد واياك نستعين) قولندن مراد بودر .
 آلتنجيسى - (وارحنا) قوليدركه «بز - اهدنا الصراط
 المستقيم - قولزده سندن طلب هدايت ايلدك» ديمكدر .
 يدنجيسى - (انت مولانا فانصرنا على القوم الكافرين)
 قوليدركه (غير المغضوب عليهم ولا الضالين) قوليله مراد بودر .
 ايشته سورة بقره نك آخرنده مذكور اولان شويدي مرتبه ي
 حضرت محمد عليه السلام افندمن معراجيه صعودلرنده عالم
 روحانياتده زيور زبان تقديس بيورمشاردى .

وقتاكه معراجدن نزول بيورديلر ، مصدر ك اثرى مظهرده
 فيض بخش ظهور اولدق مراتب مذكوردن «سورة فاتحه»
 ايله تعبير واقع اولدى .

ايشته شو انوار الهيه عهد سعيد حضرت رسالتپناهيد
 مصدردن مظهرده ، يعنى حضرت پيغمبره نازل اولديغي كجى شمدى ده
 سورة فاتحه ي نمازنده هر كيم اوقورسه ، انوار مذكوره مظهردن
 مصدرده صعود ايدر . بو سبيدن ناشيدركه عليه الصلاة و السلام
 افندمن (الصلاة معراج المؤمن) بيورمشدر .



فصل ثانی

مداخل شیطان

مداخل شیطان فی الاصل اوچدر .

شہوت، غضب، ہوی .

شہوت، خصلت سیمیه در . غضب، خصلت سبعیہ در . ہوی،

خصلت شیطانیہ در .

شہوت، کرچہ آفتدر ، لیکن غضب آدن بیوکدر . غضب،

بیوک آفتدر ، لیکن ہوی آدن دھا بیوکدر . بناءً علیہ (ان

الصلاة تنهى عن الفحشاء) قول کریمندن مراد، آثار شہوتدر .

(والمُنکر) قولندن مراد، آثار غضبدر . (والبغی) قولندن مراد،

آثار هوادر .

انسان — شہوت سببیله نفسنه، غضب سببیله نفسندن غیرینہ

ظلم ایدر . ہوی سببیله دہ ایتدیکی ظلم، تا حضرت جلال اللہ

وارر طیانیر . بوسیدن ناشیدرکہ علیہ الصلاة والسلام افندمن

(الظلم ثلاثة فظلم لا يغفر وظلم لا يترك وظلم عسى الله ان يتركه)

بیورمشدر .

مغفور اولیان ظلم، شرک باللہدر .

متروک اولیان ظلم، عبادک یکدیگرینہ ایتدکاری ظلمدر .

جناب حقک ترک بیورمسی قریب الاحتمال اولان ظلم دخی

انسانک کندینہ اولان ظلمدر .

مغفور اولیان ظلمك منشائی هوادر .
 متروك اولیان ظلمك منشائی غضبدر .
 جناب حقك ترك بیورمسی قریب الاحتمال اولان ظلمك
 منشائی شهوتدر .

بونارك برطاقم تیجهلری ده واردر .
 حرص و بخل — شهوتك ،
 عجب و كبر — غضبك ،
 كفر و بدعت — هوانك تیجهسیدر .

بو آلتی خصلتك اجتماعدن انسانده یدنجی برخوی تولد
 ایدرکه اوده حسددر . فصل كه شیطان . اشخاص مذمومه كاك
 آچنی ایسه خالق حسد دخی اخلاق ذمیهك نهایی در .

بوسیدن ناشی جناب حق مجامع شرور انسانیهی حسدله ختم
 بیوردی . بوختی (ومن شر حاسد اذا حسد) قولی متضمندر .
 نتهکیم مجامع خبائث شیطانیهی ده وسوسه ایله ختم بیورمشدر .
 بوختی ده (یوسوس فی صدور الناس من الجنة والناس) قولی معانددر .
 اوجهتله بنی آدمده حسددن بدتر ، حسددن شر برخوی یوقدر .
 نتهکیم شیاطین ایچنده وسواسدن اشر برشیطان اولمادیغی کی .

حتی حاسد ، ابلیسدن بیله اشردر دین اولمشدر .

زیرا مرویدرکه : برکون ابلیس ، فرعونك قپوسنه واروب
 دق باب ایلدی . فرعون « کیملر او؟ » دیدی . ابلیس « سن انهم
 دیورسین ! الله آیسک . بنم کیم اولدیغیم مجهولك اولماق لازم گلزمی؟ »
 دیهرک حضور فرعونده تمثیل ایلدی . فرعون . ابایسه صوردی که :

«عجبا یر یوزنده سندن بدنن شر بر شخص ثالث وارمیدر؟»
ابلیس دیدی که: «وار! حاسد ایگیزدن ده فنادر. حتی بن
بیله بو محنته حسد سببیله دوچار اولدم.»

ایشته بوراسی معلوم اولدقین صکره دیرز که: اخلاق
قیجه‌نک اصولی سالف الذکر شهوت، غضب، هوادر. بو اصول
ثلاثه‌نک اولاد و نتایجی ده شو ذکر ی کچن یدی خلق ذمیدر.
بناءً علیه جناب حق سورة فاتحه‌ده یدی آیت جلیله انزال
بیورمش در که شو آفات سبعه‌یی حسم ایلسون.

کذلک سورة فاتحه‌نک اصلی تسبیحدر [*] تسبیحده شو اخلاق
اصلیه فاسده‌یه مقابل اوله‌رق اسماء اللهدن اوج اسم پاک ذکر
اولتمشدر. دیمک اولدی که اسماء ثلاثه اصلیه، اخلاق ثلاثه
اصلیه‌یه، فاتحه‌نک آیات سبعه‌سی ده اخلاق سبعه‌یه مقابلدر.
رده قرآن کریمک کافه‌سی نصل فاتحه‌نک نتیجه وشعبه‌لری کبی
ایسه کذا اخلاق ذمیه‌نک کافه‌سی ذکر ی کچن اخلاق سبعه‌نک
نتائج وشعبی کبی در.

امهات ثلاثه‌نک دیگر امهات ثلاثه مقابلنده

اولدیغنک بیانی

اللهی بیلن اللهک برلکی اقرار ایدن کیسه‌دن شیطان ده
هوی ده تباعد ایدر.

زیرا (افرايت من اتخذ الهمه هواء) قول کریمی هوی،

[*] بسمله.

سوی الله براله معبود اولدیغنه دلیلدر . بونک بر دلیل دیگر ده شودر .

جناب حق موسی علیه السلامه « خالف هواك فانی ما خاقت خلقاً نازعنی فی ملكی الا الهوی » بیورمشدر .

جناب حق رحمان اولدیغنی بیان کیمسه غضب ایتمز . زیرا غضبك منشائی طلب ولایتدر .

(الملك يومئذ الحق للرحمن) قول کریمی ایسه دلیلدرکه ولایت حضرت رحمانه مخصوصدر .

رحیم اولدیغنی بیان رحیم اولمده جناب حقه تشبیه ایتمک لازم کلیر . رحیم اولان کیمسه ایسه نفسنه ظلم ایتمز . نفسنی افعال بهیمیه ایله بولاشدیرمز .

اولاد سبعة نك آیات سبع مقابلنده

اولدیغنك بیانی

شو معارضه بی بیانندن اول دیگر بر دقیقه ذکر ایدم . شویله که :

جناب حق تسمیه ده مذکور اولان اسمای ثلاثه بی [*] نفس سورده ذکر بیوردقدن بشقه آنلرله برابر ایکی اسم دیگر دها ذکر ایلدی که بونلرده (رب) و (مالك) در .

(رب) ك معناسی « رحیم » قریبدر . دلیلی ده (سلام قولاً من رب رحیم) قول کریمیدر .

[۵] الله، رحن، رحیم .

(مالك) ك مفهومی «رحمان» ه قریبدر. دلیل ده (المالك يومئذ
للرحمن) قول شریفیدر.

ایشته بوسیدن ناشیدر که جناب حق سورقر آیه نك آخرینی
«رب، ملك، اله» اسم شریفایله ختم ایلدی.

تقدير كلام

کویا بیوریلورکه :

شیطان اگر شهوت طرفندن سکا یوز کوستره جك اولورسه
«اعوذ برب الناس» دیملیسین.

اگر غضب یوزندن کورینه جك اولورسه «ملك الناس»
دیملیسین.

اگر من قبل الهوی کلیرسه «آله الناس» دیملیسین.

معارضه نك بیانی

«الحمد لله» دین الله شکر ایتمش، نعمت حاصله ایله اکتفا
ایلمش اولور. بناءً علیه او کیسه نك شهوتی زائل اولور.

جناب حقك «رب العالمین» اولدیغنی بیان دسترس اوله مدینگی شیئه
حریرص اولماز. ظفریاب اولدیغنی شیده بخل کوسترمز. آنك حرص
وبخلی زائل اولور. بناءً علیه کندیسندن شهوتك آفت ولذاتی
مندفع اولور. حقك رحمان ورحیم اولدیغنی بیلدکدن صکره
«مالك يوم الدين» اولدیننی بیان کیسه نك غضبی زائل اولور.

«اياك نعبد و اياك نستعين» دینك (اياك نعبد) ایله کبری

(ایک نستعین) ایله عجبی زائل اوله رق کنديسنندن آفت غضب
ایکی نتیجه لازمه سیله برابر مندفع اولور.
«اهدنا الصراط المستقیم» دین عابدن ده شیطان الهوی
مندفع اولور.

«صراط الذین انعمت علیهم» دینجده کنديسنندن شیطانک
کفری، شبهه سی «غیر المغضوب علیهم ولا الضالین» دیدیکی زمان
دخی شیطانک بدعتی مندفع اولور.
ایشته شو ایضاحات ایله تبیین ایتدی که شو یدی آیت جلیله
ذکر اولنان اخلاق قبیحه سبعه بی دافعدر.

فصل ثالث

سورة فاتحه نك مبدئي، وسطى، معادى بيلمده انسانك محتاج
اولديغى هر شئي جامع بولنديغى مبین در

معلوم اولسون كه « الحمد لله » قولى صانع مختارك وجودى
اثباته دلالت ايدر .

قرآن كريمده اثبات صانع باینده معتمد اولان نه در ؟
خلقت انسان ايله وجود صانعه استدلالدر .

كورمز ميسين كه ابراهيم عليه السلام بر يرده (ربى الذى
يحيى ويميت) ديكر يرده (الذى خلقنى فهو يهدين) ديدى .
موسى عليه السلام دخى بر يرده (ربنا الذى اعطى كل شئ
خلقه ثم هدى) موضع ديكردهده (ربكم ورب آبائكم الاولين)
ديدى . سورة بقره نك اولنده دخى (يا ايها الناس اعبدوا ربكم
الذى خلقكم والذين من قبلكم لعلكم تتقون) اك اول حضرت
محمد عليه السلام افندمزه نازل اولان آيت جليلهدهده (اقراء
باسم ربك الذى خلق خلق الانسان من علق) بيورلدى .

ايشته شو آتى آيت جليله نك هر برى بشقه بشقه دلالت
ايدركه حق تعالى حضرتلرى خلق انسان ايله وجود صانعه
استدلال بيورمش در . حضرت قرآنى بر نظر دقتله كوزدن
كچيرسهك استدلالك بونوعنه بك چوق تصادف ايدرسين .

معلوم اولماید که شو دلیل [۱] هم فی نفسه وجود صانع دلالته ایدر بر دلیل قطعیدر. همده کنده بر انعام عظیمدر. بناءً علیه شو حالت [۲] وجود آلهی عبده بیلیدر یکی جهتمله دلیلدر. اللهیدن عبده واصل اولمش بر نفع عظیم اولدینی جهتمله انعامدر. دیمک اوا. ی که من وجه دلیلدر. بن وجه انعامدر.

— منعم نه وقت مستحق حمد و تعظیم اولور؟

— انعامی محض انعام اولمق قصیدله ایقاع ایتدیکی وقت مستحق اولور.

— بدن انسانك حدوثی اء یولده می وقوع بولمش در؟

— اوت!

— نصل؟

— شویله: «طبیاع و صور و اشکالی مختلف اولان اعضانك متشابهة الاجزا اولان نطفه دن تولدی مجرد آنری او صور و طبیاع ارزره ایجاد اتمه نی خالق تعالی و تقدس حضرتاری قصد و اراده بیورمش اولمسندن ناشی امکان پذیر حصول اولمش در. بناءً علیه شو اعضای مختلفه نك حدوثی — معلوماتك کافه سنه — علمی لاحق، مقدوراتك کافه سنه قدرتی متعلق اولان بر صانعك وجودینه دلالته ایدر که او صانع لم یزل، محض رحمت و احسانی اثری اوله رق او اعضای مصالح مزه مطابق، منافع مزه موافق بر صورتده یاراتمه نی قصد و اراده بیورمش ده آنك ایچون وار

[۱] خلق انسان.

[۲] خلقت بشر.

اولمش در . مادامکه بو قصد و اراده ایله آنلری یارادان اودر ،
حمد و ثنایه ده مستحق اولان اودر .

« الحمد لله » قولى صانع تعالانك وجودينه، علمنه، قدرتنه،
رحمتنه، کمال حکمتنه، حمده، ثنایه، تعظیبه مستحق اولدیغنه دلالت
ایتمش اولور . آنک ایچون « الحمد لله » قولى شو معانی نك کافه سنه
دالدر . « رب العالمین » قولى دنخى آله عالمك واجد اولدیغنه،
عوالمك کافه سى مالکی بولندیغنه، عالمده آدن بشقه آله — بشقه
معبود بولمادیغنه دلالت ایدر .

« الرحمن الرحیم » او آله واحداك اولومدن اولده، صکره ده
کمال رحمت و کرمه، کمال فضل و احسان ایله موصوف اولدیغنه
دلالت ایدر . او آله واحداك لوازم حکمت و رحمتندندرکه بو
کوندن بشقه برکون حاصل اولسونده اوکونده محسن، مسیءدن
سچیلسون؛ یعنی اییلر بریکا، کوتولر بریکا آیریلهرق هر کس
جزای سزاسنی کورسون، مظلوملارک حق ظالمردن آلسون .
چونکه شو بعث و حشر، حاصل اولیه حق اولسه جناب حقاك
رحمان و رحیم اولدیغنی نره دن بیانه چکدی ؟ ایشته بو معنایه ده
(مالک يوم الدين) قولى دلالت ایدر .

بورالری معلوم اولنجه تبیین ایدرکه : « الحمد لله » قولى صانع
مختارک وجودينه، « رب العالمین » قولى وحدانیتنه، « الرحمن
الرحیم » قولى دنیا و آخرته رحمتنه، « مالک يوم الدين » قولى
دار آخرتی یاراتمسی سبیلله کمال حکمت و رحمتنه دلالت ایدر .

ایشته سورۀ کریمہ نك بورایہ قدری انسانك معرفت ربوبیتده
محتاج الیه اولدیغی شیلری شاملدر .

«ایك نعبد» قولندن سورده نك آخرینه قدری دخی تقریر
عبودیتده ییلمی الزم اولان اموره اشارتدرکه بو اموردخی ایکی
نوعه محصوردر . بری — اعمال عبد، دیگرى اعماله متفرع آثار.

اعمال عبد

اعمال عبدك ایکی رکنی واردر .

۱ — اتیان عبادتدرکه «ایك نعبد» آکا اشارتدر .

۲ — اتیان عبادت آنجق اعانة الله الیه امکان پذیر حصول
اولدیغی عبدك ییلمه سیدرکه «ایك نستعین» دخی بوکا اشارتدر .
ایشته بو مقامده جبر و قدر، مسائله دائر بر بحر بیگران
منفتح اولور .

اعمال عبده متفرع آثار

بو آثار، عبده هدایت وانکشاف و تجلی نك حصولیدرکه
«اهدنا الصراط المستقیم» آکا اشارتدر . شوراسی ده ییلملیدرکه
اهل عالم، اوچ طائفهدر .

طائفۀ اولی — کاملر، محقر، مخلصلردرکه بونلر معرفۀ الله
ایله معرفت خیر یینی جمع ایدنلردر . «انعمت علیهم» آنلره
اشارتدر .

طائفۀ ثانیه — اعتقادلری درست، فقط اعمال صالحه دن خالی
اولان فاسقلردرکه «غیر المغضوب علیهم» قولی بونلره اشارتدر .

طائفة ثالثة - اعتقادات صحیحہ دن خالی اولان اہل بدع
و کفر در کہ «ولا الضالین» قوی آنلره اشارت در.

بورالری معلوم اولنجه دیرزکہ :

نفس انسانیہی معارف و علوم ایله استکمال ایکی وجه ایله
اولور . اولکیسی - معارف و علومی فکر و نظر واستدلال ایله
استحصاله چالیشیق، ایکنجیسی - انسانه واصل اولان محصولات
مقدمین ایله تکمیل نفس ایله کدر .

ایشته «اهدنا الصراط المستقیم» قسم اوله، «صراط الذین
انعمت علیهم» قسم ثانیہ اشارت در .

برده بوقسم ثانیہ ده انسان عقائد صحیحہ و اعمال صائبہی جمع
ایدن طائفة محقه نك انوار عقولنه اقتدا ایله اهدای طالب اولمقله
برابر اعمال صالحه دن خالی اولان «مغضوب علیهم» ه، و عقائد
صحیحہ دن خالی اولان «ضالین» ه اقتدادن تبری ایتمش اولور .

ایشته سورة کریمه نك تفصیلاً تفسیری ده بوراده رسیدہ حسن
ختم اولدی .

ملخصاً بیان و ایضاح ایتدیکمز شو معنایه واقف اولانلره
ظاهر اولور کہ بوسورة ریمه معرفت ربوبیتله معرفت عبودیتده
معتبر اولان مقاماتك کافه سنی جامع در .

فصل رابع

عليه الصلاة والسلام افندمن جناب حقندن حكاية
بيورمش دركه :

« قسمت الصلاة بيني و بين عبدی نصفين فاذا قال العبد -
بسم الله الرحمن الرحيم - يقول الله تعالى ذكرني عبدی واذقال -
الحمد لله رب العالمين - يقول الله حمدي عبدی واذقال - الرحمن
الرحيم - يقول الله عظمي عبدی واذقال - مالك يوم الدين -
يقول الله مجدي عبدی - وفي رواية اخرى - فوض الى عبدی
واذاقال - اياك نعبد - يقول الله عبدی واذقال - و اياك
نستعين - يقول الله توكل على عبدی - وفي رواية اخرى -
فاذا قال - اياك نعبد و اياك نستعين - يقول الله تعالى هذا بيني
و بين عبدی واذقال - اهدنا الصراط المستقيم - يقول الله هذا
لعبدی ولعبدی ماسأل »

شو حديث شريفك فوائدی

فائده

۱

جناب حقك « صلات بنمله عېدم آره سنده ايكي به بولونمشدر »

بیومسی مدار شرایع، مصالح خلقه رعایتہ مبنی اولدیغنه دلالت
ایدر. (ان احسنتم احسنتم لانفسکم وان اساتم فلها) آیت
جلیلہ سی ده بومعنائی موضحدر.

بومعنی شو وجه ایله ایضاح اولنور.
عبده کوره اهم مهمات اولا - معرفت ربوبیتله، ثانیاً -
معرفت عبودیتله قلبی مستنیر اولمقددر.

زیرا عبد آجق بوعهده رعایت ایچون یرادلش در. نته کیم
جناب باری (وما خلقت الجن والانس الا ليعبدون - انا جعلنا
الانسان من نطفة امشاج نبثله فجعلناه سمیعاً بصیراً - یا بنی اسرائیل
اذکروا نعمتی الی انعمت علیکم وافرؤا بعهدی اوف بعهدکم)
بیورمش در.

ایشته حال بو منوال اوزره اولدیغیچوندر که الله ذو الجلال
حضرت محمد علیه السلام افندمنزه ازال بیوردیغی شو سورہ
جلیلہ نک نصف اولنی معرفت ربوبیتله، نصف ثانینسی ده معرفت
عبودیتله تخصیص بیوردی. تا که سورہ مشارالیه وفای عهده
انسانک هر محتاج اولدیغی شیئی جامع اولسون.

فائده

۲

جناب حق فاتحه یی (صلات) اسمیله تسمیه بیوردی. بو تسمیه
بعض احکامه دلالت ایدر.

حکم اول - فاتحه‌نك عدمی حالنده صلات حاصل اولماق لازم كلير. بو ايسه قرائت فاتحه، ارکان صلاتدن بر ركن اولديغنه دلائل ايدر. نته‌كیم بزم اصحابمذكده [*] رأيی بودر. بودليل بشقه بر طاقم دليلملرله‌ده متأكد اولور.

للمترجم - حضرت مفسر نمازده سورة فاتحه‌نك وجوب قرائتبه دائر دلائل شافعيه‌دن اون قدر دليلی بوراده‌ده ايراد ايتمش در. بو دلائلك چوغی باب رابعده مذکوردر. صوك.

فائده

۳

« فصل رابعده مذکور اولان حديث قدسی‌یه دائر ايضاحات »

عبد « بسم الله الرحمن الرحيم » دیديکی وقت جناب حق (ذکرنی عبدی) بیورور.

شو ذکر خدا بعض احکامی متضمندر.

۱ - قرآن مجیدده (فا - کرون) اذکرکم (بیورلمش در. « بنی ذکر ایدکرکه بنده سزی ذکر ایده‌یم » دیمکدر.

ایشته بو سببه‌مبنی درکه عبد، ذکر الهی متضمن اولان بسماء شریفه‌یی زیور زنن تقدیس ایدبجه جناب حق دخی آتی ملاء اعلاده ذکر ايدر.

[۵] اصحاب شافعی.

۲ — حدیث شریفک شو فقره جلیله سی دلالت ایدرکه مقام ذکر، عبودیتده بر مقام شریف وعالیدر. بومقامک علویت وکالنه (اذکرونی اذکرکم) قول کریمنده ذکر ایله واقع اولان امر الہی بر دلیل قاطع در. چونکہ بو امری متعاقب (یا ایها الناس اذکروا الله کثیراً — الذین یذکرون الله قیاماً وقعوداً وعلی جنوبہم — ان الذین اتقوا اذا مسهم طائف من الشیطان تذکروا فاذا هم مبصرون) بیورلمش در. ایشته کوریلورکہ جناب حق مقام ذکری تقریر وبیانده اول قدر مبالغه سیورمشدرکہ مقامات عبودیتدن هیچ بر مقامی تقریر و بیانده اوقدر مبالغه سیوردینی یوقدر.

۳ — «ذکرنی عبدی» قولی لفظه الله، ذات مخصوصه خدانک اسم علمی اولدیغنه دلالت ایدر. چونکہ لفظه مذکورہ اسمای مشتقہ دن اولسیدی، مفهومی ده بر مفهوم کلی اولمق و او حالده ده جناب حقک ذات مخصوصه معینہ سی بولفظ ایله مذکور اولماق لازم کلیردی. بسمله نک مشتمل اولدینی اسمای ثلاثہ دن «رحمان ورحیم» لفظلری ایسه معلومدرکہ مفهوم کلی متضمن ایکی لفظ اولمغله بسمله شریفه ده «ذکرنی عبدی» قولنه ماصدق اوله حق لفظه الہدن بشقه سی قالماز. ایشته بونکله ثابت اولدی کہ حدیث قدسیدہ کی (ذکرنی عبدی) قولی لفظه الہک اسم علم خدا اولدیغنه دلالت ایدر.

* *

«واذا قال — الحمد لله — يقول الله تعالى حمدنی عبدی»

حدیث قدسینک بو جملہ جلیلہ سی دہ دلالت ایدر کہ مقام
حمد، مقام ذکر دین اعلا در .

مقام حمدک علوی تہ مناسب آتہ دخی دلالت ایدر .
شویلہ کہ :

پیش از آفرینش آدم ملائکہ کرام (و نحن نسبح بحمده
و تقدس لك) دیمدیر می آیدی ؟ دیمک کہ اول آفرینش عالمہ
اك اول زیور زبان مخلوقات اولان سوز (حمد) در .
صفت اهل جنتہ (و آخر دعوانہ ان الحمد لله رب العالمین)
بیورلیدی ؟ دیمک کہ فناء عالمدن صکر دہ زیور زبان عباد اولہ حق
کلامک صوکی ینہ حمدر .

مقام حمدک علوی تہ عقل دخی دلالت ایدر .
زیرا (تفکروا فی الخلق ولا تفکروا فی الخالق) حدیث شریفی
ذات اللہدہ اعمال فکر، غیر ممکن اولدیغی مشعردر .
ذات اللہدہ اعمال فکر ممکن دکلدر . زیرا بر شیئی تصور
ایتمکسزین آندہ اعمال فکر ابدیلہ من . حقیقت حقت کهنی تصور
ایہ غیر ممکندر . بناءً علیہ ذات اللہدہ اعمال فکر غیر ممکندر .
بوکا مبنی در کہ آنحق جناب حقت افعالندہ، مخلوقاتندہ اعمال فکر
ممکن اولہ ییلیر .

برده دلیل ایلہ ثابت اولمش در کہ خیر، بالذات مطلوبدر .
شر، بالعرض مطلوبدر . بو جهتله در کہ جناب حقت مخلوقات
و مصنوعاتندہ هر کیم اعمال فکر ایدر سہ حقت رحمتہ، فضلہ،
احسانہ آنک وقوف واطلاعی اکثر اولور . بوکا وقوفی اکثر

اولان کیمسه نك حمد و شكر ايله اشتغالی ده اکثر اولور. ایشته سبب بودرکه «الحمد لله رب العالمین» بیورلدی. عبد بو جمله جمیه بی زیور زبان تقدیس ایدمجه جناب حق دخی «حمدنی عبدی» بیورر. جناب حق عبدك ترتیب عالم اعلی و اسفله عقلیله، فکر یله فضل واحسان الهیسنك وجودینه واقف اولدیغنه ولسانی عقلنه موافق و مطابق بولندیغنه شهادت ایلر. بوندن اجل و اعلی بر حالتی اولور؟

«واذا قال — الرحمن الرحیم — يقول الله عظمی عبدی.»
حدیث قدسینك بو جمله مجله سی اوزرینه بریسی چیقوب دیه بیلیر که :

عبد — بسم الله الرحمن الرحیم — دینجه الرحمن الرحیمی ذکر ایتمش اولدیغی حالده اول وقت جناب حق «عظمی عبدی» دیمدی ده فاتحه ده کی (الرحمن الرحیم) ی زیور زبان تقدیس ایدمجه «عظمی عبدی» بیوردی. بونده بر فرق وارمیدر؟
آکاده شو وجه ايله جواب ویریلیر :

«الحمد لله» قولى جناب حقك ذاتی كامل، وغیر یسنى مكمل اولدیغنى عبدك معترف اولدیغنه دلالت ایتدیكى كبی متعاقباً «رب العالمین» دینجه بو دخی ذاتنده كامل وغیر یسنى مكمل اولان آله عالم، واحددر؛ شریكى یوقدر. آندن صكره لسانی تزین ایلین «الرحمن الرحیم» قولى دخی ذاتنده كامل وغیر یسنى مكمل بولنان آله عالم شریكدن، نظیردن، مثلدن، ضددن، ندن منز اولان آله عالمك كندی عبادینه كمال رحمت و فضل و كرمی بی نهاده در

دیه دلالت ایدر . مع هذا شئت یوقدر که معنای کمال و جلالی
تصوردن عقل و فهمک . و همک ایردیکی مرتبه نیک نهایی بومقامدن
بشقه سی دکلدر . ایسته سبب بودر که جناب حق بوراده « عظمی
عبدی » بیوردی .

*
* *

«واذا قال — مالک یوم الدین — یقول الله مجدنی عبدی، ای
ترهنی و قدسنی عما لاینبئنی»

ایضاح

بز دار دنیاده ظالمربك مظلوملره مسلط، اقویانك ضعفایه
مستولی اولدقارینی مشاهده ایدیورز . عالم وزاهد کاملی، ضیق
معیشته، کافر فاسقی، یک اعلی راحت ورفاهیتده کوریورز .
بو حال ایسه ازهم الراحمین واحکم الحاکمین اولان جناب حقه
لایق وسزا دکلدر .

بناءً علیه مظلوملربك حقنی ظالمردن آلق، ال طاعنی ثوابه،
اهل کفر ومعصیتی عقابه ایصال ایتک ایچون معاد، بعث . حشر
حاصل اولیه جق اولسه دنیاده کی بو اهل وامهال، طرف حقدن
حق عبادده بر ظلم اولمش اولوردی . مادام که یوم جزاء، یوم دین
واردر . جناب حقه اسناد ظلم، واهمه سی مندفع اولور .

ایسته بو سبیدن ناشیدر که جناب باری (لیجزی الذین اسأوا
بما عملوا ولیجزی الذین احسنوا بالحسنی) بیورمش در که «مجدنی
عبدی الذی ترهنی عن الظلم وعن شیء» قولندن ده مراده بودر .

«واذا قال العبد، اياك نعبد و اياك نستعين» قال الله « هذا بيني و بين عبدی . »

ايضاح

بو جمله مجله مسئله جبر و قدره اشارت در .
 زیرا « اياك نعبد » قولك معناسی « عبدك عمل طاعت و عبادته
 اقدامندن اخبار در . بوندن صکرده جبر و قدر بجای کلیر .
 شویله که :

عبد، عمل طاعت و عبادتی آتیانده غیرك اعانه سنه محتاج
 اولیه رق مستقیدر ؟ دکلیدر ؟

طوغریسی آرانیر ه مستقل دکلدر . زیرا عبدك قدرتی فعل
 و ترکه یا صالحدر . یا غیر صالحدر . احتمال اول طوغری ایسه
 قدرت عبد، مرجحسز ترکی براقوبده فعله مصدر اولق ممتنع در .
 جانب فعلی ترجیح ایدن مرجح ایسه شبهه یوقدرکه عبد
 دکلدر . اللهدر .

قلب عبده معارضدن خالی اولان اوداعیه فعلی خلق ایتك
 اعانه دیمکدرکه « اياك نستعين » قولندن مراد بودر .

« ربنا لاترغ قلوبنا بعد اذ هديتنا » قولندن مراد بودرکه
 بونك معناسی « ای لالخالق فی قلوبنا داعیه تدعونا الى العقائد
 الباطلة و الاعمال الفاسدة » — بزى عقائد باطلهیه، اعمال فاسدهیه
 سوق و دعوت ایده جك برداعیه جازمه یی قابلرمزده خلق ایتمه !
 — « و هب لنا من لدنك رحمة » — بزى اعمال صالحهیه، عقائد
 حقهیه سوق و دعوت ایده جك برداعیه جازمه خلق ایت ! دیمکدر .

ایشته اعانه واستعانه ذن مراد بودر .
 بوکا قائل اولیان کیسه «ایک نعبد و ایک نستعین» قولنک
 معناسی نه دیمک اولدینغی آکلامیور .
 بوراسی تبین ایدنجه «هذا بینی و بین عبدی» قولنک صحت
 مالی ظاهر اولور .
 داعیه جازمه نك خلقی طرف اشرف خدادندر .
 قدرت و داعیه نك مجموعی حاصل اولنجه اثرک صدورى جانب
 عیدندر .

ایشته بو شایان تأمل بر کلام دقیقدر .

«واذا قال — اهدنا الصراط المستقیم — يقول الله تعالى هذا
 لعبدى ولعبدى ماسأل»

ایضاح

بز اهل عالمی کوریورزکه الہیات . نبوات، معاد مسائلنک
 کافه سنده کیى نفی کیى اثبات ایله دوچار کشمکش اختلافات
 اولشلردر . مسائل مجوٹ عنہاده شبہات، غالبدر . ظلمات،
 مستولیدر . اشخاص کثیردن پک آزی کنه حقہ واصل اوله بیلشدر .
 مع هذا که عقول و افکارده، بحث و مناظرده، تأمل شدیدده
 جمله سی مساویدر . دیمک اولدی که هدايت و اعانت خدا مددرس
 اولسه، نظر عقل طالبدہ حق ترین، باطلی تقیح ایتسه فرد
 واحدک بیله حقہ وصولی متمتع اولوردی . فصل که (ولکن حبيب

اليكم الايمان وزينه في قلوبكم وكره اليكم الكفر والفسوق والعصيان) بيورلمش در. «اهدنا الصراط المستقيم» قول كريمي شو حالته اشارت در.

بوکا شوده دلالت ايدرکه مبطل، باطله راضی اولماز. اوده براعتقاد حق، بر دین متین، بر قول صحیح آرامقده در. بناءً عليه اگر امر هر کسک ید اختیارنده اولسیدی؛ هیچ کیمسه نک خطاده واقع اولماسی لازم کلیردی. مادام که بز اکثر خالقک غریق بحر ضلال اولدیغنی کورییورز، بیلدک که حقه وصول آنجق هدايت خدا ايله تيسر نماي حصول اولور.

بونی تقویه ایدن شیلردن بری ده شودرکه :

ملائکة کرام وانبیای عظامک کافه سی بوبایدہ متفق الکلامدر.
ملائکة کرام (سبحانک لاعلم لنا الا ما علمتنا انک انت العليم الحکیم) دیدیلر.

آدم علیه السلام (وان لم تغفر لنا وترحمنا لنكونن من الخاسرين) دیدی.

ابراهیم علیه السلام (لئن لم یهدنی ربی لاکونن من القوم الضالین) دیدی.

یوسف علیه السلام (توفنی مسلماً والحقنی بالصالحین) دیدی.
موسی علیه السلام (رب اشرح لی صدری - الآیة) دیدی.
محمد علیه السلام اقدمن (ربنا لاترغ قلوبنا بعد اذهدیتنا وحب لنا من لدنک رحمة انک انت الوهاب) بیوردی.

شو حدیث قدسینک لطائفنه دائر اولان مقاله من بوراده

ختم بولدی. ترك ايتديكمز لطائف ايسه ذكر ايتدكلر مزدن
چوقدر.

فائده

۴

آیات فاتحه یدی در. نمازده کی اعمال محسوسه دخی یدی در.
قیام ۱ رکوع ۲ انتصاب ۳ سجود اول ۴ سجود اولده کی انتصاب
۵ سجود ثانی ۶ قعده ۷

دیمك كه عدد آیات فاتحه، شو اعمالك عددینه مساویدر.
اعمال مذکوره شخص مثابهسند. اولوب فاتحه دخی او اعمالك
روحی کی در. کمال ايسه آنجق روحك جسده اتصالیله حصول
پذیر اولور. بناءً علیه «بسم الله الرحمن الرحيم» قیامه مقابلدر.
کورمز. یسین که بسم الله ده کی با اسم الله اتصال ایدنجه قائم
ومرتفع اولدی. كذلك تسمیه بدایت امور ایچوندر. حضرت فخر
رسالت (کل امر ذی بال لا یبدأ فیہ بسم الله فهو ابتر) بیورمش در.
حضرت قرآندهده (قد افلح من تزکی و ذکر اسم ربه فصلی)
بیورلمش در.

تسمیه بدایت ایچون اولدینی کی نمازده کی قیام دخی بدایت
اعمال ایچوندر. ایشته شو وجوه دن طولانی تسمیه ایله قیام
بیننده مناسبت حاصل اولمش اولدی.

«الحمد لله رب العالمین» قول کریمی ده رکوعه مقابلدر.
شویله که:

عبد، مقام تحمیدده هم حقہ، ہمده خلقہ ناظر در. زیرا
تحمید جناب حقدن صادر اولان انعام سبیلہ جناب حقہ ثنادن
عبارتدر.

ایشته بو مقامده عبد هم منعمہ، ہمده نعمتہ ناظر در کہ بو،
اعراض ایله استغراق بیننده متوسط بر حالتدر. رکوع دخی قیام
ایله سجود بیننده بر حالت متوسطہدر. کذلک حمد، نعم کثیرہ
دلالت ایدر. نعم کثیرہ ایسه عبدک آرقہ سنی آغراشدیرہ رق
ظہری رکوعہ مخنی اولور.

«الرحمن الرحیم» قولى دخی انتصابہ مناسبدر. زیرا عبد،
رکوعده وقتاکہ اللہ تضرع ایلدی، رحمت باریہ لایق اولان
اودرکہ عبدی تکرار انتصابہ رد ایلیه.

بوسیدن ناشیدرکہ علیہ الصلاۃ والسلام اقدمن (اذا قال
العبد سمع الله لمن حمده نظر الله اليه بالرحمة) بیورمش در.

(مالک يوم الدين) قولى ده سجده اولایه مناسبدر. زیرا
«مالک يوم الدين» قولى کمال قهره، جلاله، کبریایه دلالت ایدر.
بوده خوف جدیدی موجبدر. بناء علیہ عبدہ لایق اولان کمال
خضوع و خشوع اوزره بولمقدرکہ سجده دخی بوندن عبارتدر.
«اياك نعبد و اياك نستعين» قولى ده بین السجدين اولان قعدهیه
سزاواردر.

زیرا «اياك نعبد» تقدم ایدن سجدهدن اخباردر. «اياك
نستعين» قولى ده سجده ثانیہیه دخی عبدی موفق بیورمسی ایچون
استعانه باللهدر.


«اهدنا الصراط المستقيم» قولى اهم اشياي سؤاله مخصوصدر.
 بناءً عليه كمال خضوعه دال اولان سجده ثانيه عبده سزادر.
 «صراط الذين انعمت عليهم غير المغضوب عليهم ولا الضالين»
 قول كريمي ده قعدهيه مناسبدر.

چونكه عبد، كمال تواضعله عبادتي اتيان ايدنجه جناب حق
 آنك بو تواضعنه اكرام ايله مقابله ايدر. او اكرام دنخي حضور
 عزتنده او طور منسي امر بيور مسيدر كه بو، طرف حقدن عبده
 بر انعام عظيمدر. ايشته بودده «انعمت عليهم» قولنه شديده المناسبهدر.
 كذلك حضرت محمد عليه السلامي وقتا كه جناب حق قاب
 قوسينه رفع ايتمكه مظهر انعام ايلدي، او سردهده حضرت محمد
 عليه السلام «التحيات المباركات الصلوات الطيبات لله» ديدى.
 صلات دنخي معراج مؤمندر. بناءً عليه وقتا كه عبد مؤمن كندى
 معراجنده كمال اكرامه واصل اوله رق حضور عزتده جلوس
 ايلدى، حضرت محمدك معراج سعادتلرنده ذكر ايلديكي كلماتي
 اوده ذكر ايتمك لازم كلدى. او جهته عبد دنخي قعدهده (التحيات) ي
 او قور. بو، عبده شونى تنبيه و اخطار ايدر كه كندينه حاصل
 اولان بو معراج، شمس معراج محمددن بر شعله، بحر معراج
 محمددن بر قطرددر. (يا اولئك مع الذين انعم الله عليهم من النبيين -
 الآية) قول كريمك تحقيقي ده بودر.

معلوم اولسون كه آيات فاتحه كه يدى در، شو اعمال سبعة نك
 روحى كي در. بو اعمال سبعة دنخي (ولقد خلقنا الانسان من
 سالة من طين - الى قوله - فتبارك الله احسن الخالقين) آيت

جالبه سی ناطق اولدیغی اوزره خلقت انسانده مذکور اولان اطوار
سبعه نك روحی کبی در .

ایشته بوراده اجسادكده، ارواحكده مراتبی کثیر اولدیغی
منكشف اولور . روح الارواح ونور الانوار ایسه الله تعالادر .
(وان الى ربك المنتهى) قول کریمی بو معنایی موضحدر .



فصل خامس

صلات، معراج عارفیندر

معلوم اولسون که رسول الله صلی الله علیه وسلم افندمزك معراجی ایکی در، بری - مسجد حرامدن مسجد اقصایه، دیکری - مسجد اقصادن اعالیٰ ملکوت الله قدر اولانی در.

ایشته بومعراجلرک ایکیسی ده ظاهره تعالق ایدن معراجدر. عالم ارواحه متعلق اولان معراج مصطفیٰ دخی ایکی در، بری - عالم شهادتدن عالم غیبه، دیکری - عالم غیبدن عالم غیب الغیبه قدر اولانی در.

بوروحانی معراجلر قاب قوسین منزله سنده اوله رق متلاصقه درلر. حضرت محمد علیه السلام افندمز بوروحانی معراجری ده تخطی بیوردیلر. «فکان قاب قوسین او ادنی» قول کریمیه مراد بودر.

(او ادنی) قولی حضرت محمدک مظهر سرّ فنا فی الله اولدیغنه اشارتدر.

عالم شهادتدن عالم غیبه انتقال سعادتارینه کلنجه :
معلوم اولسون که، جسم و جسمانیاته متعلق اولان شیلر عالم شهادتندر. زیرا سن جسم و جسمانیاته متعلق اولان شیلری کوزکله مشاهده ایدیورسین. بناءً علیه روحک عالم اجساددن

عالم ارواحه انتقالی عالم شهادتدن عالم غیبه سیر و سفر دیمکدر .
عالم ارواحه کلنجه : بو بر نهایتسز عالمدر .
شویلهکه :

مراتب ارواحك آخری ارواح بشریه در . مراتب مذکورہ
معارج کالات و مصادد سعادتدن تا سمای دنیایه متعلق اولان
ارواحہ وارنجیه قدر ترقی ایلر . اورادن ده ایلر یلیه رک ارواح
سمای ثانییه وارر . هکذا تا درجات کرسی سلطانی اولان ارواحہ
واصل اولنجیه قدر ترقیدن خالی قالملازکه ملائکة کرسی دخی
درجات استعلاده متفاوتدرلر . بوندن صکره مراتب ارواح دها
یوکسلیرکه بونلرده (وترى الملائكة حافین من حول العرش) آیت
جلیله سیله مشارالیههم اولان ملائکة کرامدر . صکره بر درجه
دها یوکسلیر . بو مرتبه ده کی ملائکة کرام دخی (و یحمل عرش
ربک فوقهم ثمانية) قول کریمیه مشارالیههم اولانلردر .

شو سکر عددده ایسه بر طاقم اسرار عالیہ خفیه واردرکه
اواسرار ی ذکر و بیان اتمه نک یری بوراسی دکدر . آندن صکره
دها عالی بر مرتبه یه واریلیر . بو مرتبه اجسامه تعلقدن مقدس
و مطهر اولان شول ارواحه منتهی اولورکه آنلرک طعمالری
ذکر الله، شرابلری محبة الله، انسلری ثناء علی الله، لذتلی
خدمه اللهدر .

ایشته بونلرده (ومن عنده لا یستکبرون عن عبادته) و (یسبحون
اللیل والنهار لا یفترون) آیت جلیله لریله مشارالیههم اولان ملکر
درکه بونلرکده درجاتی متفاوت، مراتبی متباعددر . عقول بشر

ایسه بونلرک احوالی احاطه دن، صفتلرینی شرح و بیان دن قاصر در.
الحاصل «و فوق کل ذی علم عالم» منظوم قنجه تا نور الانوار.
و مسبب الاسباب و مبدأ الکل و ينبوع الرحمه، و مبدأ الخیر اولان
الله تعالیه وارنجیه قدر بو ترقی و تصاعد اکیلسیز.

ایش ته تبیین ایتدی که عالم ارواح، عالم غیبر، غیب الغیب
دخی حضرت جلال ربوبیتدر. بونک ایچوندرکه فخر موجودات
افندمن (ان لله سبعین حجاباً من النور لو کشفها لاحرقت سبحات
وجهه کل ما درک البصر) بیورمش در. بو حجابلری یتش عدد
تقدیر اتمک آنجق نور نبوتله بیلنیر شیلردندر.

ایشته شواایضا حاتمزلده تبیین ایتدی که معراج ایکی یه منقسمدر.
اولکیسی — عالم شهادتن عالم غیبه، ایکنجیسی — عالم غیبن عالم
غیب الغیبه معراجدر.

بو افادتمز کلمات برهانیة یقینیة حقیقیه در. آرتق صدده
رجوع ایدلم:

حضرت محمد علیه السلام وقتا که معراج سعادتلرندن عودت
ایتمک ایستدیلر «یارب العزة! بر مسافر وطنه عودت مراد
ایدنجه اصحاب واحبابنه الحاف ایدنجه بعض محمولاته محتاج اولور.
دیدیلر. شو جوابی ده آلدیلر. «سنک امتکه کورتوره جکک هدی،
صلا تدر.»

ایضاح

صلات — معراج جسمانی ايله معراج روحانی یئنی جامعدر.
معراج جسمانی — افعال ايله در.

معراج روحانی - اذکار ایله در .

ایمدی ایها العبد! بو معراجہ شروع ایتمک ایستدیکک وقت
اولا : تطهر ایتلیسین . زیرا مقام، مقام قدس و طهارتدر . او
جهتله ثوبکده، بدنکده طاهر اولملی . چونکه سن وادی مقدس
طویده بولنیورسین .

شونیده بیلیسین که سنک یانکده بر ملک، برده شیطان واردر .
بناء علیه باق که بونلردن هانکیسنه مصاحب اولیورسین !
بر دین، بر دنیا واردر . باق که بونلردن هانکیسنه مصاحب
اولیورسین !

بر عقل، بر هوی واردر . باق که بونلردن هانکیسنه مصاحب
اولیورسین !

بر خیر، بر شر وار . بر صدق، بر کذب وار . بر حق، بر
باطل وار . بر حلم، بر طیش وار . بر قناعت، بر حرص وار .
حاصلی کافه اخلاق متضاده و صفات متغایه حقنده حال بو منوال
اوزرده . همان باق که هر ایکی طرفدن هانکیسنه مصاحب،
هانکیسنه موافقسین !

زیرا مرافقت، اساسکیر رسوخ و استحکام اولدقدن صکره
آندن مفارقت، متعذر اولور .

کورمز میسین که صدیق اکبر مصاحب حضرت پیغمبر اولنجیه،
دنیادهده، قبردهده، قیامتدهده، جنتدهده آندن آیرلماق لازم کلدی؟
بر کلب، مرافقت اصحاب کهنف شرفنه نائل اولغله دنیاده کی
آخرتدهده آنلرک ملازمت بابیله تشرف ایده جکدر . ایشته بو

سرہ مبنی درکہ جناب حق (یا ایہا الذین آمنوا اتقوا اللہ وكونوا مع الصادقین) بیوردی .

تطہر دن صکرہ الارینی یوقاری قالیر !

بو رفع یدین، عالم دنیایی عالم آخرتہ تودیعہ اشارتدر . بناءً
عالیہ نظرکی ایکسندن ده قطع ایت ! قلبکی روحکی سرکی عقابکی
فہمکی ذکرکی فکرکی اللہ توجیہ ایت !

صکرہ «اللہ اکبر» دبی ویر !

بونک معناسی شو دیمکدرکہ اللہ تعالیٰ کافہ موجوداتدن
اکبردر . اعلادر . اعظمدر . کافہ معلوماتدن اعزدر . بلکہ آکا
بر شی قیاس اولنوبده «اللہ آندن بیوکدر» دینمکندن ده اکبردر .
آندن صکرہ «سبحانک اللہم وبحمدک» دعاسنی اوقو !

بو مقامده سکا سبحات جلالک نوری تجلی ایدر . صکرہ
تسلیجندن تحمیدہ ترقی ایدر سین . صکرده «تبارک اسمک» دیر سین .
بو مقامده نورالازل والابد سکامنکشف اولور . زیرا «تبارک»
قولی افنادن ، اعدامدن منزہ اولان دوامہ اشارتدر .

بو مقام ، حقیقت ازلی — عدمده — حقیقت ابدی — بقاده
مطالعہیہ متعلقدر .

آندن صکرہ (وتعالی جددک) دبی ویر !

بودہ جناب حقک صفات جلال ونعوت کالی مقدار مذکورده
محصور اولمقندن اعلیٰ واعظم اولدیغنه اشارتدر .

آندن صکرده (لا آله غیرک) دبی ویر !

بوده كافة صفات جلال وسمات کمال، خدای متعاله مخصوص
و منحصر ایدوکنه اشارتدر .

«فهو الكامل الذي لا كامل الا هو والمقدس الذي لا مقدس
الا هو وفي الحقيقة لا هو الا هو.»

ایشته بو مقامده عقل — منقطع، لسان معتقل اولور . فهم
— تبلد ایدر . خیال — متحیر قالیر .

بوندن صکرده کندیکه، حالکه کلده (وجهت وجهی للذی
فطر السموات والارض) دئی ویر!

ایشته سنک «سبحانک اللهم وبحمدک» قولک معراج ملائکه
مقریین درکه بومعراج باهر الابتهاج (ونحن نسبح بحمدک ونقدس
لک) قول کریمنده مذکوردر .

کذلک بو معراج، معراج محمد مصطفادر . زیرا معراج محمد
علیه السلام دخی «سبحانک اللهم وبحمدک» قولیه مفتخدر .

(وجهت وجهی) قولک دخی معراج ابراهیم الخلیل علیه
السلامدو .

«ان صلاتی و نسکی و محیای و مماتی لله» قولک دخی کذلک
معراج محمد الحیبدر . علیه السلام .

ایشته شو ایکی ذکر شریفی زیور زبان تقدیس ایتدیکن
وقت اکابر ملائکه مقریینک معراجاریله عظمای انبیا و مرسلینک
معراجارینی جمع ایتمش اولورسن .

بو حالتدن فارغ اولدقدن صکرده ضرر عجی نفسکدن دفع
ایتمک ایچون «اعوذ بالله من الشیطان الرجیم» دئی ویر!

شونی ده یطلیسین که جنتک سکز قپوسی واردر .
 ایشته بو مقامده ابواب جنتدن سکا بر باب کشاده اولمش
 اولورکه بو باب دخی باب معرفتدر .
 باب ثانی - باب ذکر در که اوده « بسم الله الرحمن الرحيم »
 قولکدر .

باب ثالث - باب شکر در که اوده « الحمد لله رب العالمين » قولکدر .
 باب رابع - باب رجادر که اوده « الرحمن الرحيم » قولکدر .
 باب خامس - باب خوفدر که اوده « مالك يوم الدين » قولکدر .
 باب سادس - معرفت عبودیتله معرفت ربوبیتدن متولد
 اولان باب اخلاصدر که اوده « اياك نعبد و اياك نستعين » قولکدر .
 باب سابع - باب دعا و تضرعدر که اوده « اهـدنا الصراط
 المستقيم » قولکدر . فصل که « امن یحیی المضطر اذا دعا » -
 و - « ادعونی استجب لکم » بیورلمشدر .

باب نامن - ارواح طیبه طاهره یه اقتدا، ارواح طیبه طاهره نک
 انوار یله اهتداددر که اوده « صراط الذين انعمت علیهم غیر المغضوب
 علیهم ولا الضالین » قولکدر .

ایشته شو طریق ایله بو سورۃ کریمه نی اوقویوبده آنک
 اسرار عالیهنه واقف اولدیغک زمان جنتک ابواب ثمانیه سی سکا
 آجیایر . « جنات عدن مفتحة لهم الابواب » قول کریمندن ده مراد
 بودر . معارف ربانیه جناتک قبولری شو مقالید روحانیه ایله
 منفح اولور .

ایشته بوراسی صلاتده حاصل اولان معراج روحانی یه اشارتدر .

کلهلم معراج جسمانی به : بونک مرتبه اولاسی حضور الهیده
 اصحاب کهفک قیامی کبی قائم اولمقلغکدر . (فاذا قاموا فقالوا ربنا
 رب السموات والارض) آیت جلاله سی قیام اصحاب کهفی مبین در .
 خیر ! اصحاب کهفک قیامی کبی قائم اولمقلغک کافی دکل ، بلکه
 اهل قیامتک قیامی کبی قائم اولملایسین . (یوم یقوم الناس لرب العالمین)
 قول کریمی ده قیام اهل قیامتی مو صخدر .

صکره « سبحانک اللهم » دعاسنی او قو !

آنی متعاقب « وجهت وجهی » دعاسنی و آندن صکرده فاتحه
 شریفه یی ، فاتحه یی متعاقب قر آندن قولایکه کلن مقدار ی او قو !
 و چالش که عبادتکه معبود طرفندن نظر ایده سین . تاکه عبادتک
 نظر کده حقیر کورونسون . زنهار معبوده عبادتک جهتندن نظر
 ایتمه ! زیرا معبوده او جهتندن باقارسه ک هالکیندن اولور سین .
 ایشته « ایاک نعبد و ایاک نستعین » قولنک سری بودر .

شوراسنی بیملایسین که نفسک الآن نار خوف جلاله معروض
 اولان بر خشبه مجراسنده جاریدر . آتشی کورنج یومشایی ویردی .
 بناء علیه آنی رکوع ایله منحنی قیل ده « سمع الله لمن حمده » دبی ویر !
 صکره نفسکی براق که بر کره دها اسکی استقامتی آسون . زیرا
 بو دین بر دین متین در . دین ده رفیق ایله ایغال ایت ! عبادت
 خدای نفسکه مبعوض ایتمه ! اسکی استقامته عودت ایتدکن
 صکرده کمال تواضعله یرده منخدر اول ! ربکی کمال علو ایله ذکر
 ایت ده « سبحان ربی الاعلی » دبی ویر ! سجده ثانیه واردینک
 وقت دخی انواع طاعتدن اوچ نوع طاعت حاصل ایتمش اولور سین .

ركوع واحد ايله ايكي سجده دن عبارت اولان شو اوج نوع طاعتله عقبات ثلاثه مهلكه دن نجات بولمش اولورسين .

ركوع ايله عقبه شهواتدن ، سجود اول ايله رئيس مؤذيات اولان عقبه غضبندن ، سجود ثاني ايله كافه مهلكات ومعضلاته داعي اولان عقبه هوا دن نجات بولورسين .

شو عقباتي مجاوز ايدوبده او دركادن قوز تولديغك وقت درجات عالياته واصل ، باقيات صالحاته مالاك ، مدبر الارض والسمواتك عقبه جلاله منتهى اولورسين .

بناءً عليه اول حالده (التحيات المباركات الصلوات الطيبات لله ديني وير ! تحيات مباركات ، لسان ايله در . صلوات اركان ايله در . طيبات ، جنان وقوة ايمان ايله در .

بو مقامده نور روحك صعود ، نور روح محمدى ده نزول ايدرده ايكي روح برى برينه ملاقى اولور . اول حالده روح وراحت وريحان حصوله كبير .

بناءً عليه روح پاك حضرت محمد بر محمدت و تحيتك تقديمي الزمدر . همان « السلام عليك ايها النبي ورحمة الله وبركاته » ديمليسين . ايشته بو صرده حضرت محمد عليه السلام دخى سكا رد سلام ايدرك « السلام علينا وعلى عباد الله الصالحين » دير . برده « سن بو خيرات و بركاتنه وسيله ايله ، نه يولده نائل اوله بيلديك ؟ » ديه وارد اولان بر سؤاله جواباً « اشهد ان لا اله الا الله واشهد ان محمداً رسول الله » ديمليسين .

بو صرده « مادامكه سنى بودولت وسعادته ايرشديرن حضرت محمددر ، آكا نه هديه تقديم ايدجكسين ؟ » يولنده وارد اولان

دیگر سؤالده جواب ویروب « اللهم صل علی محمد وعلی آل محمد » دیملیسین .

صکره « سکا حضرت محمد کی بر پیغمبری بعث وارسال بیورمنی جناب حقدن ایستین (ربنا وابعث فیهم رسولاً) دین ابراهیم علیه السلامدر . آکا نه مکافات ایده جکسین ؟ » دیرلر . سن ده جواب اوله رق « کما صلیت علی ابراهیم وعلی آل ابراهیم » دیملیسین . ینه سکا سؤال اولنورکه : بو خیراتک کافه سی حضرت محمدنی ؟ ابراهیمنی ؟ جناب اللهمنی ؟

سن ده « حمید مجیدندر . » « انک حمید مجید » دیملیسین . عبد جناب حق بو ائنه ومدائح ایله ذکر ایدنجه « اذا ذکرنی عبدی فی ملائکة ذکرته فی ملائ خیر من ملائکة » حدیث قدسیسی ناطق اولدینی اوزره جناب حق دخی آنی محافل ملائکة ده ذکر ایلر . ملائکة کرام جناب حقت بو ذکرینی ایشیدنجه او عبده عرض اشتیاق ایدرلر . جناب حق دخی عبدینه خطاباً « ملائکة سماءات ، زیارتکة مشتاقدرلر . سکا یاقین اولمق ایستورلر . ایشته کلدیلر . همان سن ابتدا سلام ایله آنلری قارشیلایمیسین که بوبابده سابقین مرتبه سنی قزانه سین » بیورر . عبد دخی درحال صاغنه ضولنه باشی چویردرک « السلام علیکم ورحمة الله وبرکاته » دیر . آنکچون شبهه یوقدرکه عباد مؤمنین دخی جنته داخل اوله جقلری وقت ملائکة کرام هر طرفدن نزدلرینه کلهرک آنلره (سلام علیکم بما صبرتم فقم عقی الدار) دیرلر .

فصل سادس

کبریا و عظمتہ دائرہ

جلالت و مہابت جہتیلہ مخاوقاتک اعظمی مکان وزماندر .
 مکان - نہایتی اولیان بر فضا، غایتی بولنمان بر خلادر .
 زمان - بر امتداد متوہمدرکہ ظلمتکدہ ازلدن خروج ایلہ
 تاریکخانہ ابدہ منتهی اولور . کویا برنہر سریع الجریاندرکہ دامن
 کہسار ازلدن نبعان ایدوب قعر جبل ابدہ داخل اولنجہیہ قدر
 امتداد ایلر . نہ انفجارینک مبدئی بیلنیر ، نہ استقرارینک منزلی !
 الاول والآخر - زمانک، الظاہر والباطن - مکانک
 صفتلریدر .

بو درت صفتک کلی « الرحمن الرحیم » آیینہ سندہ کورینور .
 زیرا ظاہراً وباطناً مکانی، اولاً و آخراً زمانی احاطہ ایدن حق
 سبحانہ وتعالیٰ حضر تلریدر . مادامکہ زمان ومکانک مدبری جناب
 حقدر ، جناب حق زمان ومکاندن منزہدر .
 بوراسی معلوم اولنجہ دیرزکہ :

حق سبحانہ وتعالیٰ حضر تلرینک بر عرشی، بردہ کرسینی
 واردر . حکمت بالغہسی مکانی کرسییہ عقد ایدوب « وسع کرسیہ
 السموات والارض » بیوردی . زمانی عرشہ عقد ایدوب « وکان
 عرشہ علی الماء » بیوردی . زیرا زمانک جریانی صویک جریانہ

مشاهده در . بناء عليه كرسينك اوتنه سنده مكان، مفقود در . عرشك
وراسنده زمان، نابود در .

علو - كرسينك صفتيدر .

«وسع كرسية السموات والارض»

عظمت - عرشك صفتيدر .

«وقل حسبي الله لا اله الا هو عليه توكلت وهو رب العرش

العظيم»

علو وعظمتك كالى «ولا يؤده حفظهما وهو العلى العظيم»

مرآتنده مشاهده اولنور .

معلوم اولمايدركه علو وعظمت، درجات كالدن ايكي درجه درلر .

شوقدر كه عظمتك درجه سى علوك درجه سندن اكمل و اقوادر .

درجه كبريا ايسه بوايكي درجه نكده فوقنده در . بر حديث قدسيده

«الكبرياء ردائى والعظمة ازارى» بيورلمش در . ردانك ازاردن

اعظم اولديغنده ايسه اشتباه يوقدر . صفت جلال دخى رتبه جه،

شرفجه صفات مذكوره نك مجموعه فائقدر .

صفت جلال - ممكناتدن بر شئيه مناسبتدن جناب حقل

حقيقت مخصوصه وهويت معينه سنده تقدسندن عبارتدر كه صفت

الهيته استحقاقده مجرد او هويت مقدسه مخصوصه دن ناشيدر .

ايسته بومعنايه مبنى در كه عليه الصلاة والسلام اقدمن «الظو

بياذا الجلال والاكرام» بيورلمش در .

حضرت قرآنده ده (ويبقى وجه ربك ذو الجلال والاكرام)

و (تبارك اسم ربك ذى الجلال والاكرام) بيورلمش در .

شو اصل، معلومك اولنجہ دیرزکہ :

مصلی ادای صلاۃ قصداً بجه شول زمردن معدود اولورکه جناب حق او زمردنك صفتندہ (یریدون وجهہ) بیورمش در . بر سلطان عظیم الشانك حضورینہ داخل اولق ایستین کیمسه ایسه طبیعی درکہ کندینی ادناس و انجاسدن تطہیر ایتک لازم کلیر . بو تطہیرکده مراتبی واردر .

مرتبه اولی - دنس ذنوبدن توبہ ایلہ تطہیردر . فصل کہ جناب حق (یا ایہا الذین آمنوا توبوا الی اللہ توبۃ نصوحاً) بیورمش در . مقام زہدہ بولنان کیمسه نك طہارتی دنیانك حلال و حرامندن ؛ مقام اخلاصده بولنان کیمسه نك طہارتی کندی اعمالہ التفتادن ؛ مقام محسنین دہ بولنان کیمسه نك طہارتی کندی حسناتہ التفتادن ؛ مقام صدیقینده اولان کیمسه نك طہارتی جمیع ماسوی اللہدن واقع اولسه کرکدر .

و بالجمله مقامات طہارت چوقدر . درجاتی دہ متفاوتدر . بو مقامات و درجات طہارت بیانجی غیر متناهی کی در . فصل کہ جناب حق (فاقم وجهک للدين حنیفاً فطرة الله الی فطر الناس علیہا لا تبديل خلق الله) بیورمش در .

بناءً علیہ حقارندہ (یریدون وجهہ) دینلمش اولان زمرہ ابراردن اولق ایسترسهك ، آياغه قالحق ! نفسکدن باشلا یهرق اولای - جمله اعضای بسیطه و مرکبه کی ، جمیع قوای طبیعیه و حیوانیه و انسانیہ کی ثانیسا - بو عالم سفلیده کی معادنك ، نباتك ، حیوان

وانسانك وسائر موجوداتك انواعى بحارى، جبالى، تلالى،
مفاوزى وبونلردهكى عجائب نبات وحيوانى، ذرات هبائى، ثالثا
سدرة المنتهايه، رفرقه، لوحه، قله، جنته، ناره، كرسى به، عرشه
واصل اولنجيه قدر برر برر سماواته ترقى ايتدكدن صكره عالم
اجسامدن عالم ارواحه بالانتقال جميع ارواح ارضيه سفليه بشريه
وغير بشريه، جبال وبحاره متعلق اولان جميع ارواحى، رابعا
ملائكه سماواتى (۲) حول عرشده حافين اولان جميع ملائكه،
جميع حملاء عرش وكرسى، اورادنده (وما يعلم جنود ربك
الا هو) قول كريمى منطوقجه بو عالمك خارجندهكى علمه بالانتقال
آندهكى سائر موجوداتى پيش نظر عقل وهوشه كتير! شواقسام
روحانيات وجسمانياتى عقلكه استحضار ايتدكدن صكره نمازه
شروع ايله (الله اكبر) ديمليسين. وبو (الله) قولكه بو اشيانك
كرك وجودىنى وكرك صفات وافعالندهكى كالاتى يوقدن وهچدن
وارايدن ذات مقدسه ي مراد ايتمليسين. (اكبر) قولكه ده اودات
مقدسه نك بو اشيابه مشاهدتدن مشاكاتدن وبلكه ده بوناره مقايسه
و مناسبتك جوازينه عقل حكم ايتمكن منزله اولديغنى مراد
ايتمليسين. ايشته نمازك اولنده زيور زبان تقديس ايتديكمز (الله
اكبر) دن مراد بودر.

بو تكبيرك تفسيرنده ايكنجى بر وجه دهها وار. شويلاه كه:
عليه السلام افندمن (الاحسان ان تعبد الله كانك تراه فان لم تكن
تراه فانه يراك) بيورمش در. بناء عليه تكبير كتير ركن (الله اكبر
من ان لا يرانى ومن ان لا يسمع كلامى) ديمش كې اولورسين.

بونك او چنجى وجهى ده تكبير مذكورك (الله اكبر من ان
تصل اليه عقول الخلق و اوهامهم و افهامهم) معناسى مشعر
اولميسيدر. على بن ابى طالب كرم الله وجهه (التوحيد ان لا
تؤهمه) بيورمشدر.

وجه رابعى ده تكبير مذكورك (الله اكبر من ان يقدر الخلق
على قضاء عبوديته) معناسى مفيد اولميسيدر. واقعا (طاعات عباد)
خدمت خدادن (ثنای خالق) كبريای مولادن (علوم ناس) كنه
صمديت ذوالكبريادن قاصر در. «ايها العبد! معلومك اولسون كه،
سن عالم اجسام وارواحك كافة عجايبى عقلك احاطه ايد بيه جاك
بردرجه يه بالغ اوله بياسه ك دخى غور و منتهايه دكل، ميادين جلال
اللهك مباديسنه بيله بالغ اولديغكى صاقين ذهنكه كترمه! باق!
شاعر نه كوزل سويله مشدر.

«اسامياً تزده معرفة

و انما لذة ذكرناها»

رسول الله صلى الله عليه وسلم افندمن جناب حقه دعا و ثنا
بيوردقلى وقت (لاينالك غوص الفكر ولاينتهى اليك نظرناظر
ارتفعت عن صفة المخلوقين صفات قدرتك و علا عن ذلك كبرياء
عظمتك) بيورلردى.

اى مصلى! (الله اكبر) ديديك وقت چشم هوشكى آفاق
جلال اللهه ديك! (سبحانك اللهم وبحمدك) يى؛ صكره (وجهت
وجهى) يى اوقو! آندن صكرده عالم امر و تكليفه بالانتقال
سورة فاتحه يى كنديكه مرآت ايدينهرك عجايب دنيا و آخرتى او

مرآت لاهوتی نماده تماشا ایت ! اسمای حسنانک، صفات علیانک
 انوارینی؛ ادیان سالفه نك، مذاهب ماضیه نك، كتب الهیه نك،
 شرایع نبویه نك اسرارینی اومجلاى مجلاده مطالعه ايله كه شریعتہ،
 آذن طریقتہ، بوندن ده حقیقتہ واصل، انبیا و مرسلین علیہم
 السلام حضرتك درجاتہ، ملعونین و مردودین و ضالینك دركاتہ
 مطلع اوله سین .

همان « بسم الله الرحمن الرحيم » دیدیکك وقت دنیایی پیش
 نظر دقتہ کتیررسین . چونکہ آسمان وزمین اسم پاك رب العالمین
 ايله قائم اولمش در .

(الحمد لله رب العالمین) دیدیکك وقت آخرتی کورمش
 اولورسین . زیرا آخرت کلمه حمد ايله قائم اولمش در . نته کیم
 (و آخر دعواهم ان الحمد لله رب العالمین) بیورلمش در .

« الرحمن الرحيم » دیدیکك وقت عالم رحمت، عالم فضل
 واحسان اولان عالم جمالی کور !

« مالك يوم الدين » دیدیکك وقت، عالم جلالی و او عالمده کی
 احوال و احوالی کور !

« اياك نعبد » دیدیکك وقت — عالم شریعتی، « اياك نستعين »
 دیدیکك وقت — بونکله ده عالم طریقتی، « اهدنا الصراط المستقيم »
 دیدیکك وقت — بونکله ده حقیقتی کوررسین .

« صراط الذين انعمت عليهم » دیدیکك وقت — نبیین و صدیقین،
 شهدا و صالحیندن اولان ارباب سعادات و اصحاب کراماتك درجاتہ
 غطف نظر ایت !

« غير المغضوب عليهم » ديديك وقت — فساق اهل آفاق
مراتبی پیش نظر انتباهه کثیر !

« ولا الضالين » ديديك وقت — اهل كفر و نفاق، اهل
خزی و شقاق در کاتی کوزدن کچیر !

ایشته شواحوال عالیہ و مراتب سامیہ سکا منکشف اولدقدن
صکره ینه ظن ایتمه که غور و غایتہ ایرمشین . خیر !

همان کری دون ! جناب حق کبریانی، کندیک ذات
و مسکنتی اقراره عودت ایتده (الله اکبر) دبی ویر !

آندن صکره صفت کبریادن صفت عظمتہ اینده (سبحان ربی
العظیم) وردینی زیور زبان تعظیم ایت !

اگر صفت عظمتک بر ذررسنه واقف اوله بیلک ایسترسهک،
شوراسنی دوشون که بالاده بیان ایتدیکمز وجه ایله (عظمت)
عرشک صفتیدر . حال بوکه بر مخلوق، عالمک صوک کوننه قدر
قالسهده بیک چالشسه ینه عظمت عرشک کنهنه واردهماز . صکردهده
دوشون که عرشک عظمتی — عظمت خدا مقابلهسنده دریادن
برقطره کبی بیله دکلدرد . بوضورتده سنک کنه عظمت خدایه وصولک
نصل امکان پذیر حصول اوله بیلیر ؟

برده شو ذکر شریفده بر سر عجیب واردرد . « سبحان ربی
الاعظم » بیورلمادی . « سبحان ربی العظیم » بیورلدی . « سبحان ربی
العالی » بیورلمادی . « سبحان ربی الاعلی » بیورلدی .
ایشته شو تفاوتک بر طاقم اسرار عجیبهسی واردر که آنلرک
بوراده ذکر و بیانی جائز و مناسب دکلدرد .

رکوعه واروب «سبحان ربی العظیم» دیدکدن صکره ثانیاً
قیامه عودت ایتده سنک شو موقفکده واقف اولانلر، سنک
حمدک کبی حقه حمد ایدنلر ایچونده دعا ایدرک «سمع الله لمن
حمده» دئیویر! زیرا غیر ایچون ایده جکک دعائینه سکا راجع
اولور. (لازال الله فی عون العبد مادام العبد فی عون اخیه
المسلم) حدیث عالیشان مراد بودر.

اگر دینیرسه که: بومقامده نیچون تکبیر کتیرلیورده «سمع الله
لمن حمده» دینیلهور؟

جوابنده دیرزکه: تکبیر، مقام هیئت وخوف اولان کبریا
مأخوذدر. بومقام ایسه مقام شفاعتدرکه بونلر ایکی مقام متبایندر.
شوشفاعت مقامندن فارغ اولدیغک وقت دخی تکبیره عودت
ایدهرک صفت علوه منحد اولده «سبحان ربی الاعلی» دئیویر!
سجود، رکوعدن زیاده مشعر تواضع اولدینی ایچون سجودده
مذکور اولان ذکر، مبالغه صیغه سیله (الاعلی) رکوعده مذکور
اولان ذکر دخی من غیر بناء المبالغه (العظیم) واقع اولمشدر.
مرویدرکه:

جناب حقک تحت العرش (جرقیل) نامنده برملکی واردر.
بر وقت طرف خقدن اوچمغه مأمور اولدی. ملک اوچ کره
اوتوزر بیک سنه طیرانه دوام ایلدیسهده عرشک احد جانیننه
بیله رسیده اولمق ممکن اولهمدی. طرف خقدن آکائینه وحی
اولندی که «ایها الملك! دم نفخ صوره دکن طیرانه دوام ایتسهک،
عرشک طرف ثانیسنه واردمازسین!»

ایشته بو صروده ملك مشارالیه (سبحان ربی الاعلی) دیدی.
سجدتین ده حکمت نه در؟

بو سؤال بر قاچ وجه ایله ایضاح اولنور.

وجه اول - سجده اولی ازل، سجده ثانیه ابد، بینهماده کی
ارتفاع دخی ازل ایله ابد آرمهنده دنیانک وجودینه اشارتدر.

ایضاح

سن جناب حقیق ازلیتی عارفین؛ بیایرسین که هر شیئک اولی
اودر. زمان جهتیله آئی هیچ بر شی سبق ایتماشدر. بناءً علیه
آکا سجده ایدرسین.

ابدیتی عارفین؛ بیایرسین که هر شیئک آخری اودر. زمان
جهتیله آدن صکرده قله حق کیسه یوقدر. بناءً علیه آکا بر
دها سجده ایدرسین.

وجه ثانی - دینلیدی که سجده ایله دنیانک آخرتده فنانی
[*] سجده ثانیه ایله ده جلال الله نورینک ظهوری حالنده ده
آخرتک فنانی بیل!

وجه ثالث - سجده اولی کافه موجوداتک حد ذاتنده کی
فنانی، سجده ثانیه دخی کافه موجوداتک ابقاء الله ایله بقاسنی
مشعردر. (کل شیء هالک الاوجه)

وجه رابع - سجده اولی عالم شهادتک قدره الله، سجده
ثانیه دخی عالم ارواحک حضرت الله اقیادینه دلالت ایدر.
نصل که جناب حق (الاله الخالق والامر) بیورمشدر.

[۵] فتافی الآخرة.

وجه خامس - سجده اولی، سجده شکر در ذات وصفات
باریدن حصه مند معرفت اولد یغمز مقدارک شکرینی آنکه ادا
ایدرز. سجده ثانیه دخی سجده عجز و خوف در حقوق جلال
و کبریای خدادن ادا ایدیه مین مقدار ایچون سجده بر عجز و هراس
اولیورز.

معلوم اولسون که حقایقین اولمیان ناس، صفت عظمتدن -
جنتک بیوکلکنی، صفت علودن - جهنتک یو کسکلکنی،
بیوکلکندن ده مدتک اوزون لغنی فهم ایدر لر. حق سبحانه و تعالی
حضرتلری ایسه بو او هام باطله دن اجل واعلادر. واقعا جناب
حق عظیمدر. اما جنت سبیلله دکل؛ عالیدر. اما جهنت سبیلله
دکل؛ کبیردر. اما مدت سبیلله دکل.

ذات پاک فرودر. احددر. بناءً علیه جنت سبیلله نصل
عظیم اوله بیلیر؟ حجتیتدن منزهدر. جهنت سبیلله نصل عالی
اوله بیلیر؟ جهنتدن منزهدر. مدت سبیلله نصل کبیر اوله بیلیر؟
باخصوص مدت، ساعت بساعت متغیردر. بناءً علیه محدثدر.
آنی ایجاد ایدن ذات اجل واعلی ایسه مدتک حدوشدن اولده
موجود ایدی. بو صورته نصل اولور که مدت سبیلله کبیر
اولسون.

جناب حق مکاندن عالیدر. فقط علوی مکان سبیلله دکل.
زمانی سابقدر. فقط سبق زمان سبیلله دکل. آنک کبریای
کبریای عظمتدر. عظمتی عظمت علودر. علوی علو جلالدر.
ذات پاک خدا محسوساته مشابهندن، خیالاته مناسبتدن اجلدر.

متوهمارك توهم ايتدكاري درجه دن اكبردر . واصفارك كنديني
وصنف ايتدكارندن اعظمدر . مجيدلرك تمجيد ايتدكارندن اعلادر .
ايها العبد! حسك سكا بر مثال تصوير ايتديكي وقت (الله
اكبر) دي وير!

خيالك سكا بر صورت تعيين ايتديكي وقت «سبحانك اللهم
وبحمدك» دعاسني اوقو!

پاي طلبك ورطه تعطيله سورچديكي وقت (وجهت وجهي
للذي فطر السموات والارض) آيتي اوقو!

روحك عزت وجلال، ميدانلرنده جولانه باشلايوبده اورادن
صفات عاليا استغاي حسنايه ترقى، و سطح لوح محفوظده كي مرقومات
ومنقوشات قلى مطالعه ايدرك تسبيحات مقريني، تنزيهات ملائكة
روحانيي ايشيدوب آنده سكونت پذير اولدقده (سبحان ربك
رب العزة عما يصفون وسلام على المرسلين والحمد لله رب العالمين)
آيتي اوقو!

فصل سابع

الحمد لله قولك لطائف ايله سورة فاتحه ده مذکور اولان اسمای
نجه نك فوائدی بیاننده در

الحمد لله قولك لطائف نكت اربعة آتی ده ایضاح اولنور

نکته

۱

نبی اکرم صلی الله علیه وسلم افند مزدن مرویدرکه :
ابراهیم الخلیل، علیه السلام «یارب! سکا حمد ایدوب الحمد لله،
دیین کیمسه نك جزاسی نه در؟» دیه سؤال ایلدی . و « الحمد لله
شکرك هم فاتحه سی هم خاتمه سیدر» جوابی آلدی .

اهل تحقیق دیمشدرکه :

الحمد لله، کله سی فاتحه الشکر اولدیغندن جناب حق کلام قدیمی
آنکله افتتاح بیوردیغی کبی خاتمه الشکر اولدیغندن ده اهل جنتک
کلامنه دخی آنکله خاتمه چکهرک « و آخر دعواهم ان الحمد لله
رب العالمین» بیوردی .

حضرت علی علیه السلام افند مزدن مرویدرکه « خلق الله
العقل من نور مکنون مخزون من سبق علمه فجعل العلم نفسه

والفهم روحه والزهد رأسه والحياء عينه والحكمة لسانه والخير
سمعه والرأفة قلبه والرحمة همه والصبر بطنه ثم قيل له تكلم فقال
الحمد لله الذي ليس له ند ولا ضد ولا مثل ولا عدل الذي ذل كل
شيء لعزته فقال الرب و عزتي وجلالي ما خلقت خلقاً اعز عليّ
منك « بيوردي .

بینه منقولدرکه :

آدم عليه السلام بابامزك تنخ روح عقينده كندينه بر آقسيرق
كلوب در حال (الحمد لله) قوليله فتح دهان شكران ايلدى .
بوراسى معلومك اولنجه ديرزكه :

مخاوقاتك برنجى مرتبه سى عقل در . صوك مرتبه سى ده جناب آدمدر .
بالاده زيور صحيفه بيان ايتديكمز حديث جناب على منطوقنجه
عقلك اول كلامى (الحمد لله) اولدينى كى خاتمه محدثات اولان
حضرت آدم دخى بوكله ايله فتح دهان شكران ايلدى . بناءً عليه
جناب حق دخى بوكله طيبه ايله كتاب كريمى افتتاح ايدوب
« الحمد لله رب العالمين » بيوردى .

ايشته بوراسى ثابتدرکه كلمات اللهك اولى « الحمد لله » اولدينى
كى آخر انبياء الله دخى محمد رسول الله در . اول ايله آخر
بيننده ايسه مناسبت دركار اولمغله جناب حق « الحمد لله » قولنى
رسول اكرمى اولان حضرت محمده ازال بيوردينى كتاب
كريمندن ايلك آيتك اولى قيلدى . و بوكله نك جوهرندن مشتق
اولمق اوزره حضرت محمد عليه السلام افندمزه ايكي اسم وضع
بيوردى برى احمد ، ديكرى محمد .

رسالتپناه افندمنز دخی (انا فی السماء احمد وفی الارض محمد)
بیورمش در.

اهل سما - تحمید الله ده در. رسول الله اهل سمانك احمدی در.
الله تعالی اهل ارضك تحمیدنده در. نصل که حق تعالی (فاولئك
كان سعيهم مشكوراً) بیورمش در. رسول الله ده اهل ارضك
محمدی در.

نکته

۲

حمدك حصـولی بر نعمت و راحتہ ظفریاب اولغه منوطدر.
مادام که حمد، کلماتك اولی در، نعمت و رحمت ده افعال و احکامك
اولی اولبق لازم کلیر. بوسیدن ناشی جناب حق «سبقت رحمتی
غضبی» بیورمش در.

نکته

۳

رسول اکرم صلی الله تعالی علیه و سلم افندمنزك بر اسم
شریفلری ده احمددر. بونك معناسی «بن حامدلك احمدی یم»
یعنی اك چوق حمد ایدنلری یم» دیمکدر. بناءً علیه حضرت رسول
اکرم افندمنزك هر کسدن زیاده حصه مند نعم مولی اولمش اولسی
لازم کلیر. زیرا کثرت حمد، نعمت و رحمتك کثرتی حسیله در.
بو حالده حضرت محمد علیه السلام افندمنزك حق سعادتلرنده

مبذول اولان رحمت واسعه الہیہ، جمیع عوالم حقیقہ کی رحمت
خدادان اکثر اولق طبعی در.

ایشہ بو سیدن ناشیدر کہ حق احق رسالتناہیہ لرنده
(وما ارسلناک الا رحمة للعالمین) بیورلدی.

نکته

۴

مرسلک (کسر سین ایله) رحمتدن مشتق ایکی اسم شریفی
واردر کہ آنلرده «الرحمن الرحیم» در.

بو ایکی اسم، رحمتده مبالغہ فی مفیددر. رسولنک ده کذلک
اکی اسمی واردر کہ آنلرده محمد و احمددر. و بونلرده رحمتدن
مشتق درلر. زیرا یوقاریده ده بیان ایتشدک کہ حمدک حصولی حصول
رحمتله مشروطدر. بناءً علیہ (محمد و احمد) قولمز مرحوم و ارحم
قولمز مجرا سنده جاریدر.

بعض روایاتده کلش درکہ: حمد، حامد، محمود دخی اسمی
سامیہ حضرت رسول اللہندر. بونلرله اسمی سامیہ حضرت
رسول بش عدده موصول اولور. ایشہ شو اسمای خمسہ نک
کافہ سی رحمتہ دالدر.

بوراسی ثابت اولنجہ دیرزکہ:

جناب حق قرآن مجیدده (نبی عبادی انی انا الغفور الرحیم)

بیوردی. (نبی) قولی حضرت محمد علیہ السلام افندمزه اشارتدر.
 حضرت محمدك قبل العباد مذکور اولدینی بوندن آکلاشیلیر.
 (یا عبادی) قولنك آخرنده کی (یا) جناب اللهه عائد بر ضمیردر.
 (انی) قولنده کی (یا) دخی آکا عائددر. (الغفور الرحیم) دخی
 اللهك ایکی صفتیدر.

ایشته بونلرده بش لفظدر که بشی ده کریم ورحیم اولان
 اللهه دالدر.

رحمته دلالت ایدن بش اسم شریف ایله برابر حضرت رسول
 اولك طرفنده - كذلك رحمته دلالت ایدن اسماء اللهدن بش لفظ
 دخی آرد طرفنده بولندینی حالده عابد، يوم قیامتده قادمه
 جنبان اولور کیدر. رحمت رسول ایسه چوقدر. نصل که
 (وما ارسلناك الا رحمة للعالمین) بیورلمش در. رحمة الله دخی
 غیر متناهی در. نصل که (رحمتی وسعت کل شیء) بیورلمش در.
 رحمته مشحون اولان شواون بحر زاخر واریکن مذنبك ضیاعی
 نصل تصور اولنه یلیر؟

سورة فاتحه ده مذکور اولان اسمای خمسهنك فوائدینی

مبین نکتهلر

نکته

۱

سورة فاتحه اوزن شیئی جامعدر که بونلرك بشی صفات
 ربوبیتدن، دیگر بشی ده صفات عبدنددر.

صفات ربوبیت

الله، رب، رحمن، رحیم، مالک .

صفات عبد

عبودیت، استعانه، طلب هدایت، طلب استقامت، طلب نعمت .

ایشته شواستمای خمسہ الہیہ، بواحوال خمسہ یہ تمامیلہ منطبق اولدی . کویا (ایک نعبد، لانک انت الله، وایک نستعین، لانک انت الرب، اهدنا الصراط المستقیم لانک انت الرحمن، وارزقنا الاستقامه لانک انت الرحیم - وافض علینا سجال نعمک وکرمک لانک مالک يوم الدين) دینیلش اولدی .

نکته

۲

انسان، بش شیدن مرکبدر.

انسانک بدن (۱) نفس شیطانیہ سی (۲) نفس شہوانیہ سی (۳) نفس غضبیہ سی (۴) جوهر مایک عقیسی (۵) حق سبحانہ وتعالی اسمای خمسہ سیلہ بومراتب خمسہ یہ تجلی بیوردی .

اسم الله - روح ملکئہ عقلیہ فلیکئہ قدسیہ یہ تجلی ابتدکی آندہ روح، عرض خضوع واطاعت ایلدی . تهکیم (الابذکر الله تطمئن القلوب) بیورمش در.

اسم رب - نفس شیطانیه بر و احسان ایله تجلی ایتدی .
اوده عصیانی ترك ایله طاعت دیاته منقاد اولدی .

نفس غضبیة سبعیه اسم رحمان ایله تجلی ایتدی . بواسم
شریف ایسه قهر و لطفدن مرکبدر . نتهکیم (الملک یومئذ الحق
لرحمن) بیورمشدر . بو تجلی اوزرینه نفس غضبیه خصومتی
ترك ایلدی .

نفس شهوانیه بمیهیه اسم رحیم ایله تجلی ایتدی . بوده
مباحات و طیباتی اطلاق بیورمسندن عبارتدر . نصلکه (احل لکم
الطیبات) بیورمشدر . بو تجلی اوزرینه نفس شهوانیه دخی یومشایوب
عصیانی ترك ایلدی .

اجساد و ابدانده (مالک یوم الدین) قول کریمک قهریله
تجلی ایتدی . زیرا بدن، غلیظدر . کثیفدر . بناءً علیه قهر شدید
لابد و لازمدرکه بوده یم روز جزادن حاصل اولان قهردر .
وقتاکه حق سبحانه و تعالی حضر تلی اسمای خمسہ سیله شو
مراتب خمسہیه تجلی ایلدی ، ابواب نیران قیانی و یردی . ابواب
جنان آچیلی و یردی .

بعدازین مراتب مذکوره کلدکاری کبی رجوعه باشلا دیلر .
بور رجوعه ابدان ، اطاعت ایدوب (ایاک نعبد) دیدی .
نفوس شهوانیه اطاعت ایدوب (وایاک نستعین) علی ترك
الذات و الاعراض عن الشهوات . دیدی .
نفوس غضبیه اطاعت ایدوب (اهدنا وارشدنا و علی دینک
فثبتنا) دیدی .

نفس شیطانیہ اطاعت ایدوب اللہدن استقامت، وانحرافدن
 صیانت ایستدی ده (اهدنا الصراط المستقیم) دیدی .
 ارواح قدسیہ ملکیکه دخی تواضع کوسستروب کندیلرینی
 ارواح قدسیہ عالیہ ایصال بیورمسنی جناب حقدن طاب ایلدیلرده
 (صراط الذین انعمت علیهم غیر المغضوب علیهم ولا الضالین)
 دیدیلر .

نکته

۳

حضرت رسول اکرم صلی اللہ علیہ وسلم افندمنز (بنی الاسلام
 علی خمس شهادة ان لا اله الا الله وان محمداً رسول الله واقام
 الصلاة وایتاء الزکاة وصوم رمضان وحج البیت) بیورمشدر .
 وحدانیت خدایه شهادت، نور اسم اللہک تجلیسندن حاصلدر .
 اقامت صلات، اسم ربک تجلیسندن حاصلدر . زیرا رب، لفظی
 تربیه دن مشتقدر . ایتاء زکات دخی فقرایه رحمت ایچوندر .
 وجوب صوم رمضان - اسم رحیمک تجلیسندن حاصلدر .
 زیرا صائم آجقیدی وقت جوع فقرای تذر وخطر ایدرده
 آنلره محتاج اولدقلری شیئی اعطا ایدر . کذلک صائم آجقیدی
 وقت محسوسات ایله التذاذدن منقطع اولور . آنکچون اوله جکی
 زمان محسوساتدن مفارقتی کندینه قولای کلیر .
 وجوب حج - مالک يوم الدين، اسمک تجلیسندن حاصلدر .
 زیرا عندالحج هجرت وطن . مفارقت اهل وولد لازم کلیر . بو

حالت ایسه سفر قیامتہ بکزر. کذلک حجاج کرام یالین آیاق باش
 آچیق عریان اولور لر. ایشته بو حال دخی اهل قیامتک حاله
 بکزر. وبالجمله حج ایله احوال قیامت بیننده کی مناسبت جداً چوقدر.

نکته

۴

قبله نك انواعی بشدر:

بیت مقدس ۱ کعبه ۲ بیت معمور ۳ عرش ۴ حضرت
 جلال الله ۵

بناءً علیه فاتحه ده کی اسمای خمسہ بی قبله نك انواع خمسہ سنه
 توزیع ایلدی .

نکته

۵

حواس بشدر.

بصری (فاعتبروا یا اولی الابصار) قولیله، سمعی (الذین
 یستعملون القون فیتبعون احسنه) قولیله، ذوقی (یا ایها الرسل کلوا
 من طیبات واعملوا صالحاً) قولیله، شمی (انی لاجد ریح یوسف
 لولا ان تفقدون) قولیله، لمسی (والذین هم لفروجههم حافظون)
 قولیله تربیه ایت !

نکته

۶

معلوم اولسون که فاتحه‌نک شطر اولی استای خمسة آلهیه بی
 مشتمل اولوب بونلر اسرارہ افاضہ انوار ایدرلر . شطر ثانیسی
 دخی عبدک صفات خمسة سنی مشتمل اولوب بونلردن ده اسرار،
 انوار مذکورہ نک مصاعدینہ صعود وعروج ایلر . ایشته شوایی
 حالت سببیلہ درکہ عبد ایچون صلاتندہ معراج حاصل اولور .
 بونک اولکیسی نزول، ایکنجیسی صعوددر . بین القسمین خدمشترک
 دخی « مالک يوم الدين » ایله « ایاک نعبد » قوللاری یئیننده کی حد
 فاصلدر .

ایضاح

عبدک حاجتی یاطلب دنیاہ، یاطلب اخراہ متعلقدرکہ بونلرک
 ہر ایکسی ده ایکشر قسمہ منقسمدر . دنیاہ متعلق اولان قسمینک
 بری — دفع مضرت، دیکری جلب منفعتدر .

آخرتہ متعلق اولان قسمینک ده بری — کنلک دفع ضرردرکہ
 ناردن قاحقددر . دیکری — طلب خیردرکہ طلب جنتدن عبارتدر .
 شو درت قسمک بشنجیسی ده کہ اشرف اقسام بودر ، جناب
 حقک خدمتی، طاعتی، عبودیتی — لا لاجل رغبۃ ولا لاجل
 رهبۃ — طلبدر . شویله کہ : نور پاک اسم اللہی مشاہدہ ایتسہ کہ ده
 اللہدن سوی اللہ بر شی طاب ایتزسین . اگر نور ربی مطالعہ

ايتسهك آندن يالكز خيرات جنتي طلب ايدرسين . اكر نور
رحماني مطالعه ايتسهك آندن بو دنيانك خيراتي طلب ايدرسين .
اكر نور رحيمي مطالعه ايدرسهك ، آندن آخرتك مضرتلرندن
سني حفظ و صيانت ايمهسني طلب ايدرسين . اكر نور مالك
يوم الدين - ي مطالعه ايدرسهك عذاب آخرته دوچار اولماق
ايچون بو دنيانك آفاتندن و اعمال قبيحهدن سني صيانت ايمهسني
آندن طلب ايدرسين .

نکته

۷

شو اسمای خمسه يي (سبحان الله والحمد لله ولا اله الا الله
والله اكبر ولا حول ولا قوة الا بالله العلي العظيم) ذكر مشهورنده
مذكور اولان بش مرتبه دخی تنزیل ایتک ممکندر . شویله که :
« سبحان الله » قولى بر سورة شریفه نك فاتحه سیدر . اوده (سبحان
الذي اسرى بعبد ليلاً) کلمات مقدسه سیله باشلايان سورة اسراردر .
« الحمد لله » قولمز بش سورده نك فاتحه سیدر .


« لا اله الا الله » قولمز سورة واحده نك فاتحه سیدر . اوده
(الم ، الله لا اله الا هو) الفاظ شریفه سیله باشلايان سورة جلیله در .
« الله اكبر » قولمز قر آنده ایکی موضعه مذکوردر که برنده
ذکره - دیکرنده رضوانه مضافدر .

« ولذكر الله اكبر » موضع دیکرده « ورضوان من الله اكبر »

بیوردی .

« لا حول ولا قوة الا بالله العلی العظيم » قولمز قرآنده صریحاً
مذکور دکادر . زیرا بو قول کریم، کنوز جنتدن معدوددر .
کنز ایسه مخفی اولور . ظاهر اولماز .

ایشته سوره فاتحهده مذکور اولان اسمای خمسۀ الهیه شو
اذکار خمسۀ نک مبادیسیدر . شویله که : (الله) قولمز « سبحان الله »
قولمزک مبدئیدر . (رب) قولمز « الحمد لله » قولمزک مبدئیدر .
« الرحمن » قولمز « لا اله الا الله » قولمزک مبدئیدر . زیرا « لا اله
الا الله » قولمز آنجق کمال قدرت، کمال رحمت صاحبی اولان ذاته
لایق وسزادرکه اوده حضرت رحماندر . « الرحیم » قولمز « الله
اکبر » قولمزک مبدئیدر . معنای شریفی ده « انه اکبر من ان لا یرحم
عباده الضعفاء » دیمکدر . « مالک يوم الدين » قولمز « لا حول
ولا قوة الا بالله العلی العظيم » قولمزک مبدئیدر . زیرا ملک (۱)
و مالک اول ذات جلیل القدردرکه آنک عبادی کندی اراده
سینه سنک خلافتنه بر شی یامغه مقتدر اوله مازلر . « والله اعلم »



فصل ثامن

« بسم الله الرحمن الرحيم » كُ اسماى ثلاثيه اشتمالى مقتضى اولان
سبب بيانده اولوب بر قاج وجهى شاملدر

وجه اول

شبهه يوقدر كه جناب حق عقول خلقه تجلى ايدر . شوقدر كه
او تجلى آلهينك اوج مرتبه سى واردر .
شويله كه : جناب حق اول امرده — افعاليه ، آياتيه تجلى
ايدر . وسط امرده — صفاتيه ، آخر امرده ده ذاتيه تجلى ايلر .
دينيلدي كه :

جناب حق عامه عبادينه افعال و آياتيه تجلى ايدوب « و من
آياته الجوارى فى البحر كالاعلام — و — ان فى خلق السموات
والارض واختلاف الليل والنهار آيات » بيوردى .
اولياسنه ده صفاتيه تجلى ايدوب « يتفكرون فى خلق السموات
والارض ربنا ما خلقت هذا باطلاً » بيوردى .
اكابر انبيايه ، رؤساي ملائكه يه دخی ذاتيه تجلى ايدوب « قل
الله ثم ذرهم فى خوضهم يلعبون » بيوردى .
بوراسى معلومك اولنجه ديرزكه :
(الله) اسم پاكي تجلى زانده اقواى اسمادر . زيرا لفظده

استمائی اظهار ایدوب معناجه عقولدن ابعاد بیوردی . ظاهر
و باطن اودر . وارلغنی انکار کوچ . اسرارینی ادراک مشکلتیر !
ابرار کر آمدن حسین بن منصور حلاج شوقطعه‌ی نه کوزل
سویله مش در .

شعر


اسم مع الخلق قد تاهوا به و لهاً ليعلموا منه معنى من معانيه
والله ما وصلوا منه الى سبب حتى يكون الذي ابداء مبدیه

وله

یا سرّ سرّ یدقّ حتی یخفی علی و هم کلّ حی
فضاهراً باطناً تجلی لکلّ شیء بکلّ شیء

رحمان - اسم شریفی جناب حقّك صفات عالیہ سبلہ تجلیسنی
مفیددر . بونك ایچوندر که (قل ادعوا الله او ادعوا الرحمن ایّا
ما تدعوا فله الاستاء الحسنی) بیورمش در .

رحیم - اسم پاکی دخی جناب حقّك افعال و آیاتله تجلیسنی
مفیددر . بوسیددن ناشیدر که (ربنا وسعت کلّ شیء رحمةً و علماً)
بیورمش در .



فصل تاسع

سورة فاتحه نك اسمای خسته به اشتمالی سببی مبین در

بونك سببی شودر .

احوال خلاق مرآتیی بشدر . اولیکسی - خلق ، اینجیسی -
مصالح دنیاده تربیه ، او چنجیسی - مبدئی تعریفده تربیه ، دردنجیسی -
تعریف معادده تربیه ، بشنجیسی - ارواحی عالم اجساددن دارمعاده
نقل در .

اسم الله - خلق و ایجاد و تکوین و ابداعك منبعی در .

اسم رب - وجوه فضل و احسان ایله تربیه دلات ایدر .
اسم رحمن - معرفت مبدأده تربیه دلات ایدر .
اسم رحیم - معرفت معادده تربیه دلات ایدر . تا که عبد
اعمال ناسزادن احتراز ، اعمال لاثقهیه اقدام ایلیه .

اسم ملك - جناب حق عبادینی دار دنیادن دار جزایه نقل
ایده چکنه دلات ایدر .

ایشته عبد شو مقاماته واصل اولدقدن صکره کلام غیتدن
حضوره منتقل اوله رق (ایاک نعبد) بیورلدی . گویا دیمش اولورکه
شوبش اسم پاك ایله شوبش مرتبهده حصه ربای انتفاع اولوبده
دار جزایه قدمنه انتقال اولدیغك وقت الله ذو الجلالی کورر کی

اولورسین. همان اوصردده کندیه علی سبیل المغایبه دکل، علی سبیل
المشاهده تکلم ایت! ده (ایک نعبد وایک نستعین) دبی ویر!
عبد کویا دیمش اولورکه «ایک نعبد. لانک الله الخالق.
وایک نستعین، لانک الرب الرازق. ایک نعبد، لانک الرحمن.
وایک نستعین، لانک الرحیم. ایک نعبد، لانک المملک. ایک نستعین،
لانک المملک»


عبادتم سکا منحصردر. زیرا سن الله سین. خالق سین. استعانهم
سکا منحصردر. زیرا سن رب سین. رازق سین. عبادتم سکا منحصردر.
زیرا سن قوللرکه مبالغه ایله رحمت ایدیحیسین. رحمان سین. آجق
سندن طلب معاونت ایدرم. زیرا سن رحیم سین. عبادتم سکا
منحصردر. زیرا سن فرمانفرمای اقلیم بود ونبودسین. ملک سین.
آجق سندن طلب اعانه ایدرز. زیرا سن مالک رقاب امسین.

معلوم اولسونکه «مالک يوم الدين» قولى عبدك دار دنيان
دار آخرته، دارشورردن دارسروره منتقل اولدیغنه دلالت ایدر.
بناءً علیه عبد دیمش درکه «اوروز رستخیز ایچون البته برزاد واستعداد
لازمدر.» ایشته اوده عبادتدر. اوجهتله درکه (ایک نعبد) دیدی.
صکرده ینه عبد دیمش درکه «بن کنندی قوت وقدرتمله اکتساب
ایتدیکم زاد و ذخیره بکا او اوزون کونده کفایت ایتمز.» ایشته بونک
اوزرینه ده ربندن استعانه ایدرک دیدی که «الهی! بنم مستحجیم
اولان شی پک آزدر. بناءً علیه او اوزون کونده بکا کفایت
ایده جک مقداری سن خزائن رحمتکن احسان و اعطا ایله!»
نیازیله دهنکشای تضرع اوله رق (ایک نستعین) دیدی.

وقتا که يوم معاد همچون اولدیغی زاد حاصل اولدی ،
 دوشوندی که « بو بر اوزون مشقتلی سفردر . یوللر ایسه متعدد
 ومنشعبدر . خلق بو بادیة وحشتزارده کمکرده راه اولیور .
 بونک بشقه یولی یوق ! مکر سالکری ارشاده حقیق واحری
 اولان ذات اقدس واعلادن یولی صورهم . او بکا ارائه راه صواب
 ایتسون ! » ایشته بوملاحظه عاقبت اندیشانه اوزرینه « اهدنا
 الصراط المستقیم » دیدی .

برده رهیمای سفر بعید اولان کیمسه بر رفیقه بر بدرقه یه
 بر دلیله محتاجدر . بوجهتله ده (صراط الذین انعمت علیهم) دیدی .
 مظهر انعام الهمی اولانلر ایسه نبیین و صدیقین ، شهدا و صالحیندر .
 دیمک اولدی که بو اوزون یولک دلیللری انیدادر . بدرقه لری
 صدیقیندر . رفیق لری شهدا و صالحیندر .

یوننی متعاقب « غیر المغضوب علیهم ولا الضالین » دیدی .
 چونکه الله ایله قول آره سنده حجابلر ایکیه منقسمدر . بری حجب
 ناریه در که بو عالم دنیادن کنایه در . دیکری حجب نوریه در که اوده
 عالم ارواحدر . بیناء علیه نه حجب نازیه ، نه ده حجب نوریه ایله
 مشغول السرّ قالماملغک همچون شو ایکی شیدن عصمت خدایه
 یاپش !



فصل عاشر

بوسورۂ کریمہ دہ ایکی کلمہ وارد رکہ بونلر اسم اللہ مضافدرلر.
ایکی اسم دہ وارد رکہ بونلر دہ غیر اللہ مضافدرلر.
اسم اللہ مضاف اولان کلمتین دن بری - بسم اللہ [*]
دیگری - الحمد لله، در.

بسم الله، بدایت امور ایچوندر.
الحمد لله، خواتیم امور ایچوندر.
بسم الله، ذکر در.
الحمد لله، شکر در.

عبد «بسم الله» دینجه مرحمت خدای اکبره «الحمد لله»
دینجه ده رحمت دیگره کسب استحقاق ایدر.
دیمک که «بسم الله» قولیله اسم رحماندن - «الحمد لله»
قولیله ده اسم رحیمدن مستحق رحمت اولور.
ایشته جناب حقہ «یارحمن الدنيا ورحیم الآخرة» دینلسی
بو معنایه منی در.

«رب العالمین الرحمن الرحیم مالک يوم الدين» قول کریمه
کلنجه: دیرزکه:

ربوبیت، عبادک بدایت حاللریچوندر.
«الست بربکم قالوا بلی» بوکا دلیلدر.
صفت رحمان، وسط حاللریچوندر.
صفت ملک، نهایت حاللریچوندر.

[*] عند الشافعی بسمله آیات فاتحه دن معدوددر.

«لمن الملك اليوم لله الواحد القهار» بوكا دليدر .
«والله اعلم بالصواب، وهو الهادى الى الرشاد»

تم تفسير سورة الفاتحة بحمد الله وعونه .

يقول المترجم الحقير البائس الفقير «الحمد لله الذى هداانا لهذا
وما كنا لنهتدى لولا ان هداانا الله» و صلى الله على اشرف جميع
الانبياء والمرساين وعلى آله وصحبه الطيبين الطاهرين ورحمة الله
على كافة العلماء المحققين وغفر الله لى ولو الذى ولمن على حرقاً
واجعل اللهم هذا سبباً لغفرانك ورضوانك ووسيلة الى دخول
جنانك بفضلك واحسانك يا ارحم الراحمين ويا اكرم الاكرمين
مع الذين انعمت عليهم غير المغضوب عليهم ولا الضالين آمين .
وكان ختامه فى اليوم الثانى والعشرين من شهر ربيع الاول
شهر مولد النبي المحترم صلى الله عليه وسلم لسنة ثلاث وثلاثمئة
والف من هجرة من له العز والشرف ببلدة انقره صانها الله
عن الآفة وادامها فى يد الخليفة سيدنا ومولانا السلطان الاعظم
والخاقان المعظم مولى ملوك العرب والجم خدام الحرمين المحترمين
وسلطان البرين والبحرين السلطان بن السلطان السلطان الغازى
(عبد الحميد خان) الثانى طول الله عمره واقاض على العالمين بره
بحرمة سيد الانبياء والمرسلين آمين .

فى ١٧ كانون اول سنة ١٢٦٤

سر قرآنك دردنجی جزئك فهرسی

صحیفه

۳	سورة فاتحه ایله سورة فاتحه نك استملری بیانندهدر
۳	اسم اول - فاتحه الكتاب بیانندهدر
۴	اسم ثانی - سورة الحمد بیانندهدر
۴	اسم ثالث - ام القرآن بیانندهدر
۱۰	اسم رابع - سبع المثانی بیانندهدر
۱۲	اسم خامس - وافیہ بیانندهدر
۱۲	اسم سادس - کافیہ بیانندهدر
۱۳	اسم سابع - اساس بیانندهدر
۱۳	اسم ثامن - شفا بیانندهدر
۱۴	اسم تاسع - صلات بیانندهدر
۱۵	اسم عاشر - سؤال بیانندهدر
۱۵	اسم حادی عشر - سورة الشکر بیانندهدر
۱۶	اسم ثانی عشر - سورة الدعاء بیانندهدر
۱۷	باب ثانی - سورة فاتحه نك فضائلی بیانندهدر
۲۴	باب ثالث - سورة فاتحه نك مستنبط اسرار عقلیه بیانندهدر
۴۹	باب رابع - سورة فاتحه نك مستنبط مسائل فقهیه بیانندهدر
۶۹	سورة فاتحه نك عدد آتای بیانندهدر

صحیفه

- ۸۲ تقاریر تسمیه بیاننده در
- ۹۷ بشنجه باب - سورة فاتحه نك تفسيری بیاننده در
- ۹۷ فصل اول - الحمد لله - قول شریفك تفسيری بیاننده در
- ۱۲۵ فصل ثانی - رب العالمین قول کریمك تفسيری بیاننده در
- ۱۲۶ قسم اول - متحیز بیاننده در
- ۱۲۷ قسم ثانی - متحیزاتك صفی اولان ممکن بیاننده در
- ۱۳۷ فصل ثالث - الرحمن الرحیم آیت جلیله سنك تفسيری
بیاننده در
- ۱۴۸ فصل رابع - مالک يوم الدين قول کریمك تفسيری
بیاننده در
- ۱۵۶ فصل خامس - ایاك نعبد و ایاك نستعین قول کریمك
تفسيری بیاننده در
- ۱۸۴ فصل سادس - ایاك نستعین بیاننده در
- ۱۸۹ فصل سابع - اهدنا الصراط المستقیم قول کریمك
تفسيری بیاننده در
- ۱۹۸ فصل ثامن - صراط الذين انعمت عليهم قول کریمك
تفسيری بیاننده در
- ۲۰۶ فصل تاسع - غیر المغضوب علیهم ولا الضالین قول
کریمك تفسيری بیاننده در
- ۲۱۴ قسم ثانی - سورة فاتحه نك مجموعی تفسير بیاننده در
- ۲۱۴ فصل اول - سورة فاتحه دن مستنبط اسرار عقلیه بیاننده در

صمیمه

۲۱۹ فصل ثانی - مداخل شیطان بیاندهدر

۲۲۵ فصل ثالث - سورۃ فاتحه نك مبدئى، وسطى، معادى

بیله ده انسانك محتاج اولدینی هر شیئی جامع بولندیغنی

مبین در

۲۳۰ فصل رابع - حدیث شریفك فوائدى بیاندهدر

۲۶۵ فصل سابع - الحمد لله قولنك لطائف ايله سورۃ فاتحه ده

مذكور اولان اسمای خمسہ نك فوائدى بیاندهدر

۲۷۷ فصل ثامن - «بسم الله الرحمن الرحيم» ك اسمای ثلاثیه

اشتمالنى مقتضى اولان سبب بیاندهدر

۲۷۹ فصل تاسع - سورۃ فاتحه نك اسمای خمسہ به اشتمالى

بیاندهدر




سرقرآن — جزء ثالث

صواب	خطا	سطر	صحیفه
دینیش در	دینیش اولور	۵	۴
سورہ کریمہ	سورہ قدیمہ	۵	۹
آیناک	آینا	۴	۱۹
مرویدر	مرویدردہ	۸	۲۰
فرقی	خرقی	۵	۶۳
روایت نفی	روایت نص	۲۰	۶۶
الایۃ	الایات	۴	۱۳۳
لیجزی	لیجزی	۸	۱۴۸
تغریق	تفریق	۲۰	۱۶۰
حالدہ	حاہ	۲۲	۱۶۵
ثابیدن	ثابتدن	۱۸	۱۷۴
اعرابی	عرابی	۲۰	۱۷۴
جداً	جزا	۲۱	۱۷۶
بر داعیہ	بر ادعیہ	۱۸	۱۸۴
بشقہ	بشقہ	۲۰	۱۸۷
علمی	عملی	۸	۲۱۱
علمی	عملی	۱۷	۲۱۱
کریمہ	ریمہ	۱۷	۲۲۹
اہل	ال	۱۳	۲۳۶
و	دیدہ کہ	۱۹	۲۸۰
او چنبی	دردنبی	۱	۲۸۴









3 1761 07066007 1